

Aalisarneq pillugu inatsisisatut siunnersuummut nassuaatit

Nassuaatit nalinginnaasut

1. Aallaqqasiut

Aalisarneq pillugu inatsisisamut siunnersuutip ineriartortinnera sivisusinnaavoq. Inatsisip annertuumik kingullermik allannguutaa 1996-imi atulersinneqarpoq, kingornalu annertuumik oqallisigineqartarsimalluni. 2009-imi ataatsimiititaliarsuaq isumaliutissiisummik tunniussivoq, 2017-imi inatsisisatut siunnersuut Inatsisartunut saqqummiunneqarpoq, taamaattorli utertinneqarluni, februar 2019-milu ataatsimiititaliarsuarmik nutaamik pilersitsisoqarluni, september 2021-mi isumaliutissiisumminik saqqummiussisoq.

Aalisarneq pillugu inatsisisatut siunnersuut ataatsimiititaliarsuup isumaliutissiissutaa aamma Aalisarnermut Piniarnermullu Naalakkersuisup, Inatsisartuni partiit, soqutigisaqtigiinnilu kattuffit innuttaasullu akornanni oqaloqatigiinnerit tunngavigalugit suliarineqarpoq.

Siunnersuut imarisamigut tunngaviit uku malippai:

- Aalisakkanik pisuussutit inuiaqatigiit pigisaraat
- Uumassusilinnik piujuartitsineq
- Aningaasaqarnikkut piujuartitsineq
- Inuuniarnikkut attanneqarsinnaasumik ingerlatsineq
- ingerlatsivimmi sunniuteqarluni akuliutinnginnissaq
- Paasisutissanik katersineq ingerlatsivimmilu ammasumik pissuseqarneq

Inuiaqatigiit kalaallit aalisarneq pinngitsoorsinnaanngilaat, aningaasarsiornikkut suliffeqarnikkullu kulturikkullu. Taamaalilluni aalisarnermiit akitsuutit 480 mio. kr.-inik 2022-mi amerlassuseqarput, ukiunilu kingullermi 2.500-it aamma 3.000-it akornanni sulisuniit akissarsiat 1,6 mia. kr.-inik amerlassuseqarmata isertitat nalinginnaasumik kaaviiartitanut annertuumik sunniuteqarsimapput, soorlu aamma kommunit nunattalu karsiata aalisarnermiit akileraarutitigut isertitaat nunami atugarissaarnermut annertoorujussuarmik iluaqutaasimallutik.

Aalisarnerup pingaaruteqarnera inatsisisatut siunnersuummi arlalitsigut takussutissaqarpoq.

Taamaalilluni Naalakkersuisut isumaat tassaalluni pisuussutit taamatut innuttaasunut pingaaruteqartigisut inunnut imaluunniit ingerlatseqatigiiffinnut ataavartussamik tunniunneqartariaqanngitsut. Siunnersuummi siunertatut aalajangersakkami takuneqarsinnaasutut piffissami aalisarnermi ingerlatsisunit iluaqutissatut atugassanngortinneqarput.

Tulliatut Naalakkersuisunut pingaaruteqarsimalluni aalisarnerup sapinngisamik siunissami ungasinnerusumi inuiaqatigiit aningasaqarnerannut inatsit iluaqutaassasoq.

Anguniakkap taassuma anguneqarnissaanut tunngavik siulleq tassaavoq isumalluutit uumassuseqarnikkut piujuartinneqarsinnaanerat, taamaalilluni aalisagaqatigiinni ataatsini aalisarneq aalisagaqatigiit kinguaassiorsinnaanerat qaangerlugu ingerlanneqarnani. Paarlattuanik pisuussutinik iluaquteqarnissamut periarfissaqarneq aalisapilunneq naapertorlugu annikilliartussalluni. Taamaattumik peqassutsinut pingaaruteqartunut tamanut aqtsinissamut pilersaarutinik pilersitsisoqassaaq, pilersaarutini taakkunani uumassuseqarnikkut piujuartitsinissaq pingaaruteqartutut ilaassalluni.

Tunngaviusup aappaa tassaavoq iluaquteqarnerup sapinngisamik aningaasarsiornikkut annertunerpaamik iluaqutaanissaa. Naalakkersuisut isumaqarput pisassiissutinik niuerutigineqarsinnaasunik nammineq pigisanik (PNNP) aalisarneq tunngavimmik tassanga pitsaanerpaamik naammassinnittooq. "Paggatassiilluni aalisarneq" siunissami, tassa imaappoq aalisagaqatigiinni ataasiakkaani aalisarneq naammattumik patajaallippat, PNNP-mik taarserneqartariaqarpoq. Tamanna aamma inatsisip atulersinneratigut aamma raajarniarnermut, qaleralinniarnermut saattuarniarnermullu taamaassaaq, kisianni tassani piumasaqaatit naammassineqarpata aalisagaqatigiinni allani aaqqissuussinermik Naalakkersuisut eqquassisinnaassallutik. Aalisarnerit aalajangersimasut siunissami qanittumi aaqqissuussinermiit aamma ilaatinneqassanngillat. Tassunga atatillugu oqaatigineqassaaq PNNP-mik aaqqissuussineq umiatsiaarorsorluni qaleralinniarneq eqqarsaatigalugu kajumissuseq tunngavigalugu eqqunneqassasoq siunnersuutigineqarmat.

Aalisarnermik aqutsinerup manna tikillugu kingunerisimavaa aalisagaqatigiinni ataatsini aqutsinerup iluani aqutseriaatsit assiginngitsut atorneqarsimallutik. Taamaalilluni Kalaallit Nunaata Kitaani raajarniarneq sinerissamut qanittumi aalisarnermik aqusisoqarluni avataasiortunut atuuttumit allaaneruvoq. Pissutsit taamaannerat siullermik oqaluttuarisaanermik tunngaveqarpoq. Naalakkersuisut isumaat tassaavoq piujuartitsisumik tunngaveqartumik sapinngisamik siunissami ungasinnerusumi inuiaqatigiinnut annertunerpaamik iluaqutaanissaat anguniarlugu pitsaanermik tunngaveqarnissamut siunissami aqutsinissamut oqaluttuarisaanermi pissutsit akornusiissanngitsut.

Tamanna tunngavigalugu inatsisisstatut siunnersummut ilaavoq aalisagaqatigiinni ataatsini aqutseriaatsinut arlalinnut agguarsimanerit atorunnaarsinneqassasut, taamaalilluni TAC tamarmiusoq pitsaanerpaamik iluaqutigineqarluni. Tassunga atatilluguli oqaatigineqassaaq agguarsimaneq allangortinneqanngimmat imatut paasillugu maannakkut avataasiutit suli annertunerusumik eqiterutinnginnissaat qulakkeerneqassammat. Tassani aamma sinerissamut qanittumi aalisarnermut angallatit angisut periarfissaqarnerannik killilersuinerit ilanngunneqassammata.

Peqatigisaanik Naalakkersuisut kissaatigaat aalisarnermi piginnittut eqiterussimanerat killeqartinneqassasoq. Eqiterussimanerup kingunerisimavaa pisuussutinit iluanaarutit, aalisarnerup ilaani namminersortunit pigineqartut ilaanni annertuujusut, allanut naleqqiullugu inunnit ikittuinnarnit naggataatigut pissarsiarineqarluni. (Pisuussutinit iluanaarutini paasineqarpoq, aningaasartuutit akilereernerisigut ingerlataqartullu ileqqusumik iluanaarutissanik pissarsereernerisigut aalisarnermi sinneqartooraasut.) Tamanna inuiaqatigiinni kalaallini naligiinnginnermut tapertaasimavoq, Naalakkersuisunullu pingaaruteqarsimalluni naligiinnginnerup taassuma pinngitsoortinnissaanut suliniutit aallartinneqassasut. Tassungali atatillugu Naalakkersuisut arajutsisimangilaat suliniutit taamatut ittut pisuussutinit iluanaarutinut ajortumik sunniuteqannginnissaat, tassa allanneqartutut nunami atugarissaarnermut pinngitsoorneqarsinnaanngitsutut iluaqutaammata.

Aalisarnerni pissarsilluarnerpaaffiusuni pisuussutinit iluanaarutinik agguassinerup allanngortinnissaanut pissutissaqartitsisoqarpoq, taamaalilluni annertunerusut inuiaqatigiinnut tutsinneqarlutik - allatigut atukkat taamaalilluni pisuussutinit iluanaarutinit tamarmiusut taamaaliornikkut ajornerulersinnagit. Allatut oqaatigalugu: Maannakkut aalisarnerni taakkunani atuuttuni tunngavagineqartuni akitsuutit qaffasissusiat annertusineqarsinnaavvoq.

Pingarnertut anguniagaasimavoq inuussutissarsiutitsinni pingaaruteqartumik aqtsineq ammasumik pissasoq aamma patajaatsumik ilisimasatigut tunngavinnik tunngaveqassasoq. Taamaattumik aqtsinermi, nakkutilliinermi, misissuineri ilisimatusarnermilu siunertani atugassanik paassisutissanik pisariaqartunik katersisoqassaaq, paassisutissallu katersorneqartut, tamanna ingerlatsinermut imaluunniit allatigut illersorneqartariaqartunik eqqarsaatigisassanut akerliunngippat, tamanut saqqummiunneqassallutik.

Maannakkut inatsimmut naleqqiullugu inatsisissatut siunnersuut allaanerusumik aaqqissunneqarpoq. Inatsimmi atuuttumi akuersissutinut naleqqiullugu angallat aallaavigineqarpoq, akuersissullu angallammut tunniunneqartarluni. Tamatuma kingorna Kalaallit Nunaannut atassuteqarnermut ilaanullu naleqqiullugu angallammik piginnittumut piumasqaateqarluni.

Inatsit nutaaq malillugu ingerlatsisoq aallaavigineqarpoq. Taamaalilluni ingerlatsisoq akuersissummik tunineqartassaaq, ingerlatsisorlu atassuteqarnermut pissutsit il.il. pillugit piumasqaarfigineqarluni.

2. Siunnersummi immikkoortut pingarnerit tunngaviillu

2.1. Aalisakanik pisuussutit inuiaqatigiit pigisaraat

Tunngaviup saniatigut inatsisissatut siunnersummi siunertami aalajangersakkami aalajangiunneqarpoq ingerlatsisumut tunniunneqartut pisuussutit iluaqutiginissaannut pisussaaffik eqqunneqassasoq. Naalakkersuisut isumaqarput pisuussutit iluaqutiginissaanut pisinnaatitaaffimmut ilaasoq taassuma ilumut iluaqutiginissaanut pisussaaffik. Pisuussutinit

pissarsiarineqarsinnaasunit atugarissaarnermut akiliuteqarnissamik inuiaqatigiit pisariaqartitsipput, taamaattumillu pingarluni tassunga periarfissaqartup periarfissamik taassuminnga ilumut atuinissaa - nammineq pilluni, annertuitigulli aamma ataatsimoornermut.

Tamatuma saniatigut qulaani eqqaaneqartutut tunngaviup malitsigisaanik pisuussutinik iluaquaqarnissamut piffissamut killeqanngitsumut periarfissaqarnissani ingerlatsisup kialluunniit naatsorsutigissanngikkaa. Periarfissaq anguneqartoq taamaallilluni piffissamut sivitsorneqarsinnaasumut tunniunneqarpoq, sivisussusaali apeqqutaatinngagu tulluartumik kalerriisoqarneratigut utertinneqarsinnaalluni.

2.2. Sunniuteqarnissamut akuliutiginnissamik tunngaveqarneq

Siunnersuutigineqarpoq sunniuteqarluni akuliutinnginnissamik tunngavik taassuminnga aqtsinermut aalajangersimasumik tunngavittut aalisarneq pillugu inatsimmut ilanngunneqassasoq.

Siunnersuummut tunuliaqtaasoq tassaavoq pingaartumik aalisarnermut piniarnermullu tunngasut iluanni sulianik ataasiakkaanik politikkikkut passussinerit aamma politikkikkut/allaffissornikkut aaqqissuussinermi inatsisitigut tunngaviit eqqortinnejnarneri inuit akornanni annertuumik isiginiarneqartarmata, soorlu pissaanermik killormut saatitsinerit naligiimmillu tunngaveqarneq.

Sunniuteqarluni akuliutinnginnissamik tunngavik siunnersuutigineqarpoq eqqunneqassasoq taamaallilluni inatsit sapinngisamik annikinnerpaamik Naalakkersuisunut piginnaatisilerluni.

2.3 Paasissutissanik katersineq ammasumillu pissuseqarneq

Paasissutissanik katersineq pingarnertigut eqqarsaatigisassat marluk aallaavigalugit pivoq. Siullermik paasissutissat pitsasut aalisarnernik aqtsinernut tunngaviupput, aamma aalisarnerup annertussusianik paasisaqarnissamut taassumalu inuiaqatigiinnut naleqartitsineranut pingaruteqarlutik. Aappaatut paasissutissanik katersineq tamanullu saqqummiussineq aalisarnermi piviusut pillugit isertuannginnermik pilersitsivoq taamaallunilu aalisarnerit annertuitigut inatsisitigut akuerisaanerinut taakkuninngalu aqtsinermut tunngaviullutik.

Katersineq sapinngisamik annertuitigut ingerlaannartumik elektroniskiusumillu pisariaqarpoq, taamaallilluni kukkusumik allattusoqarsinnaanera annikillisillugu, aamma pisortat allaffissorneranni allaffissornikkut isumalluutit allanut atorneqarsinnaallutik.

Inatsisisstatut siunnersuutikkut Naalakkersuisut kissaatigaat paasissutissanik katersinermut aamma atortussat katersorneqartut tamanut saqqummiunneqartarnerinut erseqqissunik tunngavinnik periutsinillu pissarsisoqassasoq, taamaallilluni pingarnertigut eqqarsaatigisassat isumagineqarlutik.

2.4. Uumassusilinnik piujuartitsineq

Aalisarneq pillugu ataatsimiititaliarsuaq nassuaatit aallarniutaanni ilaatigut ima allappoq: "Eqqarsaatigisassat taakku akornanni pingarnerpaaq" (ataatsimiititaliarsuarmit qulakkeerneqartussaq tassaasimavoq inassuteqaasiornermut atasimasoq) "*tassaavoq piujuartitsineq tunngavigalugu sapinngisamik annertunerpaamik siunissami ungasinnerusumi aalisarnermit inuiaqatigiit iluanaaruteqarnissaasa qulakkeerneqarnissaa.*"

Taamaalilluni uummassusilinnik piujuartitsineq inassutiminut tunngavigisassatut ataatsimiititaliarsuup tunngaviisa akornanni qaffasinnersaanera qularutigineqanngilaq.

Inatsisisstatut siunnersuummut tunngavik tamanna tunngavigalugu tassaavoq,

- siunissami ungasinnerusumi aalisagaqatigiit kinguaassioqqinnissaannik qulakkeerinnittussanik amerlassutsinik TAC-it sippussanngillat;
- sumiiffit pisassiiffiunngitsut aalisagaqatigiinnik pisassiiffiusunik aqtsinermi atorneqassanngitsut;
- ilisimatuussutsikkut siunnersuineq sapinngisamik qaffasinnerpaamiissasoq;
- siunnersuineq aalisagaqatigiinnik aallaaveqassasoq;
- nunani tamalaani malitassat naapertorlugit aalisagaqatigiinnut pingaarutilinnut tamanut aqtsinissamut pilersaarutit ineriartortinnissaat inatsimmit takuneqarsinnaassasoq;
- aqtsinissamut pilersaarutit taamatut ineriartortinneri ilisimatuut, atuisut aqtsisullu akornanni suleqatigiinnerisigut pissasoq, aamma
- aqtsinissamut pilersaarutit aalisarnernik pineqartunik aqtsinermut tunngaviussasut.

2.5. Aningaasaqarnikkut piujuartitsineq

Aalisarneq pillugu Ataatsimiititaliarsuup isumaliutissiissutaanit qulaani eqqaaneqartoq issuaanermi inerniliunneqarsinnaavoq uumassuseqarnikkut piujuartitsinissamut tunngavik peqatigalugu alla atuutissasoq, tassa aalisakkanit pisuussutit iluaqtigineqassasut, taamaalilluni inuiaqatigiinnut aningaasarsiornikkut iluaqtaallutik, aalajangersimanerusumilli nunami atugarissaarnermut.

Aningaasarsiornermi misissueqqissaarnerit, tassunga ilanngullugu "aalisarnermi politikkut annertunerpaamik pissarsisinnaaneq" taaneqartup atorneqarnerata, takutippaa sapinngisamik annertunerpaamik pisuussutinit iluanaarutit annertunerpaanik pissarsiffiusoq aqutseriaaseq tassaasoq pisassiissutit niuerutigineqarsinnaasut nammineq pigisat (PNNP). Naalakkersuisut isumaat tassaavoq taamatut ingerlatsineq aalisakkanik aqtsinermi tunngaviusumik aallaaviussasoq. Aalisarnerni aalajangersimasuni aalisarneq patajaatsoq pineqanngimmat PNNP suli isumatusaarnerunngilaq. Tamanna saarullinniarnermi soorlu atuuppoq.

Kalaallit Nunaata Kitaani, 75°00A-p kujataani 68°30A-p avannaani, sumiiffimmi (sumiiffik 47) sinerissamut qanittumi qaleralinniarnermi siunnersutigineqarpoq PNNP atorlugu aqtsineq eqqunneqassasoq, peqatigisaanillu, tamanna tulluartutut takuneqarpat, aalisarnerni

allani imalunniit sumiiffinni allani, imaluunniit sumiiffiit killeqarfingisai allanngussagaluarpata, PNNP-p equnneqarnissaanut Naalakkersuisunut periarfissiisumik piginnaatitsineq pillugu aalajangersagaq ikkunneqassasoq siunnersuutigineqarluni.

Sumiiffik 47-mi siunnersuutigineqarpoq umiatsiaararsortut angallatillu ataatsimuulersinneqassasut, umiatsiaararsortulli eqqarsaatigalugit tamanna angallatinut PNNP-mik aaqqissuussinermut ilaasunut taamaallaat atuulluni.

Aalisarnermut pisinnaatitaaffinnik piginnittuuneremi eqiterunnerup annikillisinnissaa Naalakkersuisut kissaatigaat. Aningaasarsiornermi misisueqqissaarnerit aamma uppernarsarpaat aalisarneq, atugarissaarnermut annertuumik iluaqutaasoq, aalisarneq tassaasoq angallatitigut annertunerpaamik eqiteruffiusimasoq, angallatinullu amerlanerusunut aalisarnerup siuariarneqarnera iluaqsiinerup taassuma ajornerulerteranik kinguneqassasoq. Pissutsit taakku raajarniarnermi pingaartumik atuupput, kisianni aamma aalisarnernut allanut nuunneqarsinnaallutik.

Misisueqqissaarnerit tunuliaqutaralugit piginnittuunerup siuarnissaata qulakkeerneqarnissaanut periarfissanik allanik nassaarnissaq Naalakkersuisunit toqqarneqarpoq.

Raajarniarnermi - kingumullu ilaatigut aalisarnernut allanut nuunneqarsinnaasumik - aaqqiineq tassaasimavoq suliniutit arlallit ataqtigisinneri, tassunga ilanngullugu pingaartumik

- pisassiissutinut qummut killiussap appartinnea, maannakkut qaffasissusermut naleqqiullugu pisassiissutinut pigisanut ingerlataqartut periarfissaqarnerannik killiliisoq;
- toqqaannangitsumik piginnittuuneq pillugu malittarisassap eqqunneqarnera pisassiissutinit pigisat naatsorsornerinut ilaalerluni, piginnittuunerup taassuma annertussusaa apeqquaatinngu;
- piginnittuunermut atatillugu taaguut “inuk” pillugu malittarisassamik eqquissineq imatut paasineqassaaq inuk nammineq taassumalu qanigisai;
- aalisarnissamut pisinnaatitaaffimmuit periarfissami piffissamik killiliineq;
- agguaasseqqinnissaq siunertalarugu pisassiissutinik pigisanik utertitsinissamut tulluartumik kaleriinissamut Naalakkersuisut periarfissaqarnerat;
- soraarnerussutisiaqalernissamut aningasaateqarfiiit aalisarnermi piginneqataalernissaannut periarfissamik ammaassineq, aamma
- Kalaallit Nunaata kitaani aalisagaqtigiinni raajarniarnermut ataatsimoorussamik tunngavissanik eqquissineq.

Pisassiissutinut qummut killiinerit siunnersuutaasut taamaalillutik pisassiissutinik pigisat assanni ikittuni eqterussinnaanerinut pinngitsoortinnissaanut qulakkeerinnippoq, qularnanngilluinnartumilli tamanna namminermi namminersortutaalisarneranni maannakkut

agguassinermut naleqqiullugu pisassiissutinit pigisanik agguasseqqinnermik kinguneqartussaanani. Akerlianilli Royal Greenland A/S-imut pisassiisutit ilai ingerlataqartumut allamut tunniunneqartussaassallutik. Malugineqassaarli Aalisarneq pillugu ataatsimiitaliarsuup isumaliutissiissutaata kingorna piffissami pisassiissutinik pigisanik tunniussisoqarnikuummat, taamaalilluni ingerlatseqatigiiffit namminersortut tamarmik toqqaannartumik piginnittuunermut naleqqiullutik pisassiissutinut qummut killiliussat pillugit aalajangersakkanik maannakkut naammassinnillutik.

Inunnut ataasiakkaanut pisassiissutinut qummut killiliussaq 10%-imut aalajangersarneqarpoq. Tamanna isumaqarpoq inuit ataasiakkaat arlaannaalluunniit 10%-imik sippusumik pisassiissutinik pigisanik peqarsinnaanngitsoq, pisassiissutinik pigisanut inuup toqqaannartumik toqqaannanngitsumillu piginnittuunera aallaavigalugu naatsorsuisoqarpat. Tassunga atatillugu pingarpoq isiginiassallugu taamatut naatsorsuineq inummut ataatsimut tunngasummatt.

Umiarsuaatileqatigiiffit ilai pisassiissutinik pigisat tamarmiusut 20 %-ii sinnerlugit, toqqaannanngitsumik piginnittuuneq ilanggullugu naatsorsorneqarpat pisassiissutinik pigisat tamarmiusut 10 %-iinik pigisaqarput. Tamanna isumaqarpoq umiarsuaatileqatigiiffit inuillu taakku ingerlatseqatigiiffinni piginneqataaffigisaminni pisassiissutinik pigisat imaluunniit piginneqataassutit tunisariaqassagaat. Suliniutip taassuma akuliuttuunera pissutigalugu ikaarsaarnermi aaqqissuussinermut naleqqiullugu pilersitsisoqassaaq, tamanna pillugu immikkoortoq takuuk.

Pisuussutit inuiaqatigiinnit pigineqarnerat pillugu tunngaviup, aamma pisuussutinik iluaquteqarnissamut periarfissap inuiaqatigiinnit tiguneqarsinnaanerata malitsigisaanik ingerlatsisut ilaasa aalisarnermut periarfissaqarnerinik Naalakkersuisut aamma utertitsisinnaassapput agguateqqinnejarlillu, taamaalilluni taanna aqqutigalugu piginnittuuneq siuarneqarluni. Qulaani eqqaaneqartutulli naatsorsuutigineqartariaqarpoq taamatut agguasseqqinneq umiarsuaatileqatigiit aningaasarsiornerannut aamma pisuussutinik iluanaarutinut annertuumik kingunerlutsitsissasoq, kingumullu inuiaqatigiit aalisarnermit iluanaaruteqarnerat annikillisillugu. Pisassiissutinik pigisanik utertitsinissamut tunngavik qanorluunniit pisoqaraluarpat ingerlatsinikkut tunngaviit nalinginnaasut isiginiarlugit pisussaassaaq, tessunga ilanggullugu naligiit naligiimmik pineqarnissaat pillugu malittarisassaaq, tulluartumillu kalerriisoqarluni, taamaalilluni ingerlataqartoq tamatuma kingorna tulluarsarnissamut periarfissaqarluni.

Inatsisisatut siunnersuutikkut soraarnerussutisiaqalernissamut aningaasaateqarfifit aalisarnermi aningaasaliinissamut periarfissinneqarput. Taamatut pisoqarpat tamanna qularnanngilluinnartumik piginnittuunerup ilumut siaruarneranik kinguneqassaaq. Umiarsuaatileqatigiiffiup imaluunniit inuup ataatsip pisassiissutinut qummut killiliussatigut piumasqaatinik naammassinninneranik naatsorsuineq pillugu aalajangersakkamut toqqaannanngitsumik piginnittuuneq ilaavoq, tassa imaappoq

ingerlatseqatigiiffik/umiarsuaatileqatigiiffik pineqartoq pisassiissutinik pigisanik umiarsuaatileqatigiiffiup alla pigisaasa ilaaniq piginnippat, piginneqataassutinik tunniussisoqartussaassaaq. Piginneqataassutit taakku niuerfimmi ammasumi tuniniarneqarsinnaassapput, aalajangersakkat nutaat malillugit aamma soraarnerussutisiaqalernissamut aningaasaateqarfiiq ilaallutik.

Raajarniarnermi inatsisisstatut siunnersuutip aamma siunertaraa maannakkut sinerissamut qanittumi angallatit maannakkut avataasiorlutik angallatinut atuuttunut piumasaqaatinut periarfissaqalissapput. Tamanna tunuliaqutaralugu malittarisassat eqqunneqassasut siunnersuutigineqarpoq, taakku malillugit Kalaallit Nunaata Kitaani raajarniarneq tamarmi sinaakkutissatigut piumasaqaatit assigiit aallaavigalugit aqunneqalerluni. Tamannali isumaqanngilaq angallatit angissusaannut il.il. naleqqiullugu assigiinngitsunik aalajangersimasumik malittarisassaqassanngitsoq. Taamaalilluni angallatit mikinerusut aalisarfillu atugarliornerusut illersorneqarnissaat siunertalaralugu aalisarnernut nunap ilaani periarfissat aamma sinerissamut qanittumi sumiiffinni aalajangersimasuni angallatit angisut aalisarneranni piujuartitsinikkut killilersuineq pillugu malittarisassat eqqunneqassasut, soorlu aamma pisassiissutinit pigisat tunniunnissaannut killilersuisoqassasoq, taamaalilluni maannakkut sinerissamut qanittumi umiarsuaatileqatigiinniit maannakkut avataasiorluni umiarsuaatileqatigiinnut tunniussinermut taanna atuunnani.

2.6 Inuaqatigiinni piujuartitsineq

Eqqarsaatigisassat allat aalisarneq pillugu killiliussanik politikkut aaqqissuussinermut akuttunngitsumik pingaaruteqassapput. Assersuutigalugu suliffissaqartitsineq aamma nunap immikkoortuani politikkut eqqarsaatigisassat pineqarsinnaapput aamma aalisarnissamut periarfissaqarnermut piginnituunerup siamarrtinneqarnissaata eqqarsaatiginera.

Eqqarsaatigisassat taakku inatsisisstatut siunnersuummi ilaatigut pisassiissutinut qummut killiliussatigut, toqqaannanngitsumik piginnituunerup pisassiissutinik pigisanut piginnituunerup annertussusianik naatsorsuinermi ilaatinneqatigut, ingerlatseqatigiiffinni aalisarnermi ingerlatsisunik aningaasalersuinissamut periarfissap siuariartinneratigut kiisalu nunami suliffissuarnut pisat tulaanneqarnissaanut pisussaaffiliinikkut piviusunngortinneqassapput.

2.7 Immikkoortut pingarnerit allat

2.7.1 Aalisarnermi uumassuseqarnikkut misissuinerit kiisalu inuussutissarsiorluni misileraalluni aalisarneq

Inuussutissarsiutigalugu misileraalluni aalisarnermi siunertaq inatsisisstatut siunnersuummi erseqqissarneqarpoq. Peqatigisaanik misileraalluni aalisarnissamut kajumissaatinut assigiinngitsunut ammaassisooqarpoq.

2.7.2 Sunniuteqarluartumik aalisarnermik nakkutilliineq

Aalisarnermik nakkutilliineq eqqarsaatigalugu siunnersummi siunertaq tassaavoq unioqqutitsisumik, nalunaarutigineqanngitsumik imaluunniit malittarisassaqanngitsumik aalisarnermik ingerlatsisoqarnersoq nakkutiginiarlugu sapingisamik pitsaanerpaamik oqartussat sakkussanik atortoqarnissaat, tassunga ilanngullugu inuttut pigisanik isersinnaanermut, angallammik alapernaarsuutinik ikkussuinermut kiisalu umiatsiaaqjanik 6 meterinik naanerusunilluunniit nalunaarsuinermut tunngasut.

2.7.3 Allaffissornikkut pillaammik akiligassiisarnerit

Allaffissornikkut pillaammik akiligassiisarnissamut arsaarinninnissamullu periarfissaq atuutilersinneqarpoq, tassunga ilanngullugu nalilinnik arsaarinninneq. Periarfissaq siunnersuutikkut inatsisip atuuffiini tamani atuutilersinneqarpoq, taamaalilluni nalunaaruteqartarneq pisanillu tunisineq pillugu inatsimmi malittarisassanik unioqqutitsineq tunngavigalugu allaffissornikkut aamma akiliisitsisoqarsinnaalluni arsaarinnittooqarsinnaalluniluunniit.

2.7.4 Ikaarsaariarnermi aaqqissuussineq

Aalisarneq pillugu inatsimmi allannguutissatut siunnersuutit ingerlataqartunut peqataasunut pingaaruteqassapput, aamma piginnittuunermut malittarisassanik sukaterneqartunik atulersitsinermut naleqqiullugu ikaarsaariarnermi piffissamik pisariaqartitsisoqassalluni.

3. Aningasatigut allaffissornikkullu pisortanut inuuussutissarsiortunullu kingunissai
Siunnersuut pitsasumik aningasaqarnikkut kinguneqartitsisunik allannguinernik imaqarpoq, aamma allannguinerit aningasaqarnikkut ajortumik kinguneqartussatut naatsorsuutigineqartut. Kingunissai siunnersummi immikkoortut ilaanni siunnersummullu tamarmiusumi immikkut naliliiffigineqarput.

3.1 Raajarniarnermi 75 %-imik tunisassiorissamut akuersissut

Raajarniarnermi angallatinut tamanut 75 %-imik nalinginnaasumik tunisassiorissamut akuersissuteqarneq eqqunneqarpoq. Allannguineq raajarniarnermi raajaleriffinnilu isertitanut sulisoqarnermullu pingaaruteqassaaq. Allannguineq aamma raajarniarnermiit akileraarutinut akitsuutinullu pingaaruteqarsinnaavoq.

Angallatini 75 %-it tikillugit tunisassiorissamut periarfissap siunissami iluaqtigineqarnissaanut pissutsit arlallit apequtaassapput:

1. Aalisarnermik ingerlatseqatigiiffit allat/nutaat kilisaatinik tunisassiorfiusunik (aamma pisassiissutinik pigisanik) pisinissamut aningasalersuinissamik kivitsisinnaanersut.
2. Tunisassianik ataasiakkaanik nunarsuarmi niuerfiusumi piumasaqarnerit.
3. Tunisassianut ataasiakkaanut ingerlatseqatigiiffinni ataasiakkaani aningasartuutit ilusaat.

Taamaattumik angallatini siunissami tunisassiarineqartussat raajartassiiissutit qanoq annertutigmaarnersut nalorninarput, aamma qanoq annertutigisut suli

tulaanneqartassanersut. Siunissami qaninnerusumi tunisassiornerup tulaassisarnerillu akornanni agguarnerit annertunerusumik allannguuteqarnissaat naatsorsuutigineqanngilaq.

Allannguut siunissami angallatit mikinerusut aalisarluarpallaanngitsulluarlallit kilisaatinik tunisassiotunik anginerusunik ikinnerusunik taarserneqarnerinik kinguneqarsinnaavoq. Tamanna ataaniittumi allaaserineqartutut isertitat qaffannerinik aalsarnermilu sulisut ikilinerinik kiisalu aalsarnermi akileraarutit akitsuutillu qaffannerinik kinguneqassaaq.

Ilimagisat uku naatsorsuinernut tunngavigineqarput:

- Akit
 - o Raajat qalipallit killumut 28,96 kr.-ilerlugit avammut niuerutigineqartut (ukiumi kingullermi akit 15 %-it ilanngaatigalugit)
 - o Kilisaatinut nutabajtillugit tunisisartunut kiilumut 8,04 kr.-ilerlugit tunisinermi akit
 - o Angallatinut tunisassiorfiusunut tunisinermi akit agquaqatigiissillugit kiilumut 9,64 kr.-it
 - o Nunami suliffinniit avammut niuernermi akit kiilumut 19,01 kr.-inilerlugit, Naatsorsueqqissaartarfimmuit
- Akileraarutit akitsuutillu
 - o Tunngaviusumik ilanngaat 48 t.kr.
 - o Inuup akileraarutaa 43%
 - o Ingerlatseqatigiiffiit akileraarutaat tapeq ilanngullugu
 - o Avammut niuernermi akitsuut 18,4 %
 - o Tunisinermi akitsuut 5 %
- Sinneqartoorsinnaassuseq
 - o Angallatit tunisassiotut 25 %
 - o Kilisaatit nutaanik tunisisartut 24 %
 - o Nunami suliffiit 7,3 %
- Inuttaqarnermut tuttartut 30 %
- Angallammi nutaanik/tunisassiotuni ukiumi ataatsimi qaquinneqartartut 173/220 tons
- Tunisassiornermi iluanaarutit suliffissuit 34 %
- Tonsimut ataatsimut tiimit akissarsiffiusut amerlassusaat C&P 30

3.1.1. Pisortanut aningaasaqarnikkut kingunissai immikkut pillugit

3.1.1.1 Pisortat aningaasaqarnerat

Allannguut siunissami qaninnerusumi pisortat aningaasaqarnerannut kinguneqartitsissasooq naatsorsuutigineqanngilaq.

Tulaassuisussaatitaanerup siunissami ungasinnerusumi annikillisinneqarnera pisat 75 %-ii angallatini tunisassiarineqalerlutik tamanna pisortat aningaasaqarnerisa ukiumut 270 mio. kr.-

inik pitsaanerulernissaannik kinguneqassaaq, maannakkut pissutsit, tassunga ilanggullugu TAC, tunngavigineqarpata.

Tamanna ukununnga atatinneqarsinnaavoq;

- Pisuussutinit iluanaarutinit akitsuutit ilanngaatissat ilanngaatigereerlugit 140 mio. kr.-it tikillugit qaffanneri
- Inuit akileraarutaasa ilanngaatissat ilanngaatigereerlugit 60 mio. kr.-it tikillugit qaffanneri
- Ingerlatseqatigiiffit akileraarutaat 30 mio. kr.-it missaat tikillugit ilanngaatissat ilanngaatigereerlugit qaffanneri
- Royal Greenlandip akileraarutaa 40 mio. kr.-it missaat tikillugit ilanngaatissat ilanngaatigereerlugit qaffanneri

3.1.1.2 Allaffissornikkut kingunissai

Allannguut pisortanut kinguneqassasutut naatsorsuutigineqanngilaq.

3.1.2 Inuussutissarsiuteqartunut aningaasaqarnikkut kingunissai immikkut pillugit

3.1.2.1 Isertitat

Siunissami qaninnerusumi allannguut isertitat (akissarsiat sinneqartoortillu) allanngornerinik kinguneqassasoq naatsorsuutigineqanngilaq.

Raajat 75 %-ii, siunissami ungasinnerusumi, angallatini tunisassiarineqarpata tamanna ukiumut 245 mio. kr.-it missaat tikillugit isertitat ilanngateqareertillugit qaffannerinik kinguneqassaaq. Maluginiaruk Royal Greenlandip inerneranut sunniut qulaani missingersuutitut aammattaaq pisortat isertitaatut nalunaarsorneqarmat.

Taamatut ilanngaatissat ilanngaatigereerlugit qaffaaneq missingersorneqartoq uaniippoq:

- Raajarniarnermi inuttani 180 mio. kr.-it missaat tikillugit akissarsiat qaffanneri, tassaniillutik:
 - o Kilisaateeqqani nutajutillugit tunisisartuni akissarsiat ukiumut 70 mio. kr.-it missaat tikillugit apparnissaasa naatsorsuutigineqarneri.
 - o Kilisaatini tunisassiortuni inuttanut akissarsiat 250 mio. kr.-it missaat tikillugit qaffanneri.
- Raajarniarnermi pisassiissutinik pigisanik piginnittunut 150 mio. kr.-it missaat tikillugit sinneqartoortit qaffanneri.
- Suliffissuarni sulisut akissarsiaasa ukiumut 45 mio. kr.-it missaat tikillugit apparneri.
- Raajaleriffinni piginnittumut ukiumut 40 mio. kr.-it missaat tikillugit sinneqartoortit apparneri.

3.1.2.2 Sulisoqarneq

Siunissami *qaninnerusumi* allannguutip sulisoqarnermut allannguuteqarnissaa naatsorsuutigineqanngilaq.

Siunissami ungasinnerusumi raajarniarnermi aamma raajaleriffinni sulisoqarneq, angallatini tunisassiornissamut periarfissap 75 %-imik iluaqtigineqarnerani suliffiit ukiumut sulisut 175 missaat tikillugit ikilissapput.

Siunissami ungasinnerusumi sulisut ikilisinnaanerat ima annertutigissaq:

- Raajarniarnermi sulisut ukioq naallugu sulisut 35-it missaannik ikilinerat, annikinnerusumik sulisussaqarfiusumut aalisarnermi ikaarsaarcerup malitsigisaanik.
- Raajaleriffinni sulisut ukioq naallugu sulisut 149-it missaat tikillugit ikilinerat raajanik tulaanneqartartut ikilinerisa malitsigisaanik.

Naatsorsuutigineqarpoq sulisinnaasut suliunnaartut allamik suliffissamik siunissami nassaarsinnaassasut, taamaalillunilu inuussutissarsiuutini allani naleqartitsilernermut tapertaallutik.

3.1.2.3 Allaffissornikkut kingunissai

Suliniutip inuussutissarsiortunut allaffissornikkut kinguneqartitsinissaa naatsorsuutigineqanngilaq.

3.2 Sumiiffimmi 47-mi 6 meterit inorlugit umiatsiaaqqanik qaleralinniarnermi PNNP ilaannakuusut

Siunnersuutitigut sumiiffimmi 47-mi sinerissap qanittuani aalisarnermi PNNP ilaannakuusut equnneqarput. "Ilaannakuusut" ima paasineqassapput, aalisartut PNNP-mik aaqqissuussinermut nuukkusunnerlutik imaluunniit pisassiissutinik paggatassiissutaasartunik aalisarsinnaanermut akuersissuteqarlutik aalisarusunnerlutik namminneerlutik aalajangersinnaassagaat.

Angallatini 6 meterimik takinerusunut sumiiffik 47-mi qaleralinniarnermi ullumikkut pisassiissutit niuerutigineqarsinnaasut nammineq pigisat (PNNP) atuupput. Aalisartut nuukkusuttut angallataat ilanngullugit PNNP-mut aaqqissuussamut katarsorneqassapput. Tamatuma kingorna angallatinut umiatsiaararsortunullu angallatit angissusiini assigiinngitsuni pisassiissutinit pigisanik killilerneqarnatik niueruteqarsinnaalissapput. Peqatigisaanik aalisagaqtigiinni ataatsini paggatassiilluni aalisarnermut aqtsineq PNNP-mik aaqqissuussinermut nuukkusunngitsunut ingerlataqartunut aalajangiussimaneqarluni.

PNNP-mik aaqqissuussineq ingerlassappat pisassiissutinik amigaateqartoqassaaq, tamanna pissutigalugu pisassiissutinik pigisanik annertussutsinillu piumasaqartoqalerluni. Sumiiffik 47-mi angallatini takusimasatsitut aaqqissuussineq ingerlaneqarsinnaasimannngilaq, pisassiissutit ima qaffasitsigisumik inissinneqarsimammata pisassiissutinit pigisanik annertussutsinillu piumasaqarneq annikitsuaqqamiilluni. PNNP-mik aaqqissuussinermik eqqussinerup aalisartunut inuiaqatigiinnullu pitsasumik kinguneqartitsinissaq qulakkeerniarlugu aalisagaqatigiinnut ataasiakkaanut TAC-it isumalluutitigut tunngavigisanut tulluarsarneqarnissaat taamaattumik pisariaqarpoq. Aalisagaqatigiinnut tamanut aqutsinissamut pilersaarusoortoqassasoq siunnersuummit takuneqarsinnaammat, aamma piujuartitsineq tassungalu atatillugu ilisimatuussutsikkut siunnersuineq taakkunani pingaaruteqarluinnartuummata ukiualuit iluanni aalisarnissamut periarfissat piviusumik isumalluutinut tulluarsarumaartut tulluarpoq ilimagissallugu.

Aalisartut ataasiakkaat kikkut inuussutissarsiummik qaugu qimatsinissaannut pisassiissutinillu tunisinissaannut pissutaasinnaasut arlalissuusinnaapput. Aallaaviatigulli naatsorsuutigineqarluni aalisartut ingerlalluannginnerpaat pisassiissutinit pigisatik aalisartunut ingerlalluarnerpaanut tunisassagaat. Aalisartut ingerlalluartut pisassiissutit aalisartumut ingerlalluanngitsumut nalinganit qaffasinnerusumik akimik akiliinissaat naatsorsuutigineqarsinnaavooq.

Sinerissamut qanittumi aalisarnermi PNNP-mik aaqqissuussinerup eqqunneqarnera, imminut akilersinnaanerup isumalluutinillu iluanaarutit malunnaatilimmik qaffannerisa saniatigut aamma aningaasaliinissaq eqqarsaatigalugu aalisartunut aalajangersimasunik siumullu oqaatigineqarsinnaasunik tunngavissiissapput aamma nutaamik aningaasaliinerit taarsigassarsinikkut aningaasalersornissaannut periarfissat pitsaanerulersillugit.

Ingerlataqartut PNNP-mik aaqqissuussinermut ilaalerlutik ineriartorneq annertunerusumik sammiveqalerpat taava aaqqissuussinermi iluaqtit annertunerusumik anguneqarsinnaalerlutillu piffissap ingerlanerani inuiaqatigiinnut aamma iluanaaruteqartitsilerluni. Erseqqissarneqarpoq PNNP-mik aaqqissuussinerup pitsasumik sunniuteqalernissaanut tunngaviulluni siunertaammat ingerlataqartut sapinngisamik pitsaanerpaamik aalajangersimasunik tunngaveqarnissaat, tassunga ilanngullugit ingerlataqartunut ataasiakkaanut ukiumut pisassiissutit aalajangersimasuulerlutik.

3.2.1 Pisortanut aningaasaqarnikkut kinguneqarnissaa immikkut pillugu

3.2.1.1 Pisortat aningaasaqarnerat

Siunissami qaninnerusumi PNNP-mik aaqqissuussinermik ilaannakuusumik eqqussineq pilersitsinermut, agguassinerterut, naammagittaalliuutinik suliaqarnermut il.il. atatillugu 1 mio. kr.-init missaannik ataasiarluni pisortat aningaasartuuteqarnerannik kinguneqarumaarpoq.

Pisassiissutinik pigisanik pisinermut tunisinermullu pisassiissutit pillugit nittartakkamut aningaasartuutit paassisutissat pillugit immikkoortumit takuneqarsinnaapput.

Siunnersuinermik tunngaveqartumik aqtsinermi pilersaarusiortoqassasoq inatsimmit takuneqarsinnaammatt naatsorsuutigineqarpoq pisassiissutit siunnersuinernut tulluarsariartorusaassasut. Tamatuma kingunerissavaa PNNP-mik aaqqissuussineq ingerlalluartoq, pisortat aningaasaqarnerannut pitsaasumik aamma iluaqutaasoq. Siunissami ungasinnerusumi naatsorsuutigineqarpoq paggatassiilluni aalisarneq unikkumaartoq inuussutissarsiutigalugulu aalisartut tamarmik PNNP-mut nuullutik. Tamanna siunissami pisortat aningaasaqarnerisa 50 mio. kr.-it tikillugit ukiumut pitsanngoriarneranik kinguneqassasoq naatsorsuutigineqarpoq.

3.2.1.2 Allaffissornikkut kingunissai

Ilaannakuusumik PNNP-mik aaqqissuussinermik eqqussineq naatsorsuutigineqarpoq PNNP-mik pilersitsinermut, naammagittaalliuutit suliarinerinut, pisassiissutit agguarnerinut maannakkullu aaqqissuussinerup atulersinneranut pisortat allaffisornerannut 1 mio. kr.-it missaannik ataasiarluni aningaasartuuteqarnermik kinguneqarumaartoq.

3.2.2 Inuussutissarsiuteqartunut aningaasaqarnikkut kinguneqarnissaa immikkut pillugu

3.2.2.1 Isertitat

Sumiiffimmi 47-mi sinerissamut qanittumi qaleralinniarnermi ilaannakuusumik PNNP-mik eqqussineq naatsorsuutigineqarpoq siunissami qaninnerusumi isertitatigut pingaaruteqartunik kinguneqartitsissanngitsoq.

Pisassiissutit isumalluutitigut tunngavinnut tulluarsarpata taava pisassiissutinit pigisat amigaatigineqalissapput piumasaqartoqalerlunilu, taamaalillunilu siunissami ungasinnerusumi PNNP-mik eqqussineq isertitat ukiumut 100 mio. kr.-it missaat tikillugit qaffannerinik kinguneqarsinnaallutik (sinneqartoorutit inuttallu akissarsiaat).

3.2.2.2 Sulisoqarneq

Sumiiffimmi 47-mi umiatsiaararsorluni qaleralinniarnermi PNNP-mik aaqqissuussineq siunissami qaninnerusumi sulisoqarnermut kinguneqartitsissasoq naatsorsuutigineqanngilaq.

Siunissami ungasinnerusumi, aamma pisassiissutit siunnersuinernut tulluarsarneqarpata, PNNP-mik eqqussineq ukioq naallugu sulisut 300 missaannik allanut nuussinnaanerinik kinguneqarumaartoq naatsorsorneqarpoq.

3.2.2.3 Allaffissornikkut kingunissai

Suliniut piffissami ikaarsaarfiusumi umiatsiaararsortunut allaffissornikkut suliassat annikitsuaqqamik qaffannerinik kinguneqassaaq, tassa umiatsiaararsortut, tamatuminnga kissaateqartut, PNNP-mi nittartakkap qanoq atornissaanut ilinniassammata, taamaalillutik pisassiissutinik pigisatik annertussutsillu, pisassiissutinit qaqqissimasat ilaatigut nammineerlutik takusinnaalerlugin, aamma pigisanik pisisinnaallutillu tunisisinnaallutik.

3.3 Kalaallit Nunaata Kitaani avataasiorluni qaleralinniarnermi PNNP

Siunnersuutikkut Kalaallit Nunaata Kitaani avataasiorluni qaleralinniarnermi pisassiissutit niuerutigineqarsinnaasut nammineq pigisat (PNNP) eqquunneqarput.

Avataasiorluni qaleralinniarneq, saarullinniarneq, suluppaagarniarneq, misaqqarnarniarneq saarulliusaarnarniarnerlu 2022-mi kalaallit avataasiutaannit arfineq marluusunit ingerlanneqarpoq. Taakkunanng ingerlatseqatigiiffinni sisamani agguarsimasuni angallatit tallimat 2022-mi Kalaallit Nunaata Kitaani qaleralinniarput. Piffissami maannakkut taamaallaat qaleralinniartunik angallateqanngilaq, tassa angallatit tamarmik qaleralinniarnerlik saarullinnik, suluppaakkanik, misaqqarnanik ilaatigullu avaleraasartuunik ataqatigiissillugu aalisarnermik ingerlataqarmata. Maannakkut aalisariutit piginnaasaat pisassiissutinut naapertuitkannerput.

Ukiuni kingullerni tallimani aalisarneq tunuliaqtaralugu pisassiissutit agguarneqassappata ingerlatseqatigiiffit katillugit tallimat pisassiissutinit pigisanik pissarsissapput, taamaattorli ingerlatseqatigiiffik ataaseq ima annikitsigisunik pigisaqassalluni pigisat tuninissaat isumatusaarnerussalluni.

Aalisarneq piffissami maannakkut imminut akilersinnaavoq aamma isumalluutinik iluanaarutinit akitsuutitigut akileraarutitigullu pisortat karsiinut annertuumik iluanaaruteqartitsillutik. Imminut akilersinnaaneq siunissami qaninnerusumi taamaattumik PNNP-mik pisassiissutit equnnerisigut annertuumik qaffassasoq naatsorsuutigineqanngilaq.

Aalisarneq annertuumik imminut iluanaarfugaluartoq maannakkut aqtsineq pissutigalugu angallatiminik allatigullu pisariaqartutigut aningaasalersuinissat pilersaarusiornissaannut aningaasaliiffiginissaallu ingerlatseqatigiiffinnut ajornakusoopoq, annertuumik nammineq aningaasaateqanngikkunik. Taama annertutigisumik nalorninartoqartillugu piffissaq sivikinnerusoq sivisunerusoq tunaartaralugit ingerlatseqatigiiffit pisassanut atatillugu periarfissaqarnerat aqutseriaaseq maanna atuttooq atorlugu aningaasalersuisussanik pissarsiniarnerat ajornakusoortorujussuuvoq, taamaammallu ingerlatseqatigiiffinnut atuuttunut nutaanullu taamatut aalisarnermut pulanissamut pilersaarusiornissamut aqtsisut periarfissanik pitsaasunik pilersitsisanngillat. Maannakkut ingerlatseqatigiiffit avataasiorluni qaleralinniarnermi kiisalu aalisakkani eqqaaneqartuni allani aningaasalersuinissaannut pissutaasuni pingarnerpaat ilaat tassaavoq amerlanerpaat aamma raajartassiissutinik

niuerutigineqarsinnaasunik peqarnerat, qularnaveeqqutaasinnaasut imaluunniit ingerlatseqatigiiffinit aningaasaatilissuarnit allanit ilaatigut pigineqarlutik.

PNNP-mik aaqqissuussinermik eqquissineq siunissami ungasinnerusumi aalisarnerup imminut akilersinnaalerneranut iluaqutaassaaq, tassa ingerlatseqatigiiffit siunissamut ungasinnerusumut aalisarnissamut periarfissamik qulakkeerneqassammata taamaattumillu isumannaannerusumik aalisarneq aningaasaqarnikkut pilersaarusiorsinnaalissallugu. Aammattaaq pisassiissutinit pigisat pigisatut naliliummata appasinnerusumik erniaqartitsinermik kinguneqarsinnaallutik, taamaalilluni qaffasinnerusumik sinneqartoorsinnaallutik. Tamatuma saniatigut PNNP-mik aaqqissuussineq umiarsuaatileqatigiit nutaamik aningaasalersuisinnaalersissallugit, raajartassiissutinik niuerutigineqarsinnaasunik peqarnersut apeqqutaatinngu.

3.3.1 *Pisortanut aningaasaqarnikkut kingunissai immikkut pillugit*

3.3.1.1 *Pisortat aningaasaqarnerat*

Siunissami qaninnerusumi avataasiorluni qaleralinniarnermi PNNP-p eqqunneqarnera aaqqissuussinerup pilersinneranut ataasiarluni aningaasaliinermik kinguneqassasoq naatsorsuutigineqarpoq. Tamatuma saniatigut naatsorsuutigineqanngilaq suliniut siunissami qaninnerusumi pisortanut aningaasaqarnikkut kinguneqartitsissasoq.

Kalaallit Nunaata Kitaani avataasiorluni qaleralinniarnermi PNNP-mik eqquissineq siunissami ungasinnerusumi pisortat aningaasaqarnerannut annikitsumik pitsaanerulersitsinermik kinguneqarumaartoq naatsorsuutigineqarpoq.

Tamatuma saniatigut aalisarnermut tassunga tunngasunik pisortallu isertitaannut kinguneqartitsisinnaasunut ataqtigiissitsilluni pisassiissutinut qummut killiliussat allaaserineqarnerinut innersuussisoqarpoq.

3.3.1.2 *Allaffissornikkut kingunissai*

Avataasiorluni qaleralinniarnermi PNNP-mik eqquissineq siunissami ungasinnerusumi pisortat allaffissornerisa annikillineranik kinguneqassasoq naatsorsuutigineqarpoq tamatumalu malitsigisaanik aningaasartuutit 0,2 mio. kr.-it missaaniissallutik. PNNP-mik eqquissinermut atatillugu agguassinernut, naammagittaalliutit suliarinerinut il.il. aningaasartuutit 0,5 mio. kr.-it missaaniissasut. Pisassiissutit pillugit nittartakkamik pilersitsineq tassungalu aningaasartuutit paasissutissat pillugit immikkoortumi allaaserineqarput.

3.3.2 *Inuuussutissarsiortunut aningaasaqarnikkut kingunissai immikkut pillugit*

3.3.2.1 *Isertitat*

Siunissami qaninnerusumi Kalaallit Nunaata Kitaani avataasiorluni qaleralinniarnermi PNNP-p eqqunneqarnera isertitanut kinguneqartitsissanngitsoq naatsorsuutigineqarpoq.

Kalaallit Nunaata Kitaani avataasiorluni qaleralinniarnermi PNNP-p eqqunneqarnera siunissami ungasinnerusumi isertitat annikitsumik qaffannerinik malitseqassasoq naatsorsuutigineqarpoq.

3.3.2.2 Sulisoqarneq

Siunissami qaninnerusumi Kalaallit Nunaata Kitaani avataasiorluni qaleralinniarnermi PNNP-p eqqunneqarnera sulisoqarnikkut kinguneqassanngitsoq naatsorsuutigineqarpoq.

Siunissami ungasinnerusumi Kalaallit Nunaata Kitaani avataasiorluni qaleralinniarnermi PNNP-p eqqunneqarnera sulisoqarnikkut annikitsumik appiarnermik kinguneqassasoq naatsorsuutigineqarpoq.

3.4 Saattuarniarnermi PNNP

Siunnersuutikkut Kalaallit Nunaata Kitaani saattuarniarnermi pisassiissutit niuerutigineqarsinnaasut nammineq pigisat (PNNP) eqqunneqassapput.

Saattuarniarnermi taamaallaat angallatit 6 meterinik takinerusut atorneqarput. Angallatit pisoqaunerullillu nutajunerupput, ilai aamma qaleralinniarlutik, saarullinniarlutik nipsisanniarlutillu, allat taamaallaat saattuarniarlutik. 2022-mi angallatit 30-it umiatsiaararlu ataaseq 100 kiilut sinnerlugu aalisarput.

Saattuarniarnermi PNNP-mik aaqqissuussinerup eqqunneqarneratigut angallatini ataasiakkaani aningaasaqarneq annertuumik pitsaanerulissasoq naatsorsuutigineqarpoq, tassa aalisarneq naatsorsuutigisatut ineriartorpat. Sinerissamut qanittumi saattuarniarnermi PNNP-mik aaqqissuussinermik eqqussineq naatsorsuutigineqarpoq, imminut akilersinnaanerup isumalluutinillu iluanaarutit malunnaatilimmik qaffannerisa saniatigut, aalisartut aalajangersimasunik siumullu nalunanggereersunik tunngaveqalissasut, kiisalu nutaamik aningaasalersuinernut taarsigassarsinikkut aningaasalersuinissamut periarfissaqalissallutik. Tassungali atatillugu pingarpoq aalisarnerup uumassuseqarnikkut illersorneqarsinnaasumik aqunneqalernissaa, tassa imaappoq TAC aamma pisassiissutit ilisimatuussutsikkut siunnersuinermiit qaffasinnerutinnejarnatik.

Ukiuni kingullerni tallimani saattuarniarnermiit pitsaanerpaat pingasut tunuliaqtaralugit pisassiissutit pigisat agguarneqarpata angallatit katillugit 76-it TAC-ip 0,000005 %-ianit 13,2 %-ianik pisassiissutinit pigisanik pissarsissapput. Angallatit pitsaanerpaat arfinillit TAC-mit tamarmiusumit 49 %-iata missaanik pisassiissutinit pigisanik pissarsissapput.

Aalisartut ingerlalluarnerpaat aalisartunit ingerlalluannginnerusuniit pisassiissutinit pigisanik pisinissaat naatsorsuutigineqarpoq, taamaalilluni ingerlataqartut amerlassusii ikilillutik, pisassiissutiniillu iluaqteqarnermiit sinneqartoortit tamarmiusut qaffallutik. Pisassiissutinut qummut killiliussat 17 %-imut aalajangerneqarput, taamaalilluni saattuartassiissutit annerpaaamik piginnittunut arfinilinnut eqiterunneqarluni. Pisassiissutinut qummut killiliussat maannakkut aalisarnermiit qaffasinnerpaamik isumalluutinit iluanaaruteqarnissamik killiliinissaa naatsorsuutigineqanngilaq.

Saattuarniarnermi PNNP-mik aaqqissuussinerup eqqunneqarneratigut angallatinut taamaallaat saattuarniutinut pisassiissutit eqiterunnissaat naatsorsuutigineqanngilaq. Qularnanngitsumik angallatit ilai ataqtigiissitsilluni aalisarnermik suli ingerlataqassapput. Tamatumta kingunerisinhaavaa, kikkut tamarmik taamaallaat saattuarnermik ingerlataqalernerattulli angallatit saattuarniutit amerlassusiisa ikilissasut.

3.4.1 Pisortanut aningaasaqarnikkut kingunissaa immikkut pillugu

3.4.1.1 Pisortat aningaasaqarnerat

Siunissami qaninnerusumi saattuarniarnermi PNNP-mik eqquissineq aaqqissuussinerup pilersinneranut, pisassiissutit agguarnerinut aamma naammagittaalliutit suliarinerinut atatillugu 0,5 mio. kr.-t missaat tikillugit pisortat ataasiarlutik aningaasartuuteqarnerinik kinguneqassaaq. Siunissami ungasinnerusumi saattuarniarnermik aqtsinermi ukiumut 0,3 mio. kr.-inik aningaasartuutit apparnissaat naatsorsuutigineqarpoq. Pisassiissutit pillugit nittartakkamik pilersitsinermut aningaasartuutit paassisutissat pillugit immikkoortumit takuneqarsinnaapput.

Saattuarniarnermi PNNP-mik eqquissineq pisassiissutinit pigisat angallatinut arfinilinnut-aqaneq marlunnut eqterullutik siunissami ungasinnerusumi aalisarnermi tulluarsaanermik kinguneqassappat, inuit ingerlatseqatigiiffiillu akileraarutaasa qaffannerisa malitsigisaanik pisortat isertitaat ukiumut 5 mio. kr.-it missaat tikillugit qaffassasut naatsorsuutigineqarpoq.

3.4.1.2 Allaffissornikkut kingunissai

Siunissami qaninnerusumi pisassiissutit agguarnerinut aamma naammagittaalliutit suliarinerinut, pikkorissarnernut aamma pilersitsinermut aaqqissuussinermilu pioreersumi ataqtigiissitsinermik ingerlatsinermi suliassat qaffassasut naatsorsuutigineqarpoq. Siunissami ungasinnerusumi saattuarniarnermi PNNP-mik eqquissineq pisortat allaffissornerisa annikillineranik kinguneqassasoq naatsorsuutigineqarpoq.

3.4.2 Inuuussutissarsiortunut aningaasaqarnikkut kingunissai immikkut pillugit

3.4.2.1 Isertitat

Saattuarniarnermi PNNP-p eqqunneqarnera siunissami qaninnerusumi isertitanut sunniuteqarnissaq naatsorsuutigineqanngilaq.

Saattuarniarnermi PNNP eqqunneqarpal siunissami ungasinnerusumi aalisarnermi piginnaasat tulluarsarnerinik kinguneqassaaq, pisassiissutinit pigisat angallatinut arfinilinnut-aqqaneq marlunnut katersuullutik, tamanna siunissami ungasinnerusumi ukiumut aalisarnermi 20 mio. kr.-it tikillugit isertitat (akissarsiat sinneqartoortillu) qaffannerinik kinguneqassasoq naatsorsuutigineqarpoq.

3.4.2.2 Sulisoqarneq

Siunissami qaninnerusumi saattuarniarnermi PNNP-p eqqunneqarnera sulisoqarnikkut kinguneqassasoq naatsorsuutigineqanngilaq.

Siunissami ungasinnerusumi saattuarniarnermi PNNP-p eqqunneqarnera saattuarniarnermi sulisut annikitsumik apparnerinik kinguneqarsinnaavoq.

3.4.2.3 Allaffissornikkut kingunissaa

Aaqqissuussinerup nutaap pisassiissutillu pillugit nittartakkap saniatigut saattuarniarnermi PNNP inuussutissarsiortunut allaffissornikkut kinguneqartitsinissaq naatsorsuutigineqanngilaq.

3.5 Piginnituunerup pisassiissutinullu qummut killiliussat nutaamik naatsorsorneqartalerneri

Pisassiissutinik pigisanik piginnituunerup siaruartinnissaanik siunertaqartut suliniutit arlallit eqqunneqarput. Immikkoortumi matumani allannguutit taakku arlallit kingunissai allaaserineqarput;

- Pisassiissutinit pigisanik piginnituunerup naatsorsornissaanut periuseq, taamaalilluni 50 % inorlugu piginnituuneq aalajangiisumillu sunniuteqarneq ingerlatseqatigiiffit pisassiissutinik tamakkiisumik piginnituunerinut siunissami ilaatillugit naatsorsorneqartalerlutik.
- Kalaallit Nunaata Kitaani raajarniarnermut tamarmiusumut pisassiissutinut qummut killiliussat 20 %-inut aalajangerneqarlutik.
- Kalaallit Nunaata Kitaani avataasiorluni raajarniarnermut qaleralinniarermilu ataqatigiissitsinermi pisassiissutinut qummut killiliussat 20 %-imut aalajangerneqarlutik.
- Inummut pisassiissutinut qummut 10 %-inut aalajangerneqarlutik.

Raajarniarnermi piginnituunermik nutaamik naatsorsuisarneq aamma pisassiissutinut 20 %-imik qummut killiliineq

Raajarniarnermi piginnituunermik nutaamik naatsorsuisarneq aamma pisassiissutinut 20 %-imik qummut killiliineq peqqutaalluni Polar Seafood Greenland A/S aktianik tunisisariaqarpoq imal. piginneqataasutut TAC'ip 8 %-ia (8.500 tons miss. 2023-mi raajanut TAC malillugu). Polar Seafood A/S pisassiissutinut qummut killiliussat 20 %-it sinnerlugit toqqaannartumik pigisaqanngilaq, kisianni ingerlatseqatigiiffini allani piginneqataaffigiunnaarfiusussani piginneqataassuteqarlutik.

Polar Seafood A/S-ip ingerlatseqatigiiffiini annaasaqarsinnaanerit saniatigut ingerlatseqatigiiffiit mikinerusut piginnittooqataassutsip saniatigut qularnangitsumik aamma piginnaasanut aningaasaatinullu periarfissatik annaassavaat, taakkulu allani nassaarisariaqassallugit.

Ataqatigiissitsinermi pisassiissutini qummut killiliussat

Kalaallit Nunaata Kitaani avataasiorluni qaleralinniarnermut raajarniarnermullu ataqatigiissitsilluni pisassiissutinut qummut killiliussat 20 %-it equnneqarput. Qulaani allaaserineqartutut immikkut raajarniarnermut pisassiissutini qummut killiliussat 20 %-it equnneqarput, Kalaallillu Nunaata Kitaani avataasiorluni qaleralinniarnermut immikkut pisassiissutinut qummut killiliussat inassutigineqarnatik. Tamatuma kingunerisaanik ingerlatseqatigiiffiit raajartassiissutinik assersuutigalugu 20 %-inik pigisaqartut tamatuma saniatigut avataasiorluni qaleralinniarnermi pisassiissutinik annerpaamik 20 %-imik pigisaqarsinnaallutik. Peqatigisaanik tamanna isumaqarpoq ingerlatseqatigiiffiit raajarniarnermi aamma pisassiissutinik pigisanik pigisaqanngippata avataasiorluni qaleralinniarnermi pisassiissutinik qanoq annertutigisunik ingerlatseqatigiiffiup ataatsip pigisaqarnissaanut killiliisoqanngitsoq. TAC-mut naleqqiullugu raajani TAC-ip annertussusaa pissutigalugu avataasiorluni qaleralinniarnermi pisassiissutinit pigisanit taamaaqataanit raajarniarnermi pisassiissutinit pigisat maannakkut qaffasinnerujussuarmik naleqarput.

Pisassiissutit avataani qaleralinnut PNNP-mut atatillugu ukiuni kingullerni tallimani aalisarnerit pitsaanerpaat pingasut tunngavigalugit agguanneqarpata Polar Seafood 15,5%-it missaannik pisassinneqassaaq, illuatungaanili Sigguk A/S, Polar Seafood A/S-imit affarmik pigineqartoq 21,2 %-it missaannik pisassinneqassalluni.

Pisassiissutinut qummut killiliussap kingunerisaanik Polar Seafood avataani qaleralinniarnermi pisassani tuniniartariaqarpai taamaanngippalluunniit Sigguk A/S-imik piginnittooqataanini ilaannakortumik iperarlugu. Ataatsimut isigalugu Polar Seafood A/S-ip piginneqataassutit pisassalluunniit TAC-ip 6%-iatut annertutigisut tuniniassavai.

3.5.2.1 *Inummut pisassiissutit killiliussat*

PNNP atorlugu aalisarnerni tamani piginnittuunermut 10 %-imik pisassiissutinut inummut qummut killiliussat eqqunneqarput. Inummut pisassiissutini qummut killiliussani ilaqtat qanigisat ilaapput, angajoqqaat, meeqqat, aappat qatanngutillu inuttut ataatsitut isagineqarlutik.

Inummut pisassiissutini qummut killiliussat inummut pisassiissutinut qummut killiliussanit annertunerusunik pigisaqartunut ilaqtariinnut pingasunut kinguneqartitsissapput.

- Ilaqtariit taakku pingasut raajanut TAC-ip 5 %-iata missaanik annertussuseqartunik piginneqataassutitik imaluunniit pisassiissutinit pigisatik tunisussaassavaat. Tassani tunngavigineqarpoq ilaqtariit marluk raajarniarnermi piginnittuunerup naatsorsornera aamma 20 %-imik pisassiissutinut qummut killiliussat pillugit qulaani malittarisassat malitsigisaannik pisassiissutinit pigisatik tunereersimavaat.
- Tamatuma saniatigut ilaqtariit taakku pingasut tamarmik immikkut ingerlatseqatigiiffinni allani piginneqataassutitik imaluunniit pisassiissutinit pigisatik avataasiorluni qaleralinniarnermi pisassiissutit 2%-it aamma 4%-it akornanniittunut naapertuuttut tunisariaqassavaat. Katillugit inummut pisassiissutinut qummut killiliussat malitsigisaannik pisassiissutinit pigisanut imaluunniit piginneqataassutinut TAC-ip 9%-ianut naapertuuttunut piginnittussanik nutaanik nassaartoqassalluni.
- Kiisalu saattuarniarnermi ilaqtariit ataatsit akuersissutini arlalinni agguarsimasut saattuarniarnermi TAC-ip 6 %-iata missaannut naapertuuttut piginneqataassutit imaluunniit pisassiissutinit pigisat tuninissaat naatsorsuutigineqarlni.

Ingerlatseqatigiiffiit imaluunniit inuit ataasiakkaat pisassiissutinit pigisatik imaluunniit piginneqataassutitik ingerlatseqatigiiffinnut ataasiakkaanut pisassiissutinit pigisat nalinginut naapertuuttumik tunisinnaanngippatigit tamanna ingerlatseqatigiiffinnit taakkunannga pigisat nalillit pisassiissutinit pigisanik nutaatut piginnittunut agguateqqinnerinik kinguneqassaaq. Ingerlatseqatigiiffiit namminersortut, inatsisisstatut siunnersuutikkut annaasaqartut, annaasaqarnermut taarsiiffigitinnissamik piumasaqarsinnaasut aamma eqqartuussivimmi suliami ajugaassappata taarsiissutissat annertussusaannik kiisalu suliassami aningaasarutut ilanngullugit inatsisisstatut siunnersuut pisortat aningaasaqarnerannut artukkiissaaq. Peqatigisaanik ikaarsaarnermi aaqqissuussinerup eqqunneqartup malitsigisaanik taamatut taarsiinissaq pillugu piumasaqarsinnaanerit annikitsuinnartut isagineqarput.

Tunumi raajarniarnermi nammineq pisassat qummut killilerneqanngillat. Pisassiissutit kalaallit ingerlatseqatigiiffiitaannut sumiiffimmi matumani nuunneqartut annikitsuararsuupput qummullu killilersuisoqalissappat ingerlatseqatigiiffinni piginnittuunermi naapertuutinngitsumik killilersuisoqalissalluni.

3.5.1 Pisortanut aningaasaqarnikkut kingunissai immikkut pillugit

3.5.1.1 Pisortat aningaasaqarnerat

Immikkut Royal Greenland-ip isiginiarneqarnissaa siunertaralugu immikkut malittarisassaliortoqassamat, piginnittuunermik nutaamik naatsorsuisarneq aamma pisassiissutinut qummut killiliineq pisortat aningasaqarnerannut sunniuteqarnissaa naatsorsuutigineqanngilaq.

3.5.1.2 Allaffissornikkut kingunissaa

Piginneqataassutinik nutaamik naatsorsuisalernerit aamma pisassiissutinut qummut killiliussat nutaat pisortanut allaffissornikkut kinguneqartitsissasut naatsorsuutigineqanngilaq.

3.5.2 Inuussutissarsiortunut aningasaqarnikkut kingunissai immikkut pillugit

3.5.2.2 Isertitat

Piginnittuunermik naatsorsuisarneq pisassiissutinullu qummut killiliussat nutaat isertitanut kinguneqartitsisussatut naatsorsuutigineqanngillat.

Taamaattorli naatsorsuutigineqarluni suliniutit pigisat nalillit maannakkut pisassiissutinit pigisanik piginnittuniit nutaanut agguateqqinnerinik kinguneqarumaartut.

3.5.2.3 Sulisoqarneq

Siunissami qaninnerusumi allannguutit sulisoqarnermut kinguneqartitsinissaat naatsorsuutigineqanngilaq.

Siunissami ungasinnerusumi aningaasalersuinerni killeqartitsinerit malitsigisaannik piginnittuunermik naatsorsuinerit pisassiissutinullu qummut killiliussat nutaat aalisarnermi sulisoqarnikkut piumasaqarfiusumik kinguneqarsinnaapput. Taamaattoqassappat sulisut amerlinerinik kinguneqarsinnaassaaq.

3.5.2.4 Allaffissornikkut kingunissai

Piginnittuunermi naatsorsuisarneq pisassiissutinullu qummut killiliussat nutaat naatsorsuutigineqanngillat inuussutissarsiortunut allaffissornikkut kinguneqartitsissasut. Pisassiissutinilli piginnittut nutaat siunissami ungasinnerusumi naatsorsuutigisariaqarpoq piginnaasanik pisariaqartunik pissarsisiaqassasut imaluunniit pisisariaqassasut.

3.6 Aalisarnerni tamani kalaallit 100 %-imik piginnittuuneri

Inatsisikkut aalisarnerni tamani kalaallit 100 %-imik piginnittuunissaat eqqunneqarpoq, siunissamilu kalaallit aalisartut aningasaatinut periarfissaqarnerat killeqassalluni, taamaalilluni nunanit allaniit piginneqataasunit aningaasalersuineq aalisarnerni tamani periarfissaajunnaassalluni. Suliniutip taassuma piginnittuunani aningaasalersuinissamut

periarfissaq allanngortinngilaa, tassa pingaartumik aningaaserivinniit aningaasaliisartuniillu allaniit taarsigassarsinikkut.

Kalaallit 100 %-imik piginnittuunissaat pillugu piumasaqaat raajarniarneq pillugu inatsisini atuuttuni atuutereeropoq, nunanillu allaniit aningaasaatinut periarfissap killeqartinneqarnera siunissami aalisarnernut tamanut eqquissalluni.

Kalaallit Nunaat annertuumik aningaasaqarfiumgimmat, aalisarnermi ineriertornermut nutarterinermillu naleqqiullugu, nunap iluani aningaasaliisinnaasut amerlassusaat killeqartussaapput. Tamatuma saniatigut aningaasaatinut periarfissanut killeqartitsineq naammassisqarsinnaassutsikkut ineriertornermik unikaallatsitsissaaq peqatigisaanillu aalisartunut inuusuttunut aalisarnermut periarfissaqarnerat ajornarnerulersillugu.

Aalisarnermik ingerlataqarnermiipput akuusut pingaarutilit marluk, aningaasaatit sulisinnaasullu. Aningaasaatit sulisullu akornanni pissutsit aalisarnermik ingerlataqarnermi sinneqartoortutigut aalajangersimasumik killiliisarput.

- Allanut naleqqiullugu aalisarnermi annertuumik aningaasaliiffiusumut, qaffasissumik sinneqartoofiusumut assersuutitut eqqaaneqarsinnaapput avataasiroluni raajarniarneq qaleralinniarnerlu.
- Allanut naleqqiullugu aalisarnermi annertuumik sulisoqarfiusartunut, appasissumik sinneqartoortsisartunut assersuutitut eqqaaneqarsinnaavoq sinerissamut qanittumik saarullinniarneq.

Aningaasaliissutaasinnaasunut periarfissaq suli annertunerusumik killilerneqarpat aningaasaaliissutaasinnaasut akisunerulertut aalisarnermi misigneqassaaq (erniat imaluunniit iluanaaruteqarnissamut piumasaqaatit qaffasinnerusut), sulisinnaasunut assersuullugit. Tamanna siunissami ungasinnerusumi ima sammiveqalersitsissaaq aalisarneq annertuumik aningaasaliiffijunnaarluni, tamannalu pissappat, aalisarnermi imminut akilersinnaaneq isumalluutinillu iluanaarutit qularnanngitsumik annikillissallutik. Piviusumik tamatuma kingunerissavaa aningaasaatinut killilersuisoqannginneranut naleqqiullugu siunissami angallatini mikinerusuni pisoqaanerusunilu aningaasaliisoqartalernissaa. Angallatit pisoqqat mikinerusullu annikinnerusumik piginnaasaqarput qaffasinnerusumillu ingerlatsinermi aningaasartuutaasarlutik, sinneqartoortillu aalisarnermilu inuttaqarneq annikinnerulerlutik.

Aningaasaatinut periarfissat killeqalernerisa saniatigut nunat allamiut aningaasaataannut inerteqquteqalerneq naatsorsuutigineqarpoq aalisarnerup ingerlalluarnissaanut iluaquaasinaasunik aammalu tunitsivitsigut attaviit anginerusut aqqutigalugit akit qaffasinnerusut angunissaannut piginnaasanut ilisimasanullu periarfissat annikillissasut.

Siunissami qaninnerusumi avataasiornermik aalisarnermik ingerlatseqatigiiffinni pingasuni nunat allamiut piginnejqataassutaat ukiut tallimat iluanni piginnejqataassuteqarnertik

tunisussaavaat. Aningaasalersuinerup angallatillu annaaneqarnissaannut ikinnerpaamik pisuni ataatsimi aarlerinarsinnaavoq. Tamanna tunuliaqutaralugu ilimanarluinnarpoq inatsimmi § 11, imm. 2-mi immikkut akuersinissamut periarfissap atorneqarnissaa tulluarsinnaasoq. Aalajangersagaq taanna malillugu kalaallit 100 %-imik piginnittuunissaannit Naalakkersuisut immikkut akuersisinnapput, siunertaavorlu ingerlatseqatigiiffiup kalaallit aningaasaataannik nassaarsinnaannginna nunanilu allani aningaasaatit ingerlatseqatigiiffimmut inuaqatigiinnullu iluaqutaasinnaasutut nalilerneqarpat aalajangersagaq taanna atorneqassasoq.

Paarlattuanik iluarnerusumullu aningaasaliisinnaanermut periarfissat pitsaanerulernissaat, inatsimmi soraarnerussutisiaqalernissamut aningaasaateqarfiiit aqqutigalugit periarfissaalertussaallutik, takuuk immikkoortoq 3.9.1.

3.6.1 Pisortanut aningaasaqarnikkut kingunissai immikkut pillugit

3.6.1.1 Pisortat aningaasaqarnerat

Royal Greenland A/S, Pelagic Greenland A/S peqatigalugu saarullinniarnermi peqataasoq, ingerlatseqatigiiffimmut tassunga piginneqataasussanik nutaanik nassaarnissamut pinngitsaalineqassaaq, ullumikkut Islandimit piginneqataaffigineqartoq. Naatsorsuutigineqarpoq Pelagic Greenland A/S-imi sinneqartoorutit tamatuma annikillisissagai taamaalillunilu Royal Greenlandimi. Kinguneqartitsinerilli taakku marluullutik § 11, imm. 2-mi immikkut akuersinissap atorneqarneratigut pinngitsoortinnejarsinnaapput, soorlu aamma ikaarsaarnermi aaqqissuussineq ingerlataqartut piumasaqaatinut nutaanut aaqqissuussinissaannut periarfissiissasoq.

Siunissami ungasinnerusumi aalisarnerup aningaasaatinut periarfissanut killiliineq naatsorsuutigineqarpoq, 100 %-imik kalaallit piginnittuunissaat pillugu piumasaqaatikkut, § 11, imm. 2 malillugu immikkut akuersisoqanngippat, pisortat isertitaanni aallaaviatigut appariartoqassasoq.

Pisortani isertitat apparneri aalisarnermi inuussutissarsiutinilu allani isertitaniit akileraarutitigut iluanaarutit apparnerinut tunngasuupput.

3.6.1.2 Allaffissornikkut kingunissai

Kalaallit 100 %-imik piginnittuunissaat pillugu piumasaqaatip eqqunneqarnera naatsorsuutigineqanngilaq pisortat aningaasaqarnerannut allaffissornikkut kinguneqartitsissasoq.

3.6.2 Inuussutissarsiortunut aningaasaqarnikkut kingunissai immikkut pillugu

3.6.2.1 Isertitat

Aalisarnerni tamani kalaallit 100 %-imik piginnittuunissaat pillugu piumasaqaatip eqqunneqarnera naatsorsuutigineqanngilaq siunissami qaninnerusumi isertitanut kinguneqartitsissasaoq.

Siunissami ungasinnerusumi aalisarnerni tamani kalaallit 100 %-imik piginnittuunissaat pillugu piumasaqaatip eqqunneqarnerata kingunerissavaa isertitat inuiaqatigiinnut pitsaanngitsumik sunniuteqarneq, aalisarnerit allanut naleqqiullutik annertuumik aningaaasakiiffiqartunarunnaarnerisa malitsigisaanik, nunanit allanit piginnittut atuussinnaanerinut naleqqiullugu.

3.6.2.2 Sulisoqarneq

Kalaallit 100 %-imik piginnittuunissaat pillugu aalajangersakkap eqqunneqarnerata kingorna, tunitsivimmik ingerlatsinissaq pillugu piumasaqaammut akuersisummut atassuteqarfiusut tunuartitissappata, umiarsuaatileqatigiiffimmut ataatsimut amerlanernulluunniit naleqqiullugu kinguneqartitsisinnaanerit alaatsinaanneqartariaqarput. Taamatut pisoqassappat siunissami qaninnerusumi Kujataani nunami suliffissuarmi sulisut ikilinerinik kinguneqarsinnaavoq. Tamatuma saniatigut allannguut tunitsivissamut periarfissaaruppat Kujataani sinerissamut qanittumi aalisarnermut siunissami qaninnerusumi kingunerlutsitsisinnaavoq.

Siunissami ungasinnerusumi kalaallit 100 %-imik piginnittuunissaat pillugu piumasaqaatip eqqunneqarnera, aalisarnerup sulisunik amerlanernik pisariaqartitsilernerata malitsigisaanik (annertuumik aningaaasakiiffijunnaarluni) aalisarnermi sulisut qaffariarnerinik tunngaviatigut kinguneqassaaq.

3.6.3 Aningaasalersuineq

Siunnersuut suliniutinik arlalinnik imaqarpoq aalisariutinik ineriertortitsinerup aningaasalersornissaanut siumut sammisumik periarfissanut kinguneqartitsisussatut naatsorsuutigineqartunik.

Qulaani allassimasut suliniutit aamma piginnittuuneq aamma pisassiissutinut qummut killiliussat pillugit malittariassat ataatsimoortinnerisa kingunerisaannik aalisarnermi pissutsit aningaasaatitigut qaffasinnerusumik aningaasartuuteqarnikkut ajornerusumik inissismalersinnaapput. Ataatsimut isigalugu suliniutit, aalisarnermi piginnittuunerup siaruartinnissaanik siunertaqartup kingunerisaanik sulisinnaasunut aningaasaatini aningaasartuutit (ningaasaatit akii) qaffannerinik kinguneqarsinnaapput. Killilersuinerit malitsigisaannik aningaasaatitigut qaffasinnerusumik aningaasartuuteqarneq pissutigalugu aalisarnermi ilanngunneqartussat aningaasaatinik kivitsinissaq aalisartunut inuuusuttunut suli ajornarnerulissaq. Taamaattorli naatsorsuutigineqarluni aningaasalersuinissamut periarfissat ukiut arlallit qaangiuppata pissutsinut nutaanut tulluarsarsinnaassasut, ilaatigut aalisarnermi piginnittutut ilaanngitsunik, sulili najuuttunik aningaasalersuisarfiit ilaatigut aqqutigalugit.

Tamatumali suliniutit ataatsimoorlutik, pissutsit allanngunngippata, aalisarnermi aningaasaatitigut aningaasartuutit qaffannerinik kinguneqartitsissallutik.

Rajarniarnermi pisassiissutinit pigisani aamma angallatini tunisassiorfiusuni aningaasalersuinissamut nunatsinni aningaasaatinik nutaanik nassaartoqassappat tamatuma kalaallit aalisarnerisa sinnerini aningaasalersuinissamut pissarsiarineqarsinnaasumut aningaasaatit annertussusaat killeqassapput. Tamatuma saniatigut aalisarnermi aningaasaatitigut annertuumik pisariaqartitsinerup, pissutsit allanngunngippata, kingunerissallugu inuussutissarsiortunit allaniit aningaasaatit pilerisutsilerneri, tassani sinneqartoorutit apparnerinik kinguneqartussaq.

Pingaartumik aningaasalersuinermut naleqqiullugu tulluarpoq aamma eqqaassallugu inatsisisatut siunnersuut soraarnerussutisiaqalernissamut aningaasaateqarfitt aalisarnermi piginneqataalersinnaanerannut ammaassimmat. Taamaattorli periarfissap taassuma aningaasaqarnikkut qanoq annertutigisumik sunniuteqarnissaa nalorninarluni, tassa inuppassuit ullumikkut piginneqataanngimmata, naak tamatumunnga periarfissaqaraluarlutik.

3.7 Pisassiissutit pillugit nittartagaq aalisarnermilu paasissutissat ingerlateqgittarneri

Qarasaasiatigut nittartakkanik nutaanik marlunnik pilersitsisoqassaaq;

- Ullutsinnut naapertuuttumik aaqqissuussineq aamma aalisarnermi paasissutissat ingerlateqqittarnissaannut nittartagaq
- Pisassiissutinik pigisanik aamma ukiumoortumik pisassiissutinik niuernermi atugassaq pisassiissutit pillugit nittartagaq.

3.7.1 Aalisarnermi paasissutissat ingerlateqgittarneri

Aalisarneq pillugu paasissutissat allanngorartuartut tamanut saqqummiuttarnissaannut aaqqissuussinermik pilersitsisoqassaaq. Ullumikkut ingerlatsivik aamma nakkutiliisut, Pinngortitaleriffik aamma Naatsorsueqqissaartarfik LULI-mi paasissutissaasivimmut toqqaannartumik isersinnaapput. Taamaattumik oqartussanut taakkununnga nutaamik aaqqissuussinermik sananissaq pisariaqarnani.

Ingerlatitseqqinnermut nittartakkamik pilersitsinerup siullermik kingunerissavaa aalisarneq pillugu paasissutissanik arlalinnik innuttaasut takunnissinnaalerterat. Innuttaasut aalisarneq pillugu paasissutissanut katarsorneqartut ilaannut killeqartumik isersinnaassapput. Paasissutissat uummaarissumik saqqummiunneqartassapput, taamaalilluni nittartakkamik ulluinnarni ingerlatsineq aserfallatsaalialinerlu minnerpaamiitillugu annikillisillugu.

3.7.2 Pisassiissutit pillugit nittartagaq

Pisassiissutit pillugit nittartakkap aalisarnerni ukunani pigisanik aamma ukiumoortumik pisassiissutinik niuernerit isumagisinnaassavai

- Rajarniarneq

- Saattuarniarneq
- Kalaallit Nunaata Kitaani avataasiorluni qaleralinniarneq
- Kalaallit Nunaata Kitaani sinerissamut qanittumi qaleralinniarnerup ilaa

Nittartakkami pisassiissutinik pigisanik pisinerit tunisinerillu aamma ukiumoortumik pisassiissutit (ilaanik) nalunaarsuissaq; kisianni aamma ingerlataqartup ataatsip pisassiissutinit pigisaminik imaluunniit ukiumoortumik pisassiissutimi (ilaanik) tuniniaanissaanut periarfissiisoqarluni, nittartagarlu aqqutigalugu niuerutigineqarlutik. Tamatuma saniatigut suliariumannittussarsiuussineq aqqutigalugu Naalakkersuisut tunerusutaannik pisassiissutinik pigisanik tuniniaanermut nittartagaq atorneqarsinnaassalluni. Inassutigineqarpoq pisassiissutit pillugit nittartagaq sullissivik.gl-imi nammineq sullissivittut aaqqissuunneqassasoq, aamma nuna tamakkerlugu qarasaasiaqarnikkut periusissiamit ikorfartorneqarluni. Nittartagaq ineriertortinnejassaaq taamaalilluni sapinngisamik annertuitigut nammineq ingerlasussanngorlugu. Taamaalilluni qulaani allassimasuni aalisarnerni siunissami ungasinnerusumi aqtsinermut isumalluutinik atuinissaq annikillisillugu.

3.7.1 Pisortanut aningaasaqarnikkut kingunissaa immikkut pillugu

3.7.1.1 Pisortat aningaasaqarnerat

Qarasaasiaqarnikkut tunngavinnik nutaanik marlunnik pilersitsineq pisortanut 4-7 mio. kr.-inik ataatsimut aningaasartuutaanissa naatsorsuutigineqarpoq.

- Paassisutissanik saqqummiussinermut *nittartakkamik* pilersitsineq naatsorsuutigineqarpoq aserfallatsaaliiinermut ineriertortitsinermullu pisortat 0,5 mio. kr.-inik aningaasartuuteqassasut.
- *Pisassiissutit pillugit nittartakkamik* pilersitsineq naatsorsuutigineqarpoq aserfallatsaaliiinermut ineriertortitsinermullu 0,5 mio. kr.-inik pisortat aningaasartuutaasa qaffannerinik kinguneqassasoq. Peqtigisaanik PNNP-mik aalisarnernik aqtsinermut pisortat aningaasartuutaat ukiumut 0,5 mio. kr.-it tikillugit appassasut naatsorsuutigineqarluni.

Pilersitsinermut ataasiarluni aningaasartuuteqarnissaq 4-7 mio. kr.-iussasut aqtsinermullu aningaasartuutit 0,5 mio. kr.-inik ilanngaareerluni qaffassasut naatsorsuutigineqarpoq.

3.7.1.2 Allaffissornikkut kingunissai

Pilersitsineq ingerlatsivimmi killeqartumik isumalluutinik atuinissa naatsorsuutigineqarpoq, maannakkut sinaakkusiussat iluini aningaasartutigineqarsinnaasut. Pilersitsinerup kingorna ingerlatsinermut aaqqissuussinerillu aserfallatsaaliornerinut ukiup affaani sulisumut naapertuutumik isumalluutinik pisariaqartitsissasut naatsorsuutigineqarluni.

3.7.2 *Inuussutissarsiortunut aningaasaqarnikkut kingunissaai immikkut pillugu*

3.7.2.1 Isertitat

Nittartakkatigut tunngavinnik marlunnik pilersitsineq inuussutissarsiortuni isertitanut pingaaruteqarnissaai naatsorsuutigineqanngilaq.

3.7.2.2 Sulisoqarneq

Nittartakkatigut tunngavinnik marlunnik pilersitsineq sulisoqarnermut pingaaruteqartussatut naatsorsuutigineqanngilaq.

3.7.2.3 Allaffissornikkut kingunissai

Aaqqissuussinerit atorneqarnissaasa ilinniarnissaasa sulinerup saniatigut nittartakkatigut tunngavinnik marlunnik pilersitsineq inuussutissarsiortunut pingaaruteqarnissaai naatsorsuutigineqanngilaq.

3.8 *Atorunnaarsitsinissamik kalerriineq*

Piffissamut killiligaanngitsumut akuersissutit tassungalu atasut pisassiissutinit pigisat piffissamut killeqartinneqalerput. Taamatut allannguinerup malitsigisaanik pisassiissutinit pigisat ingerlaannaq atorunnaarsinnejqanngillat, kisianni avataasiorluni aalisarnerni atorunnaarsitsinissamut kalerriinissap aalajangernissaanut ukiut quliussallutik. Akuersissut ukiumiit ukiumut nutarterneqartarpooq, ukiullu qulissaanni piumasaqaatinini allannguisoqassalluni, taamaattorli imatut iluseqassalluni ingerlataqartut piffissami akuersissuteqarfiusumi tulluarsarnissamut piffissalerneqassallutik.

Ullumikkut piffissamut killiligaanngitsumut akuersissutit “pisusissamisoortumik kalerriinikkut” utertinneqareersinnaapput, malittarisassallu nutaat ingerlataqartut pilersaarusiornissamut aningaasalersuinissamullu periarfissaannik allannguimmata, taakku inuussutissarsiortut aningaasaqarnerannut pingaaruteqarnissaai naatsorsuutigineqanngilaq.

Piginnituuneq pillugu malittarisassat nutaat – pisassiissutinut qummut killiliussat toqqaannanngitsumillu piginnituunerup ilanngunneqarnera – aningaasalersuinissamut periarfissaqarnermut killiliisut, ingerlataqartut piumasaqaatinut nutaanut tulluarsaanissamut periarfissaqarnissaannut sivisussuseqartumik ikaarsaarnermi aaqqissuussineq eqqunneqarpoq.

3.8.1 Pisortanut aningaasaqarnikkut kingunissai immikkut pillugit

3.8 Pisortat aningaasaqarnerat

Siunissami qaninnerusumi piffissamik killiliinerup malitsigisaanik pisortat aningaasaqarnerannut kinguneqartitsinissa naatsorsuutigineqanngilaq. Piffissap akuersissuteqarfiusup kingorna ingerlataqartunut piumasaqaatit Naalakkersuisunit allanngortinnejarpata, allannguinerit akuliunneruallaarpata tamanna taarsiisoqarnissaanik piumasaqarnermik kinguneqarsinnaavoq, tamannalu pisortat aningaasaqarnerannut kinguneqartitsissalluni. Taamaattumik politikkut allanngortinnejarusuttut piumasaqaatit allanngortinnerinut tamanut atatillugu taamatut pisoqarsinnaanera sukumiisumik naliliiffineqarnissa pingaarluinnarpoq.

Ikaarsaarnermi aaqqissuussinerup piffissamillu killiliinerup malitsigisaanik pisortat isertitaanni allannguisoqarnissa pissutaasut qulaani eqqaaneqartutut naatsorsuutigineqanngilaq.

3.8.1.2 Allaffissornikkut kingunissai

Suliniutip pisortanut allaffissornikkut kinguneqarnissa naatsorsuutigineqanngilaq.

3.8.2 Inuuussutissarsiortunut aningaasaqarnikkut kingunissai immikkut pillugit

3.8.2.1 Isertitat

Suliniutip isertitanut kinguneqartitsinissa naatsorsuutigineqanngilaq.

Suliniutip sulisoqarnermut kinguneqartitsinissa naatsorsuutigineqanngilaq.

3.9 Allannguutit allat

Qulaani allaaserineqartut allannguutit annertunerusut saniatigut tulliuttumi immikkoortut allanneqartut pisortanut aningaasaqarnikkut kinguneqartitsisinnaapput.

3.9.1 Soraarnerussutisiaqalernissamut aningaasaateqarfinit aningaasalersuinissamut periarfissaqarneq

Soraarnerussutisiaqalernissamut aningaasaateqarfuit aqqutigalugit aalisarnermi ingerlatseqatigiiffinni aningaasalersuinissamut periarfissaqarnermi aalajangersimasumik annertussuseqartumik aalisarnermi aningaasalersuinermut aningaasaatit pissarsiarineqarsinnaasut annertusissasut naatsorsuutigineqarpoq. Aalisarnermi aningaasalersuinissamut soraarnerussutisiaqalernissamut aningaasaateqarfuit periarfissaqarnerat piginnittuunerup nutaamik naatsorsornerata malitsigisaanik piginneqataassutinik pisassiissutinillu pigisanik tunisinermut kingunerlutsitsinernut illuatungiliisinnaapput. Taamaalilluni suliniut aalisarnermi annikinnerusumik aningaasalersuiffiunissaanut iluaqutaasinnaavoq, piginnittuunerullu naatsorsornissaanut periutsip nutaap malitsigisaanik tamanna ingerlalluannginnerulerluni. Ataatsimulli isigalugu

suliniut siunissami ungasinnerusumi pisortat aningaasaqarnerannut inuussutissarsiortunullu ajunngitsumik kinguneqartitsissasoq naatsorsuutigineqarluni. Tamatumali pingaaruteqarnerata annertussusilernissaa ajornakusoortorujussuulluni.

3.9.2 Inuussutissarsiortluni aalisarnermi atorneqartut umiatsiaaqqat nalunaaqutsersorneri nalunaarsugaalernerilu

Inuussutissarsiutigalugu aalisarnermi atorneqartunik 6 meterinik naannerusut umiatsiaaqqat tamarmik nalunaaqutsernissaat nalunaarsugaanissaallu pillugu piumasaqaat eqqunneqarpoq. Nalunaaqutsersuinerup nalunaarsuinerullu inuussutissarsiutigalugu aalisarnermut naleqqiullugu akuersisummik piginnittup umiatsiaaqqallu akornanni naapertuuttoqarneranik qulakkeerinissaq naatsorsuutigineqarpoq. Tamatuma saniatigut umiatsiaararsorluni aalisarnermi piviusumik piginnaasamik ingerlatsiviup pitsaunerumik paasisaqarnissaa naatsorsuutigineqarpoq. Piginnaasap isumalluutitigut tungavimmut tulluarsarnissaanut naleqqiullugu pingaaruinnarpoq piginnaasamut tunngasunik paasissutissanut periarfissaqarnissaq.

Allanngueq naatsorsuutigineqarpoq paassisutissaasivimmik pilersitsinermut, normut naqinnerinut, nassiuuinernut, allaffissornermut ilitsersuinermullu il.il. pisortat 1,5 mio. kr.-t tikillugit ataasiarlutik aningaasartuuteqassasut.

3.10 Ataatsimut naliliineq

Siunnersuut suliniutinik arlalinnik imaqarpoq inuussutissarsiortunut kiisalu pisortanut annertuitigut pitsaasunik kinguneqartitsisinnaasunik.

Siullermik sinerissamut qanittumi maannakkut raajarniutinut angallatini 75 %-imik tunisassiorsinnaaneq ingerlatseqatigiiffit aalisartullu isertitai kiisalu pisortat isertitaasa annertuumik qaffannerinut iluaquatasinnaassapput, peqatigisaanillu sulisut annertuumik amerlassusillit inuussutissarsiutini allani naleqalersitsillutik suliersinnaallutik. Taamatut pisoqassappat pisassiissutinik pigisallit mikisut kattutissapput angallatinilu pisassiissutinilu pigisani aningaasalersuinissamut aningaasaatinik qaqtsillutik.

Kalaallit Nunaata Kitaani sinerissamut qanittumi qaleralinniarnermi PNPNP-mik eqquissineq aningaasalersuinissamut aalisartunut pitsaunerumik periarfissiissaq, aamma aalisartut sinneqartoorautaasa qaffannerinut iluaquatasinnaalluni. Tamatuma saniatigut PNPNP-mik aaqqissuussinerup kingunerissallugu sulisinnaasut amerlalluinnartut allani sulisinnaalernissaat. Tamatumunnga tunngaviusoq tassaavoq inatsisip malitsigisaanik pisassiissutit isumalluutinut tulluarsarnissaat. Taamatut pisoqanngippat aaqqissuussinerup ingerlalluarnissaanut pisassiissutit amigaatigilernissaat naatsorsuutigineqarsinnaanngilaq.

Kalaallit Nunaata Kitaani avataasiorluni aalisarnermi aamma saattuarniarnermi PNNP-mik eqquissineq aalisarneq pillugu pilersaarusiornissamut periarfissat pitsaanerusut qulakkeerneqassapput aamma nutaamik aningaasaliinernut aningaasalersuinissamut periarfissat pitsaanerulerlutik. Tamanna aalisarnerni taakkunani sinneqartoortutit inuttanullu akissarsiat qaffannerinik kinguneqassaaq, kiisalu sulisinnaasut ikinnerusut allanik sulisinnaalerterinut iluaqutaassalluni.

Taakku saniatigut piginnittuunerup naatsorsorneranut pisassiissutinut qummut killiliussat pillugit malittarisassat nutaat kingunerisaannik Kalaallit Nunaata Kitaani raajanut aamma avataasiorluni qaleralinnut TAC-it ilaannut piginnittussanik nutaanik ujarlertoqartariaqassaaq. Malittarisassat pingartumik Polar Seafoodimut kiisalu ilaqtariinnut pingasunut, malittarisassani nutaanik akuerisaasunit annertuallaanik piginnittuulertussanut eqquissapput.

Kiisalu ingerlatseqatigiiffiit inuillu kikkut aalisarnermi aningaasalersuisinnaanerinik killilersuinerit nutaat kiisalu Kalaallit 100 %-imik piginnittuunissaat pillugu piumasaqaat ilanngullugu kingunerissallugu aningaasaatitigut aningaasartuutit qaffanneri, aamma aalisarnerit ilaanni ingerlalluarnerit apparsinnaallutik. Tamatuma aalisartut nutaat aalisarnernut isersinnaanerat sapernarsisinnavaat.

3.10.5 Pisortat aningaasaqarnerat

Siunissami qaninnerusumi qarasaasiatigut aaqqissuussinernik pilersitsinermut aamma umiatsiaararsortunut PNNP-mik eqquissineq nalunaaqutsersuinerlu pisortanut 11 mio. kr.-nik ataasiartumik aningaasartuutaassasoq naatsorsuutigineqarpoq.

Siunissami ungasinnerusumi siunnersuut pisortanut imatut kinguneqartitsinissaa naatsorsuutigineqarpoq:

- Toqqaannartumik avammut niuerutigineqartussatut angallatini tunisassiarineqartut raajat annertussusiisa qaffannerisa kingunerissavaat isumalluutinit iluanaarutinit akitsuutiniit aamma akileraarutiniit pisortat iluanaarutaasa qaffanneri.
- Pisassiissutit isumalluutitigut tunngaviusunut tulluarsarneqarpata Kalaallit Nunaata Kitaani sinerissamut qanittumi qaleralinniarnermi PNNP-mik eqquissineq pisortat iluanaarutaasa qaffannerinik kinguneqassaaq.
- Kalaallit Nunaata Kitaani saattuarniarnermi aamma avataasiorluni qaleralinniarnermi PNNP-mik eqqussinermi naatsorsuutigineqarpoq inuit ingerlatseqatigiiffillu akileraarutaanniit pisortat iluanaarutaasa annikitsumik qaffannerinik kinguneqassasoq.
- Aningaasaatini aningaasartuutit qaffanneri aalisarnerup annertunnginnerusumik aningaasanik pisariaqartitsilerneranik kinguneqarsinnaavoq, tamannalu isumalluutinit iluanaarutit apparnerinik kinguneqarluni tamatumalu malitsigisaanik inuit akileraarutaanniit ingerlatseqatigiiffillu akileraarutaanniit iluanaarutit apparlutik.

Ataatsimut siunnersuut naatsorsuutigineqarpoq siunissami ungasinnerusumi inuit akileraarutaanniit, ingerlatseqatigiiffit akileraarutaanniit isumalluutinillu iluanaarutinit akitsuutiniit 320 mio. kr.-t tikillugit pisortat isertitaasa qaffannerinik kinguneqassasoq, tassa 2022-mi pisortat isertitaasa 4 %-iinut naapertuuttut. Tamatumunnga tunngaviuvoq raajanut TAC-ip 75 %-iisa avammut toqqaannartumik tunisassiarineqarnissaat sinerissamilu qanittumi qaleralinniarnermi saattuarniarnermilu piginnaasat tulluarsarneqarnissaat, kiisalu toqqaannartuungitsumik nunaniillu allanit piginneqataanerit pillugit malittarisassanit nutaat pisassiissutillu qummut killinginit aningaasaqarnikkut killilimmik sunnerneqarnissaq.

3.10.6 Allaffissornikkut kingunissai

Siunnersuut suliniutinik arlalinnik imaqarpoq pisortanut allaffissornikkut kinguneqartitsisussanik. Siullermik aalisarnerni marlunni PNNP equnneqassaaq aalisarnermilu allami ilaannakuusumik. Tassunga atatillugu naatsorsuinernik, agguassinernik, naammagittaalliornissamut periarfissanik il.il. suliassat naammassineqassapput. Taakku saniatigut pisassiissutit pillugit nittartakkamik aamma aalisarneq pillugu paassisutissanik, ingerlaavartumik aserfallatsaaliorneqartussanik ineriertortinneqartussanillu pilersitsisoqassaaq. PNNP-mik eqqussineq siunissami naatsorsuutigineqarpoq saattuarniarnermik avataasiorlunilu qaleralinniarnermut aqtsinermut pisortani isumalluutit annikinnerulissasut. Aammattaaq umiatsiaaqqanik nalunaaqutsersuisoqarlunilu nalunaarsuisoqassaaq, siunissami qaninnerusumi isumalluutinik annertuunik pisariaqartitsisussat.

Siunissami ungasinnerusumi nittartakkatigut aaqqiinerit aserfallatsaaliornerinut ingerlanneqarnerinullu kiisalu aalisarnermik aqtsinermut pisortat aningaasartuutaat 0,5 mio. kr.-it missaannik qaffassasut naatsorsuutigineqarlni.

3.10.7 Inuussutissarsiortunut aningaasaqarnikkut kingunerisassai

Isertitat

Siunnersummi suliniutit uku ataatsimut isigalugu isertitatigut kinguneqartitsissasut naatsorsuutigineqarput

- Raajartassiissutit 75 %-ii tikillugit tunisassiorsinnaanermut periarfissaqarneq naatsorsuutigineqarpoq isertitani (inuttat akissarsiaat sinneqartoortillu) annertuumik qaffannerinik kinguneqassasut.
- Saattuarniarnermi PNNP-mik eqqussineq, aamma Kalaallit Nunaata Kitaani avataasiorluni sinerissamullu qanittumi qaleralinniarnermi naatsorsuutigineqarpoq isertitat qaffannerinik kinguneqassasut. Sinerissamut qanittumi qaleralinniarnermi pitsaasumik kinguneqartitsinermut tunngaviuvoq pisassiissutit isumalluutitigut tunngavigisanut tulluarsarneqarneri.
- Kalaallit 100 %-imik piginnituunissaat pillugu piumasaqaat aamma piginnituunermi nutaamik naatsorsuisarneq aamma pisassiissutinut qummut killiliussat kingunerissavaat aningaasaatit amigaatalerner aalisarnermut aningaasaatinut aningaasartuutit qaffannerinik kinguneqarsinnaasoq, qularnanngitsumillu

naammassisqaarsinnaassuseq appasinnerulerluni tamatumalu malitsigisaanik sinneqartoorutit apparlutik.

Ataatsimut naatsorsuutigineqarpoq siunissami ungasinnerusumi 370 mio. kr.-t missaat (BNP-p 1,8%-ii) tikillugit isertitat qaffannerinik siunnersuut iluaqutaajumaartoq. Tassani tunngavigineqarpoq raajat 75 %-iisa tunisassiarineqarneri, aamma sinerissamut qanittumi qaleralinniarnermi saattuarniarnermilu piginnaasat tulluarsarneqarlutik, kiisalu aalisarnermi aningaasaatinut aningaasartuutini killeqartumik taamaallaat qaffattoqarlni.

Suliffeqarneq

Siunissami qaninnerusumi siunnersuut ataatsimut isigalugu sulisoqarnermut kinguneqartitsissasoq naatsorsuutigineqanngilaq.

Siunissami ungasinnerusumi ataatsimut isigalugu naatsorsuutigineqarpoq raajarniarnermi, saattuarniarnermi qaleralinniarnermilu sulisut ikilissasut kiisalu nunami suliffissuarni sulisut amerlassusii ikillutik. Tamatuma saniatigut paarlattuanik naatsorsuutigineqarluni aningaasaatitigut aningaasartuutit qaffannerisa malitsigisaanik aalisarnermi sulisoqarnikkut annikitsumik qaffattoqassasoq. Tamarmiusumik siunnersuut sulisoqarnikkut ukioq naallugu sulisut 480-it missaannut naapertuuttumik ikilinerinik kinguneqassasoq. Siunissami ungasinnerusumi taakku sisamararterutai pingasut ukiumut 300.000 kr.-inik akissarsiaqalerlutik allamik suliffitaarneri ilimagineqarpat tamanna 110 mio. kr.-it missaannik isertitat qaffannerinik kinguneqassaaq, taamaalilluni isertitatigut tamarmiusumik sunniutaasoq 480 mio. kr.-it tikillugit annertussuseqassalluni (370+110). (370+110). Tamatuma saniatigut taamatut sulisoqarnerup inuit akileraarutaanniit pisortat iluanaarutaat 40 mio. kr.-t missaannik qaffannerinik kinguneqassaaq, taamaalilluni pisortat tamarmiusumik iluanaarutaat 340 mio. kr.-t tikillugit (320+40), qaffassallutik, qulaani eqqaaneqartut tunngavigalugit.

3.10.8 Taarsiivigineqarnissaq pillugu piumasaqaateqartoqarsinnaanera

Namminersortut ingerlatseqatigiiffit siunnersuut malillugu annaasaqartut annaasaqarneq pillugu taarsiisoqarnissaanik piumasaqarpata eqqartuussivimmilu suliami ajugaallutik siunnersuut pisortat aningaasaqarnerannut taarsiinerup annertussusiatigut suliamilu aningaasartuutitigut artukkiissaq.

Inatsilli taamatut pisoqarsinnaanera pinngitsoortinniarlugu erseqqissumik siunertalarugu suliarineqarpoq, aamma tunngavigineqarluni piffissaliussat nalunaarutigineqartut naammattumik takissuseqarlutik pinngitsaaliilluni taarsiissutitalimmik piginnikkunnaarsitsineq pineqarunnaarluni taamaalillunilu inuussutissarsiuteqartunut taarsiisoqarnani. Taamaattorli piffissaliussanut qanorpiaq piumasaqaateqartoqassanersoq nalorninartorujussuulluni,

tunngaviatigullu taarsiinissaq pillugu piumasaqaat saqqummiunneqarsinnaalluni Piumasaqaatit taamatut ittut eqqartuussivimmi suliani aalajangersimasuni akuerineqassappata tamanna pisortat aningaasaqarnerannut pingaaruteqartussaassaaq, taarsiinerup malitsigisaanik aamma suliami aningaasartuutit malitsigisaannik. Taarsiinerup annertussusaanik aalajangersaanermut atatillugu pingaaruteqartussaassaaq qanoq annertutigisumik pisassiissutinit pigisanik pinngitsaolineqarnikkut tunisisoqassanersoq aamma pisassiissutinut qummut killiliussat nutaat inuussutissarsiutip annaasaqarnissaannut sillimasimanersut. Pingaartumik inatsimmi tamanna pillugu piffissaliussamut atatillugu nunat allamiut aningaasaliisartut piginneqataassutiminnik tunisinissaat pillugu piumasaqaat taarsiiffigitinnissamik illuatungilerneqarsinnaasoq.

Taamaattumik pisariaqarluinnarpoq ingerlataqartunut atukkat ajorseriarneri suulluunniit taarsiisoqarsinnaaneranik naliliineq tunngavigalugu pinissaa.

4. Avatangiisinut, pinngortitamut inuillu peqqissusaannut sunniutaasussat

Siunnersuutip avatangiisinut, pinngortitamut inuillu peqqissusianut toqqaannartumik kinguneqarnissaa naatsorsuutigineqanngilaq.

5. Innuttaasunut sunniutaasussat

Qulaani allaaserinertut saniatigut siunnersuut innuttaasunut toqqaannartumik kinguneqarnissaa naatsorsuutigineqanngilaq, isumalluutiniilli iluanaarutit qaffariaratarsinnaanerat soorunami nunatsinni atugarissaarnermut taamaalillunilu innuttaasumut annertuumik sunniuteqassaaq.

6. Sunniutaasussat allat pingaarutillit

Siunnersuut toqqaannartumik annertuunik allanik kingunerluuteqassasoq naatsorsuutigineqanngilaq.

Siunnersummi aalajangersakkakut ataasiakkaanut nassuaatit

Kapitali 1

Atuuffia

A. Siunertaq

§ 1-imut

Imm. 1-imut.

Inatsimmi tassani tunngavik pingaaruteqarluinnartoq tassaavoq aalisakkanit pisuussutit inuiaqtigiinnit ataatsimut pigineqarmata, siunertarlu pillugu aalajangersakkami tamanna erseqqissarneqarluni. Aalajangersakkami tamatuma saniatigut inatsimmi pingaarnertigut siunertaq aalajangersarneqarpoq, tassa pisuussutinik iluaquteqarneq inuiaqtigiinnut kalaallinut aamma imm. 2 aamma 3-mi allanneqartut eqqarsaatigisassat tunngavigalugit siunissami ungasinnerusumi kalaallit nunaata aningaasaqarneranut iluaqutaasumik pissasoq. Inatsimmi matuminnga aqtsinermi nalornisoqartillugu siunertaq pillugu aalajangersagaq inatsisip sinnerani aalajangersakkat nassuiarnerinut tapertatut atorneqassaaq.

Imm. 2-mut.

Aalajangersakkami pissutsit marluk pingaartinneqarput, tassa mianersornissamut tunngavik tunngavigalugu aalisakkat iluaqtiginissaat piujuartinnissaallu. Aalisakkanik pisuussutinik atuineq siunissaq ungasinnerusoq eqqarsaatigalugu piujuartitsinerussaaq, amerlassusaallu piujuartitsisumik iluanaaruteqarnerpaaffiusumik allanngutsaaliorneqassallutik, taamaalliluni siunissaq ungasinnerusoq eqqarsaatigalugu iluanaaruteqarfiunerpaanissaanut anguniakkamut pingarnermut tapersiilluni. Anguniakkap ilaa FN-ip Aalisarneq pillugu isumaqatigiissutaanni 1995-imeersumi nalinginnaasumik tunngavinnut naapertuuppoq (UN agreement on Straddling Fish Stocks and Highly Migratory Fish Stocks), taanna Kalaallit Nunaat sinnerlugu Danmarkimit ulloq 19. december 2003-imi atortussanngortinneqarluni.

Imm. 3-mut

Aalajangersakkami anguniakkat ilaat alla, inatsimmik aqtsinermi pingaartinneqartussaq aalajangersarneqarpoq. Aalajangersagaq tamanik eqqartuinngilaq, eqqarsaatigisassallu assigiinngitsut pingaartinneqarnerinut sammisaq aalajangersimasoq apeqquaalluni allanngorarsinnaalluni.

Nr. 1)

Sapinngisamik aningaasaqarnikkut annertunerpaamik iluanaaruteqarnissaq pillugu pingaarnertigut anguniagaq naapertorlugu pingaaruteqarpoq aalisarnissamut periarfissat aalisarnermilu piginnaasat akornanni oqimaaqatigiittoqarnissaa, piginnaasallu

kinguneqarluartumik atorluarneqarnissaat. Aalajangersakkap taamaattumik eqqarsaatigisassat taakku erseqqissarpai.

Nr. 2)

Imm. 1-imí pingaarnertut anguniakkami aalajangersarneqartut aalisarnermik inuussutissarsiummi ataqtigiinnermik pilersitsisoqarnissaat patajaatsunillu tunngaviusunik piumasaqaateqarnerit peqatigisaanik inuiaqatigiit siunissami ungasinnerusumi aalisarnermiit sapingisamik annertunerpaamik iluaquserneqarnissaat pillugu anguniakkap anguniarneqarneranut piumasaqaataavoq ingerlataqarfimmi aningaasaliinissap kajuminnartuunissa. Aningaasaliinissap kajuminnartuunissa aamma aalisarnermik inuussutissarsiutip ineriertuinnarnissaanut pingaaruteqarpoq peqatigisaanillu pisuussutinik aqutsinerup, nakkutilliinermi oqartussat aamma aalisarnermik inuussutissarsiortut akornanni pitsaasumik tatiginartumillu suleqatigiinnissaq tunngavagineqassalluni. Aalajangersakkami taamaattumik aningaasaliinissap kajuminnartuunissa aanguniakkap ilaatus pingaartitassatut aalajangersarneqarpoq, aalisarnermik aqutsinermi pingartinneqartussaq.

Nr. 3)

Pisuussutinik piujuartitsisumik iluaquteqarneq pillugu tunngaviup imm. 2-mi aalajangersarneqarnerata nanginnerani uani siunnersuutigineqarpoq pisuussutinik iluaquteqarnermik aqutsinermi ilisimatuussutsikkut siunnersuineq aallaavigineqassasoq.

Nr. 4)

Aalisarnermut tunngavissanik ilusilersuinermut atatillugu sumiiffinni inuuniarnikkullu eqqarsaatigisassanut sunniuit isumaliutiginissaat pisariaqarsinnaavoq, tassunga ilanngullugu sulisoqarneq. Taamatut politikkut oqimaaqatigiissitsinermi naatsorsuutigineqarpoq tamanna ima pissasooq eqqarsaatigisassat taakku ilanngunneqarnerini paasuminartuunissaq qulakkeerniarlugu iluaqutit akornutillu allaaserineqassasut, nassuiarneqarlutillu erseqqissarneqarlutik. Tamanna immikkut pingaaruteqartutut nalilerneqarpoq tamatuma pisuussutinit iluanaarutit tamarmiusut annikillisinnaammagit imaluunniit eqqarsaatigisassat qulaani taaneqartut allat akerlilerlugit.

Nr. 5)

Kalaallit Nunaat aalisarnermut tunngasuni nunanik allanik arlalinnik isumaqatigiissuteqarpoq, soorlu aamma aalisarnermik ingerlataqarfimmut pingaaruteqartunik nunat tamalaat isumaqatigiissutaannik arlalinnik Kalaallit Nunaat atortussanngortitsisimasoq, tassunga ilaatigut ilanngullugit FN-imí imarmi pisinnaatitaaffit pillugit isumaqatigiissutaat, FN-imí aalisarneq pillugu isumaqatigiissutaat, FAO Code of Conduct for Responsible Fisheries, aamma FN-imí uumasut assigiinngisitaartuneri pillugit isumaqatigiissutaat. Tamatuma kingunerisaanik nunat tamalaat isumaqatigiissutaat arlallit aamma isumaqatigiissutit allat naapertorlugit Kalaallit Nunaata aalisarnermik aqutsinermini malittussaavai.

Tamanna amerlasuunik pissuteqarpoq, tassunga ilanngullugit avatangiisitigut uppernarsaanissamut periarfissap eqqarsaatiginera, assersuutigalugu kalaallit nunaanni aalisakkanik tunisassianut MSC-mik (Marine Stewardship Council) allagartaliineq, tamannalu aqutigalugu isumaqatigiissutit tamakku eqqortinnissaanni niuerfinnut isersinnaanerit il.il. qulakkeernissaat pingaaruteqarluni.

Nr. 6)

Aalajangersakkami aalajangersarneqarpoq aalisarnerit imaani uumasoqarnermut ajortumik sunniutai sabinngisamik annikinnerpaaffianiitinneqassasut. Tamanna ilaatigut anguneqassaaq saniatigut pisat kissaatiginngisat imaanilu avatangiisink sunniutit killeqartinnissaat aalisarnerit aaqqissuunneqarlutillu ingerlanneqassasut. Immikkut pingaaruteqarpoq aalisakkanut illorsorneqartunut imaanilu uumasoqarfinnut malussajasunut sunniutit eqqarsaatigineqassasut.

Nr. 7)

Aalajangersakkami inuussutissarsiutigalugu pisuussutinik iluaquteqarnerup saniatigut inuiaqatigiit kalaallit sukisaarsaarfeqarnissamik pisariaqartitaat pingartinneqassasut aalajangersarneqarpoq. Tamatuma kinguneraa sunngiffimmi aalisarnermut naleqqiullugu innuttaasut pisariaqartitaasa ilanngunneqarneri.

Nr. 8)

Aalajangersakkami inatsimmik aqtsinermi soqtigisaqartut peqataatinneqarnissaat aalajangersarneqarpoq. Aalisarneq pillugu inatsisip 1991-imi allanngortinneqarneranut atatillugu Aalisarnermut Siunnersuisoqatigiit inatsisitigut pilersinneqarput tamannalu pillugu aalajangersakkat suli atuupput, kapitali 12 takuuk. Siunnersuummi matumani soqtigisaqartut peqataatinneqarnissaannut tunngavik siuarlugu nuunneqarpoq, siunertaq pillugu aalajangersakkamut ilaatinneqalerluni. Tassani siunertaq aamma tassaavoq inatsimmik aqtsinermi soqtigisaqartut peqataatinneqarnissaanut tunngaviup pingaaruteqassusaata ersarissaqqinneqarnissaa, taamaattorli naalakkersuinikkut ingerlataqartut akuliutsinnginnissaat isiginiarlugu. Tassa imaappoq pisassiissutit aalajangersaaffigneranni aqunnerannilu aqtsinissamik pilersaarutini qanoq ineriartortoqarnerani, soorlu tamanna § 16, malillugu akuersissuteqarnermi, soqtigisallit ilanngunneqartarnissaat pingaaruteqarpoq.

Nr. 9)

Aalisakkanik pisuussutinik iluaquteqarnermut naleqqiullugu paasiuminartuunissaq pingaarpoq, taamaalilluni inatsimmik aqtsineq tunngaveqarlularluni pisinnaassammat. Aalajangersakkami taamaattumik aalajangersarneqarpoq aalisarnernik aqtsineq aalisarnerillu ingerlanneqarnerisa paasiuminartuunissaat pingartinneqassasoq. Tamanna ilaatigut pissaaq aalisarnerit, aalisagaqassuseq pisallu pillugit paasissutissat attuumassuteqartut katarsorneqarnerisigut tamanit pissarsiarineqarsinnaasunngortillugit.

Inuaqatigiit ataatsimut pisuussutaannik iluaquteqarnermi paasiuminartuuneq pillugu tunngavik aatsitassanut tunngasunut naapertuuppoq, tassani massakkut annertunerusumik paasiuminartoqarluni.

§ 2-mut

Inatsit Kalaallit Nunaata aalisarnikkut oqartussaaffigisaani inuussutissarsiorluni aamma inuussutissarsiutiginagu aalisarnernut atuuppoq. Inatsit taamaalilluni Kalaallit Nunaanni aalisarnermut suugaluartunulluunniit atuuppoq, aliikkutaralugu sunngiffimmilu aalisarneq, misileraaneq, misissuineq ilinniagaqarnerlu siunertaralugit aalisarnertut ittut kiisalu inuussutissarsiutigalugu aalisarnerit suugaluartulluunniit pineqaraluarpata.

Kalaallit Nunaata aalisarnikkut oqartussaaffigisa tassaavoq sumiiffik Kalaallit Nunaata aningaasaqarniarnikkut oqartussaaffigisa pillugu nalunaarummi kiisalu Kalaallit Nunaata imartaasa killilernerit pillugit peqqusummi aalajangersarneqarsimasoq.

Inatsit taamatuttaaq kalaallit nunallu allat angallataasa tulaassisarnerannut aamma Kalaallit Nunaata aalisarnikkut oqartussaaffigisaani usinik nuutsisarnermut atuuppoq.

Inatsit aamma Kalaallit Nunaanni inuussutissarsiutigalugu aalisarnermut aamma Kalaallit Nunaata aalisarnikkut oqartussaaffigisaata avataani kalaallit angallataasa tulaassinerinut usinillu nuussisarnerannut atuuppoq. Inuussutissarsiorluni aalisarneq pineqartillugu Kalaallit Nunaata aalisarnikkut oqartussaaffigisaata avataani aalisarnermi inatsit taamaallaat tunngasummat Kalaallit Nunaata aalisarnikkut oqartussaaffigisaata avataani aliikkutaralugu sunngiffimmilu aalisarneq, misileraaneq, misissuineq ilinniagaqarnerlu siunertaralugit aalisarnertut kiisalu inuussutissarsiutigalugu aalisarnerit ilaangillat.

Kiisalu nunat tamalaat imartaanni nunat allamiut angallataannik aalisarnermut inatsit atorneqarluni, tamanna nunat marluk imaluunniit nunani tamalaani isumaqatigiissut malillugu ingerlanneqarpat, Kalaallit Nunaat tamanna pillugu inatsisiliorsinnaalluni. Tamanna nunat allamiut angallataasa nunat tamalaat imartaanni kalaallinut pisassiissutinik aalisarpata atuutissaqaq, assersuutigalugu taamaassalluni Kalaallit Nunaat nunat tamalaat imartaanni imaluunniit nunap allap imartaani aalisarsinnaalluni, kisiannili pisinnaatitaaffik taanna nunamut allamut ingerlateqqissimallugu. Tamanna aamma nunat tamalaat isumaqatigiissutaasigut (NEAFC (North-East Atlantic Fisheries Commission / Atlantikup Avannaata Kangiani Aalisarneq pillugu Isumalioqatigiissitat) imaluunniit NAFO (Northwest Atlantic Fisheries Organization / Atlantikup Avannaata Kitaani Aalisarneq pillugu Suleqatigiiffik)) aalisarnermik nakkutilliinissamut kalaallit nunaanni nakkutilliinermik oqartussat nakkutilliiffigisaanni imartani aalisarnernut atuuppoq ingerlataqartup pineqartup sumi nunaminngaanneernera apeqqutaatinnagu. Tassunga atatillugu Kalaallit Nunaata nunanik ilaasortaasunik allani inatsisiliornikkut nakkutilliinikkullu oqartussaaffik avitseqatigiffigissavaa.

Inatsimmi § 1-imni siunertaq naapertorlugu aalisarnermik aqutsinissamut tapersiinissamut inatsimmi aamma pineqarput:

1. aqutsinermi aamma ilisimatuussutsikkut misissuinerni siunnersuinissamilu atugassanik nalunaarsukkanik paasissutissanillu katersineq,
2. pisuussutit, aqutsineq, aalisarnerit pisanillu suliarinninneq pillugit paasissutissiisarneq,
3. misileraanissamut aaqqissuussinerit soorlu misileraalluni aalisarnerit § 1, imm. 1-imni siunertaq naapertorlugu aalisarluni inuussutissarsiummik ineriertortitsinissamut siunertaqartut,
4. aalisarnernik nutaanik pilersitsineq,
5. aqutsinermik suliaqartut, inuussutissarsiortut ilisimatusartullu akornanni suleqatigiinneq,
6. inatsisip naammassineqarnissaanut ikorfartuinermut sammisunik nakkutilliinissamut iliuutsit.

B. Nassuaatit

§ 3-mut

Nr. 1

"Aalisarneq" qanoq paasineqassanersoq inatsisini siusinnerusukkut nassuarneqarnikuunngilaq. Nassuaat uani atorneqartoq annertuitigut nunani tamalaani malittarisassani isumaqatigiissutinilu arlalinni atorneqartunut nassuaatinut naapertuuppoq, tassunga ilanngullugu "*Unioqqutitsisumik, nalunaarsugaanngitsumik malittarisassaqanngitsumillu aalisarnerup pitsaaliornissaanut, pinngitsoortinnissaanut unitsinneqarnissaanullu naalagaaffit umiarsualivillit aaqqiineri pillugit isumaqatigiissut*" FN-ip suleqatigiiffianit Food and Agriculture Organization of the United Nations-imeersoq (FAO).

Taaguummut "aalisarnermut" ilaapput aalisarnerit suulluunniit aamma ingerlatanit allaniit ingerlatanit killilerneqarluni. Taaguut taaguummit "aalisarnermit ataatsimit", takuuk nr. 26, allaaneruvoq, taamaalilluni tassani immikkut aalisarneq pineqarluni.

Nr. 2-mut

"Inuussutissarsiutigalugu aalisarneq" inatsisissatut siunnersuummi pisanik tamarmiusunik ilaannilluunniit tunisinissaq siunertaralugu ingerlanneqartutut aalisarnertut nassuarneqarpoq, nr. 1 naap.

Nr. 3

"Inuussutissarsiutiginagu aalisarneq", tak. nr. 1, inatsisissatut siunnersuummi pisat nammineq atorneqarnissaat siunertaralugu ingerlanneqartutut aalisarnertut nassuarneqarpoq.

Nr. 4

"Sinerissap qanittuani aalisarneq" inatsisissatut siunnersummi sumiiffimmi sinerissap aamma aalisarnikkut oqartussaaffigisami tunngaviusumik titarnerup avataani 3 somilimi titarnerup akornanni ingerlanneqartutut aalisarnertut nassuiarneqarpoq.

Nr. 5

"Avataasiorluni aalisarneq" inatsisissatut siunnersummi, nr. 5-ip paarlattuani, aalisarnikkut oqartussaaffigisami tunngaviusumik 3 somilisut avasitsigisumi titarnerup avataani aalisarnertut nassuiarneqarpoq.

Nr. 6

"Assigiimmik inuussutissarsiuillit" inuussutissarsiuutitut pingaarnertut inuussutissarsiuutigalugu aalisarnermik, saniatigooralugu inuussutissarsiuutigalugu aalisarnermik imaluunniit inuussutissarsiuutiginagu aalisarnermik ingerlatsinersut naapertorlugit inuttut ataatsimoortutut erseqqinnerusumik killilerneqarsimasutut inatsisissami siunnersummi nassuiarneqarput. Nassuaatip nr. 2 aamma nr. 3 ataqatigai.

Nr. 7

"Akuerisaasumik ukiumut pisarineqarsinnaasut tamarmiusut" TAC-mik (Total Allowable Catch) taaneqarnerusartoq, Kalaallit Nunaata oqartussaaffigisaata aalisakkat imaluunniit aalisagaqatigiit aalajangersimasut pingaarnertigut annertussusaattut inatsisissami siunnersummi nassuiarneqarput. Taamaalilluni TAC-imut aamma ilaapput nunamut allamut tunniunneqarsinnaasut aalisakkat ilai, aamma tamanna pillugu isumaqatigiissut naapertorlugu kalaallinit aalisarneqarsinnaangnitsut.

Nr. 8

"Pisassiissutit" inatsisissatut siunnersummi tassaapput akuerisaasumik pisarineqarsinnaasuni tamarmiusuni ilaasut. Taaguut "pisassiissutinit pigisat" ingerlatsisumut atassuteqarsinnaavoq, takuuk nr. 9, imaluunniit "ukiumut pisassiissutit", takuuk nr. 10, assersuutigalugulu aamma aalisariutini immikkoortut TAC-imut periarfissaasa annertussusaatut imaluunniit aqutsivimmi aalajangersimasumi aalisarneqarsinnaasut TAC-ip ilaatut allanneqarsimasinnaalluni.

Nr. 9

"PIsassiissutinit pigisat" inatsisissatut siunnersummi nassuiarneqarput tassaasut aalisarnermi pisassiissutit ilai PNNP-mi aalisarnermi ingerlataqartup ataatsip oqartussaaffigisai, takuuk kapitali 6. "PIsassiissutinit pigisat" tassaapput "pisassiissutit" ilai piviusumik annertussusillit.

Nr. 10

"Ukiumut pisassiissutit" inatsisissatut siunnersummi ukiumi aalajangersimasumi aalisagaqatigiinni ataatsini ingerlatsisumut atugassannngortinneqartutut pisarineqarsinnaasut annertussusaatut nassuiarneqarput. PNNP-mik aalisarneq pineqarpat, takuuk kapitali 6,

ingerlataqartup ukiumut pisassiissutai aalisarnermut pineqartumut pisassiissutit tamarmiusut ingerlataqartup pisassiissutinit pigisanik amerlisarnerisigut naatsorsorneqassapput.

Nr. 11

"Akuersissut" inatsisisatut siunnersuummi aalisarnissamut akuersissutitut nassuiarneqarpoq. Akuersissut pisassiissutinit, pisassiissutinit pigisanit, ukiumut pisassiissutinit, pisassiissutinit pigisat amerlassusianniit allaassuteqarpoq imatut; akuersissut aalisakkanik aalajangersimasunik imaluunniit aalisagaqatigiinnut aalisarnissaanut ammaassisarpoq, pisassiissutini, pisassiissutinit pigisani aamma ukiumoortumik pisassiissutini qanoq amerlatigisut aalisartoqarsinnaanersut allassimasarluni.

Nr. 12

"Angallat" inatsisisatut siunnersuummi immakkut nunakkulluunniit assartuutitut suugaluartutulluunniit aalisarnermi atorneqartutut nassuiarneqarpoq. Oqaaseqatigijit "aalisarnermut atatillugu" nr. 1-imi nassuaaserneqartumut aalisarnermut innersuussipput.

Nr. 13

"Aalisariutit ilai immikkoortut" inatsisisatut siunnersuummi angallatit killilerneqarnerinut nassuiarneqarpoq. Taaguut aalisarnikkut oqartussaaffigisami tunngaviusumik titarnerup avataani 3 somilip avataani aalisariutini immikkoortut avataasiorluni aalisarnerup aamma sinerissap aamma aalisarnikkut oqartussaaffigisami tunngaviusumik titarnerup avataani 3 somilip akornanni sinerissamut qanittumi aalisariutit aalisarnerisa immikkoortinnerinut atatillugu atorneqarnerusarpoq. Taaguut aamma allanut atatillugu atorneqarsinnaavoq aamma taaguummut "inuussutissarsior tunut" paarlaanneqartussaanani.

Nr. 14

"Usinik nuussineq" inatsisisatut siunnersuummi pisanik taakkunanngaluunniit tunisassianik suugaluartunilluunniit angallammut allamut nuussinertut nassuiarneqarpoq. Taamaattorli pisat/tunisassiat tunisinissaq sioqqullugu tunineqarsimappata usinik nuussineq pineqassangilaq. Usinik nuussineq imaani umiarsualivimmiluunniit pisinnaavoq.

Nr. 15

"Piareersaaneq" inatsisisatut siunnersuummi saliinermut, niaquiinermut sikulersuinermullu atanngitsunik pisanik suliarinninnertut paarlattuanik nassuiarneqarpoq. Nassuaammut taamaalillutik ilaapput nerpitaaajaaneq, poortuineq, asiunaveersaaneq, qerititsineq, pujoorineq, tarajorterineq tarajulimmut inissiineq panersiinerlu, kisianni allatigut piareersaasoqarsinnaavoq. Nassuaat atorneqartoq nunani tamalaani isumaqatigiissutini atorneqartumut nassuaammut naapertuuppoq, soorlu NAFO Conservation and Enforcement Measures (NAFO-mi piujuartitsineq nakkutilliinerlu pillugit malittarisassat).

Nr.16

Nassuiaat taamaallaat inuussutissarsiutigalugu aalisarnermi atorneqartunut angallatinut tunngasuuvooq, tak. inatsisissatut siunnersummut § 10-mut innersuussineq.

Nr. 17

"Nunat allamiut angallataat" inatsisissatut siunnersummi paarlattuanik nassuiarneqarpoq, tassa angallat sunaluunniit, Kalaallit Nunaanni angerlarsimaffeqartutut nalunaarsorneqarsimanngitsoq. Aamma nunat allamiut angallataannut atuuppoq nassuaammut ilaaniarunik aalisarnermut atorneqartussaallutik. Malugeqquneqarpoq pisuni immikkullarissuni nunat allamiut angallataanni kalaallit ingerlataqartut attartorsinnaammata.

Nr. 18

"Tulaassineq" inatsisissatut siunnersummi pisanik taakkunangaluunniit tunisassianik sunilluunniit angallammiit nunamut nuussinertut nassuiarneqarpoq. Tamanna aamma taamaalilluni tulaassinermut atatillugu tunisoqanngikkaluarpalluunniit atuulluni.

Nr. 19

"Pisat" inatsisissatut siunnersummi aalisarnikkut qulakkeerneqarlutik qaqpinniqartutut nassuiarneqarpoq, tassa aalisakkat, imaani miluumasut, timmissat, koralit pupiillu.

Nr. 20

Kalaallit Nunaata aalisarnikkut oqartussaaffiata annertussusia matuma kingorna Kalaallit Nunaata aningasaqarnikkut oqartussaaffia pillugu nalunaarut nr. 1020, 20. oktober 2001-imeersoq naapertorlugu aalajangersarneqarpoq. Imartap killilerneranik suliassaq suli tiguneqarnikuunngilaq, taamaalillunilu Danmarkimi inatsisit naapertorlugit aalajangersarneqarluni. Nalunaarut atuutilersinneqarpoq Inatsit nr. 441, 22. Maaji 1996-imeersoq naapertorlugu, Kalaallit Nunaata aningasaqarnikkut oqartussaaffia pillugu, Kalaallit Nunaanni atuutilersinneqartoq peqqussut nr. 1005, 15. oktober 2004-meersoq naapertorlugu.

Kalaallit Nunaata immikkut aningasarsiornikkut oqartussaaffigisaanut ilanngilaq Kalaallit Nunaata imartami oqartussaaffigisa tassaasoq nunamut atasut imartat timaaniittut silarliusullu. Imartamulli oqartussaaffigisamut ilaavoq aalisarnikkut oqartussaaffigisaq.

Kalaallit Nunaanni imartaq oqartussaaffigisaq sinerissamiit, immat soorlu umiarsualiviit, umiarsualivimmut pulaffissat, kisaqqasarfiit, kangerlumanerit, kangerluit, ikerasaat aamma kangerlunniit (nunap imartaa timerleq) tunngaviusumik titarnermiit 3 somili tikillugu (nunap imartaa avalleq).

Nr. 21

"Ingerlatsisoq" inatsisissatut siunnersummi aalisarnermik ingerlatsisoq inatsisitigut pisinnaatitaasoq pisussaatitaasorlu kinaluunniit. Taamaalilluni "aalisartumut", "ingerlatseqatigiiffimmut" il.il. ataatsimut taaguut pineqarpoq, tassa nunat tamalaat

imaluunniit nunat marluk isumaqatigiissutaat aalajangersimasumik annertussuseqartumik kalaallinut pisassiissutinut aalisarnissamut periarfissaqarmata.

Nr. 22

"Tunisineq" inatsisisstatut siunnersuummi aalisarneqarsimasunik nuussinertut, ingerlatsinertut nassuiardeqarpoq, tassa tunisinermiit akiliisoqarmat. Tunngaviusumik taamatut akiliineq 0,00 kr.-iusinnaavoq.

Nr. 23

"Pisat tulaanneqartussaasut" inatsisisstatut siunnersuummi pisatut angallammi tunisassiarineqartussaanngitsutut imaluunniit aalisariummiit toqqaannartumik avammut niuerutigineqarsinnaanngitsutut nassuiardeqarpoq, kisianni suliarineqarsimanatik Kalaallit Nunaanni nunami suliffimmi tulaanneqartussaasut.

Nr. 24

"Pisat tulaanneqartussaatitaanngitsut" inatsisisstatut siunnersuummi pisatut nr. 23-mi aalajangersarneqartumik killilersuiffigineqanngitsutut nassuiardeqarput. Pisat taakku taamaalillutik toqqaannartumik avammut niuerutigineqarsinnaapput aamma/imaluunniit angallammi tunisassiarineqarsinnaallutik.

Nr. 25

"Aalisagaqatigiit" inatsisisstatut siunnersuummi sumiiffimmi killeqartumiinnermikkut uumasoqatigiinnit allaniit ataatsimoortutut immikkoortutut uumasoqatigiittut aamma peqassutsinit allaniit sananeqaatsimikkut annertuitigut atassuteqannginnermikkut immikkoortutut nassuiardeqarput.

Aalisakkanit pisuussutinik aqtsineq aalisagaqatigiinnik aqtsinikkut pimmat aalisagaqatigiit akornanni immikkoortitsineq aaqqissuussinermut aamma aqtsinerup aalisarnerullu piviusumik naammassineranut annertuumik pingaruteqarpoq.

Nr. 26

"Aalisarneq ataaseq" inatsisisstatut siunnersuummi "aalisarnermiit", takuu normu 1), allaanerusutut nassuiardeqarpoq, taamaalilluni aalisarneq ataaseq assersuutigalugu aalisagaqatigiinni aalajangersimasumi, sumiiffimmi aalajangersimasumi imaluunniit aalajangersimasumik ingerlanneqartumik assigeequatasumut aalisarnermut tunngasuulluni. "aalisarnerup" aalisarnermik ingerlataqarnermut tunngavissat allaaseralugit.

Nr. 27

§ 5 naapertorlugu Kalaallit Nunaanni Aalisarsinnaanermut Akuersissutinik Nakkutilliisoqarfik - imaluunniit allat Naalakkersuisunit oqartussatut toqqaerneqartut - aalisarneq pillugu inatsisip eqortinnejnarneranik nakkutilliillutillu misissuisuupput. Tamanna tunngaviatigut maannakkut

atuuppoq, aamma Kalaallit Nunaanni Aalisarsinnaanermut Akuersissutinik Nakkutilliisoqarfik taarserneqarsinnaalluni ilaneqarsinnaalluniluunniit.

Nr. 28

Sakkutuut Aalisarnermik Alapernaarsuisui nammineq oqartussaapput, aamma Kalaallit Nunaanni Aalisarsinnaanermut Akuersissutinik Nakkutilliisoqarfik aamma Sakkutuut Aalisarnermik Alapernaarsuisui ilaatigut, tamakkiisuunngitsumilli, assigiimmik pisinnaatitaaffeqarlutik. Sakkutuut Aalisarnermik Alapernaarsuinerat maannakkut Issittumi Sakkutuunit isumagineqarpoq.

§ 4-mut

Aalajangersagaq piviusumik tunngaviusumik inatsisini § 3 issuarpa, tassani aalajangerneqarluni inatsisink atortitsineq Naalakkersuisuniittooq. Aalajangersakkami taamaalilluni erseqqissarneqarpoq Naalakkersuisut taakkuusut inatsisip eqqortinneranik nakkutiginmittuusut, matumani nakkutilliinermut ingerlanneqavissumut tunngatillugu aamma nalinginnaasumik oqartussaasut pisinnaatitaanerannut tunngatillugu tamanna atuuppoq.

Immikkoortumi ataatsimi arlalinnluunniit aalajangiinissamut piginnaatitsineq Naalakkersuisunit Aalisarnermut Piniarnermullu Naalakkersuisoqarfimmut isumagisassangortissinnaavaat.

§ 5-imut

Imm. 1-imut aamma 2-mut.

Imm. 1-imi 2-milu aalajangersarneqarpoq aalisarnermik nakkutilliineq pilersinneqarsimassasoq, taamatullu nakkutilliineq Kalaallit Nunaanni Aalisarsinnaanermut Akuersissutinik Nakkutilliisoqarfimmit Issittuni Sakkutuuni Sakkutuut Aalisarnermik Alapernaarsuisui suleqatigalugit ingerlanneqarluni. Aalajangersakkap taamaalilluni manna tikillugu pissusiusoq ingerlateqqippaa. Kalaallit Nunaanni Aalisarsinnaanermut Akuersissutinik Nakkutilliisoqarfipu sulineranut tunngavik inatsisissatut siunnersuummi kapitali 14-mit takuneqarsinnaavoq. Naalakkersuisut nakkutilliinermi oqartussanik allanik toqqaasinnaapput, tak. imm. 2.

Imm. 3-mut

Aalisarneq pillugu inatsisartut inatsisaata allanngortinnera pillugu Inatsisartut inatsisaat nr. 28, 28. november 2016-imeersoq malillugu Naalakkersuisunut pisinnaatitsinermik aalajangersagaq ilaatigut atuutsippaat. Allannguut taanna malillugu malittarisassanik sukumiinerusunik atuutilersitsinikkut akuersissutinik tunniussisarnermi allaffissornikkut ingerlatsinerup isumaginissaanut kommunimi ingerlatsivinnut Naalakkersuisut peqqusisinnaapput. Pisinnaatitsinerli imatut annertusineqarpoq malittarisassanik aalajangersimasunik atuutilersitsinikkut inatsimmi akisussaaffiit allat kommunini

oqartussanut aalajangiisinnaanermik tunniussinissamik Naalakkersuisut piffissami ungasinnerusumi periarfissaqaarlutik.

Kapitali 2

Kalaallit Nunaata aalisarnikkut oqartussaaffigisaani aalisarsinnaaneq pillugu piumasaqaatit

Kalaallit Nunaata aalisarnikkut oqartussaaffigisaani aalisarsinnaanermut ingerlataqartumut piumasarineqartut piumasaqaatit kapitalimi tassani misissorneqarput.

Kapitalimi taamaalilluni kalaallit nunaata imartaani inuussutissarsiutiginagu kalaallit aalisarsinnaanerat kiisalu kalaallit ingerlatsisut inuussutissarsiutigalugu aalisarsinnaanerannut aamma nunat allamiut ingerlatsisut inuussutissarsiutigalugu aalisarsinnaanerat malittarisassaqaqtinnejqarpoq. Kalaallit ingerlatsisut Kalaallit Nunaata aalisarnikkut oqartussaaffigisaata avataani aalisarnerat kapitalimut ilaanngilaq, kisianni kapitali 3-imi malittarisassaqaqtinnejqarlni (§ 14).

A. Kalaallit Nunaata aalisarnikkut oqartussaaffigisaani inuussutissarsiutiginagu aalisarneq

§ 6-imut

Aalajangersakkami § 7 peqatigalugu inuussutissarsitiginagu aalisarneq malittarisassaqaqtinnejqarpoq.

Imm. 1-imut.

Innuttaasut Kalaallit Nunaanni aalajangersimasumik najugaqartut aalajangersagaq malillugu Kalaallit Nunaata nunami aalisarnikkullu oqartussaaffigisaani inuussutissarsiutiginagu aalisarsinnaapput.

Aalajangersagaq manna tikillugu inatsimmut naleqqiullugu allanngortinneqarpoq, aamma inuit Kalaallit Nunaanni aalajangersimasumik najugaqartut, danskisut innuttassuseqanngitsut, unioqqutitsisumik immikkoortinneqartannginnissaat qulakkeerniarneqarluni. Tassani inuit piginnaatitaaffii pillugit Europami Isumaqtigiiissummi immikkoortortaq 14 Kalaallit Nunaanut inatsisip atuutilernera pillugu peqqussut nr. 814, 18. september 2001-imeersoq aqutigalugu akuerineqartoq malinneqarpoq.

Imm. 2-mut.

Imm. 2-mit takuneqarsinnaavoq inuit tamarmik, imm. 1-imi aalajangersakkamut ilaanngitsut, inuussutissarsiutiginagu aalisarnissamut akuersissuteqassasut. Tamatuma assersuutigalugu kinguneraa Kalaallit Nunaanneersuunngitsut takornariat nunanit allaneersut aalisarnissaminut aalisarnissamut allagartaqassasut.

Imm. 3-mut

Aalajangersagaq imm. 2 malillugu aalisarnermut akuersissutinik atulersitsineq, pissarsineq annaasaqarnerlu pillugit malittarisassanik aalajangersaanissamut Naalakkersuisunut tunngavissiivoq. Aalajangersagaq taanna malillugu malittarisassanik aalajangersaanermi Inatsisartut inatsisaanni matumani siunertatut aalajangersakkat kiisalu takornariaqarnikkut inuussutissarsiutip taassumalu ineriertortinneqarnerata eqqarsaatiginissaa Naalakkersuisunit pingartinneqassaaq.

§ 7-imut

Imm. 1-imut.

Aalajangersakkami Naalakkersuisut malittarisassanik aalajangersaasinnaanermut pisinnaatinneqarput, taakkunani aalisakkanik aalajangersimasunik inuussutissarsiutiginagu aalisarnermik malittarisassanik. Maleruagassanik aalajangersaaneq imm. 2-mi allassimasut naapertorlugit pissaaq.

Malittarisassani taamaattuni ilaatigut sakkunut naleqqiullugu, sumiiffinni piffissanilu killilersuinerit ilaasinjaapput, tunngaviatigut inuussutissarsiutigalugu aalisarneq pillugu Naalakkersuisunit aalajangersarnejarsinnaasunut killilersuinernut naapertuuttut.

Imm. 2-mut.

Imm. 1 naapertorlugu maleruagassanik aalajangersaanermi inatsimmi § 1-imu allassimasut naapertorlugit pissaaq. Assersutigalugu aalisakkanik aalajangersimasunik aalisarneq aalisagaqtigiinnut ajoqtaasumik ineriertorpat imaluunniit aalisakkanut periarfissaqarneq inuussutissarsiortut aalajangersimasut sallitinnissaannut tunngavissiisumik malittarisassanik aalajangersaasoqarsinnaavoq.

B. Inuussutissarsiutigalugu aalisarnermut tunngaviusumik piumasqaatit

§ 8-mut

Imm. 1-imut.

Kapitalimi matumani aallarniutigalugu aalajangersarnejarpooq Kalaallit Nunaanni inuussutissarsiutigalugu aalisarsinnaanermut akuersissummik peqartoqassasoq, akuersissullu aalisarneq pillugu inatsit naapertorlugu atulersinneqarsimassalluni. Akuersissuteqarnani inuussutissarsiutigalugu aalisarneq inerteqquaavoq aamma kapitali 15-imu malittarisassani aalajangersakkat malillugit pineqaatissiissutaasinjaalluni.

Inuussutissarsiutiginagu aalisarneq §§ 6-imu aamma 7-imu malittarisassaqtinneqarpoq.

Imm. 2-mut.

Inatsisissatut siunnersuummi kapitali 5-imu akuersissutinik atulersitsinermut il.il. tunngasut suleriaatsit allaaserineqarput, aamma § 8, imm. 2-mi aalajangersarnejarluni ingerlatsisup

akuersisummik pissarsinissaanut kapitalimi tassani piumasaqaatit naammassineqarsimassasut.

*C. Kalaallit ingerlatsisut Kalaallit Nunaata aalisarnikkut oqartussaaffigisaani
inuussutissarsiutigalugu aalisarnerat*

Inatsimmi atuuttumi siusinnerusukkullu inatsisini piginnittuunermi pissutsit pillugit aamma Kalaallit Nunaannut attuumassuteqarneq pillugu piumasaqaatinut naleqqiullugu angallat tassungalu piginnittuunermi pissutsit aallaavagineqarsimapput.

Inatsisiskkut akuersissut ingerlatsisorlu aallaavagineqarput, ingerlatsisorlu taannaalluni piumasaqaatinik aalajangersimasunik naammassinnissimassasoq. Aalisarnerlu suli angallat atorlugu ingerlanneqassalluni, piginnittuunermut naleqqiullugu Kalaallit Nunaanni angerlarsimaffeqartussaasoq. Angallammut immikkut piumasaqaatit § 10-mit takuneqarsinnaapput.

§§ 9 - 12 § 8-mut atatillugit isigineqassapput, tassa aalajangersagaq taanna inuussutissarsiutigalugu aalisarnermik ingerlatsinissamut ingerlatsisup akuersissuteqarnissaa pillugu piumasaqaateqarmat, §§ 9-12-milu taamatut akuersissuteqalernissamut ingerlatsisumut piumasaqaatinik aalajangersaalluni.

Inatsisisstatut siunnersummi akuersissut ingerlatsisorlu aallaavagineqarmata tamanna piumasaqaatini piumasaqaatigineqartut allanngortinnerinik kinguneqanngilaq, mannalu tikillugu piviusumik ingerlatsisumut piumasaqaataallutik, taakkulu inatsimmut atuuttumut naapertuullutik.

§ 9-mut

Imm. 1-imut.

Aalajangersagaq manna tikillugu inatsimmi § 6-imti atuuttumut aalajangersimasutigut annertuumik allannguiteqarluni naapertuulluni.

Aalajangersagaq § 3, nr. 12)-mi ilaasunut angallatinut tamanut atuuppoq. Assersuutigalugu qimussimik inuussutissarsiutigalugu aalisarneq ilaatinneqarpoq.

Aalajangersakkami piginnittuunermi aaqqissuussinerit suut akuersisummik pissarsisinnaanerinut piumasaqaatit aalajangersarneqarput, soorlu aamma inuup imaluunniit piginnittuunermik aaqqissuussinerup, tassa imaappoq ingerlatsisup, Kalaallit Nunaannut naammattumik atassuteqartutut isigineqarnissaanut piumasaqaatit aalajangersarneqartut.

Aalajangersakkami piginnittuunermi assigiinngitsut pingasut saqqummiunneqarput:

- 1) Inuit ataasiakkaat
- 2) Inatsisitigut inuinnaat pisinnaatitaasut pisussaatitaasullu
- 3) Suliffeqarfuit Namminersorlutik Oqartussanit pigineqartut peqatigiiffiillu pisortanit pigineqartut imaluunniit suliffeqarfuit peqatigiiffiillu Namminersorlutik Oqartussanit peqataaffigineqartut

Nr. 1)

Nr. 1-imut ilaapput inuit ataasiakkaat, kisianni inuit ataasiakkaat ataatsimoortuunngitsut. Tamatumunnga pissutaavoq inuit ataasiakkaat ataatsimoortut, inuttut, assigiimmik pisussaaffeqarlutik toqqaannartumillu piviusumik tassaammata soqtigisaqaqatigiit, nr. 2-mut ilaasut, tak. imm. 3, nr. 1. Inatsisitigut pisinnaatitaasut pisussaatitaasullu tamarmik akuersissummit pissarsiniarlutik imm. 3-mi piumasaqaatit naammassisimassavaat, tassunga ilanngullugit qularnaveeqqut allatigulluunniit sillimmammut tunngasut atuuttut piumasaqaatit.

Nr. 2)

Aalajangersakkami inatsisitigut inuinnartut pisinnaatitaasut pisussaatitaasullu ilaasut imm. 3-mi erseqqinnerusumik aalajangersaaffigineqarput.

Nr. 3)

Namminersortut saniatigut tamakkiisumik ilaannakuusumilluunniit pisortanit pigineqartut ingerlatseqatigiiffiit aalisarnissamut akuersissummik pissarsisinnaapput.

Imm. 2-mut.

Kalaallit Nunaanni inuussutissarsiutigalugu aalisarneq nunamut aalajangersimasumik atassuteqartunut ingerlatsisunut aamma nunanit allamiunut ingerlatsisunut § 13 malillugu akuersissummik pissarsisimasunut tunngatinneqarpoq, tak. § 25.

§ 9-mi aalajangersakkat tulliuttut, inuit ataasiakkaat imaluunniit inatsisitigut inuttut pisinnaatitaasoq pisussaatitaasorlu Kalaallit Nunaannut naammattumik qanittumik atassuteqartutut isigineqassappat ingerlatsisumit naammassineqarsimasussat piumasaqaatit aalajangersarneqarput. Pisortanit pigineqartut ingerlatseqatigiiffiit imaluunniit peqatigiiffiit imaluunniit ingerlatseqatigiiffiit peqatigiiffiillu Namminersorlutik Oqartussanit peqataaffigineqartut eqqarsaatigalugit allanik piumasaqaateqarfiunngitsumik taamatut atassuteqartutut isigineqarput.

Nr. 1)

Taaguut "aalajangersimasumik atassuteqarneq" tassunga atatillugu taaguutaavoq nr. 2)-mi aamma 3)-mi piumasaqaatinik katersisoq, piumasaqaatillu taakku naammassineqarsimappata pisuni qaqtigoortorujussuarni atorneqarsinnaasut, taamatulli inisisimanissaanut ingerlatsisup Kalaallit Nunaannut atassuteqarnera "aalajangersimasutut" oqaatigineqarsinnaanngitsutut isigineqartariaqarluni.

Nr. 2)-mi aamma 3)-mi piumasaqaatinut naleqqiullugu uniuisoqarnera pillugu pasitsaassisoqarpat "inuaqatigiinnut kalaallinut aalajangersimasumik atassuteqarneq" pillugu piumasaqaat immikkoortumut isumaqartinneqassaaq. Inuup inuaqatigiinnut kalaallinut aalajangersimasumik atassuteqarneranik aalajangiineq pisuni taamatut ittuni pineqartup inuaqatigiinnut kalaallinut ilumut ilaasortaaneranik tunngaveqassaaq. Inuk ataaseq piumasarineqartutut nr. 2)-mi aamma 3)-mi piumasaqaatinik naammassinnittooq, taamaattorli nunami piviusumik najugaqanngitsoq, taamaalilluni aalajangersakkamut ilaasinnaassaaq. Malugineqassaaq kalaallit angallataanni najugaqarneq tassunga atatillugu Kalaallit Nunaanni "najugaqarnertut" isigineqanngimmat.

Taaguut aamma § 11, imm. 1-imut atatillugu immikkut pingaaruteqarpoq, taamaalilluni najugaqarfimmi najugaqarnissaq akileraartartuunerlu pillugit piumasaqaammit immikkut akuersisoqarnissaanut periarfissiisoqarluni - kisianni nunamut tunngaviusumik aalajangersimasumik atassuteqarneq pinnagu. § 11, imm. 1-imut nassuaatiniittut aamma takukkit.

Nr. 2)

Kalaallit Nunaata imartatut oqartussaaffigisaani inuussutissarsiutigalugu aalisarnissamut akuersissutip pissarsiarinissaanut piumasaqaatit ilaat tassaavoq ingerlatsisup sivikinnerpaamik ukiuni kingullerni tallimani Kalaallit Nunaanni inuit nalunaarsimaffianni najugaqartuunissaa. Piffissaq inatsimmut maanna atuuttumut sanilliullugu ukiunik pingasunik sivitsorneqarpoq, taannalu aatsitassarsiorneq pillugu inatsimmi piumasaqaammat assingulissaq.

Piumasaqaatip taassuma naammassinissaanut Kalaallit Nunaanni sumi najugaqartutut najugarsimanissaq pingaaruteqanngilaq. Sumiiffiit, nunami ima inissisimasut kommunit agguarnerisa avataani inissisimaffiit eqqarsaatigalugit najugaqartut Kalaallit Nunaanni inuit nalunaarsimaffianni najugaqarsimanissaat atuuppoq, taamaattumik apeqqummut tassunga naleqqiullugu immikkut piumasaqaatit atuunnatik.

Nr. 3)

Pineqartup Kalaallit Nunaanni tamakkiisumik akileraartussaatitaanissaa qaammatisiutillu malillugit ukiuni kingullerni tallimani siuliini akilerartussaatitaasimanissa piumasaqaataavoq. Ukioq ataaseq tassaavoq piffissaq 1. januarimiit 31. decembarimut. Assersuutigalugu ulloq 1. november 2025-miit aalisarnermut akuersissut pissarsiariniarlugu piginnittooq Kalaallit Nunaanni tamakkiisumik akileraartartuussaaq, aamma piffissami 1. januar 2020-mit 31. december 2024-mut Kalaallit Nunaanni tamakkiisumik akileraartuusimassalluni.

Piffissaq inatsimmut maanna atuuttumut sanilliullugu ukiunik pingasunik sivitsorneqarpoq, taannalu aatsitassarsiorneq pillugu inatsimmi piumasaqaammat assingulissaq.

Inuit kommunit aggornerisa avatanni najugaqartut Kalaallit Nunaannut akileraartartuussapput taamaalillutillu piumasaqaammik naammassinnillutik.

Imm. 3-mut

Aalajangersagaq taanna inatsisitigut inuinnarnut pisinnaatitaasunut pisussaatitaasunullu tunngasuuvooq - paarlattuanik inummut (takuuk imm. 1, nr. 1) aamma "Kalaallit Nunaanni ingerlatseqatigiiffit peqatigiiffiillu pisortanit pigineqartut imaluunniit suliffeqarfiiit peqatigiiffiillu Namminersorlutik Oqartussanit peqataaffigineqartunut" paarlattuanik (takuuk imm. 1, nr. 3).

Nr. 1)

Inatsisitigut pisinnaatitaasoq pisussaatitaasorlu tassaasinnaavoq aktiaateqarluni ingerlatseqatigiiffik, piginneqataassuteqarluni ingerlatseqatigiiffik, piginneqatigiiffik, soqutigisaqaqatigiiffik imaluunniit piginneqatigiilluni umiarsuaatileqatigiiffik. Kommanditselskabit taamaalillutik ilaatinneqanngillat. Soqutigisaqaqatigiinni aamma piginneqatigiilluni umiarsuaatileqatigiiffimmi peqataasut, inuttut nammineq, assigiimmik pisussaaffeqarlutik toqqaannartumillu akisussaaffeqarlutik, maannakkut aalajangersakkami tassani ilanggunneqarput. Inatsit atuuttoq malillugu soqutigisaqaqatigiit nr. 1-imi ilaatinneqarput, kisianni aningaasaatit ilaannut qularnaveeqqusinissaq pillugu malittarisassani aalajangersakkanut tunngasuni imm. 3, nr. 3-mi aalajangersakkamut soqutigisaqaqatigiit ilaasussaaneri immikkut eqqarsaatigalugit immikkoortumi tassani aalajangersagaq iluarsineqarpoq. Tassunga atatillugu malugineqassaaq piginneqatigiilluni umiarsuaatileqatigiiffik tunngaviatigut soqutigisaqaqatigiiffiummat.

Nr. 2)

Aalajangersagaq taanna - tassunga ilanngullugu nutaanik - arlalinnik immikkoortoqarpoq aalisarnermi piginnituunermi annertuumik pingaaruteqartunik:

- inatsisitigut pisinnaatitaasut pisussaatitaasullu inuit assigalugit Kalaallit Nunaannut atassuteqassapput taamaalillutik taakkuninnga piginnittut imm. 2-mi piumasaqaatinik naammassinnissallutik;
- tamanna toqqaannartumik toqqaannanngitsumillu piginnituunermut atuuppoq;
- tamanna inatsisitigut pisinnaatitaasumut pisussaatitaasumullu piginnituunermut taamaallaat atuutinngilaq, kisianni aamma taasisinnaatitaanikkut assigisaatigulluunniit sunniuteqarnermut aamma;
- soraarnerussutisiaqalernissamut aningaasaateqarfiiit aalisarnermi piginneqataanissaannik periarfissinneqarput, aamma
- piumasaqaatit eqqaaneqartut piginnittunut tamanut tunngasuussallutik.

Immikkoortoq siulleq Kalaallit Nunaanni atassuteqarnermut pissutsinut naleqqiullugu inuttut aamma inatsisitigut pisinnaatitaasunut pisussaatitaasunullu sanilliunneqarpoq.

Immikkoortut aappaanni aalajangersarneqarpoq piginnittuunermi pissutsinut piumasaqaatit aningaasaatini piginneqataassutinit tamanit naammassineqarsimassasut, piginnittuunermi pissutsini qanoq avasitsigisumik inissisimaneq apeqqutaatinnagu. Assersuutigalugu tamatuma kinguneraa ingerlatseqatigiiffik A ingerlatseqatigiiffik B-mi piginneqataappat, inuit ingerlatseqatigiiffik A-mi piginnittut tamarmik imm. 2-mi piumasaqaatit tamaasa naammassisimassavaat, ingerlatseqatigiiffik B akuersisumsumik pissarsinissamut periarfissaqassappat.

Taaguut "piginnittuuneq", immikkoortut pingajuannit takuneqarsinnaasutut, alassimaneratut paasineqassaaq, kisianni ingerlatseqatigiiffit pillugit inatsit malillugu aalajangiisumik sunniuteqarnermut ilaalluni.

Immikkoortut sisamaanni soraarnerussutisiaqalernissamut aningaasaateqarfiit aalisarnermi piginneqataalersinnaanerat eqqunneqarpoq. Periarfissaq taanna inatsimmi manna tikillugu atuuttumi atuutinngilaq, aamma aalisarnermi piginnittuunerup annertunerusumik siaruarnissaanut periarfissiinissaq siunertaralugu ilanngunneqarluni. Suliniummut tunuliaqutaasoq "Nalinginnaasumik nassuaatini" suliarineqarpoq. Uani taamaallaat oqaatigineqassaaq pisassiissutinut qummut killiliussat aamma toqqaannanngitsumik piginnittuuneq qummut killiliussami tessani naatsorsuinermut ilaanissaat pillugit malittarisassat nutaat, § 32 takuuk, pisassiissutinik pigisanik tuniniaanermik kinguneqartitsiumaartut naatsorsuutigineqarmat.

Aningaasaliisartut kattuffii, assersuutigalugu umiatsiaararsorlutik aalisartoqatigiit suli aalisarnermut ataatsimut toqqaannartumik ingerlatseqatigiiffittut soqutigisaqaqatigiilluniluunniit ingerlatseqatigiiffittut aningaasaliisinnaajumaarput akuersisummillu pissarsissallutik, imaluunniit ingerlatseqatigiiffimmi pioereersumi aningaasaliisut, aningaasaliisut ataasiakkaarlutik pisassiissutinik pigisaat pisassiissutinut qummut killiliussamik qaangiinnginnissaat piumasaqaatigalugu, § 32, imm. 2 takuuk.

Aalisarnernut tamanut atuuppoq piviusumik piginnittut tamarmik imm. 2-mi allanneqarsimasunik atassuteqarnissamut piumasaqaatinik naammassinnissammata. Aalajangiisumik sunniuteqarneq piginnittuunermut sanilliunneqarpoq, qulaaniittoq takuuk.

Manna tikillugu malittarisassat atuuttut malillugit 100 %-imik piumasaqaat taamaallaat raajarniarnermut atassuteqarsimavoq. Inatsimmi matumani tamanna aalisarnernut tamanut atuutissaaq.

Imm. 4-mut

Kalaallit Nunaannut attuumassuteqartussaaneq soraarnerussutisiaqalernissamut aningaasaateqarfinnut aamma atuuppoq. Tamanna tunngavigalugu siunnersuutigineqarpoq taakku Kalaallit Nunaanni ingerlatsisutut najugaqassasut soraarnerussutisiaqalernissamut aningaasaateqarfinnut atuutissasoq. Taamaattorli soraarnerussutisiaqalernissamut

aninkaasaateqarfinnut ilaasortat ataasiakkaat najugaqarfik akileraartartuunerlu pillugit piumasaqaatinik naammassinissaat pillugu piumasaqaateqanngilaq, pineqartup soraarnerussutisiaqalernissamut aningaasaateqarfia taamaappat naammalluni.

Imm. 5-imut

Kalaallit Nunaanni inuussutissarsiutigalugu aalisarnermi ingerlataqartut aningaasarsiutigalugu inuussutissarsiortuupput, taakkulu soorunami inuussutissarsiortuuneq pillugu inatsimmut naleqqiullugu piumasaqaatinik naammassinnissallutik, tassunga ilanngullugu Qitiusumik Suliffeqarfifit Nalunaarsorsimaffianni (CVR pillugu inatsit) nalunaarsorsimanissaq pillugu inatsit, tassani aalajangersarneqarluni inuussutissarsiortut tamarmik nalunaarsuiffimmi tassani nalunaarsorsimassasut. Tamanna aamma sinerissamut qanittumi aalisarnermut atuuppoq, tassunga ilanngullugu qaleralinniarnermi saarullinniarnermilu umiatsiaararsorlutik aalisartut, tamannalu inuussutissarsiutigalugu imaluunniit sunngiffimmi akuersissut tunngavigalugu tunisisarneq pinersoq apeqquataatinnagu atuulluni. Taamaalilluni aalajangersagaq nutaaq pineqanngilaq, ulloq 1. januar 2018-mi inatsisikkut nr. 33, 28. november 2016-imeersukkut atulersinneqartoq.

Aalisarnermut naleqqiullugu nalunaarsorneqarnissaq pillugu piumasaqaat imm. 5-imi erseqqissarneqarpoq, taamaalilluni akuersissuteqarnissamut taanna piumasaqaataalluni. Nalunaarsorneqarnissaq pillugu piumasaqaatip ilaatigut kinguneraa ingerlatsisoq pillugu paasissutissat arlallit tamanit pissarsiarineqarsinnaaneri.

Imm. 6-imut

Naalakkersuisut (piviusumik Aalisarnermut Piniarnermullu Naalakkersuisoqarfik) akuersissummut piumasaqaatitut ingerlatseqatigiiffiup ilusaa aamma atassuteqarnermut pissutsit pillugit piumasaqaatit naammassineqarsimanerinik upternarsaatinik qaqqugukkulluunniit piumasaqarsinnaapput.

§ 10-mut

Imm. 1-imut.

Inatsisit maannakkut atuuttoq angallammik aallaaveqarpoq, taamaalilluni akuersissut angallammut aalajangersimasumut atulersinneqartarluni, piginnittuunermi pissutsit aqutigalugit Kalaallit Nunaannut atassuteqartoq. Inatsisissatut siunnersuut malillugu qulaani eqqaaneqartunut pullaviusoq tassaavoq akuersissut ingerlatsisorlu, akuersissummullu suli tunngaviulluni angallat, ingerlatisumit atorneqartup, kalaallit nunaanneersuunissaa.

Tamanna ingerlatisup Kalaallit Nunaannut atassuteqarneranik piumasaqaateqarnikkut qulakkeerneqarpoq, takuuk § 9, aamma angallat, aalisarnermi atorneqartoq, ingerlatisumit taassuminnga pigineqartoq, kiisalu piginnittusoq kisimi angallatip aalisarnermi atornissaanut pisinnaatitaaffeqarluni.

Imm. 2-mut.

Aalisarnermut akuersissutip pissarsiarinissaanut piumasaqaataavoq angallatit tamarmik nalunaarsorsimanissaat, tassunga ilanggullugit inuussutissarsiuutigalugu aalisarnermi atorneqartut umiatsiaaqqat, tassa umiarsualivimmut ilisarnaat normu atorlugu Umiarsuit nalunaarsorsimaffianni nalunaarsugaasimassallutik.

Qamuteralaat ATV-llu Qamutit Motorillit nalunaarsorsimaffianni nalunaarsorsimassapput, qimussillu nalunaarsorsimanissaat pillugu piumasaqaateqarnani.

Imm. 3-mut

Normu nalunaaqutsiunneqassaaq taamaalilluni tulluartumik ungasitsigisumiit takuneqarsinnaalluni.

Imm. 4-mut

Nunakkut aalisarnermi atorneqartunik angallatinik nalunaarsuinissaq pillugu malittarisassiornissaq maannakkut pisariaqartutut isigineqanngilaq, siunnersuutikkulli malittarisassat taamatut ittut nalunaarusiornikkut eqqunneqarnissaannut periarfissiisoqarluni.

Biilit aamma angallatit nalunaaqutsersimanissaannut sukumiinerusumik piumasaqaatinik Naalakkersuisut aamma aalajangersaasinnaapput.

§ 11-mut

§§ 9-mi aamma 10-mi piumasaqaatit saqqummiunneqartut ilanggunneqassasut siunnersuutigineqarpoq, taamaalilluni kalaallit aalisarnerat "kalaallinit ingerlanneqarnera" qulakkeerneqarluni, tassungalu atatillugu ingerlatsisup nammineq pigisai angallatit atorneqarlutik. Naalakkersuisulli isumaqarput inatsisit ima aaqqissuunneqartariaqartut aalisarnermi siunissami ungasinnerusumi ineriarnermut taakku killiliissanngitsut, soorlu aamma pisuussutit iluaqtiginerini inuiaqatigiit soqutigisaannut akerliusariaqanngitsut nunamilu suliffissuarnut tunisinerit tamakkiisumik pisariaqartut. Tamanna tunngavigalugu immikkorluinnaq pisuni immikkut akuersisoqartarnissaanut periarfissap ikkunneqarnissa taamaattumik pisariaqarpoq.

Imm. 1-imut.

Tassunga atasoq tassaavoq kinguaariinni nikittoqarnerani pissutsit. Siunnersuutigineqarpoq kinguaarit nikinnerat pinngitoortinnejassanngitsoq, naak aalisarnermut piginnittuunermi kingornussisoq § 9-mi piumasaqaatinik imaasiallaannarluni naammassiminnngikkaluartoq. Taamaattorli ingerlatsisoq "nutaaq" § 9-mi piumasaqaatit allanneqartut naammassinissaannut tulluartumik piffissalerneqassasoq, takuuk imm. 5.

Aalisarnermik inuussutissarsiummik ineriarortitsinermik siuariartornermillu inunnilli tamatumunnga immikkut piginnaasaqartunik pilirisutsilernissaq siunertaralugu inuit taakku

aalisarnermi namminersortutut ingerlatsilernissaannut periarfissinneqarput, naak taakku akileraartarnermut pisussaaffimmik aamma ukiuni kingullerni marlunni Kalaallit Nunaanni inuit nalunaarsorsimaffianni najugaqarnissamut piumasaqaammik naammassinninngikkaluartut - aamma kinguarit nikinnerat pineqanngikkaluartoq.

Tassunga atatillugu "najugaqarallarnermi" pineqartup Kalaallit Nunaata avataani piffissami qanoq sivisutigisumik najugaqarsimanera aalajangiisutut pingaartinneqanngilaq, kisiannili pineqartup ilinniagaqarsimanera imaluunniit assingusunik piginnaasaqalernissaq siunertaralugu Kalaallit Nunaannit qimagussimanera pingaartinneqarluni. Pineqartoq taamaattumik aamma ilinniartuuusimassaq, ilinniarnermut atasumik sungiusarfimmiissimassalluni il.il. Aallaavagineqartoq tassaasinnaavoq pineqartoq ilinniarnerup kinguninngua Kalaallit Nunaannut utersimanissa. Taamaattorli peqqutit immikkullarissut kingunerisaannik pineqartoq immikkut akuersissummik pissarsisimasinnaalluni, naak ilinniarnerup, napparsimanerup il.il. kingorna piffissami sivikinnerusumi Kalaallit Nunaata avataani najugaqarsimagaluartoq.

Ilinniakkap aalisarnermut tunngassuteqarnissaa piumasaqaataanngilaq.

Siunnersutigineqarpoq nunamut aalajangersimasumik atassuteqarneq pillugu nalinginnaanerusumik piumasaqaat qanorluunniit aalajangiussimaneqassasoq.

Imm. 2-mut.

§ 9-mi malittarisassanik immikkut ittuunngitsumik atuineq aalisarnermik inuussutissarsiummut suliffissuarnullu naleqqutinngitsumik kinguneqartitsisinnaavoq, Naalakkersuisullu isumaat tassaalluni taamaattut naleqqutinngitsut, taakku ingasappallaarpata illuatungilerneqarsinnaassasut. Tamanna tunngavigalugu siunnersutigineqarpoq Aalisarnermut Piniarnermullu Aqutsisoqarfik, inuussutissarsiut pisariaqanngitsumik ajoquserneqartussaappat, § 9-mi atassuteqarnissaq pillugu piumasaqaammit immikkut akuersinermik nalunaaruteqarnissamut periarfissaqassasoq.

Imm. 1-ip paarlattuanik imm. 2 "Kalaallit Nunaannut aalajangersimasumik atassuteqarneq" pillugu piumasaqaammit immikkut akuersisoqarnissaanut periarfissiivoq, aalisarnerup ineriartornera suliffissuarniluunniit suliarinnittarneq tamatuminnga pissutissaqartitsippata.

Assersutigalugu ingerlatsisussamik taamatut pisinnaasumik aamma piumasaqaatinik naammassinninnissamik imaaliallaannaq nassaartoqarsinnaannginnera pissutigalugu akuersissut atorneqarsinnaanngilaq. Pisuussutit iluaqtigisaannut inuiaqatigiit erseqqissumik soqutiginnipput, inatsillu, uani § 9, tassani akornutaalissagaluarpat, tassanngaanniit immikkut akuersinermi nalunaaruteqartoqassanersoq isumaliutigineqartariaqassalluni. Immikkut akuersineq piffissamut killilimmut nalunaarutigineqarsinnaavoq utertinneqarsinnaallunilu tamatumunnga piumasaqaatit naammassineqarunnaarsimasutut isigineqalerpata. Immikkut akuersinerup nalunaarutigineqarnera sapingisamik issuarneqartussajunnaarlugu pissaaq.

Eqqarsaatiginninneq, inatsisissatut siunnersummit takuneqarsinnaasutut, aalisarnermik inuussutissarsiummut kiisalu suliffissuarnut naleqqiullugu pisussaassaaq.

Imm. 3-mut

§ 10-mi ingerlatsisumit, aalisarnermut akuersissuteqartumit, pigineqartunit angallatinit aalisarneq qulakkeerneqarpoq. Aamma tunngavimmut tassunga naleqqiullugu immikkut pissutsit atuussinnaapput, malittarisassanik uteriitsumik atuinissaq naleqqukkunnaarluni.

Imm. 3 nutaajusoq naapertorlugu aalisariummik aamma aalisarsinnaanermut akuersisummik piginnittup akornanni kinaassuseq pillugu piumasaqaammi immikkorluinnaq pisoqartillugu immikkut akuersisoqarsinnaavoq. Tamanna tassaasinnaavoq aalisariutip aserornera, sivisunerusumik siumullu naatsorsuutiginngisamik amutsivimmiinnera aamma pissutsit allat tamatumunnga assingusut. Taamatut immikkut pisuni piffissami aalisariummik allamik utaqqiisaasumik attartortoqarsinnaavoq.

Angallat attartorneqartoq aallaaviatigut kalaallit nunaanni nalunaarsugaasimassaaq aamma Kalaallit Nunaanni atasutut nalunaarsorsimassalluni. Aalisariummik atorneqarsinnaasumik Kalaallit Nunaanni nassaartoqarsinnaanngippat, tassunga ilanngullugu aalisariut pisariaqartitanut atorneqarsinnaasoq, qinnuteqartup aalisariummik nunamit allameersumik attartorsinnaaneranut akuersisoqarsinnaavoq. Aalisarnermi pineqartumi ilaatigut pisariaqartitsinermik aamma Kalaallit Nunaanni aalisarnermut pineqartumut usitussutsimik pissarsinissamut periarfissanik atuuttunik aalajangersimasumik naliliinermik aalajangiineq tunngaveqassaaq. Taamaattorli Kalaallit Nunaanni angerlarsimaffeqartumik aalisariummik atorneqarsinnaasumik pissarsinissaq ajornartoq qinnuteqartup uppernarsartussaavaa.

Qinnuteqaammut attartorneq pillugu isumaqatigiissut attuumassuteqartoq ilanngunneqassaaq.

Piffissaq attartorfiusoq pisuni aalajangersimasunik tunngaveqassaaq, soorlu ataavartumik angallatip taartissaanik pissarsinissamut piffissaq qanoq sivisutiginersoq, taannalu ulloq aallartiffiusoq atorunnaarfialu allallugu aalajangersarneqassalluni.

Angallammik akuersisummillu piginnittup akornanni kinaassutsimut piumasaqaammiit immikkut akuersisoqarnera nalunaarutigineqarpat akuersisummik piginnittup §§ 8 aamma 9-imi piumasaqaatit naammassissavai.

Imm. 4-mut

Aalajangersagaq akiitsoqarfigisap qlarnaveeqqusiiiffigisamik aalisariummik tigusisariaqarsimanerani immikkut pisunut tunngasuuvvoq. Tassani Inatsisartut inatsisaanni piumasaqaatinik naammassinnittumik piginnittumik nutaamik nassaartoqarnissaata tungaanut piffissami killeqartumi aalisarnerup ingerlatiinnarnissaanut akiitsoqarfiusumut immikkut akuersinermik nalunaaruteqarnissaq pisariaqarsinnaavoq.

Aamma taamaappoq akiitsoqarfigisap, taarsigassarsianut qularnaveeqquusiineq tunuliaqutaralugu pisassiissutinik niuerutigineqarsinnaasunik nammineq pigisanik tigusisimappat. Piffissami utaqqiisaagallartumi pisassiissutini pineqartuni aalisarnerup ingerlatiinnarnissaat inuiaqatigiit soqutigisaraat, akiitsoqarfigisap pisassiissutinik nammineq pigisanik tunisinissaata tungaanut.

Piffissaq immikkut akuersiffiusoq pisut aalajangersimasut aallaavigalugit aalajangerneqassaaq, tassunga ilanngullugu pisassiissutit nammineq pigisat imaluunniit aalisariutip tunineqarnissaanut piffissaq qanoq sivisutiginissaanik naatsorsuuteqarneq aamma tunisinissaq ajornannnginnersoq eqqarsaatigalugit. Immikkut akuersinerup sivisussusaa ulloq aallartiffik naanissaalu ilisimatitsissutigalugit aalajangersarneqassaaq.

Imm. 5-imut

"Minnerusutut" immikkut akuersineq Naalakkersuisunit piumasaqaatitaqartinneqarsinnaavoq.

Assersuutigalugu eqqaaneqarsinnaavoq immikkut akuersinissaq sioqqullugu naalakkersusoqarfiup piumasarisinnaavaa aalisariummik imaluunniit ingerlatseqatigiiffimmik piginnittup kinguaariit nikinnissaat eqqarsaatigineqartoq tamanut ammasutut tuniniaanertut nalunaarutigissagaa, taamaalillunilu §§ 9-mi aamma 10-imi piumasaqaatinik naammassinnittunik Kalaallit Nunaanni pisisussamut periarfissat qulaajarneqarlutik.

Assersuut alla tassaasinnaavoq Naalakkersuisut immikkut akuersinermut piumasaralugu angallammut ingerlatseqatigiiffimmulluunniit pineqartumut utertitsilluni pisisinnaatitaaneq Naalakkersuisunit anguneqassasoq. Taamatut immikkut akuersinermi utertitsineq pisisinnaatitaanermut piumasaqaatit erseqqinnerusumik allassimasinnaapput.

Aammattaaq immikkut akuersinerup nalunaarutiginissaat sioqqullugu iliuuseqarnissamut pilersaaruteqarnissaq pillugu piumasaqaateqarsinnaavoq, piumasaqaatit immikkut akuersissutigineqartut piffissap aalajangersimasup iluani naammassineqarnissaat ilimanarluni.

Immikkut akuersinissamut piumasaqaatinik Naalakkersuisut aalajangersaasinnaanerannut periarfissat taaneqartut tamakkiisuunngillat.

§ 12-imut

Aalajangersagaq taamaallaat Kalaallit Nunanni aalisarnermut atuuppoq. Aalajangersakkami siunertaq tassaavoq pisuussutinut periarfissaasunut naleqqiullugu aalisarsinnaanermut piginnaasanik annertuallaartunik sanaartortoqarnissaata pinngitsoortinnissaa.

Imm. 1-imut.

Angallat pineqartoq Kalaallit Nunaanni aalisarnermi peqataariinngippat inuussutissarsiutigalugu aalisarnermut angallatinik pisinissamut akuersissuteqarnissap piumasaqaataaneranik malittarisassanik Naalakkersuisut aalajangersaasinnaanerannut aalajangersagaq tunngaviuvoq. Aalajangersagaq naapertorlugu malittarisassanik aalajangersaaneq aalisarnissamut periarfissanut aalisariutit Kalaallit Nunaanneersut aalisariutaannik aalisarsinnaassutsimik naleqqussaanissaq siunertaralugu pissaaq. Aalajangersagaq naapertorlugu malittarisassanik aalajangersaaneq taamaalilluni aalisarnermi pineqartumi pisaqarnissamut aalisarsinnaassuseq aamma pisat amerlassusaat periarfissaasut eqqarsaatigineqassaaq. Tamatuma saniatigut aalisariutit nutaat pillugit aningaasaqarnikkut isiginiagassat, aalisariutit pioreersut aningaasaqarnerat isiginiarlugu kiisalu aalisarnermi isumalluutit allanngutsaaliornissaannik isigininniinarneq ilaatinneqassapput. Tamanna pillugu § 1-imut nassuaatit takukkit.

Imm. 2-mut.

Aalajangersagaq taamaallaat Kalaallit Nunanni aalisarnermut atuuppoq. Aalajangersagaq imm. 1-imi eqqarsaatigisassanut eqqaaneqartunut nassuaatit isumaginissaannik siunertaqarpoq, tassunga ilanngullugu angallatinik nutaatut takkuttunik, angallataareersunik atuisunut ingerlatsisunut aningaasaqarneq eqqarsaatigalugu kiisalu aalisarnermi pisuussutinik sinneqartumik iluaquteqarnerup pinnginnissaa.

Eqqarsaatigisassat taakku isumaginiarlugit kalaallit aalisarnerannut maleduagassanik Naalakkersuisut aalajangersaasinnaapput, taamaalilluni aalisarsinnaanikku piginnaasamik annertunerulersitsisumik angallatip allanngortinnissaa akuersissuteqarnissamik piumasaqaateqartillugu.

Imm. 3-mut

Aalajangersagaq malillugu piumasaqaatit pisariillisaanissaq siunertaralugu kiisalu aalisarnermi imminut akilersinnaassuseq allanngortinniarnagu imaluunniit annertusiniarlugu aalajangersarneqarput.

Tamanna assersuutigalugu pisinnaavoq aalisariut nutaaq takkuttoq taamaallaat aalisakkanik aalajangersimasuinnarnik aalisarsinnaatinneratigut. Tamanna aamma angallat ataaseq imaluunniit angallatit arlaqartut angallammik anginerusumik aalisarluarnerusinnaasumillu taarserneratigut pisinnaavoq.

Aalajangersakkap siunertaa aamma tassaavoq aalisarnermi ataatsimi sinneqartumik aalisarsinnaassuseqarnissap pinngitsoortinnissaa. Aalajangersakkami pissutsit taaneqartut piumasaqaatigalugit akuersissutinik atuutilersitsinikkut aalisariummik nutaamik ingerlalluarnerusinnaasumillu atulersitsisoqarneratigut sinneqartumik piginnaasanik ikkussisoqannginnissaa qulakkeerneqassaaq.

Aalisarsinnaassutsip taamaaqataa aalisarunnaarsitsisoqartinnagu aalisariutinik nutaanik aalisalertsisoqarnissaanik piumasaqaatinik saqqummiussisoqarnissaanut aalajangersagaq tunngavissanik periarfissiivoq, taamaalluni taanna annertusineqarnani.

C. Nunat allamiut ingerlatsisut Kalaallit Nunaata aalisarnikkut oqartussaaffigisaani inuussutissarsiuutigalugu aalisarnerat

§ 13-imut

Imm. 1-imut.

Aalajangersagaq taamaallaat aalisariutinut Kalaallit Nunaannit nalunaarsorneqarsimannngitsunut atuuppoq aamma aalisarnissamut periarfissanut erseqqinnerusumik isumaqatigiissutaasunut nunat allamiut aalisariutaasa Kalaallit Nunaata aalisarnikkut oqartussaaffigisaani inuussutissarsiuutigalugu aalisarsinnaanerannut periarfissiilluni. Aalajangersagaq Kalaallit Nunaata imartani oqartussaaffigisaani taakkulu avataanni aalisarnerni atorneqassaaq. Ingerlataqartoq nunamit allameersoq Kalaallit Nunaata aalisarnikkut oqartussaaffigisaata avataani kalaallinut pisassiissutinik aalisassappat 14-mi aalajangersagaq atorneqassaaq.

Pisuni taakkunani ingerlataqartoq tassaasinnaavoq umiarsuaatileqatigiiffik, kisianni aamma tassaasinnaalluni oqartussat imaluunniit naalagaaffik. Taamaalluni akuersissut maannakkorpiaq Savalimmiuni aamma Norgemi oqartusanut nalunaarutigineqartarpoq, EU-milu akuersissut eqqarsaatigalugu umiarsuaatileqatigiiffimmut pineqartumut nalunaarutigineqartarluni.

Pisassiissutinik aalisariutit aalisarsinnaasaannik Naalakkersuisut aalajangersaassapput.

Imm. 2-mut.

Tunngaviusumik titarneq aalisarnermi killigititap naatsorsorneranut tunngaviuovoq. Tunngaviusumik killeqarfik Kalaallit Nunaata imartaata killilerneqarnera pillugu 27. maj 1963-imi ileqqoreqqusami aalajangersarneqarpoq, kingusinnerusukkut allannguutilik.

Tunngaviusumik titarnermiit 12 somilit iluanni aalisarnissamut nunat allamiut angallataannut immikkut akuersissummik Naalakkersuisut tunniussisinnaapput. Immikkut akuersinissamut periarfissaq siunnersuutigineqarpoq pingaartumik Kalaallit Nunaanni nunami tunisassiorfinnut tulaassisinnaanerat periarfissaqartinniarlugu nunat allamiut ingerlateqatigiiffiinut isumaqatigiissusiornissaq periarfissaatinniarlugu.

Pissutsit assingusut allat assersuutigalugu tassaasinnaapput ukiumi ataasiinnarmi aalisariutit Kalaallit Nunaanneersut aalisarsinnaasaannik amerlanerusunik 12 somilit iluanni pisassiissutit amerlaneruneri. Pisassiissutit sinneruttut nunat allamiut umiarsuaatileqatigiiffiinut

tunineqarnissaat Naalakkersuisut kissaatigippassuk imm. 2-mi oqaaseqatigiinnit siullerniit immikkut akuersisoqarsinnaavoq.

Tunisassiassanik pilersuinermiit allaanerusumik pissutsini allani 12 somilit iluanni nunat allamiut aalisariutaasa aalisarnissaannut akuersissummik tunniussisoqarsinnaanersoq naliliinermik aalajangersimasumik tunngaveqassaaq. Taamatut aalajangiineq inatsimmi § 1-imut (siunertaq) takuneqarsinnaasut eqqarsaatigisassat tunngavigalugit aalajangiisoqassaaq, tassunga ilanngullugu aningaasarsiutigalugu uumassuseqarnikkullu piujuartitsisumik aalisarnerup qulakkeerneqarnissaata eqqarsaatiginera, siunissami ungasinnerusumi inuiaqatigiinni aningaasarsiornikkut sabinngisamik annertunerpaamik iluanaaruteqarnermik pilersitsisoq.

Kapitali 3

Kalaallit Nunaata aalisarnikkut oqartussaaffigisaata avataani aalisarneq

§ 14-imut

Imm. 1-imut.

Kalaallit Nunaata aalisarnikkut oqartussaaffigisaata avataani kalaallit aalisarnerat naalagaaffiit allat imaluunniit naalagaaffiit akornanni aalisarnikkut oqartussaaffigisaanni (Nunarsuup immikkoortuani aalisarnermik aqtsinermi suliniaqatigiiffiit - RFMO) imaluunniit nunat tamalaat imartaanni ingerlanneqarnera eqqarsaatigineqarsinnaavoq. Pisumi siullermi aalisarneq naalagaaffiit ataasiakkaat imaluunniit naalagaaffiit akornanni isumaqatigiissuteqarnikkut ingerlanneqassaaq, taakku aalisarnermut malittarisassat annertunersaannik aalajangersaassallutik. Pisup tulliani aalisarneq amerlanertigut nunarsuup ilaani aalisarnikkut suleqatigiiffinnit soorlu NAFO-p aamma NEAFC-ip isumaqatigiissutaannit malittarisassiorneqartarpoq.

Imm. 2-mut.

Aalajangersakkami siunertaq tassaavoq Kalaallit Nunaata aalisarnikkut oqartussaaffigisaata avataani, aamma nunat tamalaat isumaqatigiissutaannut ilaasumi aalisarnermik Naalakkersuisut malittarisassaliornissamut periarfissinneqarnissaat.

Kapitali 4

Inuussutissarsiutigalugu aalisarneq pillugu malittarisassaliorneq

Inatsimmi anguniakkat naammassineqarnerinik qulakkeerininnissamut naleqqussaalluni suliniuit qanoq iluaqtaasinnaaneri pillugu sinaakkutinik kapitali manna aalajangersaavoq. Tamanna ilaatigut uumassuseqarnikkut, aningaasarsiornikkut inuiaqatigiinnilu piujuartitsinissaq pillugu anguniakkanut atuuppoq. Kapitalimi taamaalilluni aalisarnermi annertunerusumik malittarisassat allanneqarput, piujuartitsinissamullu aaqqiinerit pillugit

kapitali 10-mi pisuussutinik illersuinissaq siunertaralugu pilersinneqarsinnaasut aaqqiinerit allaaserineqarlutik.

Kapitali § 15-imni taamatut malittarisassiornissamut Naalakkersuisunut tunngavissiivoq, § 16-ilu aqutsinissamut pilersaarutinut tunngasuulluni, aalisagaqtigiainnut pingaarutilinnut tamanut akuersinissamut Naalakkersuisunut pisussaaffiliisoq.

A. Malittarisassatigut aaqqiinerit

§ 15-imut

Aalajangersagaq inuussutissarsiutigalugu aalisarnerup malittarisassiorneranut, taamaalillunilu tamanna pillugu ukiumoortumik nalunaarutit atulersinnerinut tunngaviuvoq. Malittarisassat taakku siullermik kalaallinit aalisartunit periarfissaasunut pisuussutinik iluaquteqarnermut tunngasuupput, tak. nr. 1-7. Aammattaaq aalajangersagaq tunngavigalugu nunat allamiut angallataannut periarfissaasunik pisuussutinik iluaquteqarnissaq pillugu malittarisassanik aalajangersaasoqarsinnaavoq. Nr. 1-7-imni malittarisassat tassaagajupput pisassat amerlassusaat, ukiup nikikkiartornerani aalisakkanik pisassiissutit agguarneri assigisaalu. Manna tikillugu pisartut assigalugit malittarisassat sapinngisamik ataatsimoortillugit atuutilersinneqassapput.

Nalinginnaasumik pilersaarusiornissamut periarfissaq pillugu anguniakkap saniatigut aalisarnerup annertussusianut, allanik iluaquteqarnissaq pillugu kissaateqarnermut il.il. naleeqjullugu pissutsinut nutaanut sukkasuumik tulluarsarnissamut malittarisassat periarfissiippuit.

Iliuutsit aalisarnermik malittarisassiornermi atorneqarsinnaasut arlallit allaqqapput. Soorlu inatsisip oqaasertaani ersittoq, iliuutsit inatsisini allani aalajangersakkat naapertorlugit aalajangersarneqartut pisuussutinut aalisarneqarsinnaasunut tunngatillugu inuussutissarsiroluni aalisarnermik naleqquttumik aaqqissuussinissaq siunertaralugu aamma atorneqarsinnaapput. Tamanna assersuutigalugu aalisakkanik piffissani tunineqarsinnaannginneranni eqqisisimatisinermik atuutilersitsinermi atuuppoq.

Aalisarnerit immikkuullarissut eqqarsaatigalugit pisuussutinik aningaasaqarnikkut oqimaaqtigiissumik atorneqarnissaat isumagineqarpoq aamma naammattumik mianerinnilluni aalisarnissap qulakkeernissaanut sukumiinerusunik malittarisassiorqarluni, tak § 1.

Tamatuma saniatigut aalisarnermik inerteqquteqarfiusumi pisanik tunisineq Naalakkersuisunit inerteqqutigisinhaavaat, tassa pisassiissutit nungunneqarsimammata, aalisagaqassuseq piffissami pineqartumi eqqisisimatinneqarmat allalluunniit peqquaallutik.

B. Ukiunut arlalinnut aqutsinissamut pilersaarutit

§ 16-imut

Aalajangersagaq nutaaajuvoq aamma Aalisarneq pillugu Ataatsimiititaliarsuup inassuteqaataata nanginneraniilluni.

Aalisarneq pillugu politiki isumalluutinik iluaquteqarnissamut pingaarnertigut najoqqutassanik pingaarnersiuinernillu imaqartoq aalisarnernut ataasiakkaanut anguniakkat aalajangersimasut aalajangersakkallu aalisarnernut ataasiakkaanut aqutsinissamut pilersaarutini nalinginnaasumik aalajangersarneqartarput. Aqutsinissamut pilersaarutit atorneqarneri, tassunga ilangullugu taakku qanoq suliarineqarnissai, aamma qanoq imaqarsinnaaneri, ilaatigut uani allaaserineqarput; FAO-p (*Food and Agriculture Organization of the United Nations*) Aalisarnermik aqutsineq pillugu piujuartitsinissamut najoqqutassat (*FAO, 1997: The Technical Guidelines on Fisheries Management*).

Aqutsinissamut pilersaarutit aalisarneq pillugu politikit naammassineqarnissaanut sakkutut pingaaruteqartutut nunani ataasiakkaani kiisalu nunani tamalaani atorneqartarput. Marine Stewardship Councilip ataani aalisarnerup akuerisaanissaanut aalajangiisuussaaq aqutsinissamut periusissiaqarsimanissaq, annerpaamik nungusaataanngitsumik iluaquteqarneq (MSY) pillugu anguniakkamut naapertuuttumik aalisarnermik aqutsinermik quakkeerinnittoq.

Naalakkersuisut isumaat tassaavoq aalisagaqtigiinnut pingaaruteqartunut tamanut aqutsinissamut pilersaarutit siunissami ungasinnerusumi inuiaqtigiit sappinngisamik annertunerpaamik iluaquteqarnissaat pillugu anguniakkamut naapertuuttumik isumalluutinik aqutsinermik quakkeerinneqataasinnaasut. Aalajangiisuussaaq pilersaarutit piumasarineqartutut pituttuisutut isumaqtigiissutitut aamma inatsimmi anguniakkat naapertorlugit suliarineqarnissaat.

Imm. 1-imut

Aalajangersakkami aalajangerneqarpoq pilersaarutit taamaattut aalisakkanut pingaarutilinnut tamanut akuersissutigineqassasut.

Aqutsinissamut pilersaarut aalisagaqtigiinnut ataatsinut, aalisagaqtigiit ilaannut, aalisagaqtigiinni immikkoortunut aamma/imaluunniit aalisarnermut ataatsimut arlalinnulluunniit (aalisariutini immikkoortunut) oqaasertalersormeqarsinnaavoq.

"Aalisagaqtigiit" aamma "aalisarnerit" akornanni immikkoortitsisoqarnissaanut naleqqiullugu § 3-mi nassuaatinut innersuussisoqarpoq. Aqutsinissamut pilersaarutit aallaaviatigut aalisagaqtigiinnut atassuteqassapput, aalisarnerilli, aalisakkat assigiinngitsut

pisaniissinnaallutik, tulluassaaq naleqqutissallunilu aqtsineq aalisagaqatigiinnik arlalinnik aalisarnermut tunngassuteqarpat.

Pilersaarutit Kalaallit Nunaata imartaani aalisarnernut taamaallaat tunngasuupput. Sumiiffinni allani Kalaallit aalisarnerat, tassunga ilanggullugit nunani tamalaani imartat, nunat marluk imaluunniit nunat arlallit aqtsinissamut pilersaarutaannut ilaasinjaassapput.

Imm. 2-mut.

Aqtsinissamut pilersaarutinut nalinginnaasunik pingasunik piumasaqaateqarpoq. Taakku imm. 2-mi takuneqarsinnaapput.

Siullermik piareersarnera soqutigisaqaqatigiit suleqatigeqqissaarlugit pissaaq, tamannalu piviusumik isumaqarluni suleqatigiissitamik pilersitsisoqassasoq, ataatsimoorluni aalisagaqatigiinnut pineqartunut/aalisarnernut pineqartunut tunngasumik aqtsinissamut pilersaarutissanik siunnersuusiorqarluni. Katitigaaneq aalisarnerni tamani assigiissinnaanngilaq, inuussutissarsiornermi kattuffiit attuumassuteqartut, Pinngortitaleriffimmit ilisimatuussutsikkut siunnersuinerit, Aalisarnermut Piniarnermut Naalakkersuisoqarfik kiisalu Kalaallit Nunaanni Aalisarsinnaanermut Akuersissutinik Nakkutilliisoqarfik nalinginnaasumik ilaasassallutik. Aammattaaq assersuutigalugu suliffeqarfiiut tunisassiortut, sulisartut, pisisartut, sunngiffimmi aalisartartut avatangiisitigullu suliniaqatigiiffiit sinniisoqarsinnaallutik, tamanna naleqquppat.

Suleqatigiiffusoq tassaavoq aqtsinissamut pilersaarummut ataatsimoorluni siunnersuusiorneq, inaarutaasumillu pilersaarut Naalakkersuisunit akuerineqartussaalluni.

Aappaatut piareersarnera nunani tamalaani isumaqatigiissutinut naapertutissaaq. Qulaani eqqaaneqartut najoqquassiat FAO-mit atorneqartut, nunami maani suliarineqartunut aqtsinissamut pilersaarutinut aallaaviusariaqarput.

Pingajuattut ilisimatuussutsikkut siunnersuinermik eqqarsaatiginninneq ilaassaaq. Pingaaruuteqarpoq aalajangiinerit naammattumik ilisimasat tunngavigalugit aalajangiiffingeqarnissaat, taamaalilluni politikkut aalajangiinerit inatsimmi siunertamut naammassinnillutik, "aalisakkatigut pisuussutit piujuartitsisumik iluaqutigineqarlutik, aalisagaqatigiillu ima amerlassuseqartillugit siunissami ungasinnerusumi annertunerpaamik piujuartitsilluni iluaqutigineqarsinnaallutik", tak. § 1, imm. 2. Tamanna iluatsinngippat uumassuseqarnikkut, aningaasarsiornikkut inuiaqatigiittullu ajortumik annertuumik kingunerlutsitsisoqarsinnaavoq, pingaartumik siunissami ungasinnerusumi.

Ilisimatuussutsikkut siunnersuineq pInngortitaleriffimmit saqqummiunneqartarpoq, tak. Pinngortitaleriffik pillugu inatsimmi § 1, tassannga takuneqarsinnaalluni pinngortitaleriffik, namminersorlutik oqartussat pinngortitamik ilisimatusarneranni qitiusoq aamma siunertaqarpoq "...Kalaallit Nunaanni eqqaanilu pisuussutinik uumassusilinnik

*nungukkiartuutaannngitsumik atuinissamut ilisimatuussutsikkut tunngavissanik
pissarsiniarnermik kiisalu avatangiisinik uumassusillillu amerlalluinnartuunerinik
isumannaarinninnissamik."*

Pinngortitaleriffik siunnersuinermi nunani tamalaani ilisimatuussutsikkut suliniaqatigiiffit (ICES) imaluunniit suliniaqatigiiffit ilisimatuussutsikkut ataatsimiititaliai (NAFO, NASCO il.il.) suleqatigeqqissaarlugit.

Pisuni naammattumik ilisimasat pigineqartinnagit, FAO-p najoqqtassiai naapertorlugit aalajangiinernut mianersortumik tunngaveqartumik tunngavissiisoqartariaqarpoq.

Annertuumik pingaaruteqarpoq pisuussutit iluaqutigineri taamatullu iluaquteqarnermik aqtsineq oqartussat soqutigisaqaqatigiillu akornanni peqatigiinnertut pinissaa, aamma uumassuseqarnikkut tunngavissat aamma pingarnertigut anguniakkat iluanni aqtsinissamut pilersaarutit soqutigisaqaqatigiit naammaginartumik kissaataannut naapertuuttariaqarput.

Soqutigisaqaqatigiit naammaginartumik kissaataasa akornanni ataqatigiissinneqarsinnaanngitsut saqqummersinnaapput. Assersuutigalugu aalisagaqassutsinik ataatsinik annertunerpaamik iluaquteqarneq soqutigisaqaqatigiit allat pinngitsoorsinnaasaannut allamut kingunerlutsitsisinnaavoq, soorlu aamma annertunerpaamik aningaasarsiornikkut iluanaaruteqarnissaq pillugu kissaateqarneq aalisakkerivinni suliffiit sapinggisamik amerlanerpaanissaat pillugu kissaateqarnermut imaluunniit pisuussutinut piginnittuunerup siaruartinnissaa pillugu kissaateqarnermut amerlanertigut ataqatigiissinneqarsinnaanngitsoq.

Taamaattumik pingarpoq isertuanngitsumik paasiuminartumillu oqallinnikkut siunissami kissaatinut sapinggisamik annertunerpaamik naapertuuttut aalajangiinerit anguneqarsinnaappata.

Tamannali isumaqanngilaq aqtsinissamut pilersaarutini ilisimatuussutsikkut siunnersuinermiit allaanerusut eqqarsaatigisassat allat ilanngunneqarsinnaanngitsut. Nalinginnaasumik nassuaatinit aamma takuneqarsinnaasutut aningaasarsiornikkut - akuttunngitsumillu inuiaqatigiinni eqqarsaatigisassat - ilanngunneqarneri tlluarsinnaapput, taamatullu ilanngussinerup kingunerisinhaallugu aqtsinissamut pilersaarutit tamakkiisumik ilisimatuussutsikkut siunnersuinernut naapertuuttannginneri. Eqqaaneqartutulli uumassusillit pingarnertigullu anguniakkat pisariaqartitaasa killiliussat iluanniissallutik.

Imm. 3-mut.

Aalajangersagaq taanna pilersaarutinut ilaasussanik immikkoortunik aalajangersimanerusunik imaqpapoq.

Nr. 1)

Eqqaaneqartutut aqtsinermi pilersaarummi pineqarsinnaapput aalisagaqatigiit kiisalu aalisarnerit, pilersaarummilu erseqqissumik tassani sunarpiaq pineqarnersoq takuneqarsinnaalluni. Tassunga ilanngutissaq nunap ilaani sunarpiaq pineqarnersoq allanneqassammat.

Nr. 2)

Pilersaarummi pineqartumi aqtsinermut anguniakkat allaaserinerinut naleqqiullugu taanna minnerpaamik aalisarnerup aalisagaqatigiillu siunissami ungasinnerusumik piujuarnissaat pillugu anguniakkanik imaqassaaq. Taannali aamma anguniakkanik allanik imaqarsinnaavoq, tassunga ilanngullugit saniatigut pisat, igitsisarnerit, aalisarnerup pinngortitap ataqtigiinneranut sunniutai aamma ingerlataqartut akornanni pisaqarnissamut periarfissat agguarsinnaaneri pillugit.

Nr. 3)

Immikkoortoq aalisagaqassuseq pillugu suliarineqarsinnaasunik, annertussusilerneqarsinnaasunik anguniakkanut tunngasuuvooq. Anguniagaq ataaseq assersuutigalugu tassaasinnaavoq aalisagaqassutsip annertunerpaamik piujuartitsilluni iluaqutaasumik amerliartoqqissinnaaffiattut qaffassisssusiata ilimanassusiata allanneqarnera. Aalisarnermut ataatsimut anguniagaq tassaasinnaavoq aalisagaqassutsip siunissami aamma MSY-mik qaffassuseqarnissaanut ataqtigiissinnejarsinnaasumik qaangiinnginnissaq.

Pilersaarut aamma 2)-mi anguniakkatut allanneqartunik anguniakkanik suliarineqarsinnaasunik imaqassaaq. Taakku annertussuseqartariaqarput, annertussusilernissaali ajornarpat kisitsisit atorlugit uuttuisoqarsinnaavoq.

Nr. 4)

Anguniakkat allaaserineqartut anguneqarnissaannut piffissaliussaq qaqugukkulluunniit pingaaruteqassaaq, pingartumilli immikkoortoq nr. 3)-mi anguniakkat suliarineqarsinnaasut anguneqarsinnaanngippata.

Nr. 5)

TAC-mik aamma imaluunniit pisassiissutinik aalajangersaanermut malittarisassanut assersuutigalugu ukiut akornanni pisassiissutinik iluaquteqarnermi nikerartitsisinnaanermut periarfissat ilaasinnaapput, taakkuli kisitsisit atorlugit uuttuiteqarluni anguniakkat anguneqarnissaat pillugu anguniakkanut akerliusinnaanatik, takuuk nr. 3).

Nr. 6)

Aqtsinissamut pilersaarutinut piumasaqaatini sunniiniutinut aalajangersimalluinnartunut kisitsisit atorlugit uuttuiteqarluni anguniakkat aqqutigalugit pingarnertigut anguniakkat akornanni toqqaannartumik atassuteqarpoq, tassa piujuartitsinissamut aaqqiissutit. Pijuartitsinissamut aaqqiissutissat taakku kisitsisit atorlugit uuttuiteqarluni anguniakkat anguneqarnissaasa qulakkeerneqarnissaanut peqataasinnaapput, taamaalillunilu

pingaarnertigut anguniakkat anguneqarlutik. Taamaattumik piujuartitsinissamut aaqqiinerni siunertap aqtsinissamut pilersaarummi allaaserineqarnissaa pingaarpoq.

Nr. 7)

Aalisagaqatigiit inissisimanerat assersuutigalugu soqtigisaqaqatigiit kissaataattulli piffissap ingerlanerani allanngorsinnaapput, tamatumalu kingunerisaanik aqtsinissamut pilersaarutini anguniakkat allassimasut nikisinneqarsinnaallutik, soorlu aamma pilersaarutini aalajangerneqartut sunniiniutit piffissamut tulluarunnaarsinnaasut.

Taamaattumik pilersaarutit tulluartumik akuttussuseqartumik nutarterneqartarnissaat pisariaqarpoq. Nalinginnaasumik taamatut akuttussuseq ukiut pingasuniit tallimaasinnaapput, taamaalilluni piffissap naalernerani piffissap taamaaqataanut nutaamik pilersaarusiortoqarluni. Pilersaarutip "ingerlaavartumik" ukiukkaartumik nutarterneqartarnissaanut periarfissamik aalajangersagaq ammaassivoq, taamaalilluni piffissami ukiunut aalajangersimasunut qaqugukkulluunniit atuulluni.

Aqtsinissamut pilersaarutinik nutarterineq eqqarsaatigisassat allaaserineqartut isiginiarlugit pissaaq.

Imm. 4-mut

Aqtsinissamut pilersaarutini immikkoortut qulaani taaneqartut pinngitsooratik atuuttussaasut imm. 4-mi immikkoortut taaneqartut pinngitsooratik atorneqartussaanngillat. Aalajangersagaq tamakkiisuunngilaq.

Nr. 1)

Aqtsinissamut pilersaarutit nalinginnaasumik pisassiissutit agguarnerini tunngavigineqartumik aaqqissuussinermik allaaserinninnermik imaqassapput. Tamanna assersuutigalugu tassaasinnaavoq PNPNP-mik tunngaveqarneq ilaatigut raajarniarneq, imaluunniit paggatassiilluni aalisarnermik tunngaveqarsinnaalluni, soorlu aalisarnerit ilai suli taamaattut.

Nr. 2)

Paasissutissanik katersineq, suliaqarneq ingerlatitseqqinnerlu pillugit malittarisassat kapitali 12-mit takuneqarsinnaapput. Paasissutissanik suli annertunerusumik katersisoqarnissaa pisariaqassappat imaluunniit kissaatigineqarpat tamanna aqtsinermi pilersaarutini ilanngunneqarsinnaassaaq.

Aalajangersakkap paasissutissanik katersineq kisiat eqqaammagu tamatuma kingunerinngilaa taakkuninnga ingerlatitseqqittoqassanngitsoq. Ingerlatitseqqinneaq inatsimmi kapitali 12-mi aalajangersakkat naapertorlugit pisinnaavoq.

Nr. 3)

Inatsimmi kapitali 14-mi aalisarnermik nakkutilliineq pillugu aalajangersakkat aqtsinermik pilersaarutit malitsigisaanik nakkutilliinissamik pisariaqartitsinernut naleqqutinngippata pilersaarutit ataasiakkaat tamatuminnga qulakteerisunik aalajangersakkanik imaqarsinnaassapput.

Imm. 5-imut

Aqtsinermi pilersaarutini siunertaq pingaaruteqartoq tassaavoq siunissami piffissami inuup sulineranut atuuttussanik piumasaqaatinik ingerlatsisut ilisimasaqarnissamut periarfissaqarnissaat. Ingerlatsisoq inuussutissarsiummini aningaasaliinissaminut periarfissinneqassaaq, tamatumalu pinissaanut tunngaviusoq tassaalluni piumasaqaatit piffissap ingerlanerani allanngortinnginnissaannut qularutissaqannginneq.

Tamanna tunngavigalugu pissusissamisoorpoq pisariaqarlunilu aqtsinissamut pilersaarutini allannguinerit aallaaviatigut pilersaarutini nammineq oqaatigineqartut aalajangersakkat malillugit taamaallaat pisarnissaat, qulaani imm. 3, nr. 7)-miitoq takuuk.

Imali sakkortutigisunik allanngortoqarsinnaalluni, tassunga ilanngullugit pisuussutit najuunnerini imaluunniit aalisarnerni, pilersaarutaasumik allannguinissaq sioqqullugu allannguinissaq pisariaqarluni. Taamatut pisoqartillugu imm. 5 malillugu taamatut allannguisoqarsinnaavoq. Aamma suliniutit taakku eqqarsaatigalugit suleriaatsit nalinginnaasut sapinngisamik annertunerpaamik malinneqassapput.

Pissusissamisuussaaq taamatut allannguineq Inatsisartunut ukiumoortumik nalunaarusiamut ilaatinneqarpat, tak. § 53.

Kapitali 5

Pisarineqarsinnaasut amerlassusissaannik aalajangersaaneq agguassinerlu

Kapitali 2-mi Kalaallit Nunaata aalisarnikkut oqartussaaffigisaani aalisarnissamut periarfissaqarnissamut ingerlataqartumit piumasaqaatit suut naammassineqassanersut aalajangersarnerisa aamma kapitali 4-mi aalisarnermik malittarisassanut pingarnertigut tunngavissanik aalajangersaanerup kingorna kapitali 5-mi aalisagaqtigiinnut kiisalu aalisariutinut pisassiissutinik aalajangersimasumik aalajangersaarnissamut najoqquṭassanik aalajangersasoqarpoq.

Ingerlatsisunut ataasiakkaanut annikitsuinnarnik annertussuseqartunik pisassiissutinik taamaallaat agguasoqarpoq: PNNP-mik aalisarnerni ukiumoortumik pisassiissutit TAC-imik tunngaveqarput (pisassiissutinit pigisat TAC-imik amerleriarlugit) aamma paggatassiilluni aalisarnermi ingerlatsisunut ataasiakkaanut pisassiissutinik aalajangersaasoqartarnani. Ingerlatsisunut ataasiakkaanut pisassiissutinik aalajangersaasoqarsimappat tamanna kapitali 5-imi aalajangersakkat malillugit pissaaq.

A Pisarineqarsinnaasutut akuerisat tamarmiusut

§ 17-imut

Imm. 1-imut

Kalaallit Nunaata aalisarnikkut oqartussaaffigisaani aalisakkanik pisarineqarsinnaasutut akuerisaasunik (TAC) Naalakkersuisut aalajangersaanerat aalajangersakkami aalajangersarneqarpoq. Nutaatut Naalakkersuisut taamaattoq § 16-imik aqtsinermi pilersaarutit pillugit aalajangersakkat malillugit taakku atorunnaarsissimmaavaat, taamaalilluni pilersaarutit aamma TAC-tut aalajangersakkat akornanni naapertuttoqalerluni. Aqtsinermi pilersaarutit amerlassusiliinernik imaqanngimmata "naapertuunneq" eqqaaneqartoq ukiumoortumik TAC-ip amerlassusia pinnagu aalajangersaaneq pillugu tunngavinnut tunngasuussaaq. Inatsisip atulersinnerani aalisarnermut aalajangersimasumut aqtsinermi pilersaarummik suli akuersisoqarsimannngippat inatsimmi nalinginnaasumik tunngaviit pingaartumillu §§ 1 aamma 16 tunngavigalugit ukiumoortumik pisarineqarsinnaasutut akuerisat aalajangersarneqassapput.

Kalaallit Nunaata aalisarnikkut oqartussaaffigisaani aalisagaqtigiinnut, nipisat saattuallu minillugit, TAC-mik aalajangersaanermut aallaavik tassaavoq NAFO-miit, ICES-imiit aamma Pinngortitaleriffimmiit ilisimatuussutsikkut siunnersuinerit. Pinngortitaleriffiup siunnersuutit Naalakkersuisunut saqqummiutissavaat.

Qulaani eqqaaneqartutut aalisarnermi uumassuseqartunit allaanerusut eqqarsaatigisassat naleqquttut allaasinnaapput. Taamaatumik imaanngilaq Kalaallit Nunaata aalisarnikkut oqartussaaffigisaani TAC-mik biologit siunnersuinerat tamakkiisumik malinneqassasoq. § 1, imm. 1-imik pingaarnertigut siunertatut aalajangersagaq taamaattoq tamatigut pingaaruteqartutut inissinneqartassanngilaq.

Aalisagaqassutimi mianerisassat saniatigut mianerisassat allat eqqaaneqarsinnaasut:

- 1) Aningaasaqarnikkut eqqarsaatigisassat
- 2) Inuttut atukkat pillugit eqqarsaatigisassat
- 3) Suliffissaqartitsinermi eqqarsaatigisassat
- 4) Sunngiffimmi sammisassaqarneq pillugu eqqarsaatigisassat

Aalisakkani uumasoqarnikkut eqqarsaatigisassanit allaanerusut eqqarsaatigisassat allat eqqaaneqarsinnaasut pillugit nalunaarsuineq tamakkiisuunngilaq.

Aalisagaqtigiinnut aqtsinermi pilersaarummik akuersiffiusimanngitsut eqqarsaatigalugit TAC-mik aalajangersaaneq inatsimmi anguniakkat naapertorlugit pisassaaq, tak. § 1.

Oqaatigineqassaaq TAC-mik aalajangersaaneq PNNP-mik aaqqissuussinermut ilaasunut aalisarernut naleqqiullugu immikkut pingaaruteqarmata (takuuk kapitali 7), tassa

pisaqarsinnaassuseq sinnerlugu imaluunniit ingerlaavartumik qaffanneqartarluni TAC aalajangersarneqarpat aaqqissuussinerup ingerlallualersitsisinnaanini annaassammagu.

Imm. 2-mut.

Kalaallit Nunaata aalisarnikkut oqartussaaffigisaani ukiumoortumik TAC-ip aalajangerneqarnerata saniatigut oqartussaaffigisap taassuma avataani kalaallinit ingerlataqartunit aalisarneqarsinnaasutut pisarineqarsinnaasut annertussusissaat Naalakkersuisunit aalajangerneqassapput. FN-ip imarmi pisinnaatitaaffiit pillugit isumaqatigiissut (United Nations Convention on the Law of the Sea; UNCLOS) malillugu pisussaaffiuvoq naalagaaffiit sinerillit arlallit iluanniittut aalisagaqatigiit nunat pineqartut akornanni suleqatigiittoqarneratigut aqunneqassasut. Aalajangersimasumik tamanna isumaqarpoq taamatut aalisagaqatigiinnut TAC-p aalajangersarnerani nunat allat soqtigisaat Kalaallit Nunaannit eqqarsaatigineqassasut.

Imm. 3-mut

Aallaaviatigut TAC iluarsiivigineqarsinnaassanngilaq, kisianni imm. 3 immikkorluinnaq pisoqartillugu taamatut iluarsiinissamut Naalakkersuisunut periarfissiivoq. Tamatumunnga assersuut tassaasinnaavoq ilisimatuussutsikkut siunnersuinerup nutaap TAC-p aalajangersarnissaanut tunngavimmik annertuumik allannguinera imaluunniit siunnersuinerup ingammik nalorninartoqarnera. Aalisagaqatigiinnut pisassiissutit ukumi aalajangersimasumi tamakkerlugit aalisarneqarneri namminermi TAC-ip qaffannissaanik nammattumik tamanna tunngavissiinngilaq. Aalisarnerni, PNNP-mik aalisarfiusuni, aalisarnissamut tunngaviup allanngornera aaqqissuussinerup siunertaanut akerliussaaq, tassa ingerlataqartup ukumi pineqartumi qanoq annertutigisunik aalisarsinnaanini ilisimanagu aalisarnissamut aningaasalersuinissanilu aaqqissuussinnaannginnamigit. Ingerlataqartup taamaalilluni pisassiissutit pigisat taarsigassarsinermut atatillugu qularnaveeqqutitut atorsinnaanngilai, pisassiissutit sinneqaraangata naleqassutsitik annasaramikkit taamaalillutillu pisassiissutit/TAC-llu ingerlaavartumik qaffanneqartarlutik.

Imm. 4-mut

Aalisarnernut nutaarluinnarnut imaluunniit aalisagaqatigiinnut siusinnerusukkut iluaqutigineqarsimanngitsunut TAC-mik aalajangersaissaq annertuumik ajornarsinnaavoq naleqqunnanilu, taamaattumillu inatsit imm. 1-imik saneqqussinissamut Naalakkersuisunut periarfissiilluni. Taamaattorli tamanna qaqtiguinnakkut taamaallaat pisinnaassalluni.

B. Pisassiissutit

§ 18-imut

Imm. 1-imut.

§ 17, naapertorlugu aalisagaqatigiinnut TAC-mik aalajangersaasoqarnerata kingorna taakku angallatinut immikkoortunut agguaanneqassapput, aamma imm. 1 taamatut agguaassinerup

isumaginissaanut Naalakkersuisunut piginnaatitsilluni. Aalajangersagaq aamma agguassinermut tunngavinnik aalajangersaavoq. Ingerlataqartunut ataasiakkaanut pisassiissutinik agguaneq kapitali 6 naapertorlugu ingerlanneqassaaq.

Naalakkersuisut taamaalillutik aqutsinermi pilersaarutinik naleqquttunik aallaaveqassapput, soorlu aamma nunanik allanik isumaqatigiissuteqarsinnaanerit isiginiarneqassasut.

Agguassinermi aalisagaqatigiinnut ataasiakkaanut TAC Naalakkersuisut aallaavigissavaat. TAC-it taamaalillutik aalisariutinut aalisarnermillu ingerlatsisunut pisassiissutinik ukiumoortumillu pisassiissutinik agguassinermi tunngavigineqassapput.

Qaleralinniarnermi umiatsiaararsortut eqqarsaatigalugit immikkut atuuppoq ingerlataqartut PNNP-mik aaqqissuussinermut ilaasut ingerlataqartullu ilaannngitsut ilaammata.

Paggatassiilluni aalisartut aamma PNNP-mik aaqqissuussinermut ilaasut akornanni umiatsiaararsortunut pisassiissutit Naalakkersuisunit agguarneqassapput. Paggatassiilluni aalisartunut tutsinneqartussat tassaapput sinerissamut qanittumi pisassiissutit ilai, inatsisip atuutilernissaa tikillugu umiatsiaararsortunut tunniunneqartarsimasut, PNNP-mut tunniunneqartut umiatsiaararsortunut nalunaarutigineqartut ilanngaatigalugit. Tassunga atillugu takuuk siunnersuummi § 28, imm. 3-6 tassungalu nassuaatit.

Aalisagaqatigiinnut ataasiakkaanut TAC-inik agguassinermi aalisariutit immikkoortuinut aalisarnermillu ingerlatsisunut assigiinngitsunut agguassinermi nunanik allanik peqatigisanik isumaqatigiissutit Naalakkersuisut mianerissavaat. Aalisagaqatigiinnut ataasiakkaanut TAC-ip iluani amerlanerusunik Naalakkersuisut pisassiissutinik ukiumoortumillu pisassiissutinik agguasinnaanngillat. Pisassiissutit nunat tamalaat akornanni isumaqatigiissutigineqarsimasut tassunga ilaatinneqarpuit.

Ingerlataqartunut ataasiakkaanut agguanneqartut kapitali 6-imi aalajangersakkanik tunngaveqartumik pissapput.

Imm. 2-mut.

Pisassiissutit agguannerinut piumasaqaatit pillugit Naalakkersuisut erseqqinnerusunik malittarisassiorsinnaanermut pisinnaatinneqarnissaat aalajangersakkami aalajangersarneqarpoq. Pisassiissutit agguanneqartarnerinut piumasaqaatinik aalajangersaanermi Naalakkersuisut mianerisinhaasaat pissutsit arlallit aalajangersakkami aamma allaaserineqarput.

Aallaaviatigut tamakkiisumik allattusoqarpoq, avaqqunneqarsinnaananili Naalakkersuisunit ilanngunneqarusuttunik allanik eqqarsaatigisassanik peqarsinnaammat, tamatumalu mininneqarnissaa aalajangersakkami siunertaanani. Tamatumunngalu erseqqissumik tunngaviussalluni eqqarsaatigisassap attuumassuteqarnissaa, atorneqarnissaalu naleqquttuunissaa.

§ 19-imut

Inatsisikkut iluaquteqarnissamut pisussaaffimmik pilersitsisoqarnerata kingunerisaanik aalajangersagaq ikkunneqarpoq aamma takuneqarsinnaappat ingerlatsisoq ukiumoortumik pisassinneqarsimasup pisassiissutigineqartut tamaasa aalisarsinnaanngippagit, pisassiissutigineqartut utertinneqarsinnaanissaannut taamaattumik tunngavissiisoqarluni. Imaassinnavaoq ingerlataqartoq ukiumoortumik pisassinneqarsimasoq aalisariuteqanngitsoq imaluunniit aalisariumminik aserortoorsimasoq, assigisaannilluunniit pisoqarsimasoq. Pisuuussutit asuliinnartikkumanagit Naalakkersuisut ukiumoortumik pisassiissutigineqartut uterteriarlugit allanut aalisarsinnaasunut pisassiissutigeqqissinnaavaat. Aalajangersagaq aamma atorneqarsinnaavoq ingerlataqartoq ukiumoortumik pisassiissutigineqartunik aalisarusussimanngippat, ingerlataqartoq qularutissaanngitsumik ukiumoortumik pisassiissutigineqartut tamaasa ukioq naatinngagu aalisarsinnaanngippagit.

Tamannali nalilersugassaavoq, ingerlatsisup ukioq naatinngagu, januaarimit decembarimut, ukiumoortumik pisassiissutigineqartut aalisarsinnaannginnerinut:

1. pisinnaatitaaffeqartoq ukiumoortumik pisassiissutigineqartut aalisarlugit aallartissimanerai,
2. ukiumoortumik pisassiissutigineqartunit qanoq amerlatigisut aalisarneqarsimannginnersut,
3. pisinnaatitaaffeqartoq nammineerluni aalisariuteqarnersoq ukiumoortumillu pisassiissutigineqartut tamaasa aalisarneqarnissaannut naleqquttunik atortoqarnersoq,
4. pisinnaatitaaffeqartoq ukiumoortumik pisassiissutigineqartut tamaasa aalisassallugit soqtiginnissuseqarnersoq
5. pisinnaatitaaffeqartoq suli tamakkerlugit aalisarneqarsimanngitsunik allanik ukiumoortunik pisassaqarnersoq.

Ukiumoortumik pisassiissutigineqartut utertinneqarsimasut agguaaqqinnerini ingerlataqartut isumagineqassapput, assingusunik ukiumoortumik pisassinneqarsimappata, ukiumoortumillu pisassiissutaasut tamaasa aalisarneqarnissaannut soqtiginnippata.

Aalajangersagaq PNNP-mik aalisarfiunngitsuni ukiumut pisassiissutinut taamaallaat sammitinneqarpoq aamma PNNP-mik aalisarnerni pisassiissutinit pigisat imaluunniit ukiumoortumik pisassiissutit utertinnissaannut tunngavissamik pilersitsinani. Aalisarneq taanna eqqarsaatigalugu kapitali 7-imut innersuussisoqarpoq.

§ 20-mut

TAC-ip ilaa akuersissutinut ilaanginnginnera pisassiissutinit pigisat utertinnerini taamaassinnavaoq. Kalaallit Nunaata aningaasaqarnera eqqarsaatigalugu Kalaallit Nunaannut TAC tamakkerlugu iluatigineqartariaqarpoq, eqqaaneqartutullu iluaquteqarnissamut

pisussaaffiup eqqunneqarneranik tamanna kinguneqarsimalluni. Taamaattumik pisassiissutinit pigisat atorneqanngitsut aalisarnermut agguanneqarnissaat pingaaruteqarluinnarpoq.

§ 20-mi allanneqarpoq taamatut agguassineq qanoq pissasoq.

Nr. 1)

Agguasseqqinnerup pisassiissutinik pigisanik tunisinikkut pippat nalequnnerpaassaaq, tassa allat pillugit ingerlatsisunik oqartussat isumaginnissinnaanngimmata, taamaattumik pisassiissutinik niuerutigineqarsinnaasunut pigisanik aaqqissuussinermi sapingnisamik annikinnerpaamik akuliuttoqartariaqarmat. Pisassiissutit ilai pisassiissutit pigisatut tunineqarnerisigut agguasseqqinermik aqtsineq sapingnisamik annikinnerpaassaaq. Taamaattorli PNNP-mik aalisarneq pineqarpat pisassiissutinit pigisatut taamaallaat tunisisoqarsinnaalluni.

Tunngaviatigut "tunisineq" aamma tassaasinnaavoq akiliisoqarnani tunisineq.

Neqeroortitsinikkut § 31 malillugu tunisisoqassaaq.

Nr. 2)

Pisassiissutit ilai ukiumut pisassiissutit Naalakkersuisunit tunineqarsinnaapput. Tamatuma sunniutigaa ukiumut pisassiissutit Naalakkersuisunit tuneqqinnejartariaqarnerannik, tamannalu nr. 1-imut naleqqiullugu annertunerusumik allaffisornermik kinguneqassalluni.

Tunisinermi akigitinneqartussap aalajangersaaffiginerani pissutsit nr. 1-imti taaneqartut tunngavigineqarsinnaapputtaaq.

Pisassiissutilli ilai taamaattoq allatut tunniunneqarsinnaapput, tassa imaappoq aningaasanik akiliuteqarnani. Aamma pisuni taakkunani pisassiissutit ilaannik tigusinermut piumasaqaateqartoqarsinnaalluni.

Periarfissat taakku marluk amerlanertigut PNNP-mik aalisarnermut atassuteqartarput.

Aalisarnerit ilaanni PNNP-mik aaqqissuussiffiunngitsuni tunniussisoqartinnagu pisassiissutit ilaannik Naalakkersuisut agguassisinnaapput, tassa tigusisoq pisassiissutit ilaannut piginnittuulernani.

Nr. 3)

Misileraalluni aalisarneq aningaasarsiornikkut nalorninartoqartarpoq. Taamaattumik tulluassalluni pisassiissutit ilai misileraalluni aalisarnermut taarsiissutit Naalakkersuisunit tunniunneqarsinnaappata.

Nr. 4)

TAC-ip ilaani iluaqutigineqanngitsunik nunanut isumaqatigiissuteqarfigisanut Naalakkersuisunit tunniunneqarpata tulluassaaq.

Imm. 2-mut.

Imm. 1, nr. 1 aamma 2 naapertorlugu tunisinermi iluanaarutit nunatta karsianut tutsinneqassapput.

§ 21-mut

Nr 1) nr. 2) aamma 3)

Aalisagaqtigiinnut TAC imaluunniit pisassiissutit tamakkerlugit aalisarneqarsimappata aalisagaqtigiinni taakkunani aalisarneq unitsinnejassaaq. Tamanna aamma pisassiissutinik pigisanik, pisassiissutinit pigisat annertussusaat imaluunniit ukiumut pisassiissutit piginnittunit ataasiakkaanit pigineqartut pisassiissutit pigineqartut, pisassiissutinit pigisat annertussusaat imaluunniit ukiumut pisassiissutit tamakkerlugit aalisarneqarsimanngikkaluarpataluunniit atuuppoq. Taamatut pisoqarsinnaavoq ingerlataqartoq ataaseq pisassiissutit pigineqartut, pisassiissutinit pigisat annertussusaat imaluunniit ukiumut pisassiissutit sinnerlugit aalisarsimatillugit. Ingerlataqartoq ataaseq pisassarisaminik qaangiiguni aalisarnerup iluani tassani ingerlataqartunut allanut tamanut kinguneqarnissaa ilimanarluiunnarpoq. Taamatut pisumi inunnik eqqartuussuserinikkut taarsiisoqarnissaanut eqqartuussiviup akerleriissinnaaneq aaqqiiffigissavaa.

Aalisarneq, § 38-mi nuussisinnaaneq pillugu malittarisassat malillugit ukiumut tulliuttumut ukiumoortumik pisassiissutinik ingerlatsiviusut ukiumi pineqartumi ukiumoortumik pisassiissutinik aalisarnertut isigineqanngillat, taamaalillunilu pisinnaanatik.

Naatsorsutigineqarporli tamatumunnga piumasaqaatit naammassineqarsimassasut, tassunga ilanngullugu piffissami "nuussiffiusinnaasumi" ingerlatsisoqarluni.

Ukumi, "siumoortumik nuussiffiusumi" (PNNP-mik malittarisassaqarluni aalisarnermi) ukumi pineqartumi TAC tamarmiusoq, tamanna pissutigalugu aalisarneq unitsinnejarnani, qaangerneqarsinnaavoq. Qaangiinerli annertunerpaamik ukumi tulliuttumi akuersissummi pisassiissutinilu aalisarneqartut annertussuseqassallutik.

Angallatinut, akuersissuteqarlutik aalisartunut, nuna alla imaluunniit nunami allami ingerlataqartumut nalunaarutigineqarsimasunut atuuppoq nr. 1)-imut taakku ilaammata.

Aalisarnerup pinngitsoorani unitsinnejarnera aalajangersakkami allanneqarpoq. Tamatuma saniatigut tamanna pisariaqartutut isigineqarpat aalisarnermik Naalakkersuisut unitsisisinnaapput. Tamanna § 15, nr. 3)-mi aalajangersagaq malillugu pissaaq.

Kapitali 6

Aalisarsinnaanermut akuersissuteqartarneq

Kapitali 2-mi, § 8-mi aalajangersarneqarpoq Kalaallit Nunaata aalisarnikkut oqartussaaffigisaani inuussutissarsiuutigalugu aalisarnermut akuersissut piumasarineqarpoq, kapitali 5-imilu akuersissutit taakkulu atulersinneri immikkut pineqarlutik. Aammattaaq akuersissutinik atulersitsinermut il.il. atatillugu akitsuutinik akiliisitsinissamut kapitali tunngaviliilluni.

A. Akuersissutit

Akuersissut, § 8, imm. 1 aamma § 14, imm. 2 naapertorlugit ingerlatsisup Kalaallit Nunaata aalisarnikkut oqartussaaffigisaani inuussutissarsiuutigalugu aalisarsinnaaneranut aamma Kalaallit Nunaata aalisarnikkut oqartussaaffigisaata avataani kalaallit angallataannit aalisarnermut piumasaqaataasoq tassaavoq aningaasarsiutigalugu inuussutissarsiorluni aalisarnissamut periarfissiisumik taamatut aalisarnissamut akuersissutit takussutissaq (misileraalluni aalisarnermut aalisarnissamut akuersissut alla nalunaarutigineqarsinnaavoq).

Aalajangersagaq Kalaallit Nunaata aalisarnikkut oqartussaaffigisaani inuussutissarsiuutigalugu aalisarnernut tamanut kiisalu Kalaallit Nunaata aalisarnikkut oqartussaaffigisaasa avataanni kalaallit inuussutissarsiuutigalugu aalisarnerannut atuuppoq.

§ 22-mut

Imm. 1-imut.

Aalajangersakkami aalajangersarneqarpoq akuersissut ukiumut ataasiarluni atulersinneqartartoq, kisianni PNNP-mik aalisarnerni, aalisarsinnaanermut pisinnaatitaaffit piffissamut sivisunerusumut atulersinneqarsimasuni tamatuma kinguneraa piffissamut tassunga sunniuteqarnera (tamanna pillugu kapitali 7 erseqqinnerusumik takuuk). Akuersissulli aamma ukiumut pineqartumut tunngasunik paasisutissanik imaqarpoq, tassunga ilanngullugit annertussutsit tonsinngorlugit, ukumi pisassiissutinit pigisatut piviusunngortinneqartussat.

Aalisarnerni arlalinni akuersissummut pisarineqarsinnaasutut qaffasinnerpaamik akuerisat ilaatillugut nalunaarsorneqartarput. Tamanna § 17 naapertorlugu TAC-mik aalajangersaaffigineqarsimasunut aalisarnernut tamanut aamma "paggatassiilluni aalisarfunningitsunut" atuuppoq.

Pissusissamisuussaaq akuersissutip atulersinnera piffissap ingerlanerani assersuutigalugu Sullissivik aqqutigalugu pisalissappat.

Imm. 2-mut.

Pisassat annertussusaat § 18 malillugu angallatinut immikkoortunut Naalakkersuisut agguassavaat, soorlu aamma imm. 1 naapertorlugu akuersissutit atulersinnissaat pigiinnarnissaalu pillugit malittarisassanik Naalakkersuisut aalajangersaassasut.

§ 23-mut

Naatsorsuutigineqarpoq ingerlatsisut akuersissummit atulersiffigineqartut §§ 8-mut aamma 9-mut ilaatinneqartut.

Aalajangersagaq tassaavoq aalisarnermut akuersissutinik atulersitsineq attatiinnarnissaalu pillugit malittarisassanik sukumiinerusunik aalajangersaanissamut Naalakkersuisunut tamanut tunngasumik pisinnaatitsissut. Aalajangersakkamut akuersissummik piumasaqarfiusut aalisarnerit tamarmik, tassa PNNP - aamma PNNP atornagu aalisarnerit ilaapput.

Akuersissutinut piumasaqaatinut nalinginnaasumik sinaakkusiussat § 23 naapertorlugu atulersinneqartumi nalunaarummi aalajangersarneqarput, kisianni PNNP-mik aalisarnerut killiliussat kapitali 7-imi immikkut malittarisassaqartinneqarput tamannalu naapertorlugu atulersinneqartuni nalunaarutini.

Sinnejartumik piginnaasaqarnerup kingunerisinnaavaa aalisagaqatigiinnit sippusumik iluaquteqarsinnaaneq, taamaattumillu piginnaatisinsinermut atatillugu erseqqissarneqarluni malittarisassiornikkut pingarnertigut anguniagaq tassaasoq aalisariutini piginnaasat aamma aalisarneqarsinnaasut qanoq annertutiginerisa akornanni ataqtigiiptoqassasoq.

Ingerlatsisut iluanaaruteqarnissaannik millisitsisunik piumasaqaatinik eqqussinermut atatillugu pingartumik PNNP-mik malittarisassaqartilluni aalisarnermi, sakkortuumik akuliuttoqartillugu, inatsisitigut taarsiisussaanermut akisussaaffeqalersinnaaneq Naalakkersuisunit arajutsinaveersaarneqassammatt.

§ 24-mut

Imm. 1-imut.

Aalajangersakkap Naalakkersuisut pisinnaatippai Kalaallit Nunaannut nunamut tulaassuisinnaatitaanermut tamatumunnga inatsisit naapertorluginit akuersissutinik tunisisinnaatitaasut. Naalakkersuisut aalajangersinnaapput Kalaallit Nunaanni tunisassiorfinnut tunisinermut pisat aalajangersimasumik amerlassuseqarnissaat, aalisakkat suussusiinik aalajangersinnaallutik tunisinermilu pitsaassutit assiginngitsut tunngavigalugit tunisisoqarsinnaasoq.

Tassunga atatillugu nunami suliffinni sulisoqarnissaq pillugu pingarnertigut kissaateqarnermk eqqarsaatiginnittoqassammatt soorlu aamma allannguinerit ingerlatsisunut atukkanik ajornerulersitsisut (assersuutigalugu tunisinerup annertusinissaanik piumasaqarnikkut) Naalakkersuisut taarsiinissamut akisussaalersinnaanerat isiginiarneqassammatt.

Aalajangersagaq uumasunut aalisagaqatigiinnillu tamanut atuuppoq, taamaalilluni tunisinermut kiisalu angallammi pisanik piareersaanermut atuuttussanik malittarisassanik Naalakkersuisut aalajangersaasinhaallutik. Tamanna aamma raajarniarnermut atuuppoq, aalisarnermilu, avammut niuernerup ilusaani, suliffissuarni sulisinnaasunilu pissutsini allanngortoqarpat imaluunniit tamatumunnga pissutissaqartitsisumik allatigut allanngortoqarpat tulaassisussaatitaanerup aamma raajanik pisanik tulaassisussaatitaannginnerup akornanni pissutsinik allannguinissamut Naalakkersuisut piginnaatinneqarput.

Pisat tulaanneqartussaasut amerlassusiannik Naalakkersuisut amerliliissappata, tamatumalu kingunerisaanik ingerlatsisut aningaasaqarnerat ajorseriarluni, allannguinerpilarsinnissaanut piffissaliinissamut pisariaqartitsineq isumaliutigineqartussaassaaq.

Imm. 2-mut.

Aalajangersagaq taanna raajarniarnermi sinerissamut qanittumi aamma avataasiorluni aalisariutinut agguarnerisa atorunnaarsinneri ilanngullugu inatsisiliornikkut takussutissaavoq Kalaallit Nunaata Kitaani raajarniarnermi ingerlatsisut tamarmik tunngaviusumik malittarisassiornikkut killiussanik assigiinnik atugassaqartinneqartut. Naalakkersuisut taamaalillutik tunisinermi piumasaqaatitigut aalisariutinut assigiinngitsunut assigiinngisitsissangillat. Tassungali atatillugu piujuartitsinikkut aaqqiinerit pillugit kapitali 10-mut innersuussisoqarpoq, assersuutigalugu angallatit aalajangersimasumik angissuseqartut sumiiffinnut aalajangersimasunut periarfissaqarnerisa killeqartinnissaanut Naalakkersuisut periarfissinneqarput.

Aalisarnermi aningaasaqarneq naammassisqaarsinnaassuserlu eqqarsaatigalugit kiisalu angallammi suliarinninnissamut pisinnaatitaaffik apparitinneqassappat maannakkut avataasiortunut annaasaqarsinnaaneq eqqarsaatigalugu Kalaallit Nunaata Kitaani raajarniarnermi tunisisussaatitaanerup qaffasissusaa aallaaviatigut 25 %-iussaaq, taamaalilluni angallammi suliarinnissinnaaneq 75 %-iulluni. Aalajangersarneqartoq annertussuseq taanna sinnerlugu ingerlataqartut tunisisinnaanerannut aporfissaqanngilaq.

Tulaassisussaatitaaneq ingerlataqartumut nalunaarutigineqassaaq, tassa raajarniarnermi umiarsuaatileqatigiiffimmut, angallatinut ataasiakkaanuunngitsoq. Umiarsuaatileqatigiiffik arlalinnik raajarniutilik taamaalilluni angallat ataaseq atorlugu pisat 75 %-iinit annertunerusunik tunisassiorsinnaavoq, annertunerusumik tunisassiorneq umiarsuaatileqatigiiffiup angallataanit allamiit annertunerusumik tunisinermit illuatungilerneqarpat.

Kalaallit Nunaata Kitaani raajarniarnerunngitsumi aalisarnerni allani aalisariutit assigiinngitsut tunisisarnerinut naleqqiullugu assigiinngitsunik piumasaqaateqarfiusunik malittarisassanik Naalakkersuisut aalajangersaasinhaapput.

§ 25-mut

Aalisarnermut piumasaqaatit ilaatigut inatsimmit (inatsit manna tassungalu atasut nalunaarutit), ilaatigullu akuersissummit namminermit takuneqarsinnaapput. Akuersissut taamaalilluni inatsisinit pinngitsooratik takuneqarsinnaanngitsunik piumasaqaatinik aalajangersaanermut naleqqiullugu pingaaruteqartuuvoq, taamaalilluni aalisarnermut atatillugu pissutsinik erseqqissunik ingerlatsisoq ilisimaarinnilluni, taamatullu Kalaallit Nunaanni Aalisarsinnaanermut Akuersissutinik Nakkutilliisoqarfik aamma aalisarnermik nakkutilliinermut atatillugu ingerlatsisup pisinnaatitaaffiinik pisussaaffiinillu erseqqissumik ilisimaarinnilluni.

Imm. 1-imut.

Aalajangersakkami tessani akuersissutip imarisaaanut minnerpaamik piumasaqaatit allanneqarput. Akuersissut taamaalilluni paassisutissanik suli allanik imaqrarinnaasarpooq, taamaalilluni siunnersuutigineqartutut imm. 2-mi periarfissiisoqarluni.

Nr. 1)

Ingerlatsisoq atiatigut aamma CVR-normuatigut akuersissutikkut kinaassusersineqarsinnaassaaq. Ingerlatsisoq inuussutissarsiuteqartutut allatulli CVR-normoqassaaq, normulu taanna akuersissummi allassimassalluni.

Nr. 2)

Akuersissummut ataatsimut angallatit arlallit ilaasinnaapput, ingerlatsisorli ataasiinnaalluni. Angallatit tamarmik akuersissummut ilaasut allaqqaneqassapput, taamaalilluni kinaassusersineqarsinnaallutik. Tamanna isumaqarpoq angallatit umiarsualivimmut ilisarnaammik normoqassasut normulu taanna erseqqissumik allanneqarluni angallammut ikkunneqassalluni, akuersissummut ilaassalluni angallatip aqqa.

Angallatit tamarmik 20 BT-mik angissuseqartut anginerusulluunniit Umiarsuit nalunaarsimaffianni ilanngunneqartarput. Inuussutissarsiutigalugu angallatit, 5 BT-p aamma 20 BT-ip akornanniittut Umiarsuit nalunaarsorsimaffianni imaluunniit Angallatit nalunaarsorsimaffianni ilaapput. Inuussutissarsiutigalugu angallatit 5 BT-mit mikinerusut, tassa imaappoq umiatsiaaqqat, Angallatit nalunaarsorsimaffianni ilanngunneqassapput. Oqaatigineqassaaq taaguummut "angallatinut" tassunga ilanngullugu umiatsiaaqqat aamma ilaammata.

Angallatit nalunaarsorsimaffiannut ilanngunneq digitalikkut pisarpoq, tamannalu pisimappat ingerlatsisup umiarsualivimmut ilisarnaat normu qinnutigissallugu.

Nr. 3)

Tunngaviatigut aalisarnermut akuersissut aalisagaqtigiinnut aalajangersimasunut nalunaarutigineqartarpoq, sulinerli pissutigalugu aalisakkat aalisarneqartut allannerisigut pisarluni, aalisarnermik ingerlatsiviusussaq sumiiffiup allanneqarnera ilanngullugu (takuuk nr. 6).

Nr. 4)

Angallammik imaluunniit angallatinit pineqartunit amerlassutsit ingerlatsisumit aalisarneqarsinnaasut ukiumoortumik pisassiissutit allanneqassapput. Akuersissutinut, PNNP-imut ilaasunut atuuppoq aamma akuersissummi periarfissiissutaasut pisassiissutini pigisat allanneqartarneri, tak. imm. 3.

Nr. 5)

Piffissamut sumut akuersissut atuunnersoq allanneqassaaq. Aalisarnerni aalajangersimasuni tassa ullorsiutit malillugit ukioq. Tunup eqqaani ammassanniarnermut piffissamut 15. oktoberimiit 15. aprilimut akuersissut atuuppoq, sulilu allani, tassa PNNP-mut ilaasuni, akuersissut ukiunut arlalinnut atuulluni. Qanorluunniit pisoqaraluarpat akuersissut ukiut tamaasa nutarterneqassaaq.

Akuersissutinut PNNP-mik aalisarnernut tunngasuni piffissami ukiumoortumik pissassiissutit aalisarneqarnissaat piffissaq ilaatigut allanneqarsimassaaq, ilaatigut pisassiissutinit pigisat ingerlatsisumut atasut piffissaq allanneqassalluni.

Nr. 6)

Nr. 3)-mi qulaani eqqaaneqartutut aalisarnermut aalisakkat nunamilu sumiiffiup allanneqarnerisa akuttunngitsumik kingunerisarpa aalisagaqtigiinnut aalajangersimasumut aalisarsinnaanerup killeqartinneqarnera. Taamatulli nunakkut killiliineq allanik peqquteqartoqarsinnaavoq, tassunga ilanngullugu imaani avatangiisnik mianerinninnissaq, tassunga ilanngullugu immap naqqani pissutsit il.il., soorlu aamma ingerlatsisut allani imalluunniit aalisariutit allat eqqarsaatigineqarsinnaasut. Kingulleq assersuutigalugu raajarniarnermi atuuppoq, angallatit anginerit sumiiffinnut angallatit mikinerusut aalisarfiginissaanut killeqartumik periarfissaqarlutik.

Nr. 7)

§ 24-mi allanneqartutut Aalisarnermut Piniarnermullu Aqutsisoqarfik piareersaanermut tunngasunik piumasaqaatinik aalajangersaanissamut imaluunniit pisanik piareersarneqanngitsunik tunisinissaq pillugu piumasaqaatinik aalajangersaanissamut piginnaatinneqarpoq. Piumasaqaatit taakku akuersissummi allassimassapput, tamannalu tunitsivinnut aamma KANUAANA-mut annertuumik pingaaruteqarluni.

Imm. 2-mut.

Imm. 1 naapertorlugu akuersissummi allanneqarsimasussat paassisutissat saniatigut taanna paassisutissanik allanik imaqarsinnaavoq. Tassani pineqarsinnaapput inatsisini allassimasut

piumasaqaatit, kisiannili erseqqissarneqarnissaat kissaatigineqartut, soorlu aamma aalisarnermut pineqartumut immikkut atuuttut piumasaqaatit pineqarsinnaallutik.

Imm. 3-mut

Imm. 2, nr. 4-mi qulaani eqqaaneqartutut PNNP-mi aalisarnermi akuersissummi periarfissiisut pisarineqarsinnaasut amerlassusiat assigiinngitsuni marlunni allanneqarsinnaapput, tassa ukiup pineqartup ingerlanerani ingerlatsisup aalisarsinnaasai kisitsisit atorlugit tonsit amerlaqataattut (ukiumoortumik pisassiissutit) aamma TAC-ip ilaatut ingerlatsisup pigisaanut annertussuseqartillugit (pisassiissutinit pigisat).

Akuersissummi marluullutik ilisimatitsissutigineqartarput.

§ 26-mut

Pineqaatissiisarnermut aalajangersakkat pingarnerit kapitali 15-imi takuneqarsinnaapput. § 26-imi allaffissornikkut sunniutaasussat akuersissutip kingunerisinnaasai takutinneqarput.

Imm. 1-imut.

Akuersissutip atornissaani tunngavissat arlallit piumasaqaatillu arlallit takutinneqarput, soorlu ingerlatalik aalisarnermut inatsisini aalajangersakkanik eqqortitsisussaasoq, § 26, imm. 1-imilu sunniutaasussaq tassaalluni ingerlatalik akuersissummik atuinissaminut pisinnaatitaaffeqassasoq, pineqartoq tunngavissat taaneqartut iluani pissusilfersorsimappat aalajangersakkanillu aalajangersarneqartunik eqqortitsisimappat.

Aalajangersakkatigut oqartussat, tassalu tassunga atatillugu Naalakkersuisut, ingerlatalinnut aalajangersakkanik eqqortitsinngitsunut qisuarialeqarnissaminnut piginnaatinneqarput. Tamanna akuersissummik atuinissamut pisinnaatitaaffimmik killilersuinikkut pisinnaavoq, soorlu sumiiffitsigut killilersuinikkut, pisanik angallammi suliaqarsinnaanermut pisinnaatitaaffiusinnaasumi killilersuinikkut imaluunniit atuisinnaanermut pisinnaatitaaffinni allani killeqartitsinikkut.

Unioqqutitsineq naammattumik sakkortuppat aamma/imaluunniit arlaleriarluni pisarsimappat Naalakkersuisut akuersissut tamakkiisumik arsaarinnissutigisinnaavaat.

Oqartussat taamaasillutik qisuarialeqarnissaminnut periarfissarqarluarput.

PNNP atorlugu aalisarnermi pisussat immikkut ittut atuutsinneqarput, tassami ingerlatalik tassani pisassiissutinit pigisanut atuinissaminut pisinnaatitaaffeqarmat. Akuersissummik arsaarinninneq pisassiissutinit pigisanut taakkununnga toqqaannartumik sunnuteqanngilaq, kisiannili akuersissut arsaarinnissutigineqarsimappat ingerlatalik akuersissummik atuisinnaassanngimmat aammalu pisassiissutinit pigisanik pigisaqarnermi atuisussaatitaaneq atuutsinneqarmat, ingerlatalik ataavartumik arsaarinninnermi allatut ajornartumik

pisassiissutinit pigisanik tunisisariaqartussaassaaq. Tassunga atatillugu § 40 tassungalu nassuaatit innersuussutigineqarput.

Imm. 2-mut.

Qisuarialeqarnissamut periarfissat imm. 1-imni nassuiarneqartut § 27 naapertorlugu akuersissutit tunniunnissaanut akiliutaasinnaasut akilerneqarsimanningerannut tunngapput.

B. Akiliutit

§ 27-mut

Imm. 1-imut.

Naalakkersuisut sinerissap qanittuani avataasierlunilu aalisarnermut aalisarsinnaanermut akuersissutit akuersissutillu tunniunnissaanut akiliutinik akiliisitsiniaasinnaanerat aalajangersakkami aalajangersarneqarpoq. Tassani piumasarineqarpoq taamatut akiliisitsiniarnissami malittarisassanik sukumiinerusunik suliaqartoqarnissaa, aalajangersakkatigullu Naalakkersuisut tamatumunnga piginnaatinneqarput. Ilaatigut aalisarnernut assigiinngitsunut akiliutit akiliisitsisarnerillu akuttussusaat pillugit malittarisassanik aalajangersaasoqarsinnaavoq.

Aalajangersakkatigut aamma § 40, imm. 2 naapertorlugu pisassiissutinit pigisat ingerlatallip tunisinnaanngisai allamut tunineqarnerannut atatillugu imaluunniit § 41, imm. 2 naapertorlugu aalisarsinnaanermut akuersissut Naalakkersuisunit arsaarinnissutigineqarsimattillugu, sulinermut atatillugu akiliutissat akilersinniarternerannut malittarisassanik aalajangersaanissamut Naalakkersuisut piginnaatinneqarput.

Imm. 2-mut.

§ 26, imm. 2 nangillugu, tamatuma kingorna akiliutinut akiitsulik akuersissummik arsaarinniffigineqarsinnaassalluni, aalajangersakkatigut malittarisassanik akiliutinut akiitsullip akiliinissaani atorunnaarsitsisunik, tassalu ingerlatalik inatsit manna naapertorlugu aningaasat akiligassat erniat akiliinngitsoornermi pillaatigineqartut ilanngullugit akilernissaat tikillugu akuersissutinik imaluunniit aalisarsinnaanermut akuersissutinik tunineqaqqinnissaat tikillugu, malittarisassanik sukumiinerusunik aalajangersaanissinnut aalajangersakkatigut Naalakkersuisut piginnaatinneqarput.

Imm. 3-mut

Aalisarneq pillugu inatsit naapertorlugu akitsuutinik akilinngisat aningaasat akiitsorineqartut pillugit akiliisitsiniarnermut nukippasuarnik Naalakkersuisut atuisimapput. Taamaammatt siunnersuut aqqutigalugu piffissaq eqqorlugu akiliutinut akilerneqanngitsunut ernianut akiliinngitsoornermi pillaatigineqartunut akiliisitsiniarnissamut periarfissiisoqarnissaanik Naalakkersuisut kissateqarput.

Siunnersummi aalajangersagaq taamaattumik erniat pissutsillu allat kingusissumik akilerneqartut pillugit inatsisip (erniat pillugit inatsit) nalunaarutigineqarneranut innersuussivoq.

Kapitali 7

Pisassiissutit nammineq pigisat nioqqutigineqarsinnaasullu

Pisassiissutit niuerutigineqarsinnaasut nammineq pigisat aalisarnermut inatsit 1991-imeersoq aqqutigalugu eqqunneqarput, tassalu taamanikkut aaqqissuussinermi taamaallaat avataasioluni raajarniarneq kisimi pineqarpoq. Tamatuma kingorna sinerissap qanittuani raajarniarneq aamma sinerissap qanittuani qaleralinniarneq angallatinut meterit arfinillit qaangerlugit angissusilinnut atuutsinneqalerpoq.

Aaqqissuussineq aalisarnerup aqtsiffiginissaanut aallaaviussasoq Aalisarnermut Ataatsimiititaliarsuup innersuussutigaa, tassami pisuussutinit iluanaarutit tamakkiisunngortinnissaannut tamanna tunngavigineqarmat.

Ataatsimiititaliarsuup isumaliutissiissutaani taaneqarpoq:

"Aalisarnerup aningaasaqarnikkut pingaaruteqassusaa inuiaqatigiit pinngortitakkut aningaasaqarnerisa pingaarnerup sunniuteqarluartumik atornissaanut suunngitsumik attuumassuteqarpoq. Aalisarnermi aqtsineq sunniuteqarluarnissamik qulakkeerinniffiusoq pinngortitakkut aningaasaqarneq inuiaqatigiit massakkut siunissamilu atugarissaarnissaannut pingaaruteqarluni tunngaviusarnissaa immikkut pingaaruteqarpoq.

PNNP atorlugu aalisarnerup iluani misissueqqissaarnerit suliarineqartut misilittagarilikallu Aalisarnermut Ataatsimiititaliarsuup tunngavigiligai tassaapput killeqanngitsumik malittarisassaqanngitsumillu aalisarnerit paggatassiillunilu aalisarnerit uumassusilerinikkut illersorneqarsinnaannginnerat aalisarnissamullu periarfissat atornissaannut aningaasaqarnikkut ajortumik kinguneqarsinnaanerat. Aalisarneq uumassusilerinikkut nammaneqarsinnaasutut aammalu aningaasaqarnikkut nammaneqarsinnaasutut tunngavigineqartut malillugit malittarisassiorneqarsimanngitsoq siunissamut ungasinnerusumut pilersaarusiortarnissamik killeqartitsivoq. Tamatuma inernerisarpaa namminersortut inuiaqatigiillu aningaasaqarnikkut pitsaanngitsumik angusaqarnerat.

Piviusumik aalisarnerup tamanut ammasup killilersugaanngitsullu kingunerissavaa, inuussutissarsiortut inuiaqatigiillu siunissami isertitaqarnissamut suliffissaqartitsinissamullu periarfissaannik siumoortumik annertuumik atuineq. Tamanna ajornerulersinnaavoq, aalisagaqatigiillu kinguaassiorsinnaanerannut iluarsineqarsinnaanngitsumik ajoqsiisinnaavoq, taamaasillunilu massakkut kinguaariinnullu tullinnguuttunut aalisarnermi aningaasaqarnikkut pissarsiaqarnissamut aseruisinnaalluni.

Aalisarneq mianersortumik killilersuiffiusoq aalisartumit suliffeqarfimmillu ataatsimit maannakkut siunissamillu ukiorpassuarni atugassanik maleruagassanik ilisimasaqartumik tunngaveqartariaqarpoq. Tamatuma nalornissuteqarneq annikillisissavaa siunissamillu ungasinnerusumut pilersaarusiorsinnaaneq ajornannginnerulersissallugu, naak matumanii aalisagaqatigiinni allanngortoqartuartussaanera, taamaasillunilu pisassiissutinut akinullu nalornissuteqartarnera pinngitsoorneqarsinnaanngikkaluartoq. Mianersortumik aalisarneq nerisassanut malittarisassiornermik tunngaveqartariaqanngilaq. Pisassiissutit uumassusilerinikkut nammaneqarsinnaasumik aalajangersaaffigisariaqarput, aamma siunissami annertunerpaamik pissarsinissamut tunngaviussapput kiisalu aalisarsinnaanermut periarfissat siunissaq ungasinnerusoq tunngavigalugu tunniunneqartariaqarlutik.

...

Aalisarnermut politikerineqartoq sisamanik pisinnaasaqarpoq, amerlanertigut diamantip pisinnaasaannik sisamanik taaneqartunik, "aamma" ukuninnga imalinnik:

- *Pisinnaatitaaneq eqqarsaatigalugu immikkuullarissuuneq, tassalu aalisartoq pisassiissutit ilaat aqqutigalugit atuinissaminut pisinnaatitaaffeqarpoq.*
- *Pisinnaatitaaffik pillugu qularnaarinninneq, tassa imaappoq aalisartup pisassaa ilai aallanut agguanneqarsinnaanngillat.*
- *Pisinnaatitaaffiup sivisussusia, tassa imaappoq aalisartup pisassani qanoq sivisutigisumik pigissanerlugit ilisimassavaa.*
- *Pisinnaatitaaffimmik nuussisinnaaneq, tassa imaappoq pisinnaatitaaffimmik tunniussisinnaanermut tunisisinnaanermulluuniit pisinnaatitaaffiup annertussusia, tassami imaappoq pisassiissutit imaluunniit pisassat ilaannik pisisinnaanermi tunisisinnaanermilu killiliussat qanoq annertutiginerat.*

Piginnaasat sisamat taakku pillugit ataatsimoortumik oqartoqarsinnaavoq, tassalu taakku arlaanni qaffasinnerusumik angusaqaraanni taava aningaasaqarnikkut sinneqartoorneq qaffasinnerussaaq, soorlu aalisarnermi pisuussutinut ernialiunneqartoq sivisuumik atorneqarsinnaassasoq, tamannalu aqqutigalugu aningaasaliinerit nutaat allanngortiterinerillu aningaasalersornissaat akikinnerulissalluni. "

A. Pisassiissutinit pigisat

§ 28-mut

Aaqqiineq pitsaanerpaaq atuuttuuppat aalisarnerit tamarmik APPN-imi aaqqissuussinermut ilaasussaagluarput, tamannalu tunngavigalugu inuiaqatigiit aningaasaqarnerannut tamakkiisumik tapeeqataassagaluarlutik. Tassanili aalisarnerup pineqartup iluamik aalajaatsuunissa pisariaqarpoq, soorlu aalisagaqatigiinnut aalisarneqartunut TAC-i ukiut ingerlaneranni aalajaatsuusariaqarluni. Aalisartut ilaat taamatut pisariaqartitsinermut malinninneq ajorput, tassami pisarineqartartut ukiumiit ukiumut allanngorartarput, aalisarnerlu tamarmiulluni nalorninartoqarsinnaasarpooq. Tassani APPN-imi aaqqissuussineq

atussallugu tulluartuussanngilaq, tassanimi isumannaatsuutitsinissaq ingerlatallip ukiuni arlalinni arlaatigut aalisarnerup pigiinnarnissaanut iluaqtissaq pingarneq pigiinnartussaammagu, tamannalu tunngavigalugit suliassani piareersarsinnaassammagit, soorlu aningaasaliisarnissat.

Aalisarnermut inatsit atuuttoq naapertorlugu PNNP tunngavigalugu aalisarnerup equnnissaani eqqussinerup inatsimmi saqquminissaa piumasarineqanngilaq - Naalakkersuisut aalisagaqatigiinnut soqutiginaatilittut isigisanut aaqqissuussinerup equnnissaanut piginnaatinneqarput.

Imm. 1-imut.

Taamaakkaluartoq inatsisip atuutilerneratigut aalisagaqatigiit PNNP-imi aaqqissuussinermut ilaasussat inatsimmi immikkut taaneqarsimapput, takuuq § 28, imm. 1.

Sinerissamut qanittumi qaleralinniarneq eqqarsaatigalugu PNNP-mik aaqqissuussineq Kalaallit Nunaata Kitaanut aamma $68^{\circ}30' A-p$ avannaanut aamma $75^{\circ}00' A-p$ kujataanut (sumiiffik 47) killeqartinneqarpoq. Upernaviup avannaaniittuni Qeqertarsuullu Tunuata kujataani aalisarneq taamaalilluni allatigut malittarisassaqartinneqassaaq, § 18-imi oqartussangortsinermut aalajangersagaq tak.

Manna tikillugu angallatit 6 meterinik angissusillit anginerilluunniit PNNP-mik aaqqissuussinermut kisimik ilaasimapput, inatsimmili umiatsiaarar sortut aaqqissuussinermut ilaalersinnaanerinut periarfissinneqarput. Ingerlataqartunut PNNP-mik aaqqissuussinermut ilaasunut, 6 meteri inorlugu sinnerluguluunniit takissuseqarneri apeqqutaatinnagu atuuppoq ilaatigut pisassiissutinut qummut killiliussanut (§ 32) aamma piffissamut pisassiissutinit pigisaqarfiusumut (§ 33) naleqqiullugu piumasarineqartunut taakkununnga ilaassapput.

Sumiiffik 47 aqutsiveqarfinnut pingasunut agguarneqarsimavoq, tassalu Qeqertarsuup Tunua, Uummannaq Upernavillu. Taamatut agguataarisoqartarnerup aqtsinissamik pilersaarutinngortussani aalajangiusimaannarneqarnissaa naatsorsuutaavoq, taamaaliornikkut aqutsiveqarfinnut pingasuuusunut pisassiissutinut immikkut aalajangersaasoqassammat, tamakku aalisarfinni immikkut pisassiissutinit pigisanut tunngatillugu ingerlatallit iserfigisinnaassammatigik. Inatsisitigut tunngavissaq tassaavoq § 18, imm. 2.

Imm. 2-mut.

Naalakkersuisut manna tikillugu aalajangersakkat naapertorlugin imm. 1-imi eqqaaneqartunit allaanerusuni aalisagaqatigiinni allani PNNP-mik aaqqissuussinermit eqqussinissamut piginnaatinneqarput. Piginnaatisissut taanna § 28, imm. 1-mi aalajangiussimaneqarpoq. Taamatuttaaq aalajangersagaq aamma atorneqarsinnaavoq soorlu aqutsiveqarfiiit killeqarfisa allanngortinneqarneranni imaluunniit aqutsiveqarfimmik nutaamik pilersitsinermi. Naalakkersuisut eqqumaffigisussaaavaat aqutsiveqarfiiit suulluunniit PNNP-mik aqtsiviusut millisinneqarneri arsaarinnittoqarsinnaarmik kinguneqarsinnaammata.

Aalajangersagaq taanna naapertorlugu aalajangiinermut tunngaviussaaq soqtigisaqaqatigiit ilanngutitinneri, soorlu § 1, imm. 3, nr. 8) malillugu taamaareersoq. Taamatut aaqqissuussineq equnneqarsinnaavoq nammineq piumassuseq tunngavigalugu, imm. 3 naapertorlugu.

Tamanna sumiiffinnut atuutissaq, kingusinnerusukkut PNNP-mik aaqqissuussivigineqartunut, taamaasilluni pisassiissutinit pigisaq pissarsiarineqartoq, aqtsiveqarfinni tamani atuutissalluni. Tassunga atatillugu nassuaatit imm. 1-imut sumiiffik 47-mut tunngasut innersuussutigineqarput.

Imm. 3-mut

Umiatsiaararsortut ataasiakkaat nammineq aalajangissavaat PNNP-mik aaqqissuussinermut ilaarusunnerluni.

PNNP-mik aaqqissuussinermut ikaarsaarnermut taamaalilluni tunngaviuvoq Naalakkersuisuniit akuersissutip (nalunaarutiginera). Qinnuteqartoqarneratigut akuersissut nalunaarutigineqassaaq.

Imm. 4-mut

Pisassiissutinit pigisat annertussusaat, imm. 3 malillugu ingerlataqartunut tunniunneqartut, § 29 naapertorlugu naatsorsuinermik tunngaveqassaaq.

Aalisarnermi tassani ingerlataqartoq PNNP-mik aaqqissuussinermut nuuppat paggatassiilluni aalisarluni aaqqissuussineq malillugu aalisartunut aalisariutinut nalunaarutigineqarsimasuni pisassiissutinit tamarmiusunit pisarisimasai ilanngaatigineqassapput.

Pisassiissutit aalisariutinut paggatassiinikkut aalisarnermut atassuteqartut taamaalillutik PNNP-mik aalisarnermut ingerlataqartup nuunnera naapertorlugu ikilineqassapput. PNNP-mik aaqqissuussinermut ilaasut pisassiissutit annertussusaat pisassiissutilu sinneruttut tunngaviatigut umiatsiaararsortup PNNP-mik aaqqissuussinermut ikaarsaarnerini tamani naatsorsorneqartassaaq. Piviusumik tamanna ukiup nikinnerani pisarpoq, tassa ikaarsaarneq piffissami tassani pisarmat, takuuk imm. 5.

Tassunga atatillugu aamma § 18, imm. 1-imut nassuaatit takukkit.

Imm. 5-imut

Ingerlataqartut ukiup aallartinneraniit sunniuteqartumik PNNP-mik aaqqissuussinermut ilaalissapput, qinnuteqaat ukiup siuliani 1. december nallertinnagu Naalakkersuisunut nassiunneqarsimappat.

Imm. 6-imut

Ingerlataqartoq, PNNP-mik aaqqissuussinermut ilaasoq, kingusinnerusukkut paggatassiilluni aalisarnermut ilaalersinnaanngilaq - aamma ingerlataqartup pisassiissutinit pigisani tunisimappagit. Ingerlataqartup pisassiissutinit pigisaminik tunisinermi aningasatigut iluanaaruteqareerluni kingorna "paggatassiilluni aalisartunut" allanut unammilleqatigiittunut ilaalinnginnissaa pinngitsoortinniarlugu aalajangersagaq taanna ikkunneqarpoq. Ingerlataqartoq PNNP-mik aaqqissuussinermut ilaannakuusumik paggatassiillunilu aalisarnermut ilaannakuusumik ilaasinnaanngilaq, taamaalillunilu PNNP-mik aalisarnissamut allamullu paggatassiilluni aalisarnermut akuersissuteqarsinnaanngilaq. Taakkua arlaat qinertariaqarpoq.

Aalajangersakkamut ilaapput ingerlataqartut pisassiissutinit pigisanut toqqaannartumik piginnittut kiisalu ingerlataqartut piginneqataassuteqartut assigisaaluunniit (toqqaannanngitsumik piginnittut).

§ 29-mut

Inatsisip atuutsinnejneranut atatillugu aalisarsinnaanermut akuersissutinut nalunaarutigineqartunut piumasarineqartut ingerlatalinnit ataasiakkaanit ilisimaneqassapput. § 29-mi aalisarsinnaanermut akuersissutit immikkut nassuiardeqarput, tassalu ukiumut pisassiissutigineqartut attuumassutilit qanoq isillugit aalajangersarneqartarnersut.

Imm. 1-imut.

Imm. 1-imi ingerlatallit APPN-imi aaqqissuussinermut ilaareersut pineqarput. Taakkununnga tunngatillugu atuuttoq tassaavoq taakkua ukiumoortumik pisarisassaat periuserineqareersoq naapertorlugu kalaallit TAC-imi pisassaasa pisassiissutit ilaanniittunik amerlillugit naatsorsuiffigineqartarnissaat.

Imm. 2-mut.

Ingerlatallit aalisagaqtigiiinnut aalisartut inatsisip atuutilernerani PNNP-mut ilaannngitsut, kisiannili inatsisip eqqunnerani ilaalersussat, pisarisartakkatik "nalinginnaasut" tunngavigalugit pisassiissutinit pigisanik tunineqassapput. Tassunga atatillugu qaleralinniarnermi umiatsiaararsortunut kajumissuseq tunngavigalugu aaqqissuussineq misissoqquneqarpoq, tak. § 28.

Pisassiissutinit pigisat matematik tunngavigalugu eqqortumik naatsorsuiffigisarnerat pillugu aalajangersakkat imm. 3-mi aalajangersagaapput.

Imm. 3-mut

Matematikip tungaatigut isigalugu pisassiissutinit pigisat imm. 2 naapertorlugu naatsorsuiffigineqartarput, taamaaliornikkut ukiuni tallimani kingullerni pisarineqartut misissuiffigineqassammata, ukiut marluk pisaqannginnerpaaffigisat peerneqassammata, ukiunilu kingullerni pingasuni pisarineqartut sinneruttut agguaqatigiissinnerat

naatsorsuiffagalugu. Taamaasilluni pisarisatut nassaarineqartut (ingerlatallip pisarisarsimasai) ingerlatallit tamarmiusut pisaasaasa nassaarineqartut inernerannik agguarneqassapput.

Umiatsiaaqqamik aalisartoq Uummannap aqutsiveqarfiani qaleralinniartoq aamma PNNP-mik aaqqissuussinermut ilaarusuttoq taamaalilluni ukiuni 2019-imiit 2023-mut 12, 23, 17, 21 aamma 11 tonsinik aalisarsimappat 23, 17 aamma 21 tonsit agguatigiissinnerat nassaarineqassaaq, tassalu 20,33 tonsit. Ingerlatallit tamarmik pisarisarsimasaasa inernerat katillugit 9.000 tonsinik inerneqarsimappat (tamanna pisuusaartitsilluni naatsorsuinermut assersuutissaavoq) ingerlatallip pineqartup Uummannap aqutsiveqarfiani pisassiissutinit pigisai 0,226 %-iussapput.

Uummannap aqutsiveqarfiani sinerissap qanittuani qaleralinniarnermut TAC-i 2024-mi assersuutigalugu 8.500 tonsinut aalajangersaaffigineqarpat ingerlatallip pineqartup 2024-mi ukiumut pisassai 19,20 tonsiussapput (0,226*8.500).

Ingerlatalik ukiut tallimat inorlugit aalisarsimappat naatsorsuineq ukiunut pingasunut pisaqarfunkerpaasunut naatsorsorlugu naatsorsuiffigineqassaaq. Ingerlatalik ukiuni pingasuni ikinnerusuniluunniit aalisarsimappat ukiuni taakkunani aalisarneq pisarisaqarfittut atorneqassaaq.

"Ukioq" pineqartillugu ukioq taanna ukiutut pisassiiffittut ataqtigiiissutut paasineqassaaq, taannalu ammassanik aalisarneq eqqaassanngikkaanni ukiumut qaammatisiuteqarfiusumut ataqtigiiittussaassaaq, ukiorlu pisassiiffiusoq 15. oktoberimiit 15. april tikillugu ingerlasarpoq.

Imm. 4-mut

Aalisagaqtigiiinnut kingusinnerusukkut APPN-imi aaqqissuussinermut ilaalersussanut tunngatillugu IOK-p eqqunneratigut suna tunngavigalugu pisassiissutinit pigisanut naatsorsuisarnissamut tunniussisarnissamullu malittarisassanik Naalakkersuisut suliaqassapput. Aallaaviatigut periuseq siuliani taaneqartoq tunngavigineqartartussaavoq, kisianni aalisagaqtigiiinnut pineqartunut tunngatillugu piumasaqaatit inatsimmi siunertanut aalajangersakkamut aamma aqutsinissamik pilersaarummut ilaasut ilangutissallugit siunertaqarnavianngilaq.

B. Pisassiissutit pisassiissutinit pigisat kaaviaartitaqarfunkerat

Soorlu siuliani taaneqareersoq pisassiissutini niuerutigineqarsinnaasuni nammineq pigisani siunertaavoq pisassiissutinit pigisanik piginnituusoq pisassiissutinit pigisat tunineqarnissaat tikillugu nalimik pigisaqannarnissaminut qularnaariffigineqarsimassasoq, taamaammallu ingerlatalik pisassiissutinit pigisat inummut tassunga kingullertut naleqartussanut ilisimasaqarneq aallaavigalugu aalisarnissaminik aningaasaliinissaminillu piareersaasinnaassammat.

§ 30-mut

Imm. 1-imut.

Pisassiissutinit pigisanut naleqartitsinermut tunngatillugu periarfissaq pingarnerpaaq tassaavoq tamatuma tunineqarsinnaanera, soorluttaaq tamanna qularnaveeqqutitut atorneqarsinnaasoq kingornunneqarsinnaallunilu. Taamaattoqarsimappat ingerlatalik pisassiissutinit pigisat tunngavigalugit aningaasaliisinnaalissaq, pisassiissutinillu pigisat nalinii pigiinnassappagu piginnittoq inuussutissarsiumminik tamakkiisumik ingerlatsisinjaassaaq siunissamilu aalisarnissani piareersaaffigisinjaassallugu, apeqqutaanani pineqartoq piffissap sivikitsuinnaap ingerlanerani aalisarnerminik unitsitsisimassappat.

Pisassiissutinit pigisanik piginnittoq § 9-mi piumasaqaatinik malinnittussaammat akiitsoqarfinnut qularnaveeqquusiinermik pisassiissutinit pigisanut tunngasunik piviusunngortitsinissamik kissaateqartunut tunngatillugu unamminartut takkuttussaassapput. Taamatulli unammisassaqartarneq § 9-imi immikkut akuersissuteqarnissamut periarfissiisoq ajornannginnerulissaq, taamaaliornikkummi akiligassaqarfik pisassiissutit ilaannik pigisaqalersoq, imaaliallaannarlu pisassiissutinit pigisanik allamut tunisaqarsinnaanngitsoq, piffissap ilaani § 9-mi piumasarineqartunut malinnittariaqassanngilaq.

Kaaviliaartitaqarneq pisassiissutinit pigisanit tamakkiisumik ilaannakortumilluunniit pisinnaavoq.

Imm. 2-mut.

Ingerlataqartut maannakkut avataasiroluni aalisarnermi pisassiissutinit pigisaqartut inatsisip atuutilernissaata tungaanut sinerissap qanittuani ingerlataqartut pigisaat pilliutigalugit pisassiissutinit eqiteruttumik pigisaqalernissaasa akiorniarnissaannik kissaateqarneq § 30, imm. 2-mi tunuliaqutaavoq. Tamanna pingaartumik Kalaallit Nunaata Kitaani raajarniarnermi atuuppoq. Kalaallit Nunaata Kitaani raajarniarnermi nutaamik aaqqissuuussinermi siullertut maannakkut sinerissap qanittuani ingerlataqartunut atugassarititaasut pitsangorsarnissaat isumallutiniillu iluanaarutit tamarmiusut qaffannissaat siunertaammata taamaaliortoqassappallu aalisarnermi tassani pisassiissutinit pigisat agguateqqinneqarnissaat annertuitigut piumasaqaataammat, pisassiissutinit pigisanik sinerissap qanittuani maannakkut aalisarnermiit avataasiroluni maannakkut aalisarnermut nuussisoqannginnissaanik quakkeerinnittumik aalajangersakkamik atuutilersitsisoqartariaqarpoq.

Pisassiissutinut qummut killiliunneqarsimasut apeqqutaatinnagit ingerlataqartumut aalajangersagaq atuutissaaq, tak. § 32, taamaalillutik sipporneqannginniassammata.

Imm. 3-mut

Naalakkersuisut pisassiissutinit pigisat niuerutiginissaannut saniatigut tunngavissanik aalajangersaasinnaapput.

Pisassiissutinit pigisanik ukiumoortumillu pisassiissutinik tunisisarneq pillugu malittarisassat sukumiinerusut pisariaqartinneqarput.

Tunisineq ilaannakortumik pisinnaammatt pisassiissutinit pigisat amerlassusiannut nuunneqarsinnaasunut killissanik minnerpaaffiliisunik aalajangersaanissaq tulluartuussaaq. Soorlu § 31, imm. 1-imu atuarneqarsinnaasoq kaaviiartitaqarneq qarasaasiami neqeroortarfikkut pisussaavoq, qarasaasiamilu isertarfiup sananerani killissanut minnerpaaffiliinerup ilanngunneqarnissaa naatsorsuutigineqassaaq.

§ 31-mut

Aalajangersagaq manna pisassiissutinit pigisat ukiumoortumillu pisassiissutit tunniunnissaannut tunngavissanik pilersitsiviusoq.

Imm. 1-imut.

Soorlu nassuaatini nalinginnaasuni siulianiittuni taaneqareersoq aqutsinermi paasiuminartoqarnissaanik Naalakkersuisut pingaartitsippu. Tamanna tunngavigalugu aammalu tamanna allaffisornermi oqilisaanermik kinguneqartussaammat Naalakkersuisut nittartagaanni iserfissamik pilersitsisoqassaaq, tassanilu ilaatigut ingerlatallit pisassiissutinit pigisanik ukiumoortumillu pisisinnaallutillu tunisaqarsinnaassappu.

Pisassiissutinit pigisanik ukiumoortumillu pisassiissutinik nuussisarneq pillugu nalunaarsuisarneq niuertoqarnissaanut piumasarineqarpoq, pisassiissutinillu pigisanit nutaatut pissarsianut aalisarnermi nuussinerup nalunaarsorsimanissaa piumasarineqarpoq.

Imm. 2-mut.

Ingerlatallit akornanni niueqatigiinneq tunngaviatigut qarasaasiakkut isertarfimmi nalunaarsuineq aqqutigalugu isumaqatigiissutigineqaannarlunilu aallartinneqarsinnaagaluartoq, takuuk imm. 1, pisassiissutinit pigisat ukiumoortumillu pisassiissutit arlaatigut pissuteqarluni Naalakkersuisunut tunniunneqarsimasut, ingerlateqqinneqartussaappu. Imm. 2-mi tamanna avammut saqqummiilluni suliariumannittussarsiuussinikkut pissasoq aalajangigaavoq.

Tamannalu isumaqarpoq Naalakkersuisut suliariumannittussarsiuussinermik aallartitsisinnaassasoq, tamannalu tunngaviatigut ammavoq, tassami peqataanissamut piumasaqaatinik aalajangersaasoqarsinnaammat, takuuk imm. 3.

Imm. 3-mut

Isiginiarneqarsinnaanermut piumasaqaatit suut atorneqarnissaannut, suliariumannittussarsiuussinermi piumasaqaatit suut tunngaviunissaannut aammalu

neqeroorutaasuni piumasaqaatit suut naammassineqarsimanissaannut Naalakkersuisut malittarisassanik aalajangersaassapput.

Piumasaqaatit soorunami suliamut tunngassuteqassapput attuumassuteqarlutillu. Malittarisassani nutaani sinerissap qanittuani massakkut ingerlatalinnut imaluunniit aalisartunut inuusunnerusunut periarfissat pitsaanerulernissaat pingaarnertut anguniagaammat pisassiissutinit pigisat neqeroorutiginissaanni ingerlatallit taakkua immikkut isiginiartarnissaat assersuutut isiginiarneqarsinnaavoq. Taamaasilluni ingerlatallip angallammik aalajangersimasumik angissusilimmik qaangiisumik pigisaqqusaannginnera imaluunniit ingerlatalik pisassiissutinit pigisat tamarmiusut ilaannik minnerusunik pigisaqqusaanera pillugit piumasaqaammik ilanngussisoqarsinnaassaaq.

Piumasaqaat taamaattoq aallartinneqassagaluarpat suliariumannittussarsiuussinermut ajugaasup pisassiissutinit pigisanik ukiuni arlalinni tuniniaaqquaannginnissaa pillugu piumasaqaatinik peqatigitillugu piumasaqartoqartarnissaat pissusissamisuuginnassaaq. Tunisinerlu aalisariutit assiguit iluanni pisariaqartussaassaaq.

Taamaattoqanngippat - tassalu piumasaqaat taamaattoq atorneqanngippat - aalisariutaatillit allat suliariumannittussarsiuussinermi peqataasinnaasimannginnerat pissutaalluni pisassiissutinit pigisani piumasaqaatit pitsasut atorlugit pissarsiarineqarsimasunik ingerlatalik tunisinnaasussaavoq, tassani aamma suliariumannittussarsiuussinermut piumasaqaatit immikkut ittut siunertaapput, soorlu sinerissap qanittuani massakkut aalisariutaasut pitsaanerusumik atugassaqartinnissaat atorneqartussaassananani.

C. Pisassiissutinit annerpaamik pigisat pillugit malittarisassat

§ 32-mut

Aalajangersakkatigut TAC-ip ilanik qanoq amerlatigisunik ingerlatalik inulluunniit pigisaqarsinnaanersoq pillugu qummut killissaq aalajangersaffigineqarpoq. Taamaalilluni ingerlatseqatigiiffinnut, soqutigisaqaqatigiinnut, peqatigiiffinnut (tassa imaappoq inatsisitigut pisinnaatitaasumut pisussaatitaasumullu kimulluunniit) pisassiissutinut qummut killiliussat atuupput, takuuk imm. 1, aamma inunnut ataasiakkaanut pisassiissutinut qummut killiliussat atuullutik, takuuk imm. 2. Qummut killiliussaq toqqaannartumik toqqaannanngitsumillu piginnituunermut atuuppoq.

Toqqaannanngitsumik piginnituunermi ingerlatseqatigiiffimmi piginnituusoq ingerlatseqatigiiffimmik pigisalik imaluunniit ingerlatseqatigiiffimmi piginnejataasoq pisassiissutinit pigisanik pigisaqartoq paasineqassaaq. Tunngavigineqartoq atuutissaaq, apeqquutanani piginnittup ingerlatseqatigiiffiullu pisassiissutinit pigisanik piginnituusup akornanni aqqlusaagassat qassiuersut.

Assersuutaasinnaavorlu inuk ingerlatseqatigiiffiup 10%-ianik piginnittusoq, ingerlatseqatigiiffillu pisassiissutinit pigisat 12%-iannik piginnittusoq. Taamaalisoqarnerani inuk TAC-ip 0,1*0,12-ianik piginnittussaaq, tassalu 1,2%-imik. Kalaallit Nunaata Kitaani raajarniarnermi inuk ingerlatseqatigiiffiup A-p 40%-ianik pigisaqarsimappat, ingerlatseqatigiiffillu B-p 50%-ianik pigisaqarluni, taannalu pisassiissutinit pigisanik 20%-iusunik pigisaqarluni, taava inuk pisassiissutinit pigisanik 0,4*0,5*0,2-inik pigisaqartussaavoq, tassalu 0,04 imaluunniit TAC-ip 4%-ia. Taamaattoqarsimappat ingerlatseqatigiiffik B pisassiissutinit pigisanik pigisaminik annertusaasinnaassanngilaq, tamannami TAC-ip 20%-erimmagu, kisiannili inuk umiarsuaatileqatigiiffinni allani piginneqataassutinut aningaasaliinissamut periarfissaqassaaq, taannami angut arnarluunniit 4%-imik taamaallaat piginneqataavoq, taamaasillunilu pisassiissutit qummut killissaannik malunnartumik annikinnerulluni.

"Toqqaannanngitsumik" piginnittuuneq pineqartillugu pineqartup iluamik piginneqataanngikkaluarluni pisassiissutinit pigisanut aalajangiisinnaassuseqarluni sunniuteqarsinnaanera aamma pineqarpoq.

§ 9-mi taaneqartuni "soraarnerussutisiaqalernissamut aningaasaateqarfinni" ilaasortasut ingerlatseqatigiiffinni aningaasaliisutut piginnittut assigalugit piginnittuulernissamut killeqartinneqarput. Taamaasilluni ingerlatseqatigiiffimmut pisassiissutinit pigisanik tunniussinissamut, tassani kattuffik taamaattoq ilaalluni, kattuffimmi ilaasortat tassanilu allanngornerit Naalakkersuisunut paassisutissiissutigisarnissaat piumasaqaataassaaq.

Aalajangersakkami pisassiissutinut qummut killiliussat taaneqartut aallaaviatigut aalisagaqtigiinnut atuutissapput. Sinerissap qanittuani qaleralinniarnermi sumiiffimmi 47-mi sumiiffiit immikkoortui tamarmik inatsisisstatut siunnersuummi PNNP-mik aaqqissuinermut ilaatinneqartut aalisagaqtigiittut isigineqarput. Pisassiissutinut qummut killiliussat taaneqartut taamaalillutik sumiiffiup immikkoortuinut taakkununnga tamanut atuupput, tassa imaappoq ingerlatsisoq Qeqertarsuup Tunuani, Uummannap eqqaani Upernaviullu eqqaani pisassiissutinit annerpaamik 2,5%-inik pigisaqarsinnaavoq.

Tamatuttaaq tamanna sumiiffinni allani atuutissaaq, kingusinnerusukkut PNNP-mik aaqqissuussiffigineqartunut, tassani pisassiissutnik annerpaamik pigisaqarsinnaaneq sumiiffinni pineqartuni atuutissalluni. Inatsisitigut tunngavissaq tassaavoq § 18, imm. 2.

Aalisarnernut ataasiakkaanut PNNP-mut ilaasut ilaannut pisassiissutinut qummut killiliussat aalajangersakkami aalajangersarneqarput, kisianni tamanuunngitsoq (taanna raajarniarnermut, sinerissap qanittuani qaleralinniarnermut saattuarniarnermullu atuuppoq, kisianni avataasiorluni qaleralinniarnermuunngitsoq).

Imm. 1-imut.

Aalisarnerni suugaluartuni PNNP-imik aqtsiffiusuni pisassiissutinut qummut killissaq aalajangersakkap nr. 1) – 5)-ianni takuneqarsinnaapput.

Nr. 1)

Kalaallit Nunaata Kitaani inatsisitigut pisinnaatitaasunut pisussaaffeqartunullu raajarniarnermut pisassiissutinut qummut killissaq 20%-inut aalajangerneqarsimavoq. Massakkut inatsimmi atuuttumi qummut killissaq avataasiortunut 33 %-imut sinerissallu qanittuaniittunut 15%-imut inissitaavoq. Qummut killissat taakku ataatsimoortikkaanni TAC-ip 25,4%-ianut piginneqataanissaq periarfissinnejassaaq. Piginnituunerilli siammerternissaannut tunngatillugu pisassiissutinut qummut 20%-imik killiliisoqassasoq siunnersuutigineqarpoq. Tamanna aalajangersakkamut nutaamut ataqtigiissutut isigineqassaaq, tassanilu aalajangersarneqarpoq toqqaannanngitsumik piginneqataaneq piginnittup pisassiissutinit pigisaasa naatsorsuiffigineranni ilanngullugu naatsorsorneqassasoq. Taamaasilluni inatsit nutaaq aqqutigalugu raajarniarnermi pisassiissutit qummut killissaannut malittarisassanik malunnartumik sukaterisoqarsimavoq.

Nr. 2)

Tunumi raajarniarnermi pisassiissutinut killiliussat Kalaallit Nunaata TAC-iata 33,333%-eriinnassavaat.

Nr. 3)

Manna tikillugu 6 meterimik anginerusut angallatit kisimik PNNP-mik aaqqissuussinermut ilaasimapput, inatsisilli atulersinnerani sinerissamut qanittumi qaleralinniarneq tamarmi ilaalistaaq, taamaattorli 6 meterinik naannerusunik angallatinik piginnittut nammineq aalajangissallugu aaqqissuussinermut ilaassanerlutik imaluunniit paggatassiilluni aalisarnermut suli ilaassanerlutik. Sinerissamut qanittumi angallatit PNNP-mut ilaasut tamarmik tamatuma kingorna sinerissamut qanittumi pisassiissutit 2,5 %-imik pisassiissutit qummut killilerlugit aalajangersakkamut ilaalistapput.

Nr. 4)

Saattuarnermi qummut killissaq 17 %-inut aalajangerneqarpoq, tamannalu angallammi 2019-imi aalisaruarsimanerpaamut naapertuuppoq. Kalaallit Nunaata Kitaani saattuarniarneq tamarmi sinerissamut qanittumi ingerlanneqarpoq taamaalillunilu ataqtigiissitsilluni pisassiissutit qummut kililernerinut ilaamatik, tak. nr. 6.

Nr. 5)

Aalisarnernut ataasiakkaanut pisassiissutinut qummut killiliussat apeqqutaatinngagu ingerlataqartoq ataaseq, aalisarnerni arlalinni peqataasoq, avataasiorluni aalisarnernit tamanit qaffasinnerpaamik 20 %-inik peqarsinnaavoq. Ingerlataqartoq taamaalilluni raajarniarnermi 20 %-inik pisassiissutinit pigisanik peqarsinnaavoq aamma avataasiorluni qaleralinniarnermi 20 %-inik pisassiissutinit pigisaqarsinnaalluni (40%/2=20%) imaluunniit raajarniarnermi 14 %-inik avataasiorlunilu qaleralinniarnermi 24 %-inik (38%/2=19%), kisianni assersuutigalugu

raajarniarnermi 15 %-ini avataasiorlunilu qaleralinniarnermi 30 %-inik peqarsinnaanani (45%/2=22,5%). Ukiumoortumik annertussutsit imaluunniit taakku nalingi naatsorsuinermeri tassani ilaanngillat.

Imm. 2-mut.

Imm. 1-imut nassuaatit taamaaqataanik imm. 2-mut atorneqarput, tassa pisassiissutinit pigisanut qummut killiliussat annertussusaat assigiinngimmata. Aamma paragraffimi tassunga aallarniutaasumik nassuaatinut innersuussisoqarpoq.

Matumunnga atatillugu taaguut ”qanigisat” ima paasineqassaaq, ilaquattat siuat kinguaalluunniit, qatanngutit, katissimasaq/najugaqatigisaq, kiisalu ”najugaqatigisaq” matumunnga atatillugu ima paasineqassaaq, inuk avitseqatigisaq ukiunilu marlunni inissiamik avitseqatigisaq.

Imm. 3-mut

Imm. 1-imut nassuaatit taamaaqataanik imm. 3-mut atorneqarput, tassa pisassiissutinit pigisanut qummut killiliussat annertussusaat assigiinngimmata. Aamma paragraffimi tassunga aallarniutaasumik nassuaatinut innersuussisoqarpoq. Ingerlatseqatigiiffit (imaluunniit peqatigiiffit) Namminersorlutik Oqartussanit pigineqartut imm. 1-imi pisassiissutinut killiliussanut ilaanngillat ingerlatseqatigiiffinnullu taakkununnga pisassiissutinut killiliussat ingerlatseqatigiiffinnut namminersortunut atuutsinneqartunit allaanerupput.

Ingerlatseqatigiiffinnut pisortanit pigineqartunut toqqaannanngitsumik piginnittuunermut piginnittuunertullu naleqqunneqartutut taasisinnaatitaanikkut sunniuteqarsinnaanermut aalajangersakkat atuupput.

Imm. 4-mut

Naalakkersuisut aalisarsinnaanermut akuersissummut tunngatillugu ingerlatallip pisassiissutinut qummut killissamik eqqortitsineranut uppermarsaammik piumasaqarsinnaanera qaqumulluunniit piumasaqataasinnaapput. Aalajangersakkap atorneqarnissaa ilimanangilaq, tassami ingerlatallip pisassiissutinit pigisai qarasaasiakkut isertarfimmi aqutsisoqarfiup pilersitaani aquaanilu imaaliallaannaq takuneqarsinnaassanngimmata, tamannali ikkunneqarsimavoq paasissutissat kissaataasut piumanerannut periarfissanik qulakkeerinninnissaq siunertaralugu, tassalu qarasaasiakkut iserfissaq arlaatigut pissuteqarluni kukkusuuussagaluarpat.

Imm. 5-imut

Ukiumi pineqartumi ukiumoortumik pisassiissutit tamarmiusut aalisarnerlu tamarmiusoq TAC-imik ukiumi pineqartumi aalajangersaaffigineqartumik qaangeeqquaanngillat. Taamaasisoqarnerani ingerlatalimmut pineqartumut ukiumoortumik pisassiissutit aallaaviatigut pisasanik ingerlatalimmut qummut killissanut naapertuuttunik

qaangeeqqusaanngillat, kisianni ukiumoortumik pisassiissutit pisarineqartut pisisumiit aalisarneqarsinnaassapput, tunisisullu ukiumoortumik pisasaanit ilanngaatigalugit.

Pisassiissutinut "nuunneqarsimasunut" tunngatillugu atuuttoq tassaavoq ukiumoortumik pisassiissutinut ilaaffigisimasaminut ilaalerissaasa atuutsinneqarnerat. Ingerlatalik taamaasilluni pisassiissutinit pigisat sinnerlugit aalisarsinnaassaaq, soorluttaarlu ukumi aalajangersimasumi TAC-i sinnerlugu amerlanernik aalisartoqarsinnaassasoq, tassami pisarineqartut pineqartut ukiup siuliani imaluunniit ukumi tulliuttumi ilanngaatigineqarsinnaassammata, apeqquaalluni qanoq "nuussisoqarsimanersoq".

Imm. 6-imut

§ 28, imm. 2 naapertorlugu aalisagaqatigiinnut allanut, § 28, imm. 1-imi taaneqartut saniatigut, PNNP-imik aaqqissuussineq Naalakkersuisut aallartissinnaavaat. Taakkununnga tunngatillugu aalisagaqatigiinnut pineqartunut pisassiissutinut qummut killissamik Naalakkersuisut aalajangersaasinnaanerat atuuppoq.

D. Pisassiissutinit pigisat sivisussusilernerat

§ 33-mut

Imm. 1-imut.

Ingerlatallip aalisarnissaminut aningaasaliinissaminullu piareersaanissaanissaminut periarfissaqarnissaa eqqarsaatigalugu pisassiissutinit pigisanik tunineqassaaq, taakkulu ukiuni arlalinni siumut qularnaarneqartussapput. Tunngavagineqartumi malinneqartussaq tassaavoq pisuussutit inuiaqatigiinnit pigineqartut, tunniussineq piffissatigut killeqartinneqassasoq, peqatigitilluguli aalisarsinnaanermut periarfissaqartitsineq ima sivisutigisumik qularnaarneqarsimassasoq ingerlatalik aningaasaliinernut aalisarnerullu piareersarnissaanut tunngatillugu killilersuiffigineqassanani.

Aalisarsinnaanermut akuersissut piffissaliunneqartumut taaneqartumut siumut ukiut tamaasa nalunaarutigineqartarpooq, taamaasilluni aalisarsinnaanermut akuersissut "ingerlaannartuulluni". Piffissaliunneqartup taaneqartup kingornagut ukumi pineqartumi aatsaat pisassiissutinit pigisani allannguinissanut kissaataasut aallartinneqarsinnaassapput. Naalakkersuisullu ingerlatallip raajarniarnermi pisassiissutinit pigisaanik appaanissamik kissaateqarsimappata aalisarsinnaanermut akuersissut § 33-imi piffissaliussap taaneqartup iluani atuutissaaq, ingerlatallillu "ukumi immikkut ittumi" pisassiissutinit pigisani qanoq annertutigisumik pigisaqarsinnaanera nalunaarutigalugu.

Imm. 2-mut.

§ 28, imm. 2 naapertorlugu aalisagaqatigiinnut § 28, imm. 1-imi taaneqartut saniatigut PNNP-imik aaqqissuussinermik Naalakkersuisut aallartitsisinnaapput, tamannalu isumaqarpoq aalisagaqatigiit inatsisip atuutilernerani PNNP-imik malittarisassiornermut ilaasussaanngitsut

ilaasussanngortulluunniit. Taakkununnga tunngatillugu atuuttoq tassaavoq tassunga atatillugu Naalakkersuisut aalisagaqtigiinnut pineqartunut aalisarnissamut pisassiissutinit pigisanut piffissaliinermik aalajangersaasinnaanerat.

E. Pisassiissutinit nammineq pigisanik nioqqutigineqarsinnaasunik atorunnaarsitsineq

§ 34-mut

Pisassiissutinut qummut killiliinerit aalajangersarneqartut piginnittuunerup siammerternissaanut periarfissiippuit. Pisassiissutinut qummut killiliinernut sakkortusaanerit, minnerunngitsumik toqqaannanngitsumik piginnittuunerit ingerlatalinni pisassiissutinit pigisanik naatsorsuinerni ilaasussaanerat pillugu malittarisassaqarneq, siammerterinissamik kinguneqartussaapput, ilimanarluinnarporli tamanna umiarsuaatileqatigiiffinni aningaasanik siammerterinermik imaqassasoq, tassalu pisassiissutinit pigisanik angallatinut ingerlatalinnullu arlalinnut siammerterinissaq pineqartussaanani.

Taamaammat *pisassiissutinit pigisanik* siammerterinermi pisassiissutinit pigisanik Naalakkersuisut atorunnaarsitsinissaat ilimanarluinnarpoq, taamaasillunilu periuseq anguniagassanik Naalakkersuisut anguniagassaannik qulakkeerinnittoq atorlugu agguaaqqittoqarnissaa anguneqarsinnaassammat.

§ 34-kkut pisassiissutinit pigisat agguateqqinnissaannut Naalakkersuisut periarfissinneqarput. Tassungalu atatillugu maligeqquneqarpoq Naalakkersuisut suliniummi suugaluartumi aalisarnermi sunniuteqarluarnerup minnerulernissaanik kinguneqartussani isumalluutinit iluanaarutigineqartussat annaaneqarnissaat periaannaassammat tassunga atatillugu isigniartariaqarpaat.

Imm. 1-imut.

Pisassiissutinit pigisanik atorunnaarsitsinermi/arsaarinninnermi soorunami sulianik ingerlatsinermi inatsisitigut tunngavigineqartut nalinginnaasut malinneqartussaassapput, ingerlatallillu piumasaqaatinut nutaanut taakkununnga piareeqqanissaasa periarfissinneqarnissaat eqqarsaatigalugu atorunnaarsitsinerup aallartinnissaa aatsaat piffissaq aalajangersimasoq qaangiuppat pisinnaassaaq. Atorunnaarsitsineq pisassiissutinit pigisat ilaannannguinik peersinikkut aatsaat pisinnaavoq, tassalu ukiumut 20%, aatsaallu piffissap pineqartup naaneraniit, takuuk § 33, imm. 1 , tassungalu nassuiaatit.

Aalajangersagaq taanna apeqqutaanani pisoq immikkut nalilersuiffigisariaqarpoq, tassalu arsaarinninnissaq kissaataasooq pinngitsaaliisummik pigisanik taarsiissutitalimmik pigisanik piginnikkunnaarsitsinermik ingerlatalinnullu annaasaqarnermik kinguneqassanersoq, tamannalu Naalakkersuisut taarsiissuteqarfigisussaassavaat.

Imm. 2-mut.

Aalajangersakkatigut pisassiissutinit pigisat atorunnaarsinneqartut ingerlatalinnut allanut tunniunneqarsinnaannginnerat aalajangiunneqaannarpoq, kisiannili § 31-imni malittarisassat malillugit Naalakkersuisut aqqutigalugit agguaaqqittooqartussaasoq.

F. Pisassiissutinik niuerutigineqarsinnaasunik nammimeq pigisanik pisassiissutinik atuineq

§§ 35-miit 39-mut aalajangersakkani ilaatigut malitassaq pingaardeq atortussanngortinneqarpoq, tassalu inuiaqatigiit pisuussutaannik atuinissamut pisinnaatitaaffeqarnermi atuinissap pisussaaffiunissa malinnejartussaasoq. Pisuussutit ima naleqartigaat tamakku inuiaqatigiinnut arlaatigut tuttussanngortussaallutik, taamaammallu tamakku atorluarnissaat pingaarluiinnartuuvoq. Taamatut eqqarsarnermi ingerlatalik kinaagaluartoq ukiut tamaasa ukiumoortumik pisassiissutit tamakkerlugit atuisarnissaminut pisussaaffeqartoq pineqarpoq.

Peqatigitillugu atuinissamut killiliussat eqaatsuunissaat tulluartuussaaq, tassalu atuinissaq pisinnaassasoq - aammalu tamanna sunniuteqarluartumik pisinnaassasoq - tassanilu anguniarneqartussaavoq ingerlatallip ukiumoortumik pisassaanik nuussisinnaanissaq, matumanu pineqartoq ukiumi aalajangersimasumi tamatuminnga tamakkiisumik atuisinnaassanngippat - ingerlatalimmut allamut pinngikkuni (ukiumoortumik pisassiissutinik tunisinkut) imaluunniit ukiup tullianut nuussinikkut (pisassiissutinik nuussineq).

Killeqanngitsumik ukiumoortumik pisassiissutinik tuniniaasinnaanermut periarfissaqartitsineq "ilatsiinnarluni aalisarnermik" kinguneqariaannaavoq, taamaaliornikkut ingerlatalik ukiumoortumik imminut pisassiissutigineqartunik tamanik ilaannaanilluunniit tuniniaasinnaalissammat, taamaasillunilu ilumoorpat attartortitsisussaalluni. Naalakkersuisut isumaqarput taamatut pisinnaatitaaffimminik ilatsiinnarluni atuisarneq tulluartuunngitsoq, ukiumoortumillu pisassiissutinik tunniussisinnaanermut periarfissaqartitsineq killeqartariaqartoq.

Ukiup tullianut pisassiissutinik nuussisinnaanermut killeqanngitsumik periarfissaqartitsineq ukiut akornanni atuinissami assigiinngisitsinerujussuarmik kinguneqarsinnaavoq, tamannalu amma aalisagaqatigiinnut ajortumik sunniuteqarsinnaavoq. Tamanna tunngavigalugu pisassiissutinik nuussisarnermut periarfissaqartitsineq killeqartissallugu tulluartuussasoq Naalakkersuisut isumaqarput.

§ 35-mut

Aalajangersagaq malitassamik tunngaviulluinnartumik takutitsiffiuvoq, tassalu ingerlatalik pisinnaatitaaffimminik atuissasoq, aalajangerneqarporlu ukiumoortumik pisassiissutit ikinnerpaamik 85%-ii ukiumi aalajangersimasumi aalisarneqartartussaasut.

Aalajangersakkamik unioqqutitsineq pineqaatisiisarnermut aalajangersakkat malillugit akiliisitsinermik kinguneqarsinnaavoq, kisiannili amma piffissami aalajangersimasumi

aalisarsinnaanermut akuersissutip atornissaanut pisinnaatitaaffiup tamakkiisumik ilaannakortumilluunniit arsaarinnissutigineqarneranik imaluunniit aalisarsinnaanermut akuersissutip arsaarinnissutigineqarneranik kinguneqarsinnaavoq, takuuk § 26.

§ 36-mut

Imm. 1-imut.

Pisassiissutinit pigisat ingerlatalinnit ingerlatsisuniinnaq taamaallaat pigineqartassasut, ingerlatallillu pisassiissutinit pigisanik piginnittuulluni pisassiissutinit pigisanik aalisarnissamik misiliinani ingerlatsisimanissaata pinngitsoortinnissaa aalajangersakkami siunertaavoq. Taamaammat pisassiissutinit pigisat aallaaviatigut tamatigut aalisarsinnaanermut akuersissummut attuumassuteqartartussaapput.

Aalajangersaq maannamut inatsimmi atuuttumi § 16-imut assinguvoq.

Imm. 2-mut.

§ 10 naapertorlugu aalisarsinnaanermut akuersissummut angallammik attuumassuteqartoqassaaq, kisiannili assersuutigalugu umiarsuaatileqatigiiffimmik pilersitsinermut atatillugu pisassiissutinit pigisanik pineqartup pigisaanik angallammik pisassiissutinit pigisanik atuinissamut atorneqartussamik pissarsisoqarnissaa tikillugu ukiumoortumik pisassiissutinik nuussisinnaassaaq. Angallammik taamatut pissarsiniartarneq misilittakkat malillugit sivisuumik ingerlasinnaavoq, ingerlatalimmullu periarfissaasariaqarpoq taamatut pigisaqalersimanermut piffissami angallammik pigisaqalersimanani pisassiissutinit pigisanik peqalereersimanissaa periarfissinneqartariaqarpoq. Ukiumoortumik pisassiissutinik tunisineq imm. 1-imi killiliunneqarluni taaneqartup kingornagut amerlanerpaamik qaammatit 18-it ingerlasussaasariaqarput, taamaattoq takuuk imm. 3 aamma § 37.

Imm. 3-mut

Ingerlatalik angallammik pissarsinermut atatillugu annertuumik aningaasartuuteqalertussaavoq, tamannalu naammaginanngilluinnartumik kinguneqartussaavoq angallammik pissarsineq arlaatigut pissuteqarluni ingerlatalik pisunani kinguartinneqarsimappat imaluunniit tassunga atatillugu pineqartoq aalisarsinnaanermut akuersissumminik arsaarneqarsimappat. Taamaammat aalisarnermi angallammik atuilernissamut siumut takuneqarsinnaanngitsunik akornutissaqalersimappat imm. 1-imi aalajangersakkaniit immikkut akuersissuteqarnerup nalunaarutiginissaanut Naalakkersuisut periarfissaqassapput.

Aalisarneq pillugu Inatsisartut inatsisaanni atuuttumi maannakkut periusiusoq tassaavoq ingerlataqartup qaammatinik pingasunik immikkut akuerineqarneranik nalunaarfigineqartarnera. Imm. 1-imik qaammatit pingasut ingerlaneranni ingerlataqartoq naammassineqarsinnaanngippat sivitsuinermik nalunaaruteqartoqarsinnaavoq. Immikkut

akuersinerup sivitsorneqarnerata nalunaarutiginissaa sioqqullugu pissutsit qaqgu aaqqinnejarnissaannik ilimagineqarneri pillugit ingerlataqartoq nassuaasiussaaq. Periaatsip taassuma atorneqarnerata ingerlaqqinnissaa naatsorsuutigineqarpoq.

Piffissami killeqartumi immikkut akuersinerup iluani imm. 1 suli ingerlataqartumit naammassineqarsinnaanngippat imm. 2 aamma imm. 3 atorneqalissapput.

§ 37-mut

Imm. 1-imut.

Aalajangersagaq nutaajuvoq. Aalajangersakkami ingerlatallit nutaat pisassiissutinit pigisaminnik tamanik ilaannaanilluunniit tunisinissamut sivisunerusumik piffissaqarnissaat siunertaavoq, taamaasilluni qaammatinik 48-nik sivisussuseqassalluni, taamaaliornikkullu ingerlatallit nutaat aalisarnermut peqataalernissaannut ajornannginnerulersitsinkut periarfisanut aporfissat atorunnaarsinniarlugit. Aamma aalisarnermi piginnittuunerup siammarteriffiginissaa pillugit kissaateqartoqarpoq, nalilerneqaporlu ingerlatallit nutaat ajornannginnerusumik periarfissaasa oqinnerulerterat tamatumunnga iluaquataajumaartoq.

Ingerlataqartup aalajangersakkami qaqgu atuilersinnaaneranut aalajangersakkami piumasaqaatit 3-t saqqummiunneqarput.

Siullit marluk nutaat aalisarnermut isersinnaanerisa ajornannginnerulerterat pillugu siunertanut innersuussippu. Nutaatut ingerlataqalersunissamut piumasaqaatit aalajangersakkami aalajangersarneqarput.

Piumasaqaammi kingullermi ingerlataqartup nutaat pisassiissutinit pigisanik pisisinnaaneranut qummut killiliippu peqatigisaanillu suli aalajangersagaq atorsinnaallugu. Killissat allat amerlanerpaanik pisassiissutinit pigisat 1/4-iannut aalajangerneqarpoq (pisassiissutinit qummut killiliineq), matumani pisassiissutinit pigisanut niuerfinnut annerusumik nalornisoqartarnissaa akornusersuisoqarnissaalu pinngitsoortinniarlugit.

Aalajangersagaq atorneqarsinnaassappat piumasaqaatit pingasuusut tamarmik naammassineqarsimassapput.

Pissarsiarinninnerup nalaani ukiumoortumik pisassiissutit tunineqartarnerat pillugu § 36, imm. 2, ingerlatalinnut taakkununnga aamma atorneqarpoq.

Ingerlatalik §§ 36 aamma 37-mi killiliussanik eqqortitsisimanngippat sunniutaasussat pillugit § 40-mut innersuussisoqarpoq.

§ 38-mut

Imm. 1-imut.

Ingerlatalik kinaagaluaruni ukiumoortumik pisassiissutit imminut tunngasut 15%-iannik nuussinissaminut periarfissaqarpoq. Tamanna "aqqtissanut marluusunut tamanut" atuuppoq: ukiup tullianut ukiumoortumik pisassiissutinik nuussisoqarsinnaavoq imaluunniit ukiumi siullermi "siumoortumik aalisartoqarsinnaavoq, tassalu aalisarneqartut ukiup aappaanut ukiumoortumik pisassiissutinut ilanngaatigineqarpata.

Nuussisinnaanermut periarfissaqartitsineq ukiumoortumik TAC-ip tamarmiusup qaangiilluni aalisarfiusinnaaneranik kinguneqariaannaavoq, tassalu tamanna tunngavigalugu aalisarneq unitsinneqanngippat, soorluttaarlu TAC-i ukiuni allani annikinnerusumik aalisarfiusimatillugu.

Imm. 2-mut.

Naalakkersuisut nuussisarnernut piumasaqaatinik aalajangersaanissaminut piginnaatinneqarput. Tassungalu atatillugu pisassiissutinit pigisat atornissaannut piumasaqaatinik ajorseriarnerit suugaluartut ingerlatallip malunnartumik annaasaqarneranik kinguneqartut tunngaviatigut Naalakkersuisunut akisussaasunngortitsisinnaanerat maluginiarneqaannartussaavoq. Tassunga atatillugu pissusissamisoortumik piumasaqaatitut assersuutaasinnaasoq tassaavoq aalisarneqartussatut nuussat ukiumi pineqartumi piffissap aalajangersimasup iluani aalisarneqartarnissaat pillugu piumasaqaammik atuisoqarnissaa. Piviusut malillugit ukiumoortumik pisassiissutit ukiup tullianut nuunneqartut 30. april tikitsinnagu aalisarneqartussaanerat (raajat) aamma ukiup tulliani 30. juni tikitsinnagu (qalerallit) aalisarneqartussaanerat aallaavigineqassaaq.

§ 39-mut

Imm. 1-imut.

Ingerlatallip ukiumoortumik pisassiissutinik tuniniakkanik qanoq amerlatigisunik nuussisinnaaneranut killissaq 8%-imut inissinneqarpoq. Tamanna pisuussutit tunniunneqartut piginnittumiit nammineq aalisarneqarnissaat pillugu kissaateqarnerup kiisalu eqaatsumik aaqqissuussusinnaanerup isiginiarneqarneranik aallaaveqarpoq.

Imm. 2-mut.

Ingerlatalik ukiumoortumik pisassiissutit ilaannik tunisaqassagaluarpat pineqartoq taakkununnga nammineerluni aalisarsinnaassanngilaq, taamaammallu tamanna ingerlatalimmut ukiumoortumik pisassiissutinit tamarmiusunit ilanngaaffigineqartussaassalluni. Tamanna imm. 1 aamma imm. 4 naapertorlugu ukiumoortumik pisassiissutinik tunisinermi atuuppoq.

Imm. 3-mut

Ingerlatalik ukiumoortumik pisassiissutit minnerpaamik 85%-iannik ukiumilu pisassiiffiusumi pineqartumi nammineerluni aalisartussaammat, ingerlatalik 15%-imik nuussiutigaluni

ukiumoortumik pisassiissutit 8%-iannik tuniniaaqquaanngilaq. Taamaammat tunineqarsimasut ukiumoortumik pisassiissutit ilaannik ingerlatallip nuussinnaasaanik ilanngaatigineqassapput.

Imm. 4-mut

Ukiumoortumik pisassiissutit 85%-iannik atuisarnissaq pillugu imm. 1-imik piumasaqaammut ingerlatallip malinnissinnaanissaa arlalippasuartigut tunngaveqarluni periarfissaanavianngilaq, taamatullu pisoqarnerani ukiumoortumik pisassiissutit 8%-ii imm. 2-mi taaneqartarlutik periarfissiisut qaangerlugit annerusumik tuniniaanissamut immikkut akuersissuteqarnissaq qinnutigineqarsinnaassaaq, taamaasilluni ingerlatalik ukiumoortumik pisassiissutit 85%-ii qaangernagit atuisussaassammat. Taamaakkaluartoq immikkut akuersissuteqarnissap anguniarnissaanut piumasaqaateqartussaavoq, tassalu pisoq malillugu immikkut akuersissuteqartoqarnissaanut qinnuteqarnissami ingerlatalik 85%-it angussallugit periarfissaqassanngimmat.

Ingerlataqartup 85 %-imik iluaquteqarnera pillugu aalajangersakkamiit immikkut akuerneqarnermiq nalunaarut, taamaalilluni ingerlataqartoq ukiumut pisassiissutimi ilaanik annertunerusunik ingerlataqartumut allamut tunniussisinnaalluni, pisassiissutinik nuussisinnaanermut periarfissami ilanngaassinginnissamik imaqarsinnaavoq. Taamatut ilaannginnissamut nalunaaruteqartoqarpal ingerlataqartup taamaalilluni assersuutigalugu 20 %-it ingerlataqartumut allamut tunniussinnaavai taamaattorlu 15 %-it tikillugit pisassiissutinik nuussisinnaalluni. Taamaattorli 15 %-inik annertunerusunik nuussinissamut akuersisoqarsinnaanngilaq.

"Teknikikkut pissutaasunut" assersuutitut taaneqarsinnaapput ajunaartoqarnera, siumut naatsorsuutiginngisanik iluarsaanerit imaluunniit allannguinerit siumut naatsorsorneqarsinnaanngitsut annertuut imaluunniit angallammi atortunik taarsersuinerit.

"Aningaasaqarnikkut pissutaasunut" assersuutitut taaneqarsinnaapput aningaasaliinissanut eqqarsarnerit, taakkunani assersuutaasinnaalluni ukiut arlallit atorlugit pisassiinissamut tunngavissanik pilersitsiniarneq.

"Niuerfitsigut pissutaasunut" assersuutitut taaneqarsinnaapput niuerfinni siumut naatsorsorneqarsinnaanngitsunik annertuunik allanngornerit, soorlu atuisut pissusiini allanngornerit nappaalanersuaqarneranik peqquteqartut.

"Immikkut pissutaasuni allani" assersuutitut taaneqarsinnaapput umiarsualivinnik matooraanerit, sorsunnerit, suliffeqarfinnullu inunnit ataasiakkaanit pigineqartunut tunngatillugu napparsimanerit, qinikkatut suliaqarneq imaluunniit naalakkersuinikkut inissisimanerup isumaginissaa. Naatsorsuutigineqarpoq kalaallit nunaata kitaani aalisarnermut naleqqiullugu Tunumi raajarniarnermi immikkut akuersinerit annertunerusumik nalunaarutigineqartarumaartut. Tamatumunnga pissutaavoq Tunumi TAC-p kalaallit nunaata

kitaanut naleqqiullugu annikitsuaraanera, tamannalu amerlanertigut tamaani aalisartuni angallatini TAC-ip ilaani annertunerusoq katarsorneqarpat aningasaqarnikkut isumaqarnerulluni.

Imm. 5-imut

Aalajangersakkatigut ukiumoortumik pisassiissutit tuniniartarnerannut tunngatillugu pingaarnertut tunngavagineqartussaq oqaatigineqarpoq, tassalu inuk pisinnaatitaaffeqartoq atuisussaasoq, taassuminngalu attartortitsinikkut pisinnaatitaaffimmik iluanaaruteqassanngitsoq. Aalajangersagaq taamaasilluni apeqqutinut nalornissutaasunut paragrafimi pisunut tunngatillugu pileriaannaasunut aaqqiissutaasinnaasutut atorneqarsinnaassaaq.

G. Pisassiissutit pinngitsaaliinikkut nuunneqartarnerat

§ 40-mut

Imm. 1-imut.

Nr. 1)

Ingerlatallip ukiumoortumik pisassiissutigineqartut imminut tunngasut 85%-iannik aalisarsimasinnaasimassanngippat, tamannalu umiiarnermik imaluunniit allatut akornutaaggallartunik pissuteqarsimannngippat ingerlatallip pisassiissutinit pigisaminik nammineq aalisarsinnaasaminut naleqqussaanissani isumagissavaa. Tamanna pisassiissutinit pigisat ilaannik ingerlatallip aalisarsimasinnaasimanngisaanik tunisaqarnikkut pissaaq.

Piffissaq ukiunut pingasunut (malittunut) aalajangersarneqarpoq ukiullu kingulliit pingasut naanerat sioqqullugu pisassiissutinit pigisat tunineqarsimassallutik.

Nr. 2) aamma 3)

§§ 36 aamma 37-mi pisuni eqqaaneqartuni piffissaliussatut aalajangersarneqartut iluanni aalisariummik pisinissamik ingerlataqartoq iluatsitsisimanngippat aamma tunisisoqassaaq. Pisassiissutinit pigisat tuniniarlugit aallartinneqassapput, tamannalu piffissaliunneqartup iluani pissaaq. Piginnituusullu pisassiissutinit pigisanik tuniniaanissaa sioqqullugu piginnittooq pigisaqalerterup kingorna qaammatit 18-it qaangiunnissaannik utaqeqqaassanngilaq.

Imm. 2-mut.

Aalajangersakkami tunisinermut piffissaliussaq allanneqarpoq. § 34 naammassineqanngippat pisassiissutinit pigisat ilai tessani pineqarput ingerlataqartup aalisarsinnaasimanngisai, §§ 36-ip aamma 37-ip naammassineqannginnerini pisassiissutinit pigisanik tamakkerlugit ingerlataqartup tunisussaallugit.

Imm. 3-mut

Aalajangersakkami pisumut ingerlatallip imm. 1-imi piumasaqaammut naammassinnissinnaannginneranut aaqqiissutissaq takutinneqarpoq. Taamatut pisoqarsimatillugu Naalakkersuisut pisassiissutinit pigisat suliariumannittussarsiuussisarneq pillugu malittarisassat malillugit neqeroorutigissavaat, takuuk § 31.

Pisassiissutinit pigisat tunngaviatigut suli ingerlatalimmit pigineqarput, tuniniaanermilu inerniliunneqartoq tassunga tunniunneqassaaq, tassami tassunga atatillugu akiliutigineqartussat Naalakkersuisut pisussaavaat, matumunnga malittarisassanik aalajangersaasoqarsimappat, takuuk § 27.

Imm. 4-mut

Pisassiissutinit pigisat tunineqarnissaannut piumasaqaatit aamma tunisinermut atatillugu suleriaatsit erseqqinnerusumik allaaserineqarnissaat pisariaqarsinnaavoq imaluunniit tulluarsinnaavoq.

§ 41-mut

Imm. 1-imut.

Ingerlatalik aalisarsinnaanermut akuersisummut piumasaqaatinik unioqqutitsisimappat, tamannalu tunngavigalugu aalisarsinnaanermut akuersisumminik annaasaqavissimappat, takuuk § 26, imm. 1, pisassiissutinit pigisat tunngaviatigut suli pineqartumit pigineqartussaapput, ingerlatalilli aalajangersagaq manna malillugu arsaarinninnissaq pillugu aalajangiinerup ingerlatalimmit paasineqareernerata kingorna qaammatinik arfinilinnik piffissaqarluni tuniniaanissamik pisussaaffeqartussaavoq. Tamanna tamanut tuniniaanikkut pisinnaavoq, tuniniaanermilu inerniliunneqartoq ingerlatalimmut tunniunneqassaaq. Tassunga atatillugu aalisarnermut inatsisaasunik unioqqutitsinerit kapitali 15 malillugu pineqaatissiissutinik allanik kinguneqarsinnaammat malugeqquneqarpoq.

Pisassiissutinit pigisat ukiumoortumik pisassiissutit ilai malippai, ukiumi pineqartumi suli aalisarneqarsimanngitsut. Ukiumoortumik pisassiissutit taakku piffissaagallartillugu tunniunneqassapput ingerlataqartoq tigusisoq ukiup pisassiiffiusup pineqartup iluani aalisarnissai angumerisinhaallugit. Pisuni tamanna ajornarluni, assersuutigalugu akuersissutip arsaarinnissutiginera ukiumi ima kingusitsigaluni ukiumoortumik pisassiissutit taakku ilai taamaallaat ingerlataqartumit tigusisumit pisassiissutinik nuussinissamut imaluunniit ukiumoortumik pisassiissutimi tuninissaannik taamaallaat periarfissaqalerluni.

Imm. 2-mut.

Pisassiissutinit pigisanik tuniniaaneq pisimanngippat pisassiissutinit pigisat suliariumannittussarsiuussisarneq pillugu malittarisassat malillugit Naalakkersuisunit neqeroorutigineqassapput, takuuk § 31.

Pisassiissutinit pigisat tunngaviatigut suli ingerlatalimmit pigineqarput, tuniniaanermilu inerniliunneqartoq tassunga tunniunneqassaaq, tassami tassunga atatillugu akiliutigineqartussat Naalakkersuisut pisussavaat, matumunnga malittarisassanik aalajangersaasoqarsimappat, takuuk § 27.

Imm. 3-mut

Pisassiissutinit pigisat tunineqarnissaannut piumasaqaatit aamma tunisinermut atatillugu suleriaatsit erseqqinnerusumik allaaserineqarnissaat pisariaqarsinnaavoq imaluunniit tulluarsinnaavoq.

Kapitali 8

Aalisariutini inuttat

§ 42-mut

Aalajangersakkut Naalakkersuisut pisinnaatinneqassapput aalisariutini inuttanut nalunaarusiamut sukumiinerusunik aalajangersaasinnaallutik, tassunga ilaalluni inuttanik nunatsinnut attuumassuteqartunut atorfinititsinermi ikinnerpaaffiliisinnaaneq.

Aalisarnermik inuussutissarsiummi sulisussanik Kalaallit Nunaannut aalajangersimasumik attuumassutilinnik immikkut isiginniffiusumi malittarisassanik sukumiinerusunik aalajangersaasoqarsinnaanera aalajangersakkami siunertarineqarpoq, taakku § 9, imm. 2, nr. 1-imut nassuaatinut assersuullugit. Aalajangersakkuttaaq kalaallit inuiaqatigiit ilinniarnissanut periarfissanik aalisarnermik inuussutissarsiuiniittuni iluaquusernissaat qulakkeerneqassaaq.

Kapitali 9

Usilersoqqinnej, tunisineq suliareeqqiinerlu

A. Usilersoqqinnej

§ 43-mut

Imm. 1-imut.

Aalajangersakkap Naalakkersuisut pisinnaatippai Kalaallit Nunaata aalisarnikkut oqartussaaffigisaani avataanilu tulaassinermut aamma usinik nuussinermut ersarinnerusunik aalajangersaasinnaatillugit, sumi usinik nuussisoqarsinnaanersoq tulaassisqarsinnaanersorlu aalajangiisinjaallutik, umiarsualivinnik fabrikinillu ilaannillu innersuussisinjaallutik.

Aalajangersakkami pineqarput kalaallit nunallu allamiut angallataanni Kalaallit Nunaata aalisarnikkut oqartussaaffigisaani aamma Kalaallit Nunaata aalisarnikkut oqartussaaffigisaata avataani usilersoqqinnerit tulaassisarnerilu, takuuk § 2 tamaat.

Usilersoqqittarnerni tulaassinerillu malittarisassaliornermi siunertaq tassaavoq nunani tamalaani isumaqatigiissutit naapertorlugit Kalaallit Nunaata pisussaaffinik naammassinninnissaq. Pingaartumik unioqqutitsisumik, nalunaarutigineqanngitsumik malittarisassaqartinneqanngitsumillu aalisarnermut naleqqiullugu pingaarpoq usilersoqqinnernik tulaassinerillu nakkutilliisoqarnissaa. FOA-mit “*Unioqqutitsilluni, nalunaarutiginnitarani killilersugaanngitsumillu aalisarnerit pinaveersaartinniarlugit, pinngitsoortinniarlugit unitsinniarlugillu nunat umiarsualivillit iliuusissat pillugit isumaqatigiissutaat*” malitsigitinneqarpoq.

Usilersoqqittarnerit tulaassinerillu nunanit tamalaanit annertuumik isiginiarneqartupilussuupput. NEAFC assersuutigalugu ilaatigut tulaassinerit usilersoqqinnerillu pillugit malittarisassanik akuersisimavoq, Kalaallit Nunaanni inatsisini atulersinneqarsimasut.

Imm. 2-mut.

Aalajangersakkami akuersissuteqarnerup tunisinissamut tulaassinissamullu piumasaqaatitut tunngaviusarnissaanut tunngavissarpiaq takutinneqarpoq.

Usilersoqqinnissamut akuersinermi angallatini suliareqqiineq pillugu malittarisassat sillimaffigineqassapput, tak. § 45.

Immikkoortoq B - Tunisisarneq-mi kingullertut taaneqartuni pisut immikkut tigussaasut pineqarput, tassani usilersoqqittarnerit angallatillu tulaassiviusartut akuersisummit nalunaarfigineqartariaqarlutiik.

B. Tunitsiveqarneq

§ 44-mut

Imm. 1-imut.

Aalajangersagaq malillugu tunitsivik tunisassiorfillu nutaaq kommunimi tunitsiviup pilersinneqarfiani communalbestyrelsimiit akuersissuteqarnani pilersinneqaqqusaanngillat. Suliffissuit pioreersut aalisagaqatigiinnut allanut tunitsivittut tunisassiorfittulluunniit allanngortinnissaat kissaataasimappat aamma communalbestyrelsip akuersisimanissaa piumasarineqarpoq.

Tunitsivinnik tunisassiorfinnillu nutaanik pilersitsinermut taakkulu allanngortinnissaannut akuersinermi ilaatigut aningaasaqarnikkut pisinnaasanut akilersinnaassutsimullu kiisalu inuussutissalerinikkut sunniutaasussanut uuttuinissaq ilaasussaavoq.

Tunitsiviit tunisassiorfiillu kommunimit aamma inuussutissalerinermut oqartussanit akuerineqartarnissaannik tamanna kinguneqassaaq.

Aalajangersakkatigut siunertarineqarpoq qulakkeerneqassasoq aalisarnermiq
inuussutissarsiuteqarnermi, aalisakkeriveqarnermi inuussutissarsiutinilu allani taakkununnga
attuumassuteqartuni aningaasaqarnermut suliffissaqartitsinermullu tunngatillugu
sianiginagiassat pisariaqartinnejartut qulakkeerneqarnissaat.

Eqqarsaatigisassat taakku, tunitsiviit tunisassiorfiillu eqqarsaatigalugit, aningaasaatitigut
tunngavinnik pisariaqartunik peqarneranut, sumiiffimmi innaallagissamik imermillu
pilersuinissamut naammattumik periarfissaqarneranut, inuussutissarsiutigalugu aalisartut
pisaminnik tunisinissamut naammattumik periarfissaqareernerannut kiisalu sumiiffimmi
pineqartumik sulisoqarnikkut isumalluuteqarneranut atassuteqarput. Qinnuteqartup
taamaalilluni piumasaqaatit arlallit naammassineqarsimaneri uppermarsassavai.

Taakku saniatigut tunitsivinnik tunisassiorfinnillu pilersitsinissamut kiisalu taakku
allangortinnissaannut tunngalluinnartumik piumasaqaataavoq, Kalaallit Nunaanni
Uumasunut Nakorsaqarnermut Inuussutissalerinermullu Oqartussanit imaluunniit avammut
tuniniaanermi tunisassiorfiit pineqarpata Danmarkimi Fødevarestyrelsimit inuussutissat
pillugit inatsisini tamanna pillugu malittarisassat naapertorlugit akuerineqarsimanissaat.

Ataatsimut isigalugit inuussutissarsiornikkut, niuernikkut kiisalu inuussutissat
isumannaatsuunissannut tunngaviit nalinginnaasut isiginiarneqarput. Taassuma saniatigut
pisuussutinik nalinginnaasunik aamma pisuussutinik nalinginnaasunik suliffeqarfiiit
tunngavigisaannik piffissamut sivisuumut nungusaataanngitsumik atuinissamik
qulakkeerinninnissaq isiginiarneqartariaqarput.

Isumaliutigisassat kommunalbestyrelsimit ilanngullugit peqqussutigineqartussat
akornanniippoq tunitsivitsigut piginnaasap tamarmiusup eqqarsaatiginissa. Piginnaasap
taassuma isumalluutitigut tunngavigisaq qaangerneruppagu pisassatigut periarfissat
qaffanneqarnissaannut kajumissuseq taava annertunerussaaq, aamma uumassuseqarnikkut
pijuuartitsinermut siunissami eqqarsaatigisassat annaaneqarsinnaallutik.

Aalisagaqtigii allat (ulloq manna tikillugu tunineqartartut suliareqqinnejartartullu
saniatigut) tunisarnissaannut suliarisarnissaannulluunniit suliffissuarnut piovereersunut
tunngatillugu kommunimiit akuersisoqarsimanissa aamma piumasarineqarpoq.
Aalajangersagaq taanna siusinnerusukkut atuuttumut sanilliullugu allangortinneqarpoq,
tassani assersuutigalugu imermik innaallagissamilluunniit pilersuisinnaassutsip
annertusineqarneranut imaluunniit attaveqaatitigut allatigut soorlu aqquserniornermut,
talittarfiliornernut assigisaannullu pisortat aningaasaliisoqarnissaannik allangortitsinermut
pisariaqartitsiviuppat akuersissummik pissarsiniarnissaq taamaallaat pisariaqartinnejarpoq.
Tamannali siunertamut naapertuutinngilaq, tassa suliffeqarfimmik inuussutissalerisumik
allanguinerit tamarmik inuussutissalerinermut oqartussaniit akuersissummik
pisariaqartitsiviummata. Akuersissut Kalaallit Nunaanni Uumasunut Nakorsaqarnermut

Inuussutissalerinermullu Oqartussanit pissarsiarineqassaaq, matumani nunatsinni niuerfinnun tunisassiorneq kisimi pineqarsimappat imaluunniit avammut tuniniaanissaq siunertaralugu tunisassiorneq Danmarkimi Fødevarestyrelsen aqqutigalugu pisimappat.

Imm. 2-mut.

Aalajangersagaq pingaarnersamigut aalisarneq pillugu inatsisartut inatsisaat nr. 18, 31. oktober 1996-imeersumut naleeqiullugu allanngunngilaq, aamma tunitsivinnik aamma tunisassiorfinnik nutaanik pilersitsineq kiisalu tunisassiorfinnik piovereersunik allanngortitsineq pillugu malittarisassanik erseqqinnerusunik atulersitsinissamut Naalakkersuisunut piginnaatitsilluni.

Umiarsuarnik tunitsivilisarneq pillugu Naalakkersuisut aamma malittarisassiorsinnaanerannik ilanggussisoqarpoq. Aalajangersakkat taamaattut ilaatigut makkununnga tunngasinnaapput:

- 1) sumiiffik pisiortorfissaq,
 - 2) nunami suliffimmik pilersitsinissaq pillugu piumasaqaat,
 - 3) pisanik tunisinissamut periarfissat,
 - 4) angallammut teknikkut piumasaqaatit,
 - 5) aalisakkat suunerit amerlassusiallu,
 - 6) piffissamik killiliineq, aamma
 - 7) tunisisinnaanermut tamanut perarfissaqartitsineq
-
- 1) Sumiiffimmi killilikkami taamaallaat tunitsiviup ingerlataqarnissaanut Naalakkersuisut killiliisinnaapput. Pingartumik umiarsuarmik tunitsivilisoqartillugu taakku nunami suliffissuarnik ingiaannginnissaat pingaruteqarluni.

 - 2) Suliffissaqartitsineq eqqarsaatigalugu pisanik tunisisarnerup nunami tunisassiorfinnut pinissaa kissaatigineqarmat nunami tunisassiorfimmik pilersitsinerup aningaasalersornissaa eqqarsaatigalugu tunitsivilinissamut akuersissuteqartoqarsinnaassaaq.

 - 3)) Sumiiffinnit pisanik tunisinissamut perarfissanik amigaateqarfiusuni sumiiffinni angallatinik tunitsivilisoqarsinnaassaaq. Aamma sumiiffimmi killeqartumi unammilleqatigiittoqanngippat angallatinik tunitsivinnik ikkussisoqarnissaanut akuersineq tulluarsinnaavoq.

 - 4) Pisiortornissamut teknikimut piumasaqaatinik Naalakkersuisut aalajangersasinnaapput. Assersuitigalugu taamatut pisoqarsinnaavoq suliareqqiinermi imaluunniit pisanik tulaassanik qerititerinermi.

- 5) Pisiortornissamik akuersissummi Naalakkersuisut piumasaqaatinik aalajangersaasinnaapput, aalisagaqatigiit annertussutsillu aalajangersimasut kisimik pineqarput.
- 6) Sumiiffinni sikuusimasuni taamaammallu nunami tunitsiviit tikinnejqarsinnaanngitsuni Umiarsuarnik tunitsivilinerup piffissap killilerneranik aalajangiisinnaaneq tulluarpoq.
- 7) Umiarsuarnik tunitsivilinissamik akuersissuteqarnermi umiarsuarmik tunitsivimmik piginnittooq aalisarnermi ingerlataqartunik tunisiniartunik itigartitsisinnaanngilaq. Umiarsuarmik tunitsiviligajuttoqartarpoq sumiiffimmi aalajangersimasumi pisanik tunisinissamut periarfissat killeqarneri tunngavilersuutigalugu, aammalu umiarsuit tunitsiviit arlallit sumiiffimmi ataatsimi tunitsiviusinnaasaristik, killilersorneqanngitsumik unammillernissaq eqqarsaatigalugu kikkut tamarmik umiarsuarnut tunitsivinnut tunisisinnaasariaqarlutik.
- Imatut pisoqarsimagaangat angallatinut tunitsivinnut usilersoqqittartunullu akuersissummik tunngaviatigut tunniussisoqarsinnaassasoq Naalakkersuisut isumaqarput:
- Suliffissuup annertunerusumik aserfallatsaaliorneqarnerani piffissami aalajangersimasumi tunisineq ingerlatiinnarniarlugu.
 - Illoqarfimmi nunaqarfimmiluunniit siusinnerusukkut tunitsiveqarsimannngitsunut imaluunniit killilimmik tunisassiorsinnaasunut suliffissuarmik sanasoqarnissaa aalajangiiffigineqareersimappat tamatumalu pilersaarusiornera aningaasalersornissaalu aallartereersimappat upternarsarneqarlunilu, tunisassiornerlu annertusarneqarsinnaasoq upternarsarneqarsinnaappat aammalu tunitsivimmum qaninnerpaamut ungasissimappat
 - Siornatigulli tunisassiorfeqanngitsut imaluunniit killilimmik tunisassiornikkut piginnaasaqartoq upternarsarsinnaallugulu, tunisassiornikkut piginnaasat annertusineqassasut, aamma
 - tunitsivimmum qaninnermut ungasippat.
 - Aalisakkanik illoqarfimmuit illoqarfimmut allamut assartuisarnermut atatillugu illoqarfiiit ilaanni suliareqqiisarnermut tunngatillugu unammisassanik pilersoqarsimavoq.
 - Ungasippallaanngitsumi nunami sulisussaqarsimatinngagu, akuersissullu taamaasilluni nunami suliffissuarnut pioreersunut tunisisarnermut attuisussaasimannngippat.

Taamaaqataanik akuersissutit nalunaarutigineqqarsimasut utertinneqarnissaat pillugu malittarisassanik Naalakkersuisut aalajangersaasinnaapput. Taamatut utertitsinissamut pingarnertut pissutaasoq tassaasinnaavoq akuersissut pillugu piumasaqaatit naammassineqannginneri.

Imm. 3-mut

Assigiaartumik eqqortumillu nalunaaruteqartarnerit qulakkeerneqarnissaat siunertaralugu pingaaruteqarluinnarpoq assigiaartunik niuerfinni malitassaqarnissaq, tassa imaappoq angissutsikkut pitsaassutsikkullu immikkoortiterinermut malitassaqarneq. Taamatut aalajangersakkami siunertaq tassaavoq assigiaartumik nalunaarusiortarnermut tunngavissap qulakkeerneqarnissa, tamannalu unammillersinnaassutsip pitsaanerulerneranik tunngavissiissalluni, soorlu aamma tunisineremi akinut il.il. naaleqqiullugu aalisartunut annertunerusumik ammasumik pissuseqarnermik kinguneqassalluni.

EU taamaaqataanik aaqqissuussinernik eqqussisimavoq, assersuutigalugu Europa-Kommissionip aamma Siunersuisoqatigiit peqqussutaat nr. 1379/2013-inikkut.

C. Suliareqqiisarneq

§ 45-mut

Aalajangersagaq piffissap ingerlanerani Kalaallit Nunaanni aalisarnikkut, agguassassinikkut suliffeqarnikkullu politikimi sakkuunikuovoq annertooq. Aalajangersakkakkut aalajangersarneqarpoq kalaallit angallataanni tunisassiortoqassanngitsoq, tamanna § 24 tunngavigalugu akuersinermik Naalakkersuisut nalunaaruteqarsimangippata.

Angallammi tunisassiornissamut akuersisummik tunniussinermi pingartumik aalisagaqassuseq niuernerlu eqqarsaatigalugit piujuartitsineq tunngavigalugu aalisarneq inuaqatigiit aningasaqarnerannut annertunerpaamik pissarsiffiusussaq inatsimmi siunertarineqartoq Naalakkersuisut aallaavigissavaat. Pissutsillu aalisarnermik ingerlatsilluarnerusinnaasut aamma pingartinneqassapput.

Naalakkersuisut akuersisummik nalunaaruteqassapput, kisianni Kalaallit Nunaanni inuussutissat pillugit oqartussaaffiup ilaannaa tiguneqarsimavoq, taamaammallu tamanna pillugu oqartussaaneq Danmarkimi oqartussanut avitseqatigiisutigineqarluni. Taamaalilluni akuersissutip nalunaarutiginissa sioqqullugu inuussutissalerineremi oqartussaniit akuersissutip pisariaqartup pigineqarnissa Naalakkersuisut qulakkiissavaat. Taamaattorli suliffeqarfik nammineerluni akuersissuteqartoqarnissa pillugu danskit kalaallilluunniit inuussutissalerinermut oqartussaasuinut qinnuteqartussaavoq.

Angallammi suliareqqiineq inuussutissalerineremi eqqiluisaardeq aamma inuussutissat isumannaatsuunissaat pillugit malittarisassat qaqqugukkulluunniit atuuttut malillugit inuussutissalerinermut oqartussat akuersereernerisigut pisinnaavoq. Danmarkimi fødevarestyrelsi inuussutissanik avammut tuniniaasarneq pillugu malittarisassaliornerup Danmarkimit tiguneqarnissaata tungaanut angallatit avammut tuniniaasinnaanermut akuersissuteqartut angallatini suliareqqiinissamik akuersissapput nakkutiginnillutillu.

Aalajangersagaq taanna peqassutsimik nungusaataanngitsumik aalisarnissaata siuarsarnissaa siunertaralugu piffissat eqqisisimatsiviit sumiiffiillu matuneqartut pillugit malittarisassiortoqarsinnaavoq. Suliareqqiinermi tarajorterineq, uutiterineq, saliineq, agguineq, qerititerineq, poortuineq, akuutissanik atuineq il.il. ilaapput. Angallammi inuussutissanik suliariinnitoqarpat inuussutissanik tunisassiornermut, inuussutissatigut eqqiluisaarnermut inuussutissallu isumannaatsuunissaannut piumasaqaatit pillugit Uumasut nakorsaanni inuussutissalerinermilu oqartussanit angallat akuerineqassaaq. Tamatuma ilaatigut kingunerisaanik erngup, angallammi suliareqqiinermut atatillugu atorneqartup imissatut pitsaassuseqarnissaa pillugu piumasaqaateqarpoq. Immamat tarajoq imaluunniit imeq tarajornilaartoq atorneqaqqusaanngillat. Aammattaaq angallatini taakkuni nakkutilliinissamut misissuinissamullu Uumasut nakorsaat inuussutissalerinermillu oqartussat periarfissaqassapput, kiisalu inuussutissalerinermi inatsimmi piumasaqaatit allat eqqortinneqarneri kulakkiissallugit.

Kapitali 10

Eqqisisimatsineq, piujuartitsinissaq siunertaralugu teknikkut iliuusissat il.il.

§ 46-mut

Kapitali 3-mi "Inuussutissarsiutigalugu aalisarnerup malittarisassiornera"-mi aalisarnermut killiliussat malittarisassiornerat erseqqissaavagineqartillugu kapitali 10-mi pineqartussat immikkut ittut iluanni isumalluutit illersornissaat siunertaralugu malittarisassianik Naalakkersuisut aalajangersaasinnaapput.

Imm. 1-imut.

Aalajangersakkami nr. 1-6-imi immikkoortut isumalluutit illersorneqarnissaat siunertaralugu Naalakkersuisut malittarisassiorfigisinnaasaanni arlallit allaqqapput. Aalajangersagaq tamakkiisumik eqqartuinngilaq, taamaattumik siunertaq tassaappat aalisakkatigut isumalluutinik illersuineruppat sumiiffinnut allanut malittarisassianik Naalakkersuisut aalajangersaasinnallutik, soorlu aamma malittarisassaliorneq suliniutit arlallit ataqtigiissinnerisigut pisinnaasoq. Siunnersuummi imm. 1, nr. 4-mi "aalisagaqatigiit allat" allanneqarput, tassami aalisakkaniit allaniit allaanerusunik aalisarneq ingerlanneqarmat.

Nr. 1)

Aalajangersagaq malillugu aalisarnerup uumassusilerinikkut illersorneqarsinnaasup siuarsaaffiginissaa siunertaralugu piffisanut eqqisisimatsiffiusussanut sumiiffinnillu matusisarnermut tunngatillugu malittarisassianik aalajangersaasoqarsinnaavoq. Piffissat eqqisisimatsiffiusartut sumiiffinnilu matooraasarnerit pillugit malittarisassaqartitsineq assersuutigalugu aalisagaqatigiit suffisarneranni illersuisarnissaq imaluunniit piffissani aalisagaqatigiit immikkut appasisumik qaffasissumilluunniit naleqartillugit illersuisarnissaq aalajangersaaffigineqarsinnaapput.

Sumiiffinnik aalisarfígeqqusaanngitsunik imaluunniit angallatit teknikikkut aalajangersimasumik piumasaqaatinut ilaasut aalisarfigisinnaanngisaannik imaluunniit killilimmik aalisarfigisinnaasaannik pilersitsisoqassaaq. "Karsit" aqtsinissamik pilersaarutinut ilaassapput, nalunaarutiliornermullu atatillugu pilersinneqassallutik. Ingerlatsinermi inatsisitigut tunngaviit pingaarutillit malitsigisaannik, naligiit naligiimmik pineqarnissaat, naatsorsuutigineqartariaqarpoq angallatit, inatsisip atulersinnissaa sioqqullugu angissusertik taamaakkaluartoq angallatinut mikinerusunut naatsorsuutigineqartunut sumiiffinnut periarfissaqarsimasut, taamatut malittarisassanut ilaasinnaajunnaassapput.

Nr. 2)

Atortut, atortut assigiinngitsut aamma aalisariaatsit pisaqartarnissamut pingaaruteqarput - aamma aalisakkanut saniatigut pisarisatut aalisarsarneqarsinnaasutut akuerineqarsimasunut. Pissutsinut taamaattunut malittarisassaqartitsineq aalisakkap aalisarsinnaanermut akuersisummik tunniussiffiusimasup avissaartinneratigut aalisakkat kissaataanngitsut saniatigut pisarisoornissaat annikillisarneqarsinnaavoq. Taamaaliornikkut uumassusilerinermut aningaasaqarnermullu tunngatillugu piujuartitsinerulluni aalisarneq anguneqarsinnaassaaq.

Angallatit aaqqissuunneri atorneqarnerilu pillugit malittarisassanik aalajangersaaneq assersuutigalugu igitsisarernut atortunut, igitsineq inerteqqutaatillugu, inerteqqusummut tunngavissiisinnaavoq. Aalajangersagaq taanna malillugu assersuutigalugu suleriaatsit erseqqinnerusumik nassuarneqarsimasut malillugit usilersornissamut pilersaarusiortoqarnissaat pillugu piumasaqaateqartoqarsinnaavoq. Aalajangersagaq taamatuttaaq atortunik, atortunik assigiinngitsunik aamma aalisariaatsinik aalajangersimasunik atuisoqarnissaanik inerteqquteqarnermut, tassunga ilanngullugu assersuutigalugu nipi atorlugu ungoorutinik "pingerinik", qassutinik imaani uumasunik pisaqarnissamik annikillisaaqataasunik atuinissamik piumasaqaateqarnermut atorneqarsinnaavoq.

Nr. 3)

Malittarisassat tassaapput aalisarnerup ingerlanneqarneranut malittarisassaqartitsinermut malittarisassanut ataatsimut taaguutaasut.

Aalajangersagaq taanna tunngavigalugu aalisarnermi atortut qanoq nalunaaqutsorsorneqassanersut, kalerrisaarutit qanoq ittut atorneqassanersut, angallatit qanoq iliuuseqassanersut, atortut allat atortuinut ilarussimappata qanoq iliortoqassanersoq imaluunniit angallatit arlallit aalisarfímmi ataatsimi aalisarusuppata killilimmilli inissaqarlutik angallatit qanoq pissuseqassanersut il.il. pillugit malittarisassanik aalajangersaasoqarsinnaavoq.

Nr. 4)

Aalisarnermi uumassuseqarnikkut piujuartitsinermik tunngaveqartumik ineriartornerup qulakkeerneqarnissaa siunertaralugu aalisakkat uumassusillillu allat angissusiisa

minnerpaaffissaat aalisakkallu allat pillugit malittarisassanik aalajangersaasoqarsinnaavoq. Kalaallit Nunaanni aalisarnermik aqtsinermut aallaaviusoq tassaavoq aalisagaqtigiinni ataasiakkaani aalisarnerit ataasiakkaat, sulinermullu peqquteqartumik "allat" aamma aalajangersakkamut ilanngunneqarput. Malittarisassani taakkunani ilaatigut qulakkeerneqassaaq taakkunanna aalisarnerup aallartinnginnerani aalisakkat taakku aalisagaqtigiilluunniit suffinissamut pisoqaassusissartik angissusissartillu angusimassagaat. Malittarisassani taakkunani aningaasarsiornermi pilerinartunngortinnagit tamakkerlugit aalisarneqarnissaasa pinngitsoortinnissaa qulakkeerneqassaaq.

Aalajangersagaq taanna malillugu aalisagaqtigiinnik ataatsinik imaluunniit aalisagaqtigiinnik allanik aalisarnermi aalisakkat mikivallaartut qassit pisarineqarsinnaanerinut malittarisassanik aamma aalajangersaasoqarsinnaavoq.

Nr. 5)

Aalisakkat pisarineqartut qanoq angitiginerinut aamma aalisakkat suut pisarineqarnerinut nigartat angissusii pingaaruteqarluinnarput. Taamaattumik naatsorsuutigineqarpoq aalajangersakkamik taassuminnga tunngaveqartumik malittarisassanik aalajangersaaneq aalisarnerup ineriartorneranut annertuumik pingaaruteqassasoq.

Nigartat qanoq uutornissaannut nunat tamat akornanni malittarisassaqarpoq, aalajangersakkamilu malinneqartussat tamakku atorneqassasut piumasarineqarpoq.

Nr. 6)

Saniatigut pisarisuukkat pisassiissutitallit ingerlatallillu aalisassallugit akuersisummit peqarfiginngisai aalisagaqtigiinnut saniatigut pisarisoorfigineqartunut anginermik akileraaruserneqarnerannik kinguneqariaannaapput. Taamaammat aalisagaqtigiit tamakku illersorsinnaaniarlugit saniatigut pisarisuukkat annertussusaat pillugit malittarisassanik aalajangersaasoqarsinnaavoq.

Taamaammat inuussutissarsiutigalugu aalisarnerup aalisagaqtigiinnut aalisartut ataasiakkaat aalisassallugit akuersisummit peqarfigisaannut ingerlannissaata qulakkeernissaa aalajangersakkami siunertarineqarpoq.

Imm. 2-mut.

Aalajangersagaq manna sumiiffinnut imm. 1, nr. 1-3-mi taaneqartunut kommunit malittarisassanik atortussanngortitsisarnissaasa piginnaatitsissutaanissaanut Naalakkersuisut tunngavissaqalerput. Piginnaatitsissut amerlanertigut nalunaarutinngortoq aqququtigalugu pisinnaasarloq, kisiannili aamma allakkatigut piginnaatitsissut alla pineqarsinnaalluni. Aalajangersagaq piffissani killeqartuni aalisagaqtigiinnik assigiinngitsunik aalisartarnissamut kommunit ileqqoreqquaasa atortussanngortittarnissaannut atorneqartarpooq.

Aalajangersagaq kommunip killeqarfia iluani malittarisassat suut illersuisoqarnissaanut tunngassutilit ingerlattariaqarnerannut nalilersuinissamut kommunit amerlanertigut periarfissagissaartarnerannik tunngavilersugaavoq. Ileqqoreqqusaq Naalakkersuisunit akuerineqassaaq.

Kapitali 11

Aalisarnermi uumassusilinnik misissuinerit misileraallunilu inuussutissarsiuqgalugu aalisarnerit.

A. Aalisarnermi uumassusilinnik misissuinerit ilinniagaqarnermullu atatillugu aalisarnerit

§ 47-mut

Imm. 1-imut.

Kalaallit angallataataannut tunngatillugu aalisarnermi uumassusilinnik misissuinerni Naalakkersuisut akuerseqqaarsimanissaat aalajangersakkami aalajangersarneqarpoq. Aalajangersagarli Pinngortitaleriffik aalisarnerup uumassusilerinikkut misissuiffiginissaanik kissaateqarsimappat atorneqassanngilaq, takuuk aalajangersakkami imm. 3.

Ingerlatallit nunanit allaneersut Kalaallit Nunaanni aalisarnermi uumassusilinnik misissuinissamik kissaateqartut danskit oqartussaasuinit attuumassutilinnit (maanna Nunanut Allanut Ministereqarfik) akuersisummik peqassapput. Nunanut Allanut Ministereqarfik). Akuersisummik tunniussisoqartinnagu Naalakkersuisut tusarniarneqassapput.

Imm. 2-mut.

Aalisarnerup aalisarnermut immikkoortumut nukittorsaanissa, taamaalillunilu inuiaqatigiinnut iluaquatalernissa, amerlanertigut tunngavigneqarpoq. Aalisagaqatigiinnut aalisakkamulluunniit immikkut ittunut aalisarnerup uumassusilerinikkut misissuiffiginissa ilumut piviusorsiortuunersoq aamma aalisarnerup allatut uumassusilerinikkut misissuiffigeqqinnissa ilumut pisariaqartinneqarnersoq naliliiffiginiarlugit Naalakkersuisut Pinngortitaleriffimmuit oqaaseqaammik piniartussaapput. Oqaaseqaatigineqartoq naliliinermut tamarmut ilanngunneqassaaq.

Imm. 3-mut

Naalakkersuisut akuersissuteqartinngikkaluarlugit Naalakkersuisullu ilanngutinngikkaluarlugit Pinngortitaleriffiup aalisarnermi uumassusilerinikkut misissuinernik nammineerluni aallartitsisinnaanera ingerlatsisinnaaneralu aalajangersagaq manna aqqtigalugu aalajangersarneqarpoq.

Imm. 4-mut

Aalisarneq ilinniartitsinissaq siunertalarugu ingerlanneqartoq Naalakkersuisut akuersissuteqarnerisigut ingerlanneqarsinnaavoq. Aalajangersakkatigut aamma aalajangersarneqarpoq aalisarnerit ilinniartitsinissamik siunertallit naak aalisarnermut

killilersuinissanut aalajangersaasoqarsimagaluartoq pisinnaassasut. Tamannalu isumaqarpoq Naalakkersuisut akuersisummi piumasaqaatinik aalisarnermi nalinginnaasumik atuutsinneqartartunit sakkukinnerusunik nalunaaruteqarsinnaassasut. Pisat, aalajangersagaq taanna naapertorlugu akuersissuteqarnikkut aalisarneqarsimasut, aallaaviatigut tunineqarsinnaanngillat, kisianni akuersissut tassunga periarfissaqarnermik imaqarsinnaavoq, pisat qaquinneqartut annertussusaat pisuussutinut niuerfimmulluunniit sunniuteqannginnera naatsorsuutigalugu.

Aalisarnermik inuussutissarsiuteqarnerup iluani inunniq ilinniartitsinermut atugassamik angallammik 312 BRT-imik taamanikkut Namminersornerullutik Oqartussani Ilinniartitaanermut Pisortaqrifiup pisismimaneranut atatillugu 1988-imi aalajangersagaq ilanngunneqarpoq.

Taamaalilluni siunissami suliniutit assigut aalajangersakkap taassuma iluaniissinnaallutik.

Aalisarnerup “ilinniartitaanermik siunertaqarnermut” ilaanissaanut

pissutsit makku pingaartinneqassapput:

- a) ilinniartitaanerup pisortaniit akuerineqarsimanissa, aamma
- b) peqataaneq inuussutissarsiutitigullu aalajangersimasutigut piginnaatitsisumik ilinniartitaaneq naammassisqaqarnermik kinguneqarpat,
kingorna Kalaallit Nunaanni suliffeqarfinni toqqaannartumik
atorneqarsinnaasumik.

Ilinniartitaaneq siunertalarugu aalisarnermiit pisat aningasarsiornikkut kaaviiartitanut ilaatinneqarnissaat siunertaanngilaq.

Aalajangersakkap taassuma atorneqarnerani pisat qaquinneqartut TAC-mit / pisassiissutinit ilanngaatigineqassanersut Naalakkersuisut aalajangersimasumik isummerfigissavaat.

Imm. 5-imut

Aalisarnermi uumassusilerinikkut misissuinerit aallaavimmikkut aalisarnerup ingerlannissaanut malittarisassanut ilaanngillat. Aalajangersakkatigulli aalisarnermi uumassusilerinikkut misissuininisanut akuersissutit aamma aalisarnernut ilinniartitsinernik siunertalinnut akuersissutit Naalakkersuisunut nalunaarutigineqarsimasut piumasaqaatinut arlalinnut erseqqinnerusumik aalajangersaaffigineqarsinnaasut aalajangersarneqarpoq. Matumani assersuutigalugu sumiiffimmi erseqqinnerusumik nassuarneqartumi misissuinerit, misissuinerit atortunik immikkut ittunik atortoqarluni imaluunniit tekniki immikkut ittoq atorlugu misissuinerit pineqarput.

Imm. 6-imut

Naalakkersuisut aalisarnermi uumassusilerinikkut misissuinissat aamma aalisarneq ilinniarnissamik siunertalik pillugit sulianik suliaqartarput, aqutsisoqarfillu taannaavoq tassunga atatillugu akuersissutinik tunniussisartussaq.

Naalakkersuisut suliassaqarfimmut aalajangersakkanik aalajangersaanermikkut suliat suliariisaannut tunngavissanik pilersitsisinnaapput, akuersissutilu tunniunnissaannut piumasaqaatinik nalinginnaasunik atortitsisinnaallutik. Tassunga atatillugu nalunaarusiortarnissaq pingaartinneqartussaavoq.

B. Inuussutissarsiutigalugu misileraalluni aalisarneq

§ 48-mut

Inuussutissarsiutigalugu misileraalluni aalisarnermi ilisimasanik nutaanik aalisarnermi naleqarnerulersitsinissamut iluaqutaasinnaasunik pissarsiniartarnissaq imaluunniit nerisaqaqtiginnerup kissaataanngitsumik annikillisitsilluni sunnerneqannginnissaa siunertaavoq. Inuussutissarsiutigalugu misileraalluni aalisarnerup aalisarnermut immikkoortup ineriartortitsiffiunissaanut, taamaalillunilu inuiaqatigiit ineriartornissaannut iluaqutanissaa aallaaviuvoq. Tassani assersuutaasinnaapput aalisagaqtigiiinnut ilisimasanik nutaanik pissarsiniarnerit, teknikikkut atortut nutaat atorneqarnerat imaluunniit aalisarfiit nutaat misissuiffigineri.

Inuussutissarsiutigalugu misileraalluni aalisarneq aalisariutaatileqatigiinnut ataasiakkaanut aningaasartornarlunilu navianartortaqarsinnaavoq, angusarineqartussallu annertuumik nalornissutigineqarsinnaassallutik. Inuussutissarsiutigalugu misileraalluni aalisarnissamut kajumissuseqalernissaq siuarsaaffiginiarlugu Kalaallit Nunaanni aalisarnermi pisarineqartut pisuussutinik atuinermut akitsuutaat pillugit Inatsisartut inatsisaat nr. 46, 23. november 2017-imeersoq kingusinnerusukkullu allangortinneqartoq naapertorlugu aalisariutaatileqatigiit akitsuutinut akiliuteqannginnissaat pilersinneqarsimavoq aamma Aalisarnermut aningaasaliissutinut immikkoortitat pillugit Inatsisartut inatsisaat nr. 15, 20. november 2006-imeersoq naapertorlugu aalisariutaatileqatigiit tapiissutinik tunineqarsinnaanerat periarfissinneqarluni.

Imm. 1-imut.

Inuussutissarsiutigalugu misileraalluni aalisartoqassappat misileraalluni aalisarnissamut Naalakkersuisunit akuersissummik nalunaaruteqartoqarsimanissaa piumasarineqarpoq.

Imm. 2-mut.

Aalajangersagaq inuussutissarsiutigalugu misileraalluni aalisarnissaq pillugu qinnuteqaammut piumasaqaatinik imaqrarpoq, takuuk nr. 1) - 4).

Misileraalluni aalisarneq avataasiortunit kiisalu sinerissami qanittumi ingerlataqartunit ingerlanneqassaaq, aamma ingerlataqartut ataasiakkaat piumasaqaatinik naammassinninnissamut periarfissaanni annertuumik assigiinngitsoqarluni. Tamanna tunuliaqutaralugu pissusissamisuussaaq inunnut ataasiakkaanut killeqartumik isumalluuteqartunut naleqqiullutik avataasiorluni angallateqartunut umiarsuaatileqatigiinnut annertunerusumik piumasaqaateqartoqarpas. Kingullertut taaneqartumut naleqqiullugu assersuutigalugu ajornanngitsumik immersorneqarsinnaasunik aamma qinnuteqarnermik oqilisaassisumik najoqqtassaliortoqarpas.

Nr. 1)-imut

Misileraalluni aalisarnermi siunertaq aalajangersakkami imm. 1-imik naammassinnissimassasoq, qinnuteqaatillu taamatut pisoqarneranut nassuaammik imaqassasut, piumasarineqarpoq.

Nr. 2)-mut

Misileraalluni aalisarneq naatsorsuutigisatut isumalluutitsinnut ilisimasanik tapeeqataasinnaassappat tamanna ilisimasalinnit suliarisariaqarpoq, paassisutissallu atorsinnaalersinniarlugit paassisutissat pitsaalluinartut tunniullugit. Taamaammat qanoq aalisarnerup ingerlanniarneqarneranut qinnuteqaatit arlaatigut uppernarsaaffigalugit nassuaaffigineqassapput. "Naatsorsuutigisatut angusassat"-ni paasineqassaaq misileraalluni aalisarnermi suliniuteqarnerup pitsaassusa nalunaarusiortarnerillu il.il. naatsorsuutigisanut naapertuuttarnissaat.

Nr. 3)-mut

Nassuaatini siulianiittuni soorlu atuarneqarsinnaasoq nalunaarusiortarneq misileraalluni aalisarnernut suliniutit ilaannut pingaaruteqarluni ilaasuuvvoq, tassungalu suliniutit siunissami aalisarnissap piareersaaffiginerani atorneqartussaanerat pissutaavoq. Taamaammat qinnuteqaatini angusarineqartut tamanut saqqummiuttarnerisa qanoq nalunaarusiortfigisarnissaat arlaatigut uppernartumik nassuaaffigisariaqarpoq.

Nr. 4)-mut

Pisut ilaanni Naalakkersuisunit tapiissutisinissamut periarfissaqassaaq tamannalu pillugu qinnuteqaat misileraalluni aalisarneq pillugu qinnuteqaammik imaqassalluni.

§ 49-mut

Imm. 1)-imut.

Naalakkersuisut misileraalluni aalisarnissanut ataasiakkaanut piumasaqaatinik erseqqinnerusunik aalajangersaassasut aalajangersakkatigut taaneqarpoq. Tamatuma kingunerissavaa misileraalluni aalisarneq nalinginnaasumik aalisarnissamik periarfissiissappat aalisarnissamut, nalunaarusiortnissamut kiisalu kikkut aalisarsinnaanerannut Naalakkersuisut malittarisassanik aalajangersaasinnaanissaat. Aalajangersagaq aqqutigalugu

Naalakkersuisut assersuutigalugu amerlassutsinut killiliinerit, immikkuullarissuunerit, ingerlaavartumik nalunaarusiortarnerit pillugit malittarisassanik aalajangersaasinnaapput.

§ 50-imut

Imm. 1-imut.

Aalisartut § 48, imm. 2 naapertorlugu inuussutissarsiutigalugu misileraalluni aalisarnissamut akuersisummik angusaqarsimasut akuersisummi tunniunneqartumi piumasarineqartut aalajangersarneqartut naapertorlugit aalisarnermik ingerlatsinissamik pisussaaffeqarnerat aalajangersagaq manna aqqutigalugu aalajangersarneqarpoq. Aalajangersagaq eqqunneqarpoq misileraalluni aalisarnermi angusarineqartut nalunaarsortarnissaat, pisariaqarpallu aalisarnermut iluaquatasussamik tamanut saqqummiuttarnissaat qularnaarniarlugu.

Imm. 2-mut.

Qinnuteqaatigineqartut saniatigut misileraalluni aalisarnermi malunnartumik allannguinerit Naalakkersuisunit akuerineqarnissaat piumasaqaataammat aalajangersakkatigut aalajangersarneqarpoq, takuuk § 48, imm. 2, nr. 1-4

Imm. 3-mut

Akuersisummi piumasaqaatinik amigartumik eqqortitsinerit inuussutissarsiutigalugu misileraalluni aalisarnissamut akuersissutit arsaarinnissutaanerannik kinguneqarsinnaammat aalajangersakkatigut erseqqissarneqarpoq. Tassungalu atatillugu pissutsinut naapertuutumik periaaseqarnissaq isiginiarneqassaaq, tamatumalu kingunerissavaa unioqqutitsinerit annikitsut akuersisummik arsaarinninnermik aallaaviatigut kinguneqartassanngimmata, matumani aalisartoq annikitsumik akerliusumik iliuuseqarsimassappat. Akerlianilli piumasaqaatinik sakkortuumik, utertuartunik piaaralunilu unioqqutitsisoqarsimappat Naalakkersuisut akuersisummik arsaarinninnissamik periarfissaqarput.

Kapitali 12

Paasissutissat

Aalisarnermiit paasissutissat pissarsiarineqarnissaannut tunngavimmik siunnersut qulakkeerinnippoq. Aalajangiinernut pilersunut tunngavigineqartup qaffasinnerpaamiinnissa sapinngisamik pitsaanerpaamik aqutsisoqarnissaanut piumasarineqarpoq. Tamannalu assigalugu aalisarneq pillugu paasissutissat eqqortuunissaat pitsaasumik tatigineqarsinnaasumillu nakkutilliisarnissamut aamma ilisimatusarnermut atorneqarsinnaasumut piumasarineqarput. Tamanna tunuliaqtalaralugu paasissutissanik katersineq aalisarnerup siunissaanik qulakkeerinninnissamut inuiaqatigiillu sapinngisamik taassuminnga annertunerpaamik iluaquusernissaanut naleqqiullugu pingaaruteqarluinnarlutik.

Kalaallit Nunaanni aalisakkatigut isumalluutit inuiaqatigiinnit kalaallinit pigineqarneri, inuiaqatigiit matumanit eqqartorneqartunik paasissutissanut inatsisit naapertorlugit piumasaqarsinnaaneri pillugit tunngavimmut tamanna naapertuulluinnarpoq.

Aammattaaq paasissutissat ingerlatsivimmit taamaallaat atorneqannginnissaat, kisianni sapinngisamik tamanit aamma pissarsiarineqarsinnaaneri ingerlatsinermi paasuminartuuneq pillugu tunngavik kissaateqarnerlu malillugu. Siunnersuut taanna aqqutigalugu paasuminartuuneq pillugu piumasaqaat taamaattumik eqqunneqarpoq. Paasissutissanut naleqquttunut kikkut tamarmik periarfissaqarnerat qulakkeerniarlugu tamanna pillugu ajornanngitsumik takussutissiamik Naalakkersuisut piareersaassapput, tassa takussutissiamut paasissutissat isertuussassat ilaassanngimmata, tassunga ilanngullugit immikkut paasissutissat unammilleqatigiinneq pissutigalugu illersugaasariaqartut.

Tassungalu atatillugu inatsimmik aqtsinermut pisariaqartunik paasissutissanik tunniusseqqisinissamut aqtsisoqarfik tunngavissaqarnerulissaq.

A. Paasissutissanik katersineq suliaqarnerlu

§ 51-imut

Imm. 1-imut.

Manna aalajangersagaq aqqutigalugu Naalakkersuisut (Aalisarnermut Piniarnermullu Naalakkersuisoqarfik aqqutigalugu) Kalaallit Nunaanni aalisarneq pillugu paasissutissanik tamanik inatsisip aqunneqarnissaanut naleqquttunik pissarsisinnaapput. Tamanna inatsimmi anguniakkat naapertorlugit aalisarnermut suliassaqarfiup illorsorneqarsinnaasumik aqunneqarnissaanut paasissutissanik naammattunik peqarnissaq qulakkeerniarlugu pissaaq. Kalaallit Nunaanni aalisarnermut attuumassuteqartunik paasissutissanik katersinermut, suliarinninnermut ingerlatitseqqinermullu Naalakkersuisut akisussaanerat aalajangersakkami aalajangersarneqarpoq. Aalajangersakkami matumanit qulakkeerniarneqartoq tassaavoq inatsimmik matuminnga aqtsineq pillugu paasissutissanut tunngaviusunik naammaginartunik pilersitsisumik kinguneqarluartumik paasissutissanik katersisarnerup pilersinneqarnerata qulakkeerneqarnera tassunga ilanngullugu kisitsisitigut paasissutissat misissueqqissaarnermullu siunertat, kiisalu ineriartortitsineq aamma inatsisissatut siunnersuutit nalunaarutilu allanngortinnejnarneri. Paasissutissanut tunngaviusut aamma kalaallit aalisarneranni pisuussutinit iluanaarutinut akitsuutit atuuttut siunissamiittullu nalilersornissaannut, ilaatigut nakkutilliinermi ilisimatusarnermilu atugassatut, ilaatigut aalisarnermik inuussutissarsiuteqarneq tamakkerlugu pillugu, ilaatigut inuussutissarsiortut nioqquissiornerisa pilersaarusiornissaanut atugassatut ilaatigullu nakkutilliinissamut atugassatut atorneqassapput. Ilanngullugu siunertarineqarpoq paasissutissanik tamanik aalisarnermik aqtsinermut attuumassuteqartumik misissueqqissaarnissamut pisariaqartunik katersinissamut Naalakkersuisut tunngavissaqarnissaat. Tassani inatsisitigut suliaqarnermik,

nalitusaavinnik misissueqqissaarnernik, kisitsisitigut paasissutissanik kiisalu nakkutilliinissaq siunertaralugu paasissutissanik misissueqqissaarnerit ilaatinneqarput.

Imm. 2-mut.

Aalajangersakkami tassani inatsimmut ilaasunik paasissutissanik katersinermut suliariinninnermullu kiap isumaginnittuunissaata qaqugukkulluunniit uppernarsarneqarsinnaanera qulakkeerneqarpoq, ilaatigut marloqiusamik nalunaarusiortarnerup pinngitsoortinnissaa siunertaralugu.

Imm. 3-mut

Aalajangersagaq tassaavoq inatsimmi 1996-imeersumi § 25-mi tunngavinnik ingerlatitseqqinnej, taakkualu annikitsumik iluarsineqarput. Inuuussutissarsiutigalugu aalisarnermut soqutigisaqartunut paasissutissanik aalisarnermik aqtsinermi pisariaqartunik tunniusseqqusinissamut aalajangersagaq manna aqqtigalugu Naalakkersuisut tunngavissaqalerput, tassunga ilanngullugit nakkutilliinermut, misissueqqissaarnermut ilisimatusarnermullu siunertat. Maani aalajangersakkami siunertarineqarpoq, Naalakkersuisut Kalaallit Nunaanni inunnut suliffeqarfinnullu aalisarnermi suliffeqarfimmik ingerlataqartunut, akuersisummik pigisaqartunut, angallatinik Kalaallit Nunaanneersunik nunanit allaneersunillu piginnittunut atuisunullu, tunisasiorfinnut allanullu paasissutissanik aalisarnermik aqtsinermi pisariaqartunik piumasaqarsinnaanissaat. Aalisarnermi peqataasut tamaasa eqqarsaatigalugit paasissutissanik katersinissamut erseqqisumik inatsisitigut tunngaveqarnissaq qulakkeerniarlugu aalajangersagaq ilanngunneqarpoq.

Aalajangersagattaaq malillugu paasissutissat katersorneqartut inatsimmik akisussaassuseqartumik naammattumillu aqtsinermik ingerlatsiviup isumaginnissinnaaneranut pisariaqassapput. Taaguummik "pisariaqartuuneranik" naliliinermi naleqqiussuinermik tunngavik atorneqarpoq, tassa imaappoq paasissutissat pineqartut ketersornerisa pisariaqartuunerat taakkulu atorneqarnerinut atasunut aningaasartuutinut naapertuunissaat qulakkeerneqassasoq.

Paasissutissat assersuutigalugu tassaasinnaapput kisitsisitigut paasissutissanik, nakkutilliinermut aamma ingerlatitseqqinnermi suliassanik isumaginninnermut pisariaqartut imaluunniit ilisimatuussutsikkut siunnersuusiornermut imaluunniit inatsimmik aqtsinermi atugassanik misissueqqissaarnernut.

Malugineqassaaq paasissutissat Naatsorsueqqissaartarfimmit toqqortarineqartut aalisarnermik nakkutilliineq siunertaralugu atorneqarsinnaanngimmata.

Aalajangersagaq paasissutissanik eqqarsaatigineqarsinnaasunik tamanik katersinissamut annertuumik periarfissiinngilaq, kisianni taakku pisariaqarpata paasissutissanik pissarsiniarnissamut Naalakkersuisunut erseqqisumik tunngavissiilluni. Tassunga tunngatillugu oqaatigineqassaaq assersuutigalugu pisassiissutit aalajangersarnissaannut

atugassanik ilisimatuussutsikkut misissuinerit aalisarnermik akisussaassuseqartumik aqtsinermut pisariaqarluinnarmata. Naatsorsuutigineqarpoq tassaanerussasoq Pinngortitaleriffimmi ilisimatusarnermik ingerlatat aalajangersakkamut tassunga ilaatinneqassasut imaluunniit siunertap taamaaqataanut suliffeqarfii allat.

Suliffeqarfinni oqartussanilu pisariaqanngitsumik isumalluutinik atuineq annikillisarniarlugu inatsit naapertorlugu nalunaaruteqartarnerit ingerlaannartumik pisarnissaat sapinngisamik qulakkeerniarneqassaaq. Tamanna assersuutigalugu tassaasinnaavoq internet aqqutigalugu immersuiffissat digitaliusut iluaqtigalugit paasissutissanik tunniussineq, qarasaasiami toqqorsivimmut toqqaannartumik paasissutissat toqqorneqarlutik taannalu aqqutigalugu allaffissornikkut pisariillisaasoqarluni.

Sammisamut aalajangersimasumut naleqqiullugu aalajangersakkami ilaatigut eqqaaneqarpoq suliffeqarnikkut aningaasaqarnikkullu pissutsit, tassungalu atatillugu oqaatigineqarluni assersuutigalugu akissarsiat, bonusimik aaqqissuussisinnaanerit ilanngullugit pillugit paasissutissat, kiisalu avammut niuerneq pillugu paasissutissat annertuumik pingaaruteqarumaartut.

Imm. 4-mut

Sapinngisamik paasissutissanik katersinermut pilersuinerellu erseqqissunik tunngavinnik periutsinillu piareersaasoqartariaqarpoq, soorlu aamma suleriaatsit sapinngisamik annertunerpaamik ingerlaannartumik pisinnaanissaat qulakkeerneqassasoq. Aalajangersakkap taassuma atorneqarnerani qulakkeerneqartariaqarpoq ilaatigut pissusissamisoortumik tusarniaanikkut paasissutissanik pilersuisut pillugit aningaasartuutinik Naalakkersuisut naliliissasut, aamma paasissutissanik pilersuineq pillugu piumasaqaatinut nutaanut naleqqiullugu naleqqiussinermik oqimaaqatigiissitsineq qulakkeerneqarluni.

Imm. 5-imut

Aalajangersakkami aalajangersarneqarpoq katersinermut, suliariinninnermut oqartussanullu allanut ingerlatitseqqinnermut tamakkiisumik ilaannakuusumilluunniit Naalakkersuisut piginnaatitsisinaasut, takuuk imm. 1. Aalajangersagaq taanna atorlugu imm. 1 malillugu suliassap oqartussanut suliffeqarfinnulluunniit namminersortnun allanut suliassanngortinnissaanut Naalakkersuisut piginnaatinneqarput. Taanna assersuutigalugu tassaasinnaavoq nakkutilliinermi oqartussat attuumassuteqartut, kommunit suliffeqarfiilluunniit namminersortut.

Maluginiarneqassaaq inuit pisortanut suliassanik suliariinnittut sulinermut atatillugu nipangiussisussaatitaammata, takuuk pinerluttulerineq pillugu Kalaallit Nunaannut inatsimmi § 51.

Imm. 6-imut

Aalajangersakkami ilisimatuussutsikkut atugassanik paasissutissanik katersinissaq siunertaralugu ilisimatuussutsikkut alaatsinaattunik ilaasoqarnissamut angallatit pisussaaffeqarnerat pillugu malittarisassanik aalajangersaanissamut Naalakkersuisut pisinnaatinneqarput. Aalajangersakkami ilisimatuussutsikkut alaatsinaattut suliassanik sunik suliaqarsinnaanerinik Naalakkersuisut killilersuinissamut periarfissinneqanngillat. Taamaallaat angallammi naalakkap ilaatsinissamut pisussaaffianut tunngavissat aamma angallammiinneranni ilisimatuussutsikkut alaatsinaattumut atukkat pillugit piumasaqaatit erseqqinnerusut, tassunga ilanngullugit nerisaqarneq unnuiffissarlu pillugit malittarisassat.

B. Paasissutissanik pissarsisinnaaneq ingerlatitseqqittarnerlu

§ 52-imut

Aalisarnermi aqtsinermilu ammasumik pissuseqarnissaq siuarsarniarlugu aalajangersakkami tassani siunertaavoq aalisarneq aamma aalisariutit pisaasa katitigaanerat pillugit paasissutissanik attuumassuteqartunik imaqartumik tamakkiisumik takussutissiamik Naalakkersuisut suliaqarlutillu tamanut saqqummiussisassasut. Tassunga ilaapput paasissutissat uumassuseqarnermut, aningaasaqarnermut, teknikimut avatangiisitigullu pissutsinut tunngasut kiisalu aalisarnermiq ingerlataqarfimmi ingerlataqartunik suliffeqarfinnik aamma aalisakkanit nioqqtissaliornermi kiisalu inuussutissarsiummi sulisuni pissutsinik aningaasaqarnikkut tamakkiisumik takussutissiisussat.

Aalajangersagaq ilanngunneqarpoq ammasuunissaq pisariaqartoq qulakkeerniarlugu, aamma kalaallit inuiaqatigiinni innuttaasut tamarmik paasissutissanik Kalaallit Nunaanni aalisarnermut tunngasunik pissarsisinnaanissaat qulakkeerniarlugu.

Imm. 1-imut.

Aalajangersagaq aqqutigalugu Naalakkersuisut paasissutissanik imm. 1 naapertorlugu katersorneqarsimasunik suliffeqarfinnut ilisimatusarnikkut aqtsinikkulluunniit paasissutissanik misissueqqissaarnissamut soqutigisaqartunut tunniussisussanngortinneqarput.

Imm. 2-mut.

Imm. 1-imi paasissutissat katersorneqartut suliffeqarfinnut attuumassutilinnut tunniunneqarsinnaanerat aalajangersaaffigineqartoq, takuuk siuliani taaneqartut, imm. 2 aqqutigalugu aqtsisoqarfik aalisarnermi takunninnissamut tamat periarfissaqarnissaat pillugu peqquneqarpoq, aamma nr. 1-imiit 8-mut paasissutissat sorliit minnerpaamik tamanit pissarsiarineqarsinnaanerat takutinneqarlutik.

Nr. 1)

Takussutissiaq aalisarsinnaanermut akuersissutinik piginnittut amerlassusaannut, tassungalu inuussutissarsiuitit atasut piginnittuunikkut ilusaata misissorneqarnerannik aammalu pisassiissutinit pigisaariaannaasunut takussutissiamut naatsorsuinernik imaqassaaq.

Nr. 2)

Aalajangersagaq malillugu tamakkiisumik takussutissiaq ukiunut ataasiakkaanut aalisakkanullu TAC pisassiissutillu pillugit paasissutissanik imaqassaaq. TAC-ip pisassiisutillu pillugit paasissutissat saniatigut ilisimatuussutsikkut siunnersuisarneq aalisarnerillu akornanni, assersuutigalugu sinerissap qanittuani avataanilu aalisarnerni, pisassiissutit agguataarneqarnerat pillugit paasissutissanik takussutissiaq imaqassaaq.

Nr. 3)

Aalajangersagaq manna naapertorlugu, pisassiissutit amerlassusiannik agguaanerit akuersissutinillu pigisaqartunut aalisakkanut ataasiakkaanut agguarlugit pisassiissutit pillugit paasissutissat tamakkiisumik takussutissiap imarissavai. Matumanilaapput pisassiissutit annertussusaat aamma pisissiissutinit pigisat suliffeqarfittinunnit ataasiakkaanit pigineqartut aqqtigalugit inunnut ataasiakkaanut agguaanneqarsinnaasut.

Nr. 4)

Aalajangersagaq taanna malillugu takussutissiaq aalisariutit pillugit paasissutissanik imaqassaaq, tassunga ilanngullugit teknikikkut pissutsit, piginnaasaq atorneqarnerilu, tunisat amerlassusiat tunisallu nalingi. Angallatip pisaqarsinnaassusaanut soorlu angallatip usisinnaassusaa, uuttuutai aamma maskiinaata sakkortussusia, pillugit paasissutissat apeqqutaaqataapput. Aalajangersagaq ilanngunneqarpoq angallatit ataasiakkaat pisaaq tamakkiisumik malinnaavigisinnajumallugit ammalluinnartumillu ingerlatsisoqarnissaa qulakkeerniarlugu. Angallatinut meterinik arfinilinnik naannerusunut atatillugu paasissutissanut piumasaqarsinnaaneq killeqartinneqarsinnaasariaqarpoq.

Nr. 5)

Aalajangersakkami tassani siunertaq tassaavoq tunisat amerlassusaannut paasissutissat aamma tunisat nalingi suliffissuarnut tunngassutillit tamanit pissarsiarineqarsinnaanissaat. Aalisarnermi suliffissuaqarneq inuiaqtigatigiinnut aalajangiisuulluni pingaaruteqarpoq, sulisinnaasullu ilarpassuinik suliffissaqartitsilluni. Taamaammat soqtigisaqartut tamarmik tulaassinermut kisitsisinut ajornaatsumik tamakkiisumillu takunnissinnaanissaat pingaaruteqarpoq.

Nr. 6)

Takussutissiaq pisassiissutinik niuerneq pillugu paasissutissanik imaqassaaq. Tamanna pisassiissutit annertussusiisa amerlassusaat, illuatungeriit kikkut niueqatigatigiissimanerat, niueqatigatigiissutit annertussusaat aamma pisassiissutinik niueqatigatigiissutit nalingat pillugit paasissutissanik Naalakkersuisut tamanut saqqummiisinnaanerannik kinguneqassaaq.

Nr. 7)

Ammalluinnartumik ingerlatsinissaq qulakkeerniarlugu matumani aalajangersakkami Naalakkersuisut pisassiissutinit pisat ukiunut pisassiiffiusunut aalisakkanullu agguakkat pillugit ilisimatitsinissamut pisussaaffilerneqarput.

Imm. 3-mut

Aalajangersakkami uani Naalakkersuisut tamakkiisumik takussutissiamik nutarterisarnissaat siunertaavoq, takuuk imm. 2.

§ 53-imut

§ 51, imm. 1 malillugu paasissutissat katersorneqartut tunngavigalugit aalisarneq, tassanilu aqutsisoqarnera pillugit Inatsisartut upernaakkut ataatsimiinneranni Naalakkersuisut saqqummiussisassasut aalajangersakkami aalajangersarneqarpoq. Tassani pineqarpoq ukiumoortumik nalunaarut ilaatigut kalaallit nunaanni aalisarnermi ineriarternermik allaaserinnillunilu misissueqqissaartoq. Nalunaarut tassunga ilanngullugu aqtsinermi pilersaarutit atuuttut pillugit takussutissiamik imaqassaaq Kalaallit Nunaanni aalisarnermut inatsisitigut malittarisassat atuuttut aamma allaassutaasinnaasut pillugit nassuaat ilanngullugu.

Siunertaavoq aalajangersagaq Kalaallit Nunaanni aalisarneq pillugu paasissutissat annertusinerinut iluaqutaassasoq, aamma kalaallit nunaanni aalisakkatigut isumalluutit inuiaqtigiiinnit kalaallinit pigineqarneri pillugit tunngavimmik tunngaveqarluni. Nalunaarut annertuumik siunnerfeqarpoq aamma Kalaallit Nunaanni aalisarneq pillugu pitsaassuseqartumik oqallinnerup tunngaveqarnissaata qulakkeerneqarnissaa siunertaralugu. Taamaattumik pingarpoq nalunaarutip kalaallit nunaanni aalisarnermi ajornartorsiutaasunik ineriarternissamullu periarfissat immikkut suliarippagit. Nassuaammit aamma piginnaatitsinermi aalajangersakkat suut atorneqarsimanersut takuneqarsinnaassaaq kiisalu allaassutaasinnaasut aamma aqtsinermi pilersaarutit nutarterneqarsimasut pillugit nassuaateqarluni. Siunertaavoq aalajangersakkap aalisarnermi taassuminnga aqtsinerup paasiuminartuunissaanik iluaqutaanissaa.

Ukiumoortumik nalunaarutip TAC pillugu nassuaat siusinnerusukkut atuuttoq taarserlugulu annertusissavaa. Paasiuminartuuneq annertusiniarlugu aamma naalakkersuinikkut ingerlataqartut akuliuttannginnissaannik tunngaviup eqqortinneqarnissaa qulakkeerniarlugu aalajangersagaq eqqunneqarpoq.

Kapitali 13 *Aalisarneq pillugu Siunnersuisoqatigiit*

§ 54-imut

Imm. 1-imut.

Siunnersuisoqatigiit katitigaanerat pillugu piumasaqaatit naapertorlugit Aalisarneq pillugu Siunnersuisoqatigiinnik Naalakkersuisut pilersitsippu, tak. imm. 4. Aalisarneq pillugu Siunnersuisoqatigiit suliassaat tassaassaaq imm. 2-mi allattorneqartunut tunngatillugu Naalakkersuisut oqaaseqaateqarnissaq. Imm. 2-mi taaneqartunut tunngasunik nalinginnaasumik iluseqartuni suliani tamani Aalisarneq pillugu Siunnersuisoqatigiit ilanngunneqartarnissaat Naalakkersuisut qulakkiissavaat.

Imm. 2-mut.

Naalakkersuisut Aalisarneq pillugu Siunnersuisoqatigiit oqaaseqaammik qaugu qinnuigisinnaneraat aalajangersakkami aalajangersarneqarpoq. Suliani nalinginnaasuni taamaallaat Aalisarneq pillugu Siunnersuisoqatigiit tusarniarneqarsinnaapput, taamaalillutillu sulianik suliariinninnerni aalajangersimasuni peqataasinnaanatik. Malittarisassanik attuumassuteqartunik tamanik Naalakkersuisut piareersaernerinut atatillugu Siunnersuisoqatigiit ilanngutitinneqassapput, soorlu aamma nalunaarummik kinguneqanngitsunik suliniutinut nalinginnaasunut atatillugu siunnersuisoqatigiit aamma tusarniarneqartassasut.

Assersuutigalugu sammisat siunnersuisoqatigiinni suliariineqarsinnaasut tassaapput

- TAC,
- nunani tamalaani isumaqatigiissutit,
- Kalaallit Nunaata oqartussaaffiata avataani aalisarneq,
- aalisarnerup nalinginnaasumik malittarisassatigut aqunneqarnera,
- angallatinut nutaanut/allangortinneqartunut periarfissat pillugit malittarisassat,
- utertitsisussaatitaaneq,
- pisassiissutinit pigisanik oqartussat tunisinerat,
- aalisarnermut piumasaqaatitut tunitsiviit pillugit piumasaqaatit, aamma
- piujuartitsinissaq siunertaralugu teknikkut iliuusissat

Imm. 2, nr. 1-imut

Inuussutissarsiutigalugu aalisarnerup ingerlanneqarneranut killilersuiffingeqarneranullu malittarisassassaliornissamik pilersaarusrusiornermut suliaqarnermullu atatillugu Aalisarneq pillugu Siunnersuisoqatigiit oqaaseqaateqaqqullugit Naalakkersuisut qinnuigisinnavaat.

Imm. 2, nr. 2-imut

Aalisarnermi aalajangersimasumi pisat annertussusaannik aalajangersaanermi Aalisarneq pillugu Siunnersuisoqatigiit oqaaseqaateqaqqullugit Naalakkersuisut qinnuigisinnavaat. Aammattaaq pisassiissutit, aalisarnermi atortunik atuineq, umiarsuarnik tunitsivilineq kiisalu aalisakkanik aalisakkanillu tunisassianik tuniniaaneq pillugu apeqqutit pillugit siunnersuisoqatigiit oqaaseqaateqarnissaannik Naalakkersuisut noqqaasinnaapput. Tassani immikkut tuniniaasarnermut suliniutissat nutaat pineqarput.

Imm. 2, nr. 3-mut

Kalaallit Nunaanni aalisarnermi piujuartitsinermik siuarsaasunik suliniutinut tunngasunik Aalisarneq pillugu Siunnersuisoqatigiit oqaaseqaateqaqqullugit Naalakkersuisut qinnuigisinnaavaat. Tamanna tassaasinnaavoq suliniutit aalajangersimasut pillugit siunnersuisoqatigiit tusarniarnissaat, soorlu aamma piujuartitsinermik siarsaanermi suliniutit nutaat pillugit siunnersuisoqatigiinniit siunnersuutinik pissarsiniartoqarsinnaasoq.

Imm. 3-mut

Apeqqutini kinguartinneqarsinnaanngitsuni siunnersuisoqatigiit ataatsimoorlutik isummersinnaannginneranni Aalisarneq pillugu Siunnersuisoqatigiit allakkatigut Naalakkersuisunit tusarniarneqarsinnaapput.

Imm. 4-mut

Kalaallit Nunaanni aalisarnermi kattuffiit attuumassutillit katitigaanerat allanngorartuarmat kattuffiit peqataasut ataasiakkaarlugit inatsimmi taakkartorneqarsinnaangillat, taamaattumik soqutigisaqaqatigiit ingerlatseqatigiiffiussasut attuumassuteqassasullu taamaallaat oqaatigineqarpoq. Tassani aamma kattuffiit inuiaqatigiinni, najukkamiunersoq, nunap immikkoortuaniunersoq nunaluunniit tamakkerlugu pingaaruteqarnissaat pineqarpoq. Naalakkersuisut kattuffinniillu inassutigineqartut tunngavigalugit kattuffiit qassit kikkullu siunnersuisoqatigiinni ilaasortaassanersut ingerlaavartumik isummerfigisariaqartassavaat.

Siunnersuisoqatigiit katitigaanerat Naalakkersuisunut siunnersuisartutut siunnersuisoqatigiit sulinerannut naapertutissaaq. Siunnersuisoqatigiit taamaalillutik kattuffinnit soqutigisaqaqatigiinneersuussapput, aamma Aalisarnermut Piniarnermullu Naalakkersuisoqarfik, Pinngortitaleriffik imaluunniit Kalaallit Nunaanni Aalsarsinnaanermut Akuersissutinik Nakkutilliisoqarfik siunnersuisoqatigiinni ilaasortaasussaanatik. Naalakkersuisoqarfik taamaallaat allattoqarnikkut ikiutissaaq, tak. imm. 6, aalisarnermillu nakkutilliisoqarfik aamma pinngortitaleriffik siunnersuisoqatigiinni aggersitatut akuttunngitsumik peqataasarnissaat naatsorsuutigineqarluni.

Siunnersuisoqatigiinnik pilersitsinermi ilaasortat nipangiussisussaatitaaneq pillugit atsiussapput, tamannalu siunnersuisoqatigiinni sulinissamut piumasaqaataavoq. Sulinermut atatillugu nipangiussisussaatitaanermik unioqqtitsineq Kalaallit Nunaanni Pinerluttulerinermut Inatsimmi § 50 malillugu pineqaatissiissutaasinnaavoq.

Imm. 5-imut

Aalisarnermut Siunnersuisoqatigiit inatsimmi matumani aalajangersakkani tunngaviliussat iluanni suleriaaseq aqqutigalugu suleriaassisamik aalajangersaanissartik namminneq toqqarsinnaavaat. Tassunga atatillugu siulittaasumik toqqaanissamut, pisariaqarsimappallu allatut inuttalersuinissamut malittarisassat aamma aalajangersaaffigineqassapput. Siulittaasussamik qinersisoqarnerani assersuutigalugu pineqartup sivisuumik inuussutissarsiornikkut misilittagai, siusinnerusukkut Aalisarnermut Siunnersuisoqatigiinni ilaasortaasimanera imaluunniit aalisarnermut inatsisiniik taakkualu aqutsiffiginerannik

immikkut ilisimasaqarnissaa immikkut pingaartinneqassapput. Siunnersuisoqatigiilli aamma aalajangiisinjaapput - inatsisip pilersinneqarnera sioqqullugu soorlu taamaassimasoq - siulittaasoqarfiup taarseraannikkut ingerlanneqarsinnaasoq.

Imm. 6-imut

Aalisarnermut Siunnersuisoqatigiinnut tunngatillugu allattoqarfiup isumaginissa Naalakkersuisoqarfiup suliassarissavaa. Siunnersuisoqatigiit annertunertigut isummernissamut tunngavissianik suliniutissanillu Naalakkersuisuneersunik suliaqartassaaq, taakkununngalu tunngatillugu atorfilitt ilassinninnermik suliaqartarnissaat tulluartuussaaq.

Naalakkersuisut siunnersuisoqatigiit ataatsimiinnerannut atatillugu aningaasartuutit akilertassavaat, tassanimi aningaasartuutit attuumassutillit naleqquttullu pineqarnissaat naatsorsuutaasussaammat.

Kapitali 14

Nakkutilliineq

Ataatsimut isigissagaanni nakkutilliineq ingerlanneqartoq akornutissanut ingerlatalimmut nakkutilliisoqarnissaanut attuumassuteqartunut eqqarsaatissanut nakkutilliinermut tunngavilersuutaasunut naapertuitissasoq atuutsinneqarpoq.

§ 55-imut

Imm. 1-imut.

Aalajangersagaq taanna malillugu inatsimmi aalajangersakkanik eqqortitsisoqarneranik nakkutilliinermut malittarisassanik sukumiinerusunik Naalakkersuisut aalajangersaasinnaapput. Tassunga ilanngullugu Kalaallit Nunaata aalisarnikkut oqartussaaffigisaani kalaallit angallataasa tulaassuinerat usingiartarnerallu pillugit malittarisassanik Naalakkersuisut aalajangersaasinnaapput. Aalajangersakkatigut aamma Kalaallit Nunaata aalisarnikkut oqartussaaffigisaata avataani kalaallit angallataasa tulaassineri usilersoqqinnerilu pillugit malittarisassanik Naalakkersuisut aalajangersaasinnaapput. Aalajangersakkamut ilaapput Kalaallit Nunaata aalisarnikkut oqartussaaffigisaani aamma avataani pisarineqartut.

Pissusissamisuussaaq inerteqqutit peqqussutilu pillugit sinaakkutissat nalunaarutikkut allanneqarpata. Tassunga atatillugu assersuutigalugu danskit aalisarneq pillugu inatsisaani § 120-miit isumassarsisoqarsinnaavoq, ima allassimasoq:

"Nakkutilliinermi oqartussat, tamanna pisariaqartinneqarpat, peqqussummi inerteqqummillu nalunaaruteqarsinnaapput

*1) nakkutilliinerup ingerlanneqarnera pillugu, tassunga ilanngullugit tulaassiviit, piffissat tulaassivissat aamma nakkutilliinermi oqartussani tulaassinermi najuunnissaat imaluunniit
2) aalisariutip, aalisakkanik assartuutip angallatip, biilit, aalisakkanik assartuisut, aamma aalisarnermi atortut kiisalu pisat politiit takkunissaannut suli sumiiffimiinneri qulakkeerniarlugit eqqartuussisarnermilu inatsimmi pillaasarneq pillugu malittarisassat malillugit pinngitsaaliinikkut pisariaqartumik akuliuttoqarluni."*

Imm. 2-mut.

Aalajangersagaq taanna tunngavigalugu nunat tamat akornanni isumaqatigiissutit naapertorlugit nakkutilliinermi pisussaaffit qaqugukkulluunniit atuuttut Naalakkersuisut ilanngussinnaavaat. Taamaalilluni aalajangersagaq NAFO-miit aamma NEAFC-imiit nakkutilliinermi aalajangersakkat ilanngunneqarnissaannut aalajangersagaq tunngavissiivoq. Tamanna assersuutigalugu isumaqarpoq Naalakkersuisut Port State Control-imut tunngatillugu sukumiinerusunik malittarisassiorsinnaasut.

Imm. 3-mut

Inerteqqutaasumik, nalunaarutigineqanngitsumik malittarisassaqartinneqanngitsumillu aalisarnerup pinngitsoortinnissaa siunertaralugu aalisakkat ilaatigut qanoq pisarineqarnerinut tunineqarnerinullu malittarisassanik aalajangersaanissamut Naalakkersuisut periaarfissaqarnissaat pingaaruteqarpoq.

Aalajangersakkami matumani nunani tamalaani kattuffiit Kalaallit Nunaata ilaasortaaffigilersimasi imartani tamani piujuartitsinermik tunngaveqarluni aalisarnissap qulakkeernissaanut tunngatillugu aalisarnerit unioqqutitsiffiusut, nalunaarutigineqarneq ajortut malittarisassaqartinneqanngitsullu killeqartinnissaannik immikkut qitiutitsisarnissaat anguniarneqarpoq. Tulaassinerit usingiarnerillu qanoq ingerlanneqarnissaat pillugit kiisalu nunat ataasiakkaat inerteqqutaasumik, nalunaarutigineqanngitsumik killilersugaanngitsumillu aalisarnerup killilersimaarnissaanut qanoq iliuuseqarnerusinnaanerannut tunngatillugu soleqatigiiffiit taakku piumasaqaateqarsinnaapput.

Nr. 1)

Unioqqutitsisumik aalisarnerup killilersimaarnissaai siunertaralugu pisat tiguneqartut pillugit paasissutissanik inuit aamma inatsisitigut inuttut isigineqarsinnaasut tunniussinissaannik pisussaaffiliisunik malittarisassanik aalajangersasoqarsinnaavoq. Tamakku assersuutigalugu tassaasinnaapput tigooqqaaviit, suliffissuit aamma illut niuerfiit taamatut pisussaaffilerneqarsinnaasut.

Siunertaq tassaavoq inerteqqutaasumik, nalunaarutigineqanngitsumik killilersugaanngitsumillu aalisarneq ingerlanneqarnersoq nakkutiginiarlugu aamma angallatit allattaavinnut malittarisassat malillugit allattuinersut nakkutiginiarlugin sapinngisamik pitsaanerpaanik nakkutilliisutut oqartussat sakkussaqartinneqassasut.

Nr. 2)

Unioqqutitsisumik aalisarnerup killeqartinnissaa siunertaralugu aamma pisanik tunisisartut inuit aamma inatsisitigut pisinnaatitaasut pisussaaffeqartullu aalisarnermut kalaallit imaluunniit nunat allamiut akuersissutaannik atuuttumik peqarnersut nakkutigineqarnissaannut tigooraaviit, suliffissuit, illut niuerfiit il.il. peqqunneqarnissaat pillugu malittarisassanik aamma aalajangersaasoqarsinnaavoq.

Inuk imaluunniit inatsisitigut inuttut isigineqarsinnaasoq akuersissummik atuuttumik peqarnani pisaminik tigooraavimmut tunisisimasoq paasineqarpat tigooraaviup, suliffissup imaluunniit illup niuerfiusup il.il., taamatut pisanik pisisimasup pineqaatissinneqarsinnaanera pillugu malittarisassiorqarsinnaavoq.

Nr. 3)

Pisassiissutit tamakkerlugin aalisarneqarsimatillugit, tamanna tusagassiorfiit, aalisarnermi kattuffiit il.il. aqqutigalugit tamanut saqqummiunneqarsimalluni, tak. assersuutigalugu § 21, nr. 2) tigooraaviit, suliffissuit, illut niuerfiit il.il. pisassiissutinik taakkuninnga pisanik tigusinissaannut inerteqquteqartunik malittarisassanik aalajangersaasoqarsinnaavoq.

Pisat unioqqutitsinikkut pisarineqarsimasut tigusisup ilisimasimappagu ilisimasariaqarsimagaluarpaguluunniit siuliani allassimasut nanginneratut unioqqutitsisumik pisanik pineqartumut pineqaatissiisummik malittarisassanik Naalakkersuisut aalajangersaasinnaapput.

Imm. 4-mut

Aalisakkanik tulaassineq, aaqqissuussineq aamma aalisariutinik aamma aalisarnermi assartuutinik ingerlatsineq pillugu malittarisassanik ilanngussiniarluni aalisarnermik nakkutilliisoqarfip sulinerata oqinnerulernissaa siunertaralugu Naalakkersuisut annertuumik aalajangersakkut piginnaatinneqarput, taamaalilluni assersuutigalugu takkulluni nakkutilliinissaq sapinngisamik annikinnerpaamik akornusersorneqartillugu.

§ 56-imut

Kalaallit Nunaanni Aalisarsinnaanermut Akuersissutinik Nakkutilliisoqarfik § 5 naapertorlugu aallaaviusumik nakkutilliinissamut pisinnaatitaaffeqarpoq, kisiannili kapitali 14 naapertorlugu Naalakkersuisut naalagaaffimmqi oqartussat tamanna pillugu isumaqatigiissuteqarfigereerlugit allat nakkutilliisussatut toqqrneqarsinnaapput, soorlu assersuutigalugu sakkutuut imarsiortut aalisarnermik nakkutilliisut nakkutilliitinneqarsinnaapput. Peqatigisaanik sakkutuut imarsiortut aalisarnermik nakkutilliisuinut politiinullu siusinnerusukkut inatsimmi pisinnaatitaaffiusut Kalaallit Nunaanni Aalisarsinnaanermut Akuersissutinik Nakkutilliisoqarfip tigunikuuai. Kapitali 14-imi aalajangersakkanik atuutsitsinermut politiiniit aamma sakkutuut imarsiortut aalisarnermik nakkutilliisunik ikioqqulluni Kalaallit Nunaanni Aalisarsinnaanikkut Akuersissutinik Nakkutilliisoqarfik noqqaasinnaavoq,

tamatumunnga aalajangersimasumik pisariaqartitsisoqarpat, assersuutigalugu angallat ikiffingeqarnissaminik nakkutilliiffingeqarnissaminillu itigartitsippat.

Imm. 1-imut.

Nakkutilliinermi oqartussat pisussaaffiinik aalajangersakkami aalajangersaasoqarpoq. Nakkutilliinermi oqartussaasut kikkuunersut § 5 naapertorlugu aalajangersarneqarpoq, aallaaviusumillu tassaalluni Kalaallit Nunaanni Aalisarsinnaanermut Akuersissutinik Nakkutilliisoqarfik. Kalaallit Nunaanni Aalisarsinnaanermut Akuersissutinik Nakkutilliisoqarfiup saniatigut nakkutilliinermi oqartussanik allanik Naalakkersuisut toqqaasinnaapput.

Nakkutilliinermi oqartussat akuersissutini piumasaqaatit eqqortinneqarnerinik nakkutilliinermut atatillugu angallatini aalisarnermi atortunik pisanillu misissuisinnaapput.

Umiarsuit tunitsiviit angallatillu allat usinik nuussinissamut akuersissuteqartut aalajangersakkamut ilaapput.

Aalajangersakkami ilaapput angallatit tamarmik, Kalaallit Nunaata aalisarnikkut oqartussaaffigisaani aalisartut kiisalu kalaallit angallataat nunat tamat imartaanni aalisartut. Angallatit tamaasa Kalaallit Nunaanni aalisarnermut aamma Kalaallit Nunaanni pisassiissutinut attuumassuteqartut aalajangersakkami pineqarput.

Piginnaatitsinermi pisarineqartunik suliarineqarsimasunik poortoriikkianillu nakkutiginnittarnissaq ilaavoq.

Imm. 2-mut.

Akuersissutini piumasaqaatit eqqortinneqarnersut misissornissaat siunertaralugu nakkutilliinermi oqartussat piumasarisinnaavaat angallatip pappiliaanik uppernarsaatinillu takunnikkumallutik. Tamanna nalinginnaasumik isumaqarpoq inuit imaluunniit inatsisitigut pisinnaatitaasut pisussaaffeqartullu, akuersissummik piginnittutut allassimasut, inuk imaluunniit inatsisitigut pisinnaatitaasoq pisussaaffeqartorlu aalisartuunersoq qulakkeerniarlugu akuersissummik misissuineq.

Imm. 3-mut

Nakkutilliinermi oqartussat eqqartuussivik aalajangiiteqqaarnagu aalajangersakkami eqqaaneqartut ingerlassinnaavaat. Sulisulli uppernarsaammik tulluartumik takutitsisassapput.

Pisortat ingerlatsineranni malittarisassanut tunngatillugu isumaliutissiissut 1039/1985 eqqartuussisoqarnerup avataatigut pinngitsaaliissutitalimmik akuliuttarneq pillugu martsimi 1985-imi ataatsimiititaliaq apeqquteqarpoq, tassani ilaatigut apeqqutit apeqqutit eqqartuussivik avaqqullugu misissuinissamut arsaarinninnissamut tunngasut suliarineqarput.

Isumaliutissiissut 1039/1985 eqqartuuussisoqarnerup avataatigut pinngitsaaliissutitalimmik akuliuttarnermi, qupp. 137-imi imm. 6.3.2.2.2-mi erserpoq:

"Akuliunnerit amerlanerpaat nakkutilliinermik tunngaveqartarpuit, arlaqartumik taamungaannaq tigooqqaalluni misiliilluni nakkutilliinermik... [Taanna]-rpiaq taamungaannaq tigooqqaalluni misiliineq - siumut oqaatigineq ajornartua – aaqqiissut naleqalersikkaa. Tamanna tunngavigalugu inatsisitigut piviusutut allaatiginninneq (retsfaktumbeskrielsen) pissutsini taamaattuni eqqorteqqissaartikkuminaattarpoq. Pinngitsaaliissutitalimmik akuliunneq paasissutissanik aallernermik tunuliaqutaqarpat, taava inatsisitigut aalajangiinerit piuminartuuusarput paasuminartuuusarlutillu. Inatsisitigut aalajangiinissamik piumasaqaateqartoqassappat, ataatsimiititaliap isumaa malillugu, pisariaqanngitsumik allamut saasaaneruvoq, eqqartuussivinnik pisariaqanngitsumik suliakkersuisoq, saniatigullu ingerlatsinermut oqartussaasut nakkutilliinissaannik sanngiillisitsisoq, inatsisitigut isumannaatsuunermik iluaquteqanngitsumik. Inatsisip atuutsinneqarnissaanut eqqartuussiviiit imaluunniit ingerlatsinermi oqartussaasut qaffasinnerusumik akisussaaffeqassanerannut tunngatillugu naggaterpiaani kikkut akisussaasussanerannut tunngatillugu ajornartorsiuteqarnera siusinnerusukkut taaneqarpoq. Taamaammat ataatsimiititaliaq isumaqarpoq, pinngitsaaliissutitalimmik akuliunneq nakkutilliineq imaluunniit paasissutissanik ujarlerneq anguniarneqartillugu, taava inatsisitigut aalajangiinissamik piumasaqarnissaq pinngitsoortinnejqartariaqartoq.

Imm. 4-mut

Nakkutilliinermi oqartussanut isumagisassanngortinneqartut pisinnaatitaaffit suliassallu pillugit malittarisassanik Naalakkersuisut aalajangersaasinnaanerannik aalajangersakkami aalajangersaasoqarpoq.

Imm. 4 naapertorlugu malittarisassanik sukumiinerusumik aalajangersaanermut atatillugu erseqqissarneqassaaq Kalaallit Nunaanni Aalisarsinnaanermut Akuersissutinik Nakkutilliisoqarfripaataani sulineq piniarnermik aalisarnermillu nakkutilliisunit ingerlanneqartoq taamaallaat allaffissornikkut nakkutiginninermik nakkutilliinertullu iluseqartussaammat, aamma piniarnermik aalisarnermillu nakkutilliisut peqqussutit il.il. pinngitsaaliissutigissallugit imaaliallaannarlutik pissaanermik atuisinnaanatik. Taamaalilluni pinerluttulerineq pillugu inatsit naapertorlugu sulianik suliarinnittut suli tassaapput politiit imaluunniit sakkutuut imarsiortut aalisarnermik nakkutilliisut.

§ 57-imut

Imm. 1-imut.

Aalajangersagaq taanna malillugu nakkutilliinermi oqartussat tamanna pisariaqartutut nalilersimappassuk angallatit suulluunniit unitsissinnaavaat, ikiffigisinnaavaat misissuiffagalugillu. Aamma pisanik sakkunillu misissuinissaq imaluunniit nakkutilliinissaq siunertaralugit angallatit timmukarnissaannik peqquneqarsinnaapput.

Ulloq manna tikillugu illersornissaqarfiup aalisarnermik nakkutilliisui angallatit unitsinnerisigut ikiffignerisigullu angallatinik nakkutilliinermik isumagisaqarput. Tamanna pillugu Danmarkimi naalagaaffimmi oqartussanik isumaqatigiissusiortoqarpat taamatut nakkutilliilluni suliap ingerlanneqarneranik illersornissaqarfiup aalisarnermik nakkutilliisui taamatut nakkutilliinermik ingerlatsiinnassapput. Aalajangersagaq naapertorlugu maannakkut ”nakkutilliinermi oqartussat” angallammik unitsitsisinnaallutillu angallammut ikisinnaapput, taamaattumik § 5-imi akisussaaffit agguneri naapertorlugit maannakkut aallaaviatigut suliassamik taassuminnga Kalaallit Nunaanni Aalisarsinnaanermut Akuersissutinik Nakkutilliisoqarfik isumaginnissaaq. Tamanna atutissaaq § 5 naapertorlugu naalagaaffimmi oqartussanik allanik immikkut ittumik isumaqatigiissusiortoqarsimanngippat.

§ 55-imi nakkutilliinermi suliassat ingerlanneqarsinnaapput kalaallit imaluunniit nunat allamiut angallataat pineqarnersoq apeqqutaatinngagu.

Aallaaviatigut nakkutilliinermi oqartussat umiarsuup unitsinneqarfiani imaluunniit ikiffigneqarfisaani misissuissapput. Tamanna ajornarpat, imaluunniit sapernartoq paasineqarpat, umiarsuaq Kalaallit Nunaanni umiarsualivimmut toqqarneqartumut ingerlaqqullugu peqquneqassaaq.

Pisanik sukumiinerusumik kisitsisoqarnissaa siunertaralugu uppermarsaatnik qulakkeerinninniarluni umiarsuup timmukarnissaanik nakkutilliinermi oqartussat peqqusisinnaapput.

§ 3, imm. 1, nr. 18-imi tulaassisarnerup nassuiaaffiginera atortunut atuuttussanngortillugu aamma annertusineqarpoq.

Imm. 2-mut.

Imm. 1 naapertorlugu pisinnaatitaaffik eqqartuussivik aalajangiiteeqqaarnagu kisiannili kinaassutsimik uppermarsaammik pissusissamisoortumik takutitsinikkut nakkutilliinermi oqartussat ingerlassinnaagaat aalajangersakkami aalajangersarneqarpoq. Tamanna immikkoortumi periutsimut maannamut atuuttumut akuerisaasumullu naapertuuppoq.

Imm. 3-mut

Aalisariummi angallatinik nakkutilliinermut atortulersuutinik (FOE) ikkussuisoqareersimanngippat aalajangersagaq naapertorlugu nakkutilliinermi oqartussat aalisariutini piginnittunik ikkussueqqusinissamut pisinnaatinneqarput. Ilaatigut angallatip sumiiffia, siunnerfia sukkassusaalu il.il. atortulersuutip nassiuttarpai.

Nakkutilliinermi aaqqissuussinerit assigiinngitsorpassuit atornerisigut nakkutilliinissaq ajornassanngilaq, tassunga ilanngullugu assersuutigalugu dronit.

Aalajangersagaq tamakkiisuunngilaq, taamaattorli paasissutissat sulianut allanut tunngassuteqartut aamma matumani ilaasinnaallutik.

Imm. 4-mut

Aalajangersakkap matuma Naalakkersuisut pisinnaatippai angallatinik nakkutilliinermut atortulersuutinik atuinermut tunngatillugu erseqinnerusunik malittarisassiorsinnaanissamut, tassunga ilanngullugit atortulersummik ingerlatsineq, teknikikkut immikkoortiterinerit, paasissutissat sulianut allanut tunngassuteqartut il.il.

§ 58-imut

Imm. 1-imut.

Kalaallit nunallu allamiut angallataat, Kalaallit Nunaanni akuersissuteqarlutik aalisartut angallatip aalisarnermut attuumassuteqartunik ingerlataanik nakkutilliinissaq siunertaralugu nakkutilliinermi oqartussat sinniisuinik angallammiiittoqarnissaanik nakkutilliinermi oqartussat peqqusisinnaapput.

Aalajangersakkap oqaasertai siusinnerusumut naleqqiullugu annertusineqarput, taamaalilluni maannakkut erseqqissarneqarluni aalajangersagaq angallatinut aalisarnermik ingerlataqartunut taamaallaat atuukkunnaarluni, kisianni aamma aalisarnermut attuumassuteqartunik ingerlataqartunut angallatinut tamanut, tassunga ilanngullugu assersuutigalugu angallatit usilersoqqinnejartut, angallatit aalisakkanik assartuisut, umiarsuit tunitsiviit, umiarsuit tunisassiorfiit aamma umiarsuit qeritsiviit.

Kiisalu aalajangersagaq imatut annertusineqarpoq, maannakkut umiarsuaatileqatigiiffit Naalakkersuisunit akuersissuteqarlutik angallatit aalisartut, usinik nuussisut nuussisuni imaluunniit aalisarnermut attuumassuteqartunik allatigut ingerlataqartut nakkutilliinermi oqartussaniit sinniisunik ilaasoqaqqullugit peqquneqarsinnaallutik, angallat taamaattoq Kalaallit Nunaata nunami aalisarnikkullu oqartussaaffigisaata avataani ingerlataminik ingerlataqarpat.

Nakkutilliineq nalinginnaasumik imatut aaqqissuunneqassaaq nakkutilliinermi oqartussat sinniisui nalunaaquttap akunnerini arlalinni angallammiiillutik aamma atortunik, umiarsuup allagaataanik, usianik il.il. misissuillutik.

Nakkutilliineq aamma imatut ingerlanneqarsinnaavoq nakkutilliinermi oqartussat sinniisui piffissani sivisunerusuni angallammiiillutik, aamma angallatip ingerlataanik alaperناarsuillutik aamma unioqqutitsisinnaanernik nakkutilliineq siunertaralugu takusaallutilu misissuillutik.

Nakkutilliinermi oqartussat najuunneri aalisarnerup malittarisassat atuuttut malillugit ingerlanneqarneranik qulakkeerinneqataavoq.

Imm. 2-mut.

Aalajangersagaq nutaajuvoq. Aalajangersagaq taanna malillugu nakkutilliinermi oqartussat kalaallit aamma nunat allamiut aalisariutaat, aalisarnermi assartuutaat aamma umiarsuit tunitsiviit peqqusinnaavaat Kalaallit Nunaata aalisarnikkut oqartussaaffigisaani avataanilu angallatit taakku tulaassaannik usilersoqqinnerinillu nakkutilleeqqullugit. Kalaallit Nunaata aalisarnikkut oqartussaaffigisaata avataani kalaallit angallataasa tulaassisarnerannik usilersuisarnerannillu Nakkutilliinermi Oqartussat nakkutilliisinnapput.

Aalajangersagaq Kalaallit Nunaata aalisarnikkut oqartussaaffigisaani taassumalu avataani aalisarnermut atuuppoq. Aalajangersakkap pingaarteqarnera pisanik nuussineq imaluunniit pisanik tulaassineq umiarsuit uppermarsaataanni il.il. allattorneqarsimasut naapertorlugit ingerlanneqarnersut ilaatigut nakkutilliinermi oqartussat nakkutilliinissamut periarfissaqarnerannut atatillugu isigineqassaaq.

Imm. 3-mut

Nakkutilliinermi oqartussat najugaqarnerannut nerisaqarnerannullu umiarsuaatileqatigiiffit aningaasartuutinik akiliinerat periuseq atuuttoq malillugu annikitsuararsuuvoq. Taamaattorli aalajangersakkami oqaaseqatigiit appaat malillugu nakkutilliinermi aningaasartuutit ilaannik annertunerusunik imaluunniit tamarmiusunik angallammik piginnittup akileeqqunissaannut periarfissaqarpoq. Kisiannili umiarsuaatileqatigiit aningaasartuutaasunut akileeqqusarnissaat tulluartuunersoq nalilertariaqarpoq. Taamatut iliuuseqarnermi aningaasartuutit sumut tunnganissaannut suup anguniarneqarneranut aningaasartuutit annertussusaanni nalilerneqartussaassaaq - soorlu nakkutilliisutut oqartussat angalaneranni, najugaqarneranni nerisaqartinnerannilu aningaasartuutit.

Aalajangersagaq taanna naapertorlugu malittarisassat aalajangersarneqartut tamakkiisumik akiliinissamut peqqusinnaanermut kinaassusersiunngitsumik piumasaqaatinik imaqartariaqarput, taamaalilluni erseqqissumik takuneqarsinnaalluni umiarsuaatileqatigiiffit allanik imaluunniit tamakkiisumik akileeqquneqarsinnaassanngitsut, immikkoortumi aalajangersimasumi imaluunniit piffissami aalajangersimasumi kilisaatinut tamanut akiliinissamut piumasaqaat eqqunneqanngippat.

Nakkutilliineq pillugu akiliinerup annertussusaata allanngorarneranik tunngavilersuisinnaasunik pissutsinik tamakkiisumik taaguisoqarsinnaanngilaq, kisianni assersuutit eqqaaneqarsinnaallutik:

- 1) Kilisaammiit nalunaaruteqanngitsoornerit uteqattaartut.
- 2) Unioqqutitsinerit uteqattaartut siusinnerusukkut paasineqarsimasut aamma umiarsuup naalagaanut assuarliutigineqarsimasut.
- 3) Aalisarnermi nakkutilliisup pisarnertut pulaarnerata nalaani ingasattumik unioqqutitsinerit paasineqartut.

- 4) unioqqutitsisumik igitsinernut pasitsaassinerit sakkortuut pisat annertussusiisa katitigaanerisigut, immikkoortumi angallatit allat pisaannik malunnaatilimmik allaanerunerisigut imaluunniit Kalaallit Nunaanni Aalisarsinnaanermut Akuersissutinik Nakkutilliisoqarfianiit immikkoortumi angissutsit nalinginnaasumik angissusiisa agguarnerinik paasiaqarsimanermiit takutinneqartut.
- 5) Pisarnertut pulaarnermi angallatit ataatsimoortut sunniuteqarluartumik misissuititsinngippata aalisarnermik nakkutilliisut ataavartumik angallammiitinneqarnissaat pisariaqalersimappat.

Imm. 4-mut

Pingaauteqarpoq nakkutilliinermi oqartussat sinniisui angallatini taakkunaniittut Kalaallit Nunaanni Aalisarsinnaanermut Akuersissutinik Nakkutilliisoqarfimmik, Issittumi Sakkutuunik aamma politiinik atassuteqarnissamut periafissaqarnissaat. Inuk nakkutilliisoq taamaaliornikkut unioqqutitsinertut ilimagineqartoq erseqqinnerusumik misissorneqassanersoq imaluunniit erseqqinnerusumik misissuineq ingerlanniarlugu Issittumi Sakkutuuniit umiarsuaq alapernaarsuut aggersarneqassanersoq pillugu qullersani nalilersuitissinnaavai.

Angallatip radiuanik, nalunaarasuartaataanik qarasaasiaanillu atortuinik nakkutilliinermi sulinermut atasunik atuinermi aningaasartuutit umiarsuaatileqatigiiffiup akilissavai. Angallatip radiuanik, nalunaarasuartaataanik qarasaasiaanillu atortuinik nakkutilliinermi sulinermut atanngitsunik atuineq pillugu aningaasartuutit aalisarnermik nakkutilliisup nammineq akilissavai.

Imm. 5-imut

Imm. 1 aamma 2 naapertorlugit pisinnaatitaaffik eqqartuussivik aalajangiiteqqaarnagu kisiannili kinaassutsimik upternarsaammik pissusissamisoortumik takutitsinikkut nakkutilliinermi oqartussat pisinnaatitaaffii periuseq atuuttoq naapertorlugu ingerlanneqarsinnaapput.

Imm. 6-imut

Aalajangersagaq taanna malillugu nakkutilliinermi oqartussat, taakku aalisarnermi nakkutilliisui, aamma sulisut allat nakkutilliinermi suliassanik suliaqartussatut toqqarneqarsimasut pillugit malittarisassanik pisinnaatitaaffinnillu Naalakkersuisut aalajangersaasinnaapput. Aalisarnermi malittarisassanik eqqortitsisoqarneranik nakkutilliinerit annertuut Kalaallit Nunaanni Aalisarsinnaatitaanermut Akuersissutinik Nakkutilliisoqarfimmik Issittumi Sakkutuunit politiinillu ingerlanneqartarput. Suliassat taakku pillugit malittarisassanik aalajangersaaneq Naalagaaffimmi oqartussat peqatigalugit isumaqatigiissutigineqassapput.

§ 59-imut

Aalajangersagaq pissutigalugu "misissuiffimmik" aaqqissuussinermik taaneqartumik pilersitsisoqarsinnaavoq. Aalajangersagaq malillugu angallat sumiiffimmut aalajangersimasumut ingerlaqquneqarsinnaavoq, tamaani alapernaarsuineq ingerlanneqarsinnaalluni. Taamatut aaqqissuussinikkut Sakkutut imarsiortut aalisarnermik nakkutilliisut akulikinnerusumik taamaalillunilu kinguneqarluarnerusumik misissuisinnaapput.

Nunat allamiut angallatai eqqarsaatigalugit tamanna amerlanertigut Kalaallit Nunaata aalisarnikkut oqartussaaffigisaanut pulanerup siorna kingornalu pisinnaavoq.

Misissuiffimmik aaqqissuussineq angallat aalisakkanik ataatsinik immikkoortuni malittarisassaqarfiusuni assigiinngitsuni aalisarpat, immikkoortuni taakkunani aalisarsinnaanerup avissaarnerani tulluassaaq. Aaqqissuussineq nunani allani atorneqarsimavoq, nunanilu taakkunani misilittagaalersut iluaqtsiullugit ilanngunneqarsinnaapput.

Aaqqissuussinerup taamaallaat pisariaqarfiatigut atorneqartarnissa pingaaruteqarpoq. Aaqqissuussineq aalisarnermut akornutaassanngilaq. Tassunga atasumik siunertamut iluaqtaassaaq piffissaq sumiiffillu sapinngisamik umiarsuup naalagaalu isumaqatigiissutigineqarpata.

§ 60-imut

Aalajangersagaq kalaallit aamma nunat allamiut angallataannut atuuppoq.

Aalajangersagaq malillugu angallat aalisarnissamut akuersissuteqarfiunngitsumiitillugu aalisarnermi atortut illuartinneqarsimassapput. Aalajangersakkami siunertaavoq angallatip akuersissutigisaata saniatigut aalisarnermik ingerlatsisoqannginnissaata qulakkeerneqarnissa. Angallatit taamaalillutik aalisarnermi atortunik saqqumitsiinnarnermikkut pineqaatissinneqarsinnaapput.

Aalajangersagaq nakkutilliinermi aalajangersagaanngikkaluarpoq, kisiannili angallat kalaallit nunaata imartaani angalaartillugu qanoq pissusilersornissaanut malittarisassaliornissamik aalajangersagaq siunertaqarluni. Taamaattorli aalajangersagaq nakkutilliinermut aalajangersakkat pillugit immikkoortumi ilanngunneqarpoq, tassanimi aalajangersagaq piumasaqaatinik aalajangersaaffiusoq unioqqutitsilluni aalisarnermi nakkutilliinissaq eqqarsaatigalugu angallatit malitassaat pineqarpoq.

§ 61-imut

Aalajangersakkami siunertaq tassaavoq nakkutilliinermut periarfissap qulakkeerneqarnissa.

Assersuutigalugu nakkutilliinermi oqartussat pisanik misissuereertinnagit imaluunniit nakkutilliinermi oqartussat takkutereertinnagit angallatip pisanik usingiarsinnaanngikkaat pillugu peqqusummik nalunaaruteqarsinnaapput. Aammattaaq aalajangersagaq angallatinut suliffeqarfinnullu aalajangersimasumut atorneqarsinnaassaaq, tassani piffissami aalisakkanik aalajangersimasunik tunisineq pillugu tulaassinernik kinguneqarluarnerusumik nakkutilliisoqarnissaanik pisariaqartitsisoqarsimatillugu, soorlu aalisakkap aalajangersimasup tunineqarnerata nakkutiginissaa. Taamaalilluni tulaassinerni, usilersoqqinnermi imaluunniit aalisakkanik immikkoortiterisoqarnerani ingerlaannartumik oqimaalutaaneq suliffeqarfiiit nakkutilliinermut oqartussanut siumoortumik nalunaarutigissagaat pillugu angallatinut peqqusisoqarsinnaavoq. Tassunga ilanngullugu oqimaalutaaneq oqimaalutaasartumit akuerineqartumit ingerlanneqarsinnaavoq.

Peqqussutit inerteqqussutillu taamaalillutik aalisarnerni aalajangersimasuni imaluunniit immikkoortuni tamatumunnga pisariaqartitsisoqalersillugu nalunaaruteqarnissaq naatsorsuusiorqarnissaalu pilligit piumasaqaatinut nalinginnaasunut ilassutitut pingaaruteqartutut atorneqarlutik.

§ 62-imut

Imm. 1-imut.

Aalajangersakkami nakkutigineqartut nakkutilliinermi oqartussanut ikiuunnissaannut pisussaaffimmik aalajangiipput.

Aalajangersakkatigut nakkutilliiffiusussat nakkutilliinermut oqartussanik taakkualu sinnisaannik suleqateqartut nakkutilliinermi suliassanut akornusersuinnginnissaat qulakkeerneqassaaq. Taaguummi “pisariaqartumik ikiunneq”-mi ilaapput nakkutilliinerup ingerlanneqarnissaa eqqarsaatigalugu pisariaqartutut isigineqartut pisariaqartunillu atuinissaat qulakkeerniarlugu inuit taaneqartut inuttanik immikkullu ilisimasalinnik ikiuisussanik atugassiissapput. Aammattaaq nakkutilliinermi oqartussat sulinerminnut atatillugu pisariaqartitaannik atortunik, uppernarsaatinik, atortussianik, logboginik, atortunik elektroniskiusunik radiunillu ujartorneqartunik pisariaqartunillu atuinissaat qulakkeerneqassaaq.

Imm. 2-mut.

Imm. 2-mi aalajangersakkami nakkutilliinermi oqartussat immikkut pisoqarsimatillugu suliffeqarfiiup akiligaanik kukkunersiuismik naalagaaffimmit akuerisaasumik imaluunniit kukkunersiusutut nalunaarsorneqarsimasumik atortunik nakkutigineqarsinnaasunik misissuisussamik toqqaassasut aalajangersarneqarpoq. Aalajangersakkamut ilaapput angallatit suliffeqarfiiillu, nakkutilliinermik ingerlatsineq tamatuminnga pisariaqartitsippat.

§ 63-imut

Imm. 1-imut.

Siunnersuusiornermut atatillugu nakkutilliinermi pisinnaatitaaffit atuuttut pisariillisarneqarnissaasa pisariaqarnerat Naalakkersuisunit nalilersoqqissaarneqarnikuupput. Tassunga atatillugu sunniuteqarluartumik aalisarnermik sunniuteqarluartumik nakkutilliineq aalisariutinut suliffeqarfinnullu aalisarnermik ingerlatalinnut kalerreeqqaarani aalisarnermik nakkutilliartorsinnaanermut tunngavissamik eqquassinissaq pisariaqartutut isigineqarsimavoq. Suliffeqarfinnut angallatinullu isersinnaanermut piumasaqaat tassaaginnarpoq tamanna nakkutilliinermik oqartussat suliassaannik suliaqarnermi inatsisinik eqqortitsinissap imaluunniit tessunga atatillugu malittarisassat atortussanngortinneqartut malillugit pisassasoq. Taamaalilluni inatsisitigut pituttukkanik suliassanik isumaginnissinnaajumalluni nakkutilliinermik oqartussaasup nalinginnaasumik isersinnaanera matumani pineqarpoq.

Siunnersuummi taamaalilluni pissusissamisoortumik kinaassutsimik upternarsaammik takutitsinikkut aamma eqqartuussivikkut aalajangiinertaqanngitsumik siunnersuummi taaneqartuni angallatini suliffeqarfinnilu aalisarnermi nakkutilliinissamut nakkutilliinermi oqartussat periarfissaqarnerat attatiinnarneqarpoq.

Imm. 2-mut.

Nakkutilliinermi oqartussat aalajangersagaq taanna malillugu inatsimmik saneqqutsisoqartumik pasitsaassisooqarpat inuit angerlarsimaffianni siumut nalunaaruteqaqqaaratik misissuisinnaapput. Nakkutilliinermi oqartussat qaqgukkut inuit angerlarsimaffianni isernissamut piumasaqarsinnaanerat imm. 1-imut tunngatillugu sakkortusineqarpoq. Taamaalilluni pineqartup inatsimmik taannalu naapertorlugu malittarisassianik saneqqutaarinermiinut atatillugu angerlarsimaffimminik atuineranik pasitsaassisooqarsimassaaq. Sanilliussinermik tunngavik uani isiginiarneqassaaq, taamaalillunilu inuit angerlarsimaffiinut oqartussat isinnginneranni iliuutsit annikinnerusut atorneqassapput. Nakkutilliinermik oqartussat suleriaasissamik akulerutinnginnerusumik atuinissamik utaqqisaqarsimappata imaluunniit upternarsaatissat iginneqartussatut suujunnaarsinnejartussatulluunniit pasitsaanneqarsimappata suliap iluarsineqarsinnaanngitsumik ilusaa eqqarsaatigineqassaaq.

Nammineq pigisaq inatsimmik saneqqutaarinermi atorneqarnera pisinnaavoq tassani upternarsaateqarneranik, atortoqarneranik assigisaannillu inatsimmik saneqqutsinermut upternarsaateqarneranik pasitsaassisineq. Tamatuma saniatigut illuut inatsimmik unioqqutitsinermut ilaasumik atorneqarsimasutut oqaatigineqarsinnaavoq, matumani illuut tunisassiornermut, toqqorsinermut, imaluunniit pigisanik inatsisip unioqqutinneranut upternarsaatissatut atorneqarsinnaasunik toqqorsivittut atorneqarsimappat.

Nakkutilliinermi oqartussat angerlarsimaffimmut imaliinnarlutik isersinnaanngikkunik politiinut ikiortissarsiorsinnaapput. Politiit siumoortumik ikiorneqarnissamik qinnuagineqarsinnaapput, matumani pigisamik piginnittup appakaannissamut itigartissagaatik

imaluunniit nakkutilliinermik oqartussaasup sulineranik akornusersuissasoq nakkutilliinermut oqartussaasup naatsorsuutiguniuk.

§ 64-imut

Imm. 1-imut.

Imm. 1 qaqinneqartut tunineqartut aalisarneq pillugu inatsit naapertorlugu pisariaqarsimanngippata, tunineqarsimanngippata imaluunniit nalunaarutigineqarsimanngippata il.il. aalisakkat tunineqarnissaannut il.il. nalinginnaasumik inerteqqusummik imaqrpoq. Oqaaseq »imai« imatut pisanut tunngasuupput, kisianni aamma aalisakkat qaqinneqartut ilaasinnaallutik, kingusinnerusukkut tunitsivimmilfersut il.il.

Imm. 2-mut.

Piginnaatitsinermut tunitsiviit tamarmik ilaapput. Aalajangersagaq malillugu aalisakkat il.il. tiguneqartut pisassiissuteqartarnerup avataani unioqqutitsisumik pisarineqarsimannginnerisa imaluunniit tiguneqarsimannginnerisa qulakkeerinissamut tunisisoq il.il. uppernarsaasarnissaa pillugu najoqqutassanik erseqqinnerusunik Naalakkersuisut aalajangersaasinnaapput.

Imm. 3-mut

Aalajangersagaq aalisartunut nakkutilliinermilu oqartussanut tunngasuuvvoq. Utteritseqqinneaq, aalisagaq suli uumappat, nakkutilliinermi oqartussanit taamaallaat isumagineqassaaq.

§ 65-imut

Imm. 1-imut.

Tunisisoq il.il., aalisakanik unioqqutitsisumik qaqinneqartunik tigusisoq unioqqutitsisumik qaqinneqartut ingerlaannartumik nakkutilliinermi oqartussanut nalunaarutiginerisigut akisussaajunnaassaaq. Qaqinneqartut tamatuma kingorna oqartussat inassutigisaat naapertorlugu toqqorneqassapput aamma oqartussat tamatumunnga akuersiteeqqaarnagit tuniniaqqusaanatik.

Nassuaanermi ilangussatut U 2005 1899 V-mut innersuussisoqarsinnaavoq, suliami tassani aalisakanik tigusinermut atatillugu »ingerlaannartumik« nakkutilliinermi oqartussanut nalunaaruteqarluni unnerluutigineqartup akisussaajunnaarsinnejartoq taamaalliluni ima paasineqassaaq akisussaajunnaarnissamut periarfissaq taamaallaat atuussinnaasoq, aalisakanik qaqinneqarsimasunik tigusinermut atatillugu tiimialuit ingerlanerisa iluanni pisariaqartunik misilitissanik tigusisoqarsimalluni; aalisakkat ullup unnuallu ataatsip iluani tunisassiornermut ilaasinnaallutik, aamma aalisakkat mikivallaartut immikkoortinnejarneri naammannani. Unnerluutigineqartoq immami itisoormiunik peqqussuarnik qaqinneqartunik immikkoortunik pingasunik tigusisimasoq toqqorsisimasorlu, taakkunanna 273,6 kiilut - amerlanersaat millimeterimik naappallaarlutik, minnerpaaffissap ataaniillutik, 2.500 kr.-inik akiliisitsisoqarluni.

Imm. 2-mut.

Nakkutilliinermi oqartussat nakkutilliinerup ingerlannissaanut periarfissamik qulakkeerneqassapput, aalajangersakkamilu tamanna tunngavigalugu toqqorsimanissaannut piumasaqaateqarluni, soorlu aamma oqartussaniit akuersisoqarnani tunisineq inatsisinik unioqqutitsinerulluni.

Imm. 3-mut

Pisat akuerisaasunut aamma akuerisaanngitsunut agguarneri pisuni amerlanerni ajornakusoortarpoq, nakkutilliinermilu oqartussat taamaattumik immikkoortiterinermik nakkutiginnittariaqarlutik, pisat tamarmik unioqqutitsisumik pisatut nalunaarutigineqassanngippata. Oqartussat immikkoortiterinermik nakkutiginnissimangippata taamaattoq immikkoortiterineq aamma pisinnaavoq nakkutilliinermi oqartussat misiligtissanik tigusinerisigut, tassani aalajangerneqarluni pisat qanoq immikkoortinnejassanersut.

§ 66-imut

Pisat atortussaajunnaarsinneri aallaaviatigut pinngitsoortinniarneqassaaq pisarineqarsimasullu atorneqarlutik, kisianni taamatut atuineq ingerlataqartumut, malittarisassanik unioqqutitsisimasumut, iluaqutaassanngippat imatut pisoqarsinnaavoq peerneqarneri tulluarluni pisariaqarlunilu. Aalajangersagaq tamatumunnga tunngavissiivoq.

§ 67-imut

Aalisarnermi atortut pillugit aalajangersakkat allanneqarsimasut unioqqutinnejarsimappata aalisarnermi ilaatigut nakkutilliinermi oqartussat akuliunnissaannut aalajangersagaq tunngavissiivoq.

Kapitali 15 *Pineqaatissiissutit*

Aalisarnermut piumasaqaatinik unioqqutitsinerit, tassalu aalisarsinnaanermut akuersissutinik, aalisarsinnaanermut akuersissummik atuinissamut pisinnaatitaaffimmut tunngatillugu qisuarfigineqarsinnaapput. Taamatut piumasaqaatinik unioqqutitsineq taamaalinerani ingerlatallip inatsisinik unioqqutitsinera pisinnaavoq, tassami inatsisini aalajangersakkanik eqqortitsinissaq aalisarsinnaanermut akuersissummik tunniussinissamut ilaavoq.

Taamaattorli inatsisinik unioqqutitsinerit kapitali 15 naapertorlugu pineqaatissiinernik kinguneqarsinnaapput.

§ 68-imut

Imm. 1-imut.

Akiliisitsissumik aalajangersaaniarnermi pinerluttulerinermi inatsimmi periaatsit atorneqarnissaat piumasaqaataavoq, tak. tassani inatsimmi §§-it 121 aamma 127. Taassuma nassataraa akiliisinnaassutsip iliuutsillu qanoq ittuunera eqqarsaatigalugit aamma inuiaqatigiit soqutigisaat pingaartinneqassammata uumasunik pineqartunik iliuuserineqartunik akiuininarneq eqqarsaatigalugu. Matumaní unioqqutitsilluni pisap nalinga aallaaviussaaq. Angallatip angissusia, piginnaasaa aaqqissugaaneralu kiisalu inatsisinik unioqqutitsinermut tunngasut pissutsit eqqarsaatigineqarsinnaapput. Taamaattorli akiliisitsinerup qaffasissusia pitsaaliuinertut erseqqissumik sunniuteqartutut annertussusilerlugu aalajangersarneqartariaqarluni.

Aalisarnermi suliani aallaaviusoq tassaavoq angallammi naalagaasoq unioqqutitsisinnaanernut inuttut unnerluunneqassammat. Taamaattorli imm. 4-mut innersuussisoqarluni, piginnittooq angallammik ingerlatsisuunngippat.

Nr. 1)

Inatsimmi aalajangersakkanik allanneqartunik unioqqutitsinerni akiliisitsisoqarsinnaavoq.

Nr. 2)

Inuit inatsisitigullu pisinnaatitaasut pisussaatitaasullu inatsimmi peqqussutinik nalunaarutinillu allaqqasunik malinninngitsut akiliisinneqarsinnaapput.

Nr. 3)

Inatsit malillugit akuersissutini atulersinneqartuni piumasaqaatinik unioqqutitsinernut akiliisitsisoqarsinnaavoq.

Piumasaqaatit taamaattut akuersissummi aalajangersarneqassapput, taakkuli aallartinnissamut akuersissutinik taaneqartartuni aamma aalajangersarneqarsimasinnaapput. Piumasaqaatinut assersuutitut taaneqarsinnaapput akuersissutit pisanik tunisisussaatitaaneq amerlanertigut aalisarsinnaanermut akuersissummi piumasaqaatitut allaqqakajuttartut.

Nr. 4)

Paasissutissanik eqqortunik nalunaarsuineq piujuartitsinermik tunngaveqartumik inuussutissarsiutigalugu aalisarnerup aalajangersarnissaanut tunngaviuvoq. Taamaammat paasissutissanik eqqunngitsunik salloqittaataasunilluunniit tunniussisoq akiliisinneqarluni pillarneqassaaq. Taamatuttaaq paasissutissanik tunniusseqquneqaraluarluni tunniussinngitsoq akiliisinneqarluni pillarneqassaaq.

Imm. 2-mut.

Aalajangersagaq taanna malillugu malittarisassanik nalunaarutikkut atulersinneqartunik unioqqutitsinerit aamma akiliisitsinernik kinguneqarsinnaanerink aalajangersaanissamut

Naalakkersuisunut piginnaatitsivoq. Taamaalilluni nalunaarutinik kommunimilu ileqqoreqqusanik atortussangortinneqarsimasunik unioqqutitsisoqartillugu akiliisitsinermik pineqaatissiinissamut inatsit tunngavissiivoq.

Imm. 3-mut

Kalaallit Nunaannut pinerluttulerinermi inatsimmi kapitali 5, § 18-imi erserpoq aalajangersakkani pinerluttulerinermi inatsisitigut akisussaanermi ingerlatseqatigiiffiit il.il. akisussaaasunerannut tunngasumi allanik aalajangersaasoqarsimannngippat, kinaluunniit inatsisitigut akisussaasoq, matumani aktiaateqarluni ingerlatseqatigiiffiit, piginneqataassuteqarluni ingerlatseqatigiiffiit, piginneqatigiiffiit, soqutigisaqaqatigiiffiit, peqatigiiffiit, aningaasaateqarfiiit, pigisat, kommunit, namminersorlutik oqartussani oqartussaaasut kiisalu naalagaaffimmi oqartussat pineqartut.

Imm. 4-mut

Imm. 4-imi aalajangersakkami pineqarput angallammik piginnittup imaluunniit oqartussaasup inuttut akisussaanera. Nalinginnaasumik tamanna amerlanertigut tassaassaaq piginnittoq. Taamaattorli inuup angallammik attartortup, taamaasillunilu angallammik atuisinnaasup, akisussaaasunngorsinnaanera aalajangersakkap kingunerissavaa.

§ 69-imut

Imm. 1-imut.

Aalajangersakkami pineqarpoq akiliisitsinissamik arsaarinninnissamillu allaffissornikkut aalajangiineq, tassunga ilanngullugu nalilinnik arsaarinninneq. Siunnersuut aqqutigalugu aalajangersakkami taaneqartumi § 68, imm. 1-imi tamanut akiliisitsisarnissap arsaarinnittarnissallu eqqartuussiviit avaqqullugit akuersissutigineqarsinnaanerat equnneqassaaq, taamaasilluni inatsimmi malittarisassanik unioqqutitsinerit imaluunniit tassunga atasumik malittarisassat atortussangortinneqartut tunngavigalugit akiliisitsisarnerit arsaarinninnerillu allaffissornikkut akuerneqarsinnaanerat atorneqarsinnaassamat.

Pineqartup unioqqutitsinermut pisuunini nassuerutigissagaa, piffissaliussap erseqqinnerusumik aalajangerneqartup iluani akiliisitsisummik akiliumalluni nassuerutigissagaa aammalu eqqartuussiviit avaqqullugit arsaarinninnissaq akuerissagaa piumasarineqarpoq. Akiligassiinermik arsaarinninnermilluunnit allaffissornikkut aalajangiinermut atatillugu qinnuteqartoqarneratigut akiliinissamut piffissarititap sivitsorneqarnissaanik periarfissaq aalajangersakkami atuutilersinneqarpoq.

Akiligassiisoqarnissaani suleriaaseq aaqqissuinerlu erseqqissoq nakkutilliinermi oqartussanut, aalisarnermik nakkutilliisunut angallatinullu nakkutilliisunut ilitsersuutini aalajangersarneqassaaq.

Akiligassiisarneq EU-mi pisinnaatitsineq pillugu inatsimmi pisinnaatitsineq atorlugu logbogit kingusinaartumik nassiunneqarnerat pillugu suliani ullumikkut atorneqartarpooq.

Taamatuttaaq arsaarinninnissamik periarfissaq siunnersuutip kinguneraa, tassunga ilanngullugu nalilinnik arsaarinninnissamik allaffissornikkut aalajangiineq.

Unioqqutitsilluni sakkoq pineqartup pisuunerminik atsiornissaata kiisalu eqqartuussivik avaqqullugu arsaarinninnermik suliamik aalajangiinissamik isumaqataanerminik nalunaaruteqarnissaata tungaanut nakkutilliinermi oqartussanit tigummineqassaaq. Piumasaqaatini taakkunani marlunni ataaseq eqqortinneqanngippat eqqartuussivik avaqqullugu arsaarinnittooqarsinnaanngilaq.

Taamatuttaaq nalilinnik eqqartuussivik avaqqullugu arsaarinnittooqarsinnaavoq.

Eqqartuussivik avaqqullugu arsaarinninnerit eqqartuussivillu avaqqullugu akileeqqusinerit pisariinnerupput, amerlanertigullu unnerluussisussaatitaasut eqqartuussiviillu aqqutigalugit aalajangiinerniit oqinnerusumik aalajangeeriaatsitut isigineqarsinnaalluni, taamaammallu - aamma eqqartuussiviit oqilisaaffiginissaat eqqarsaatigalugu - innuttaasup suliani oqinnerusuni suliap allaffissornikkut aalajangiiffiginissaanik toqqaasinnaanissaa tulluartutut isigineqarpoq.

§ 70-imut

Imm. 1-imut.

Aalajangersakkami aalajangersarneqarpoq, suliani § 72 naapertorlugu allaffissornikkut suliarineqartuni, Kalaallit Nunaanni eqqartuussisarnermi inatsimmi § 347, imm. 1-imi malittarisassat taamaaqataanik atorneqassapput. § 347, imm. 1-imi takuneqarsinnaavoq unnerluutigineqartup killisorneqarneq sioqqullugu unnerluutigisamik ilisimatinneqassasoq aamma pineqartoq oqaaseqarnissamut pisussaaffeqanngitsoq. Malittarisassat taakkua isiginiarneqartarmata nalunaarusiami takuneqarsinnaassaaq.

Imm. 2-mut.

Aalajangersagaq "pisariaqartinneqarmat" ilanngunneqarpoq. Tassani eqqartuussiviit avaqqullugit akiliisitsinerit allatut pineqaatissiinertut inatsisitigut malersorneqarsinnaanermut tunngatillugu assinganik isigineqarnissaat aalajangerneqarpoq. Ingerlatalik taamaasilluni malersoqqinneqarsinnaassanngilaq, tassalu pineqaatissiineq ingerlanneqareersimappat, matumanii akiliisitsinerup akilerneqarnera aqqutigalugu.

§ 71-imut

Imm. 1-imut.

Arsaarinninnermi Kalaallit Nunaanni pinerluttulerinermi inatsit atorneqassaaq.

Imm. 2-mut.

Aalajangersakkami imm. 2-imí aalajangersarneqarpoq angallammi unioqqutitsilluni aalisartumi pisanik arsaarinninnermi ilaasut pisat taakkualu nalingini angallammiittut angallatillu avataaniittut ilaasut, tassani pineqaratik pisat unioqqutitsinani aalisarnermeersutut uppernarsarneqartut.

Aalajangersagaq taanna pinerluttulerinermi inatsimmi tunngavinnik saneqqussineruvoq. Saneqqutsineq pisat ilaat unioqqutitsilluni aalisarnermeersut immikkoortinnissaata ajornakusoornera tunngavigalugu isigineqassaaq.

Pisat sorliit unioqqutitsilluni aalisarnermeernersut paasiniarlugit nalilersuinermi angallammut tunngatillugu pissutsit aalajangersimasut atuuttut pingaartinneqassapput. Logbogimik, usilersonermut allattuivimmik, angallammi aalisarnermi atortunik, atortut suut atorneqarsimanerannik logbogi malillugu allassimasunik il.il. nalilersuisoqarsinnaavoq. Aammattaaq pisat nalunaarutigineqartunut naapertuunnersut nalilersuinermi pingaartinneqarsinnaapput.

Taamaammat pisat sorliit unioqqutitsilluni aalisarneqarsimanersut nalilerniarnerani matumani suut uppernarsaatissaqarnersut apeqqutaassapput.

Unioqqutitsilluni aalisarnermi pisanik nalinginnaasumik arsaarinninnermik kinguneqarsinnaasumi assersuutaasinnaavoq angallat sumiiffimmi matoqqatitaasumi aalisarsimasoq imaluunniit angallat pineqartoq aalisarsinnaanermut akuersissummik pigisaqanntoq. Aalisarnerup unitsinnissaata atuutilernerata kingorna aalisarneq imaluunniit angallatip pisassiissumminik atuisimanerata kingorna aalisarneq assersuutaasinnaapput. Tamanna aamma pisinnaavoq, angallat aalisarnermi atortut akuerisaanngitsut atorlugit aalisarpat, tassunga ilanngullugit nigartat mikivallaartut il.il.

Imm. 3-mut

Aalajangersagaq taanna malillugu angallatip pisaanik annertuumik uteqattaartumillu nalunaaruteqannginnerani angallammik angallatilluunniit nalinganik arsaarinnittoqarsinnaavoq.

Pisut annertunerit imatut paasineqassapput, pisut pillugit piaaraluni annertuumilluunniit mianersuaalliorluni nalunaaruteqannginnejuk kukkusunilluunniit nalunaaruteqarpat. Matumani pisunut assersuutaasinnaasutut ilaapput angallat pisassiissutini sinnerlugit aalisarsimasoq, sumiiffimmi matoqqatitaasumi aalisarsimasoq atortullu, nigartat mikivallaartut inerteqqutaasut atorlugit aalisarsimasoq imaluunniit aalisagaqtigiiinnik inerteqqutaasunik assigisaannilluunniit aalisarsimasoq.

Imm. 4-mut

Aalajangersakkami arsaarinnittarneq pillugu nalunaarutikkut sukumiinerusunik malittarisassiornissamut Naalakkersuisut pisinnaatinneqarput. Malittarisassanik taakkuninnga suliaqarnermi imm. 2 aamma 3-mi uuttuutit atorneqartut assigalugit malinnittoqassaaq. Tassa malittarisassat taakku suliarineranni tamanna pillugu Pinerluttulernerinermik inatsimmi § 166 isiginiarneqassaaq, tamanna malillugu atortut pinerluuteqartup unioqqutitsinani ingerlatsineranut annertuumik pingaaruteqartut pissutsit immikkut ittut tamassumunnga pissutissaqartitsinngippata, arsaarinnissutigineqassangitsut. Taamaakkaluartoq minitaanerit §-imi imm. 2 aamma 3-mi erseqqissaatigineqartut imm. 4 naapertorlugu malittarisassanik aalajangersaanermi atorneqarsinnaassapput.

Imm. 5-imut

Arsaarinninnermut atatillugu pisap ajornanngippat atorneqarnissaa sapinngisamik qulakkeerneqassaaq. Taamaaliortoqarsinnaavoq pisap nalinganik arsaarinninnikkut imaluunniit pisap oqartussaasunit tiguneqarnerisigut taamaalillunilu taassuma tunineratigut iluanaarutit nunatta karsianut tuttussanngortillugit.

Periuseq ajornannginnerpaaq tassaassaaq pisap nunami tunitsiviliaannissaa tassani suliarineqarumaarmat. Tunineqarnerani nalinga Nunatta Karsianut tussaaq, tunineqarnerani nalingata ilaa pisap arsaarinnissutaasup assartorneranut akiliutitut ingerlatisumut tunniunneqassanersoq pillugu nalilersuisoqaqqissaartariaqarmat.

§ 72-imut

Imm. 1-imut.

Aalajangersakkami tassani pisanik arsaarinninnermut atatillugu immikkoortitsineq. Imm. 1 malillugu pisanik immikkoortitsineq assersuutigalugu pisat angallammi illuartiterneresigut pisinnaavoq.

Immikkoortitsineq aamma pisinnaavoq pisanik nalunaaqutsiinikkut imaluunniit lastip inilluunniit paarnaarneqarnerannik nalunaaqutsiinikkut. Tamanna piumasarineqartutut isigineqarpat periarfissat taakku marluutillugit ataatsikkut atorneqarsinnaapput.

Immikkoortitsinermi nalunaaqutsersuinermiluunniit akulerutsitsinissaq pinngitsoorneqarsinnaanngippat, angallat oqaaseqatigiit aappaat malillugu pisanik arsaarinnissutinik imaluunniit nalinginik arsaarinnissutigineqartunik tulaassinissaanik peqquneqarsinnaavoq.

Imm. 2-mut.

Aalajangersagaq taanna malillugu pisat arsaarinnissutaasut angallat Kalaallit Nunaata aalisarnikkut oqartussaaffianiitillugu immikkoortinneqassapput.

Aalajangersagaq pisat arsaarinnissutaasut angallammiiginnarneranni atorneqassaaq.

§ 73-imut

Imm. 1-imut

Aalajangersakkami nakkutilliinermi oqartussat angallammik unioqqutitsilluni tigummigallagassamik eqqartuussivimmilu suliassanngortitsinissaq siunertaralugu angallatip umiarsualivimmut tulakkiartoqquneqarnissaanik pisinnaatinneqarput. Taamatut tigummigallagaqarnermi sulinermut atatillugu Kalaallit Nunaanni eqqartuussisarneq pillugu inatsimmi kapitali 37-mi aalajangersakkat atuutissapput.

Malugineqarpoq tigummigallagaaneq imarsiornermi inatsisitigut taaguutaasoq, inuup tigummigallarneqarneranut paarlaanneqassanngitsoq (paarnaarussatut paarisaaneq).

Tigummigallagaaneq kalaallit aalisarnermut oqartussaaffigisaata avataani iluanilu pisinnaavoq.

Imm. 2-mut.

Aalajangersakkami angallatinik eqqartuussisarneq pillugu (hot pursuit (pisoqarsimatillugu marlersuineq)) FN-imi imarpit pilligit isumaqatigiissummi 1982-imeersumi artikili 111 malinneqarpoq. November 2003-imi Inatsisartut aalajangerneqarpoq FN-ip imarmi pisinnaatitaaffit pilligit isumaqatigiissutaa atortussanngortinneqassasoq, tak. 5. decembari 2003-mi inatsisartut aalajangiussaat.

“hot pursuit”-imik aallartitsinissami pingaaruteqartoq tassaavoq, unioqqutitsinerup Kalaallit Nunaata aalisarnikkut oqartussaaffiani pisimanissaa angallatillu malersorneqartup suli Kalaallit Nunaata aalisarnikkut oqartussaaffianiinnissaa. Tassani malersuineq unitsinneqarani ingerlanneqassaaq.

§ 74-imut

Imm. 1-imut.

Aalajangersagaq manna malillugu imm. 1-imi aningaasat piumaneqarlutik taaneqartut akilersinniarnissaasa qulakkeernissaat imaluunniit tamakku akilernissaannut quaternaveeqquisoqarnissaa tikillugu angallammik unitsitsineq pisinnaavoq. Taamatut angallammik unitsitsineq § 71 malillugu pineqaatissiinerit ingerlannissaat tikillugu ingerlaannarsinnaavoq. Aalajangersakkamut ilaapput kalaallit aamma nunat allamiut angallataat.

Aalajangersagaq malillugu imm. 1-imik piumasaqaatit suliami aalajangiinerup kingorna qaammatit marluk iluanni naammassineqarsimannngippata angallammi taassumalu atortuini naammassiniaasoqarsinnaavoq.

Imm. 2-mut.

Aalajangersagaq taanna malillugu imm. 1-imik malittarisassaq atorneqarsinnaanngilaq, matumani angallammut oqartussaasoq akuerisaanani angallammik piginnittuulersimappat. Matumani eqqarsaataasoq tassaavoq arsaarinninneq piginnittumut annertuumik akulerunnerussanngimmat, matumani inuk alla akuerineqarani angallammik piginnittuulersimappat.

Imm. 3-mut

Akuliuffigineqartup piumasarippagu politiit erngerlutik kingusinnerpaamillu nal. akunnerit 72-t ingerlaneranni suliassamik eqqartuussivimmut saqqummiussissapput, eqqartuussiviuullu aalajangerumaarpaa akuliunneq akuerineqarsinnaanersoq. Aalajangersagaq taanna malillugu tigummigallagaqarnermut naammagittaalliortoqarpat eqqartuussisoqarnermi sulineq pillugu Kalaallit Nunaannut inatsimmi kapitali 37 atorneqassaaq. Naligitinneqartoq suliami matumani pineqartoq eqqarsaatigalugu tamakku siullertut Kalaallit Nunaanni Eqqartuussivimmut suliassanngortinnejassapput.

Eqqarsaataavoq aalajangersagaq inatsimmik unioqqutitsinermut atatillugu akileeqqusineq akuerineqanngippat atorneqassasoq.

§ 75-imut

Imm. 1-imut.

Aalisarnermut tunngatillugu suliat nalinginnaasumik ajornakusoortutut isigisariaqarput, Kalaallit Nunaanni Eqqartuussivittulli inatsisitigut paasisimasaqarnissaq annertuumik piumasaqaataassalluni.

Imm. 2-mut.

Pillaammik akiliutit aalajangersagaq taanna malillugu Nunatta Karsianut akilerneqartassapput. Aalajangersagaq pinerluttulerinermik inatsimmi § 127, imm. 4-mik tunngaveqarpoq.

Kapitali 16

Atortuulersitsineq ikaarsaariarnermilu aalajangersakkat

Inatsit aalajangersakkanik arlalinnik imaqarpoq, tamakkulu peqqusinernik inerteqqutinilluunniit imaqarput, taakkunanilu ingerlatallit tamakkununnga naleqqussassasut piumasarineqarpoq. Assersuutigalugu tamanna aalisarnermi APPN-imi malittarisassaqartitsinermut ilaasunut qummut killissanut tunngatillugu atuutsinneqarpoq,

soorluttaarlu tamanna umiatsiaaqqanut nalunaarsuisarnissamut piumasaqaammut ulloq manna tikillugu ilaasimannngitsunut atuuttoq.

Ingerlatallit aalajangersakkat nutaat malillugit malinninnissaminnt isersinnaanissaat periarfissaqarnissaallu qulakkeerniarlugit inatsimmi ikaarsaariarnissamut aaqqissuussineq ilanngunneqarpoq.

§ 76-imut

Imm. 1-imut.

Inatsit 1. januar 2025-imi atulissaaq. Peqatigitillugu nalunaarutit arlallit atuutilissapput, tamakkuninngalu atuutilersitsinissamut inatsisip piginnaatitsineratigut Naalakkersuisut piginnaatinneqarput.

Imm. 2-mut.

Inatsit massakkut atuuttoq 1996-imeersuuvoq, tamatumali kingorna inatsimmi arlalinnik allanngortitsisoqartarsimavoq. Inatsit 1996-imeersoq allannguutilu tamarmik inatsisip nutaap atuutilerteratigut atorunnaassapput.

Imm. 3-mut

Malittarisassat kiisalu Naalakkersuisut aalajangiineri inatsisartut inatsisaat nr. 18, 31. oktober 1996-imeersoq naapertorlugu atortussanngortinnejartut malittarisassanik allanik taarserneqarnissaat atorunnaarsinnejarnissaalluunniit tikillugu atuutiinnassapput.

Inatsisartut inatsisaat nr. 18, 31. oktober 1996-imeersoq naapertorlugu malittarisassat suli atuuttut tamakku inatsit taanna inatsisilluunniit allat tunngavigalugit malittarisassatigut aalajangersaaffigineqartut malillugit taarserneqarnissaat atorunnaarsinnejarnissaalluunniit tikillugu atuutiinnassapput.

§ 77-imut

Imm. 1-imut.

Kalaallit Nunaata eqqaani aalisarnermi tamakkiisumik piginnittuusup kalaaliunissaa pillugu piumasaqaat aalajangersagaq taanna malillugu inatsisip atuutilerteraniit kingusinnerpaamik ukiut tallimat qaangiunnerini naammassineqarsimassaqq.

Imm. 2-mut.

§ 32 naapertorlugu aalisagaqtigiainnut PNNP-imi malittarisassiornermut ilaasunut tunngatillugu pisassiissutit qummut killiliiffigineqarput. Raajarniarnermi pisassiissutinik qummut killiliiffigineqareersumi massakkut avataasiorluni ingerlatalinnt killeqartitsisoqassaaq. Tassungalu ilaavoq pisassiissutinit pigisanik ingerlatallip pigisaanik naatsorsuinermi pisassiissutinit pigisat pineqartup umiarsuaatleqatigiiffinni assigiinngitsuni

piginneqataassutit aqqutigalugit pigisaasa ilaasarnissaat. § 32-mut nassuaatigineqartut tamakkerlugit takukkit.

Ingerlatalik aalajangersakkat nutaat kingunerisaannik pisassiisutit tamarmiusut ilaannik taakkuninnga ikinnerusunik pissarsismappat tamanna piffissaq sivisuup ingerlanerani aningaasaqarnikkut isertitaqarnissakkullu ajornerusumik kinguneqariaannaavoq.

Ilumut allannguineq arsaarinninnerup tungaatigut arlaatigut kinguneqassanersoq pisussat arlallit apeqquaasussaassapput, soorlu akulerunneq suliatigut immikkut tunngavilersugaanersoq aammalu ingerlatallip inuussutissarsiumminik ingerlatsiniarluni ingerlatalimmut piumasaqaatit ingerlanneqartut piffissarlu ingerlatallip pisut nutaat malillugit sulilernissaanut allannguinerit eqqarsaatigalugit.

Naalakkersuisut isumaqarput pisuussutit pinngortitameersut ima isikkoqartut tamakku naassaanngitsumik namminersortunut tunniunneqarsinnaanngitsut. Pisinnaatitaaffiup ataatsimut pisuussutinut innuttaasumut nalunaarutigineqartup atorunnaarsinnissaa qaqumulluunniit periarfissaassaaq. Naalakkersuisut isumaqarput ataatsimut pisuussutinut piginnittuunerup allatut agguaanneqarsinnaanera suliatigut illorsorneqarsinnaasoq, tassungalu atatillugu ilumut siunissamut aqutsinissamik pilersaarummut ilaalernissamut sunniateqassanersoq.

Naalakkersuisuttaaq isumarpot innuttaasoq pisuussummut piginnittuunissamut pisinnaatitaaffimmik tigusaqarsimasoq, pisuussummillu taamaattumik atuinissaminut piareersarsimasoq - immaqalu pisinnaatitaaffimmut tassunga akiliuteqarsimasoq - piumasaqarsinnaassasoq, tassalu naatsorsuutigisassanut pineqartup pisuussummut isersinnaanerminut pigisaanut isiginninniartoqassasoq.

Naalakkersuisut piumasaqaammut tassunga naammassinnippata, tassalu allannguinerit piffikkaartumik pisimappata aamma/imaluunniit naleqquttumik kalerriuteqarneq aqqutigalugu pisimappata, piumasaqaatini allannguinerit pisinnaassapput, aamma pisassiissutinit pigisat annertussusaannut tunngatillugu.

Tassunga atatillugu maligeqquneqarpoq avataasierluni aalisarnermi APPN-ip 1991-imi equnneranut atatillugu pingaartinneqalereersimammat pisinnaatitaaffiit ingerlatalimmut pineqartumut nuunneqartut qaqugumulluunniit tunniunneqarsinnaassasut, kisiannili naleqquttumik kalerriiikkut utertinneqarsinnaassasut, taamanilu tamanna ukiunik tallimanik sivisussuseqartussatut isigineqarsimavoq.

Aalajangersagaq aamma inatsimmi “qanigisat” ilaatilernerinut atatillugu atorneqassaaq. Ilaqtariit killilersuinermut aaqqissuutissapput, tamannalu aalajangersakkami piffissap taaneqartup iluani pissalluni.

Imm. 3-mut

§ 10, imm. 3-imi alassimasoq inuussutissarsiutigalugu aalisarnermi atorneqartut umiatsiaaqqat 6 meterinik tassanngaluunniit takinerusut nakkutilliisut nammineq nalunaarsuiffianni nalunaarsugaalerneq inatsisip atuutilerneraniit kingusinnerpaamik ukiup ataatsip qaangiutinnginnerani naammassineqarsimassaaq.